

~~1079~~

3075

BIBL. NAZ.
Vitt. Emanuele III


Race.
De Marinis

A

1252

NAPOLI

~~178~~
Rau de Moring H 1252







DE OPTIMIS STUDIIS
ORATIONES X.

JACOBI FACCIOLATI

*S. Theol. Doctoris, et in Seminario
Patauino Stud. Praefecti.*

A C C E D U N T

LAUDATIO FUNEBRIS,
COMMENTARIOLUM DE LINGUA LATINA,
ET EXERCITATIONES ALIAE,

*de quibus vide Indicem
pag. ult.*




PATAVII, Typis Seminarii, MDCCXXIII.

Apud Joannem Manfrè.

SUPERIORUM PERMISSU ac PRIVILEGIO.





HIERONYMO CANALI

PATRICIO VENETO
D. MARCI PROCURATORI

Jacobus Facciolatus

S. P. D.



Uandoquidem cul-
tus atque observan-
tia erga te mea ,
SENATOR AM-
PLISSIME , ad
eam crevit magnitudinem , ut
nihil possit esse supra ; jam illud
est reliquum , ut ejus diuturnita-
ti consulam , & quantum fieri per
* 3 me

me potest , ad immortalitatem
producam . Ac si mihi aditus per
has potissimum lucubrationes ad
tuam benevolentiam est patefa-
ctus , quem quidem maximum
earum fructum semper existima-
vi ; in his ipsis tanti beneficii
memoria consignanda est ; ut o-
mnes intelligant , nec litteris de-
esse patronos , nec suis patronis
litteras deesse . Utinam vero ad-
huc ille viveret meorum studio-
rum auctor atque auspex , Geor-
gius Card. Cornelius , qui , qua
erat in te voluntate , meum hoc
grati animi officium valde pro-
baret ; & siquid assequi conjectu-
ra possum , jussu etiam & aucto-
ritate promoveret . At ego vel
hoc ipsum memoriae ejus perpe-
tuo tribuam , ut quos ille , mira-
bili

bili acumine & sapientia Vir,
suo judicio ornare solebat, omni
studio colam; tantumque conni-
tar, quantum viventi atque im-
peranti ad meam fidem indu-
striamque ostendendam satis ef-
fet. Vides, quæ me in primis
rationes impulerint, ut libellum
hunc tuo nomini inscriberem.
Accedit, quod ea sunt in te o-
mnia, quæ ceteri Scriptores se-
qui solent, quoties unum ali-
quem deligunt egregium virum,
ad quem sua opera instituunt.
Si enim Familiæ decus & nobi-
litem spectro, tua est inter pau-
cas illas, quarum antiquitas in
patriæ primordiis latet, quarum
splendor ac dignitas ad summum
fastigium pervenit, quarum opes
& auctoritas nullo sæculo inter-
cidit.

cidit. Sin autem in te ipsum oculos conjicio, si animi magnitudinem, si ingenium, si rectum atque elegans in re omni judicium perpendo, quis potest esse unus, cui magis me laboresque meos commendatos velim? Verum etsi omnia tibi deessent, quæ a natura & fortuna proficiuntur, quorum certe nihil deest; tuus tamen iste Latinarum litterarum amor perpetua optimorum scriptorum lectione in dies magis auctus me valde cepisset, & quadam veluti contentionis similitudine ad hanc observantiæ significationem adduxisset. Ut enim sua quisque amat, plurimique facit, ita libenter ad eos accedit, in quibus videt esse similia. Non hoc ad gratiam dico.

co. Cave enim tibi persuadeas ,
tantum me in cujusquam digni-
tate atque amplitudine collocare ,
ut si minus aptus mearum litte-
ricularum judex videatur , eas ta-
men ad illum afferre velim , ei-
que dicatas emittere . Quod , ut
opinor , & ipse nosti moris mei
totiusque pæne vitæ conscius , &
iccirco commemoro atque confir-
mo , nequis forte dubitet , num
tibi tuoque ingenio plus aliquid
tribuam , quam quantum revera
tribuendum est . Sed ego sane et-
si mea omnia a te legi malo ,
quam ab aliis ; tamen hoc ipsum
cum reputo , quam acute videas ,
nemo est unus , ne ex iis quidem ,
qui ex instituto Latinam eloquen-
tiam profitentur , cujus judicium
magis verear . Quod non ita ac-
cipi

cipi velim , quasi vero monitiones effugiam : nam tuas quidem etiam cupio , quas certo scio neque sapientia carere posse , neque benevolentia. Vale .

IDIB. JAN. MDCCXXIII.
EX SEMINARIO PATAVINO.



LECTOREM



*I dixero, multos mihi
sapientes viros au-
ctores fuisse, ut has
Orationes uno volu-
mine comprehensas e-
mitterem, veterem
cantilenam recinere*

*videbor, qua non gravium modo re-
rum, sed etiam levissimarum scripto-
res uti solent. Huic igitur causa par-
cendum est, quod eam nimis multi oc-
cuparint, & in fidei suspicionem ad-
duxerint. Sequitur altera, & quidem
potior, in eo posita, quod cum ego sin-
gulas ad nostrarum exercitationum ce-
lebritatem superioribus annis foras de-
dissem, paucis diebus perituras, ut fe-
re fit, nunc denique majorem quam-
dam fame curam suscipere debeo, ta-
lemque adornare editionem, cujus au-
ctoritatem nullo tempore nullaue ex-
cusatione defugiam. Ego sane illis plu-*

rimum

AD LECTOREM.

*rimum debeo, qui lucubrationes tam infirmas & inanes suo judicio orna-
 runt; iterumque ac sæpius editas, in
 majore quodam litterarum lumine col-
 locarunt, quam mihi quidem ferre pos-
 se viderentur: sed si integrum est,
 vehementer illos oro atque obsecro, ut
 nostra hæc nunc primum pro nostris ha-
 bere incipiant, cum jam in publici ju-
 dicii discrimen rite prodimus, tota vi-
 ta præstaturi quidquid, fata omnia li-
 brorum animo volventes, ratione &
 consilio vulgamus. Veniam hanc iis
 præsertim opusculis concedi velim, quæ
 alii alibi typis mandarunt, sed a no-
 bis tamen nisi manu descripta numquam
 exierunt. Neque enim alia mihi caus-
 sa fuit, cur Philippi a Turre Vitam,
 quæque illam consequuntur epistolæ, hoc
 volumine complecterer, nisi ut exta-
 ret exemplum, quod ipse quoque agno-
 scere ac præstare possem. Hactenus mi-
 hi consului. Quæ deinceps sequuntur,
 & partem veluti alteram constituunt,
 ad rationes pertinent scholarum nostra-
 rum. Ac Seminarii hujus exercitationes*

et.cum.

AD LECTOREM.

earumque ordinem qui ignorat, fortasse nos leuitatis damnabit, quod minuta hæc nimio quodam gloriola studio persecuti simus. Verumtamen si cogitabit, me cum possem aliis orationibus, quas in hac publica Civitatis luce recitari, volumen augere, tamen istiusmodi lucubratiunculis maluisse locum dare, nihil gloriose, aut temere factum iudicabit. Jam vero &) inter gravissimas Demosthenis orationes talia quedam leguntur; &) Cicero ipse proæmiorum volumen habuit, ut ad Atticum scribit lib. 16. epist. 6. Verum unusquisque, ut videbitur, accipiat. Numquam ego moreri me hominum opinionibus passus sum, quominus ea facerem omnia, quæ mei muneris esse existimaui: porro autem certo scio, non defuturos, qui Latine linguae ingenium intelligentes, ejusque difficultates scribendo experti, æquo animo ferant, me hujus quoque generis, quod medium est, magisque varium &) elegans, quam grave &) exaggeratum, nostris adolescentibus exempla posuisse.

Nunc univèrse dicendum aliquid de
 filo

AD LECTOREM.

*stilo esset. Sed ego ita semper existima-
vi, ut sua cuique sunt lineamenta oris,
suaque membrorum conformatio miro
prorsus natura artificio ab aliis distin-
cta, & in magna similitudine dissimi-
lis; ita uniuscujusque certam esse quam-
dam orationis formam & quasi faciem,
in ipsa natura sitam, de qua nihil ma-
gnopere queri debeat. Illud curavi di-
ligenter, ut siquis in dicendo essem,
quantuscunque essem, pro virium mea-
rum tenuitate Latinus orator viderer:
sed plura in tam difficili negotio polliceri
non ausim. Verborum structuram &
compositionem ad optima atatis consuetu-
dinem figurare & exprimere volui; at
verba ipsa, ubi opus fuit, ex media
quoque, atque adeo ex infima Latini-
tate sumsi, modo ne peregrina misce-
rem. Etsi autem aliquando necessitate
compulsus ad Græca sum; hæc tamen
neque inculcavi sine modo, quod monet
Cicero in libro Officiorum primo; &
Latinis litteris Latinaque positione ple-
rumque molli-vi, ut pluribus morem
gererem. Si doctis tantummodo & in-
telli-*

AD LECTOREM.

telligentibus scribendum fuisset, multo mihi magis indulgissem. Sed quorsum tam multa verba? Non ego is sum, qui hominum judicia impedire possim, aut velim. Totum hoc, quidquid est, in medio pono; amicis, inimicis, civibus, exteris in illud jus esto; qui volet carpito; invitus ne legito; officii gratia ne laudato. Nihil enim mihi magis miserum videri solet, quam eorum contentio, qui cum suos libellos vulgarint, concursant, sollicitant, rogant, minantur; gratia, auctoritate, pecunia, artibus omnibus laudatores querunt. Impotens hæc fama libido reip. litteraria libertatem, summum ejus bonum ac pane unicum, subruere conatur: verum bene habet, quod neque omnibus fucum facit, neque diu. Ego mihi beatus videbor, si æquum monitorem inveniam: et) utcumque res cadat, neminem in judicium vocabo.

NOI REFORMATORI

Dello Studio di Padoa .

HAvendo veduto per la Fede di revisione, ed approvazione del P. F. *Ambrosio Lasotti Inquisitore*, nel Libro Intitolato, *De optimis studiis Orationes decem Jacobi Facciolati &c.* non v'esser cos' alcuna contro la Santa Fede Cattolica, e parimente per Attestato del Segretario nostro, niente contro Principi, e buoni costumi, concediamo licenza a *Giovanni Manfrè Stampatore*, che possa essere stampato, osservando gli ordini in materia di Stampe, e presentando le solite Copie alle Pubbliche Librerie di Venezia, e di Padoa.

Dat. 5. Agosto 1722.

(Francesco Soranzo Proc. Ref.
(Z. P.^o Pasqualigo Ref.

Registrato .

Agostino Gadaldini Segretario .



ORATIONES X.

Habitæ atque editæ ad
SEMINARII PATAVINI
Studia instauranda.



AD GRAMMATICAM

Oratio I.

*Latina lingua non est ex Grammatico-
rum libris comparanda.*



Uoties ex hoc ornatissimo
loco publice dico, ita de-
lector præsentia vestra,
& celebritate hac littera-
torum hominum tanta,
ut satis amplum mihi vi-
dear, non unius modo
orationis, sed ingentium laborum fructum
collegisse. Unum enim dicere, tacentibus
A omni-

omnibus, cum est ubique gloriosum, tum vero ibi maxime, ubi qui audiunt & frequentissimi sint, & rebus omnibus ad subtiliter graviterque judicandum instructissimi. Non tam hercule olim illustre fuit, florente republica, Romæ dicere, sive in foro, sive in curia, ubi nullo delectu habito, promiscue omnes subsellia occupabant; quam est hoc tempore, hoc in loco, unde lectissimum quemque ex omni literatissimæ Civitatis ordine circumspectio, Theologos, Philosophos, Medicos, Mathematicos, Jurisperitos, atque horum sane plurimos, qui eloquentiæ laudem cum sua quisque arte conjungunt. Videte, quæso, Auditores, in vestro beneficio quantopere mihi placeam. Ego equidem litterarum splendorem ac dignitatem cum Magistratuum imperio & majestate minime comparo: sed tamen cum veteres Romanorum supplicationes, ovationes, triumphos in mentem revoco, plane non tanti facio, ut amplissimæ huic mihiq; jucundissimæ dicendi exercitationi præponam. Nullus enim hic plebi locus est, nullus femellis, insanæ clientium turbæ ad plausus & acclamationes plane nullus: sed & viri totius Civitatis principes ad dignitatem, & Patres omnium ordinum gravissimi ad honestatem, & Doctores Collegiorum omnium sapientissimi ad judicium, & ingenui adolescentes ad gratiam & celebritatem convenerunt: quorum lætæ frontes, & secunda admurmuratio

ratio dicentem potest mirum in modum, erigere, ac beatum prorsus efficere. Verum felicitas hæc humanarum omnium, ut mihi quidem videtur, longe maxima, quam est infinitis, prope difficultatibus ac periculis circumsepta! Cujus est, bone Deus, tanta ingenii vis ac fecunditas ad res præclarissimas inveniendas, distribuendas, ornandas, ut ne leviter quidem ulla in parte deficiat, nusquam incurrat, displiceat nemini? Sunt enim eodem tempore præstanda multa, diversa, ac prope contraria; nec solum laborandum quomodo dicas, sed in primis qua de re dicas: ut si semel in re proponenda alicujus animum offendas, cum deinceps habeas in tota oratione aversum. Est qui nihil velit audire, nisi vetustum; quosdam gratia tantum novitatis conciliat; alii Græcas Latinasque eruditiones postulant; amplificatione alii delectantur: eoque sunt singuli acumine ingenii, quibus ut imponas, nulla arte consequaris. Hæc me reputantem, ac sæpe antea expectum jussere denique libertatem illam abdicare, quæ solet ceteroquin ex hoc suggesto dicentibus concedi omnibus; ut de re qualibet suus quisque arbitratus verba faciant. Quare quem mihi ordinem ipsa studiorum ratio ac natura præscribit, eum in posterum religiose servabo, ut hoc quidem tempore de Grammatica, tum de Humanitate, post de Rhetorica, deinde de Philosophia, postremo de reliquis disciplinis, ut

quæque solet addisci, orationem habeam, & quod de singulis sentio, id quotannis exponam. Ita mihi boni Superi tantum vitæ concedant ac virium, ut curriculum hoc primum conficiam, deinde non improspere; libenter tum demum cessurus aliis provinciam, cum laboribus & ætate confectus vel fato fungar, vel in otio honesto conquiescam. Interim de Grammaticis studiis, quibus solet ætas prima occupari, non raro etiam altera, aliquando & postrema, quid mihi videatur, habete; & qua soletis benignitate, diligenter attendite.

Etsi omnes artes ac disciplinas in dies amplificari tam est rei literariæ gloriosum, atque utile, quam Reip. augeri opibus & imperio; tamen quod Reip. accidit, ut nimia crescendi libidine non raro decreseat, idem solet in hoc litterarum quasi regno evenire. Nihil ego de Platonice Philosophiæ, nihil de Peripateticæ fatis, variaque fortuna disputo, quarum utraque tum demum vel corrui, vel certe plurimum detrimenti cepit, cum impotenti sectatorum studio altissime evecta in præcipiti stetit, ac mole sua laboravit. Unum illud Latinitatis tradendæ artificium urgeo, quod Grammaticen communiter appellant: opus suapte naturâ exiguum ac tenue, sed immodica hominum industria adeo amplificatum, ut volenti omnia percurrere nihil sit nisi Grammaticum tota vita legendum. Conatus hos præstantium viro.

virorum, si eo spectant, ut Latini sermonis diligens quædam historia extet, non solum non reprehendo, sed etiam laudo: sin vero nobis, Latinitatis docendæ causa, obtruduntur, longissime abjicio, nulliusque esse momenti, nullius utilitatis contendo. Prima enim illa Guarini Veronensis rudimenta ut corrigerent, & illustrarent, boni præceptores depravarunt; coque res demum deducta est, ut qui velit Latine scire, hunc sibi a Grammaticorum insidiis cavere maxime oporteat. Quod ut evincam, cum mihi necesse sit de Grammaticorum tricis, antinomiis, ambagibus aliquanto disputare liberius, quæso vos, Auditores, ne me honestissimo generi hominum infensum putetis, qui & natura ipsa ad benevolentiam comparatus, omnem invidiæ suspicionem diligentissime fugio, & pro suscepto vitæ instituto eorum in primis amore delector, qui de litteris benemereri pro virili parte conantur. Sunt enim eorum lucubrationes etsi ad recte loquendum non necessariae, tamen ad cognoscendum non illiberales: neque ego (ita me Dii ament) industriam hanc magna cum eruditione conjunctam contemno, sed parum admodum Latinæ locutioni inservire defendo. Et sane ubi puer singulas nominum, ac verborum declinationes memoriæ mandavit, paucaque illas in universum regulas probe tenet, quibus tanquam cardinibus tota vertitur Latina lingua, quid est, cur

statim non ad Classicum Scriptorem ducatur, quem sine intermissione verset, memoriæ tradat, habeatque veluti unum ex familia, quicum magistri ope & auxilio familiarissime loquatur ac vivat? Cum enim ille potissimam diei partem in scholis traducat, quid in caussa esse dicamus, ut perpetua rerum Latinarum tractatione Latine tamen minime discat, domi vero minore multo exercitatione, minusque accurata a parentibus, a nutricibus, a vernis domesticam linguam assequatur? Ego certe ita mihi persuadeo, tenellos angustosque puerorum animos immensa illa regularum, appendicum, scholiorum farragine terreri, atque opprimi, ut ne respirare quidem possint, nedum se explicare, Latineque interrogando, ac respondendo naviter audere. Quemadmodum enim subitarius miles si in confertissimam hostium aciem statim compellatur, periculi magnitudine, atque insolentia despondet animum, sui que prorsus oblitus ne gladium quidem disstringit; ita litterariæ palæstræ tirunculi ingentes Grammaticorum commentationes aggredi jussi, cogitatione ipsa difficultatis, ac laboris exanimantur, spemque omnem evadendi statim abjiciunt. Hinc scholæ tædium, hinc quæsi sæpe morbi, hinc impatiens vacationum desiderium, hinc denique commenta illa callidissime excogitata ad otium & ignaviam, si fieri potest, impune fovendam. Hæc ego si probem, ad nuces
pro-

profecto redire videar, & pueris similia facere: sed tamen quoties animo colligo exsucca illa, frugisque omnis ac delectationis expertia Grammaticorum præcepta, quibus tot annos impallescere vivida ingenia coguntur, quadam quasi miseratione commoveor, iustoque dolori libentissime parco. Quotus enim quisque vestrum (juvat præterita repetere, & memoriam pueritiæ renovare ultimam) ita fuit ad omnes litterarum labores recte compositus, ut ante cœperit æquo animo frequentare scholas, ac domestico carere otio, quam positis Grammaticis, Latinos Scriptores tractaret, eorumque lectione, & imitatione Latine aliquid conaretur? Ego sane, ut de me dicam, obruebar infinita illa atque implicatissima regularum strue; nec pluribus votis adversa tempestate jactati nautæ portum desiderant, quam ego inde me ut expedirem, & improbi laboris terminum aliquando contingerem, Deorum hominumque opem implorabam. Ut autem ad amœniora paullo transivi, cœpique ex oratoribus, ac poetis delibare aliquid, tum vero quasi in novum orbem repente translatus tanto animi ardore Latinæ linguæ studium arripui, ut ludorum ac vacationis oblitus, magno etiam sæpe cum valetudinis incommodo libris diu noctuque inhærerem. Quod si ardentissimæ illi proficiendi voluntati aliquando respondisset ingenium, ut certe (magno cum dolore dico) nunquam respondit; nec

vos hoc tempore plebejo dicendi genere molestissime detinerem, nec ullus esset hac ætate Latinus Orator, cui de orationis nitore, numero, perspicuitate ullo pacto concederem. Nunc vero in magna virium infirmitate siquid valeo, qui valeo sane minimum, totum Ciceroni, Terentio, Livio, Cæsari, Virgilio, Horatio, ceterisque ejus ætatis Scriptoribus elegantissimis debeo. Nihil a me repetundarum jure postulet Priscianus, nihil Donatus vindicet, nihil Valla, nihil Sanctius, nihil ille ipse, deliciæ quondam nostræ, Emanuel Alvarus, quos omnes una cum crepundiis vel abjeci, vel deposui; nec ex eo unquam in manus sumsi, nisi per hosce dies, ut huic Orationi materiam compararem. Excidere jamdiu animo eorum monita, excidere leges, nihilque mihi potest ad stilum retardandum contingere infestius, quam tristis quædam eorum recordatio ac metus, unde solent arida omnia, sicca, exanguia proficisci. Quid enim est aliud Grammaticæ loqui, quam omnino Latine non loqui, si credimus Præceptori maximo Quintiliano? Nam ut omnia Grammatici vere dicant, utrum aliud efficiunt, nisi ut sine barbarismis, sine solæcismis sit oratio? In quo si tota laus consistit Latinitatis, jam ne ipse quidem Cicero Latinus est, cujus libri si ad Grammaticorum cavillationes exigantur, solæcismis non carent. Neque vero id ignorant, sed quæ in aliis magnopere da-

Inst. l.
1. c. 6.

damnant, hæc in Cicerone, mutato nomine, figuras appellant, & veluti lumina variandæ orationi accommodata valde commendant. Nituntur enim omnes Latinum sermonem certis complecti legibus, quibus deinde contraria multa apud Latinos Auctores cum inveniunt, ad schemata, metaplasmos, aniptoses, archaismos, hellenismos, & id genus alia magnifica figurarum nomina confugiunt, quorum ope non quidem eorum famam tucantur, qui sine piaculo reprehendi non possunt, sed nobis illudant, ne Grammatica præcepta cum illis ipsis pugnare Scriptoribus, unde sumuntur, intelligamus. Fuit olim Latina lingua, quemadmodum ceteræ, juris plane sui, ex colluvione multarum gentium Romæ nata, populari convictu, communique rerum tractatione aucta, denique usu ipso, & sorte quadam inveniendi, ligandique verba, non ratione & consilio ad hanc copiam propagata, numerisque suis absoluta. Hanc proinde præceptis coercere totam, perinde est, ac de scientia, non de lingua disputare: quod Varro ipse, analogiæ ceteroquin exactor molestissimus, aliquando cum didicisset, nullam esse observationem similium docuit, & in omnibus pæne verbis unam consuetudinem dominari. Id vero quam mirum videri debuit Alvaro nostro, qui de sola nominum, verborum, ac participiorum constructione quingentas ferme regulas non sine multis præterea observationibus concinnavit! Fuit ille

Gell. l.
2. c. 2. 5.

ille certe magno ingenio, magna industria, magna Latini sermonis peritia, cui ego de re tota libenter concedam, si suas regulas non dicam omnes, non plurimas, non aliquas, sed principem illam, ac ceterarum caput de verbo *Amo* adversus irruentem undique inimicorum impetum defendat, sartamque testam ab omni detrimento conservet. Quid enim primum de-

*¶ Dunque c'è un errore
il dire secondo molti
gram: che amo vo-
gli a Popolo d'io
solo Accusativo*

cernis, Emanuel, de verbo *Amo*? Num esse activum, & inter activa familiam ducere? At Aufonius ad neutra rejecit: *Ut apud Deum fieri amat*. Quid tum? Num esse primi ordinis, nec alium postulare casum; nisi quartum? At ego secundi facio, eique genitivum adjicio: *Nolo Tbaidem amare tanti*. Quid postea? Vis ne esse primi, & secundi? At Cicero ad quartum refert: *Si quicquam me amas*. Quid deinde? Esse etiam quarti? At idem in sextum conjicit: *De raudusculo multum te amo*. Pro pudor! Ejus rei artem efficitur ac venditamus, cujus fundamenta prima tam facile corruunt. Novi equidem, & qui analogiam summa ope defenderent, ab ipsa florentis Romæ ætate fuisse nonnullos: sed nemo tamen cum hac nostrorum Grammaticorum turba comparandus, qui ut nihil intentatum relinquant, ab ipso mundi exordio, & vetustissima Hebræorum lingua Romanarum vocum causas, similitudinem, & originem petunt, petituri altius vel ab Arcadibus, si Arcades, quod Poetæ eorum jactare consueverunt, ante lu-

Att. I.
5. ep.
17.

Att. I.
7. ep.
2.

lunam orti fuissent . Nihil novi affero apud eos , quibus est aliquis cum Martinio , cum Becmanno , cum Vossio usus . Cum his autem ? Imo etiam cum viris nostræ hujus ætatis præstantissimis , qui abrepti sæculi more , gravissimum certamen de vocalæ nescio cujus origine nuper instituerunt , multasque ac reconditas eruditiones ex Hebræis codicibus , ex Syriacis , ex Arabicis , ex Græcis ductas in tam leve negotium contulerunt . Quod si , quam sunt ingeniosi ad hæc excogitanda , tam essent unanimes in tradendis , fortasse nos aliquando fefellissent . Verum hoc percommode cadit , quod sibi invicem de rebus omnibus bella movent , seque mutuis vulneribus conficiunt : quod ipsum argumento est , nihil huic arti inesse certi , quæ homines procaces efficit , & novarum rerum nimio plus amatores . In ipso enim statim Grammaticæ limine nonne de partibus orationis principes in hac arte viri acerbissime pugnant ? quodque ridiculum est , gravissimos totius antiquitatis Scriptores Aristotelem , Platonem , Plutarchum , D. Augustinum pro se quisque stare jubent ? Perge porro . De pronominum causa , numero , ac natura quam dubia , quam varia , quam sibi contraria decernunt Varro , Probus , Priscianus , Donatus , Quintilianus ? Hi autem ipsi inter se cum casibus nomina ab officio fuisse indita consentiant , nonne Scaliger tamen negat ? Valde castigat Priscianum , quod *sic* morbum

Mi-
nerva
Sanct.
l. 1. c.
2.

bum quartæ declinationis fecerit : rursus in Vallam arma movet Petrus Ramus, quod *ficum* fructum masculino genere extulerit. Scaligero commune genus pessime a Græcis *ἑκταῖον*, optime a Latinis *promiscuum* appellari videtur : Sanctius Latinos damnat, Græcos absolvit. Impersonalia dicit Alvarus *decet*, *pœnit*, *pluit*, & similia : nulla esse impersonalia, testatus Deos hominesque, Scioppius affirmat. Siquis verborum modos statuatur esse quatuor, ecce tibi qui quinque, qui sex, qui octo, qui multo plures inducit. Est qui probet *gerundia*, ac *supina* : non deest, qui pura puta Grammaticorum deliramenta dicat. Alii verbis in *or* Præterita tribuunt, alii adimunt. Quibusdam placent verba Neutra, ac Deponentia, quidam toto Latio exulare jubent. Denique in tanta Scriptorum multitudine neminem unum invenias, qui malit aliorum vestigiis insistere, quam nova comminisci, ceterosque omnes allatrare. Nolo vos, Auditores, per singulas partes ducere, omnesque de Orthographia, de Prosodia, de Etymologia, de Syntaxi controversias hoc loco explicare, ne gravissimo officio, ne tempore, ne patientia vestra nimium abuti videar. Percurrite, si vacat, quæ solent homines libellorum suorum initio longissime præfari, ubi ceteris, qui ante se de re Grammatica scripsere, diem dicunt, eorum lucubrationes mendosas, nugaces, sordidas, cloacinas (sit verbo Scioppiano venia) audacissime
 appel-

appellant, seque ex Deorum immortalium sede quasi delapsos, allaturos optima pollicentur. Cumque singuli & universi eadem recinant; quo se vertant miseri adolescentescens? cui se tanquam duci tradant germana latinitate instituendos? Numquid Varroni? At litterarum porcus dicitur a Palæmone. Num Prisciano? At Græcum hominem latinæ Linguæ fucum fecisse existimat Alvarus. Num Vallæ? At ejus *Elegantias* Ramirezius de Prado inelegantes appellat. Num Donato, num Probo, num Servio, num Charisio? At hos omnes passim labi, & monstra effutire contendit Scioppius. Num denique Scioppio ipsi? At miserabilis litterator dicitur ab Hornio, vir desultoriæ levitatis a Labbeo; canis Grammaticus a Lambecio. Indignamini ad hæc; Auditores; sed artis, mihi credite, seu vitio seu fato quodam fieri solet, ut nec sua quisquam asferre possit, nisi carpat aliena, nec aliena carpere, nisi modum excedat. Quam indecoræ, quam pudendæ, quam prope insanæ fuere contentiones illæ Poggii cum Valla, Politiani cum Merula, Scaligeri cum Erasmo de rebus his minutissimis, quasi de aris & focis! Quam illa ridicula Francisci Philelphi cum Timotheo quodam Græco, qui de vi syllabæ pugnaturi, ea lege in aciem ex composito descenderunt, ut victus barba mulctaretur! O magnas nugas magno conatu actas! O vos miseros quicunque ab his tanquam ex tripode, de Latinæ linguæ

guæ ratione responsa petitis! Quos æstus,
 quas tenebras vobis offundent Grammati-
 cæ illæ Philosophicæ, Minervæ, Aristar-
 chi, Mercurii, Thesauri, in quibus ad
 criticam eruditionem multa quidem sunt
 acute ac subtiliter excogitata, ad locutio-
 nis vero Latinæ usum propemodum nihil.
 Est illustre quiddam Latinus sermo, inge-
 num, perspicuum, tricis & ambagibus
 carens, quod nemo unquam ex his ho-
 minibus pugnacissimis consecutus est: nec
 vero intelligo, scriptis suis quo pacto fi-
 dem concilient, quibus ipsi, quæ præci-
 piunt, præstare non possunt. Polycletum
 accepimus statuarum artificem totius Græ-
 ciæ peritissimum non ante celebrem illum
 recte fingendi Canona in lucem edidisse,
 quam publice proposita statua, velut artis
 exemplo, suas ipse regulas egregie præ-
 stando confirmasset. Ita se mihi Gramma-
 tici probent: tum vero fatebor non invi-
 tus, Latine loquendi facultatem eorum
 præceptionibus tanquam canone proban-
 dam esse. Sed profecto quod Carneades
 apud Ciceronem agebat, oratoriæ artis scri-
 ptorem ne mediocriter quidem disertum
 fuisse ullum, idem de Grammaticis affir-
 mare licet, neminem adhuc artem, quam
 traderet, Latine loquendi ne mediocriter
 quidem calluisse. Non est hujus temporis,
 aut loci, multo vero minus mearum vi-
 rium, singulorum vitia commemorare: ve-
 rumtamen, nequid gratis ad invidiam af-
 ferre videat, prodeant in medium hinc
 Teren-

lib. 1.
 de O-
 rat. c.
 20.

Terentius Varro veterum Grammaticorum, hinc Julius Scaliger nostrorum sine controversia princeps, quorum alter aurea ætate Deorum beneficio natus, Ciceronis æqualis & amicus, ita tamen scripsit, ut cum Livio Andronico Romanæ linguæ incunabulis exceptus videatur: alter vero Josepho filio communi omnium consensu primas cedit; illi inquam Josepho, cujus peregrinitates, barbarismos, solæcismos nec unos, nec leves Scioppius collegit, & in suo *De stilo historico* libro posteritati mandavit. Tamen si Latinæ linguæ laudem (ut ante dixi) neque totam, neque præcipuam in solæcismis vitandis collocari puto, quod est emendate loqui; sed in ipsa potius plena ac tereti compositione verborum, in colore, & quodam habitu, ut nihil claudicat, nihil diffluat, nihil fluctuet, sed tota permixta & temperata numeris, æquabiliter constanterque feratur oratio, quod unum est, si recte sentio, Latine loqui. Numerosa hæc & concinna verborum comprehensio nulla definiri arte potest, nullis Grammaticorum præceptis concludi; cujus vel maximum vitium est, si de industria quæsitæ ad certas leges operose exigatur. In auribus est singulorum tota, & ad aurium sensum judicanda: quod fortasse olim præstare non fuit valde difficile audientibus, ac loquentibus nihil nisi Latine; at vero his temporibus, nisi quis se totum veteribus scriptis dedat, & in eorum lectione,

&

& imitatione dies noctesque versetur, nec tolerabile quippiam Latine conabitur, nec nisi insipienter judicabit. Hinc fatuæ passim orationes, in quibus tam est perspicuus Grammaticus labor, ut omnia macra sint, meticulosa, hiulca, sine numero, sine veneribus, sine gratiis; quæ tamen auditori misero laudandæ sunt, quod nequeat barbarissimos & solœcissimos ex Grammaticorum regulis designare. O te dementem, M. Tulli, qui cum Varronis de re Grammatica libros haberes, linguæ tamen nitorem ex perpetua Catonis, Plauti, atque in primis Terentii lectione hauriendum tibi existimabas. Te levem, Demosthenes, qui Thucydidis historias cum sæpe legisses, octies insuper descripsisti. Tantumne tibi a foro, & a curia supererat otii, ut non te potius Grammatico homini traderes, unde Atticam illam sermonis elegantiam ocyus arriperes? Itane igitur, Auditores? Ne vivam, siquis ex nostris, qui se Tullianos profitentur, unam Tullii orationem aut semel in vita descripsit, aut octies lectionavit. Vel igitur Cicero, in quo esset Latini sermonis ratio, Demosthenes, in quo Græci, non satis intelligebant; vel nos in Grammatico ludo, aliud agentes, quam oporteat, frustra laboramus. Valeant Prisciani, valeant Servii, valeant Donati, eosque consulamus eatenus, ut ab aliquo Pomponio Marcello de solœcismo postulati respondere possimus. Ergo (ut extremum aliquid habeat oratio mea,

mea , quo tota hujus generis ratio concludatur) traditus mihi ad institutionem adolescens norit linguam esse quandam , quæ Latina dicatur , Italicæ parentem , eique magna parte similem . Hujus sciat esse nomina , esse verba , nominumque ac verborum Ordines certis obstringi legibus , quæ sint memoriter ante omnia discendæ : Summa Constructionis capita altissime infingat animo , calleatque probe velut ungues digitosque suos : In Prologia versetur aliquanto magis , quod ratio condendi carminis certior est , magisque definita , quam condendæ orationis : Denique paucis præterea ex Etymologia , & Orthographia delibatis , Grammaticos longissime ableget , sibi valde persuadeat , non Latini sermonem ex Grammatica , sed Grammaticam ex Latino sermone natam esse . Quid ita ? Nimirum ut aquas ex ipso fonte hauriat , hoc est Latinos Scriptores legendi scribendique exercitatione nunquam intermissa in succum & sanguinem suum convertat ; unde ille existit orationis ambitus ac nitida circumscriptio , quæ supra Grammaticorum vires posita , auribus longa disciplina exercitatis judicari potest , verbis explicari non potest . Id unum in hac palæstra arduum est ac difficile , quod & liberale ingenium postulat , & morum conformationem quandam ingenio similem , & illam extremo loco diligentiam , quæ sola in hac arte minimum valet , ceteris tamen adjuncta naturæ præ-

B sidiis ,

fidis , Tullianum illud dicendi genus effi-
cere potest , quod tantopere commenda-
tur . Hoc scilicet ab hominibus non tam
miti fidere natis , aut excultis frustra requi-
rimus , qui , ut carmina edant sæpe opti-
ma , orationem tamen , cuius non est , ni-
si aurium sensu definitus modus ac nume-
rus , ostendent fortasse nullam , quæ Lati-
na dici possit . Vos igitur , adolescentes ,
quibus in Italia natis atque altis illud in-
super accedit , quod in Italiæ parte nobilif-
sima , & ad animi cultum opportunissima
erudimini , pergite strenue in hoc curricu-
lo , ut majorum vestrorum laudem retinea-
tis . De bellica Italorum virtute nihil sa-
ne ausim pronunciare : sed litteras quidem
certe non amisimus . Commigrant ad nos
quotidie callidi homines pecunia instructis-
simi , & præclaram illam Musarum supel-
lectilem , optima volumina nobis abri-
piunt ; artes etiam ac disciplinas paul-
latim abducturi alio , nisi studio ac di-
ligentia resistitis . Vestrum est communis
patriæ famam ac splendorem ex tanto
periculo eripere , vestrum luctuosam ca-
lamitatem ab hoc solo , a nobis , a vo-
bis ipsis prohibere ; ut omnes intelligant
Romanum imperium Italis auferri po-
tuisse , Romanas litteras non posse . In
vos coniecere oculos , vos hortantur atque
impellunt parentes pro Familiæ honesta-
te , cives pro Reip. gloria , magistri
pro Scholæ fama , sed in primis Anti-
stes Eminentissimus pro Religionis causa ,
quæ

quæ cum litterarum caussa conjunctissima est.

Edita est Patavii an. 1713. deinde alibi, addita hac Auctoris Epistola

AD LECTOREM.



*R*ationem hanc cum haberem, non defuerunt, qui crederent, me nova moliri, ac de Grammaticis studiis hoc in loco mutandis cogitare. Id me coegit Orationem ipsam typis committere, totamque consilii mei rationem et causam patefacere. Nec igitur is ego sum, ut tantum possim; nec si maxime possem, rerum nostrarum conditio quippiam de veteri instituto mutari pateretur. Pueri enim ferre omnes, qui huc accedunt, Grammaticen attigerunt; nec juvat curriculi partem emensos rursus ad carceres, nova

proposita methodo, revocare. Præterquamquod nihil unquam tanti erit, ut me ab ea docendi consuetudine avocet, quam diligentissimi Societatis Patres ubique tenent, Emanuele Alvaro duce. Cum enim acutissimo ingenio Viri juventutis recte instituendæ vias omnes ac rationes scrutati, unam denique illam invenerint, quam Italia omnis amplexa est, quid nos in tanta virium imbecillitate novi conemur? Satis erit, si ductores sapientissimos, quantum labore & solertia possumus, prope sequamur; desperantes post tot tantosque conatus inveniri posse meliora. Quid igitur, inquis, in oratione isthac tua de Grammaticis blateras? Ego vero nihil dixi, nisi exercendi stili gratia: in quo si quid peccatum est, cur non illi peccarunt, qui injustitiam, qui muscam, qui quartanam, qui asinum laudaverunt? Non est sane idem in civili hominum convictu reprehendere aliquid, & laudare; in Academicis exercitationibus est prorsus idem. Quod si cui forte aliud agens persuasi, aut persuassisse

*suasisse videor, Latinam linguam non
 ex infinitis Grammaticorum praeceptis,
 sed ex veterum librorum lectione &
 imitatione comparandam esse, nolo ego
 illum tanquam in media arena desti-
 tuere. Itaque ejus causa Commenta-
 riorum de Latinis Scriptoribus Orationi* V. post
Orat.
XI.
*adjungo, ut qui sint ad legendum &
 imitandum probatissimi, ex singulorum
 classibus facile intelligat. Dua porro cum
 sint divisiones celeberrimae, quarum u-
 na a quadruplici hominis aetate, altera
 a metallorum gradibus peti solet, no-
 lui tibi omnes Grammaticorum pugnas
 de illis narrando, immensa lectionis ta-
 edium afferre; sed quod optimum du-
 xi, in prima fere Andream Borri-
 chium, in secunda Olaum, viros cla-
 rissimos secutus sum. Utrum vero a-
 liquid praestiterim, praeter describendi
 patientiam, malo te ipsum judicare.
 Verum cui haec? Non illis certe, qui
 librorum Prooemia cum legerint, satis
 habent; magnoque supercilio in trivis,
 & compitis de re tota disceptant: sed
 unis illis, qui & patienter legunt, &*

*sapienter judicant , et humaniter mo-
nent . Horum aliquem si nactus fue-
ro , de graculorum vocibus non labo-
rabo . Vale*



AD HUMANITATEM

Oratio II.

Putris ad Latinam eloquentiam informandis nocet librorum copia.



Ui Grammaticorum insidias hoc ipso ex loco deprehendere præterito anno conatus sum, &, si recte sentio, deprehendi, non satis videor commissæ nobis juventuti consuluisse, nisi ad

Humanitatis studia progredientem manu veluti ducam, nunquam ab ejus latere, nisi universo confecto curriculo, discessurus. Quamvis autem ingens præstantissimorum hominum numerus, qui optime docent, & scribunt optima, nihil reliqui fecerit, quod ad alendos puerorum animos pertineret; suus tamen est & copię morbus, nec tam sæpe animal humorum inopia, quam nimia quadam redundantia conficitur. Neque vero mihi tantum tribuo, ut putem posse me, qui nihil ferme possum, ultra peccetur in parte, remedium adhibere; sed tamen siquid est a nobis in commune scholarum bonum conferendum, quemadmodum suscepti muneris ratio non

imponant discipulis ac magistris, legantur, recitentur, describantur: non est ut hominum benevolentiam amittere velim, simultatesque gravissimas tam levi de causa subire. Quod unum arbitror sine periculo fieri posse, dicam in universum, acriterque contendam, pueris ad Latinam eloquentiam informandis librorum copiam in primis officere: proinde non esse conditione ulla permittendum, ut extra principes Latinitatis Auctores evagentur. Utinam Patavinis parentibus eam prolem Superi donent, quæ vel a teneris librorum studio teneatur, quod omen est in reliquas ætates sane præclarum: sed utinam etiam magistris omnibus eam mentem injiciant, ut pueris ad instituendum sibi conceditis librorum multitudinem mature laudent, sero concedant. Id ego nostris solemni more quotannis denunciabo, si modo a vobis in præsens obtinere potuero, quemadmodum spero, ut quæ ex animo dico, & confirmare aggredior, suffragio vestro comprobetis.

Siquid ego mihi non brevissimi temporis experientia comparavi, ut de primæ ætatis studiis judicare possim, in duo ferme genera distribuo: primum est eorum, qui Grammaticæ cursum vix emensi, ac litterarum veluti dulcedine prægustata, libros undique impense conquirunt, iisque se totos dedunt; alterum eorum, qui invita Minerva nati, librorum genus omne, non secus atque ovis lupum, averſantur.

Me-

Medium enim ætas illa prudentia omni destituta nihil agnoscit. Utrumque sane vitium est: sed alterum illud, quod ex Musarum odio nascitur, insanabile; primum vero etiam optandum, modo adsit peritissimus docendi artifex, qui frenos adhibeat, qualis fuit Isocrates in Theopompi concitatione temperanda. Quod si quis ex istis librorum amatoribus in eum magistrum incidat, qui per se currenti stimulos addat, cujusmodi sunt ubique multi, pejore futurus est conditione, quam qui in ipso Grammaticæ limine libros omnes ejuravit. Quandoquidem hic sibi uni detrimento est, ille multos mortales inficiet, & in erroris communionem doctrinæ fama perducet. Si enim, ut Callimachus agebat, μέγα βιβλίον μέγα κακόν, quid illum ex multis magnisque libris colligere putatis, Auditores, qui simul ætate, simul judicio infirmus nondum satis æra lupinis distinguat? Ipsa profecto memoria, qua solet pueritia valere plurimum, ipsa, inquam, memoria facile omnia sine ordine ac sine delectu recipiendo nocebit; si modo non scitulum blateronem, sed Oratorem instituimus. Cum enim hominis animus ex earum rerum contemplatione, quæ in memoria reconduntur, duci fere soleat ad parienda similia, nonne ille confusa pariat ac perturbata necesse est, cujus memoria non thesaurus, ut a Tullio dicitur, sed tale quiddam sit, quale Poetæ finxere chaos? Sit oratio sublimis & exaggerata, sit vera,

Cic. 3.
de
or.
rat. c.
9.

Athenus
1. 3. c.
1.

ra, sit gravis, sit callida, sit verborum ac sententiarum floribus refertissima; si caret perspicuitate, quæ prima est dicendi virtus, nec in animos hominum penetrabit, nec artificio capiet, nec rationibus vincet, nec affectibus permovebit. Atqui ego perinde loquor, quasi puer multa legendo, multa discat tum bona, tum mala, quod nequeat ex imbecillitate iudicii delectum adhibere. Nimis equidem egi liberaliter, nimio plus concessi, quam oporteret. Pejora undique arripiet, probabit, exscribet, memoriæ mandabit, & ut in vacua rebus mente altissime infixæ, quando vivet, retinebit. Amat enim ætas illa convenientia sibi, vana, levia, ludicra, in verbis novitatem, in sententiis fucum, in tota oratione tumorem & audaciam. Jacet Cicero, si cum Seneca compares; serpit Virgilius, si conferas cum Statio; friget Catullus, si Martiali opponas: uno verbo non rem & veritatem, sed colores & pigmenta confectatur. Quid vero si in fabulas illas forte incurrat, quas vulgo Romanenses appellant? quid si in quadrata quædam carmina, cubica, retrograda? quid si in elogia, anagrammata, acrosticha, summa cum Latini sermonis verrecundia non multis abhinc sæculis in Latium importata? Valeat, inquiet, omnis antiquitas frigida, meticulosa, sine animis, sine spiritu, sine fruge: perierat Latina lingua, nisi cum Romanis periisset: nunc demum revixit venusta, florida, elegans,

gans, par famæ ac nomini tanto. Ignorabant veteres illi, quantum liceret hyperbolæ, metaphoræ, allegoriæ: non ita fecundi erant, ut decem antitheta uno spiritu funderent: non norant quid esset argute dicere, quid subtiliter, quid magnifice. quid autem norant? si qui unus ad sæculi hujus elegantiam accedere maxime visus est, Senecam dico, ejus lucubrationes

1. x. c. Quintilianus nescio quis corruptas in elo-
2. quendo, perniciosissimas; & dulcibus vitiis redundantes judicavit. Nolite, quæso, existimare, Auditores, ad causam ista confingi. Audivi ego, audivi nobilissimum adolescentem, qui cum multa ex Barclajo recitasset pluribus ante annis memoriæ tradita, & in sui perniciem arctissime custodita, quærenti mihi, utrum aliquid ex Cicerone didicisset, subiratus respondit, aridam illam Ciceronis Latinitatem obsolevisse. Magna hæc illius, magna multorum calamitas, non tamen paullo attentius consideranti valde mira. Quemadmodum enim pueri ex picturis maxime novas & coloratas, ex gemmis rubentes & pellucas, ex nummis fulgidos & elegantissime cufos; ita ex hoc litterario quasi thesauro non solida & gravia, sed fucata & sonantia sibi decerpunt. Hinc morbus in omnes ætates consequentes vel nullo unquam remedio, vel ferro atque igni depellendus. At enim est, qui in magna librorum multitudine nullum habeat, nisi optimum. Gratulor ego illi, qui optima mul-

multa in rebus humanis invenire potuit .
 Est quod ad Oraculum Delphicum referamus .
 Esto , sint optimi , sint probatissimi omnes : ipsa enimvero multitudine sua , copia ipsa rerum optimarum legenti nocebunt . Neque enim tam multa capit angustissimus pueri animus ; non impletur hoc modo , sed obruitur ; respuit omnia , nisi sensim immittas . Quod si quis eximia natura præditus , laborisque & vigiliarum præter ejus ætatis morem insigniter patiens cuncta recipiat , quantum inde utilitatis ad eloquentiam redundabit ? quantum scilicet ad valetudinem ex optimorum ciborum intemperantia . Non satis est ad morbos vitandos comedere saluberrima , nisi opportune , ac temperanter comedas . Porro sicut insitus stomacho ignis immodico cibo opprimitur , aut etiam extinguitur , ita ingenium nequit , ut ita dicam , nimis multa concoquere , sed quasi oppressum otia-
 tur , vel cruda & indigesta in malos humores convertit . Inde strigosus ille dicendi modus , inconstans , salebrosus , involutus , ut nihil intelligas sine interprete ; inde illa historiarum , fabularum , ἀπὸ βιβλίων
 τῶν perpetua & inordinata congeries in exordio , in confirmatione , in peroratione , nulla rerum , nulla temporis , nulla loci ratione habita , quæ omnia vulgus pulcherrimas eruditiones appellat , sapientes viri pulcherrima monstra . Est enim , ut aliarum rerum , ita eruditionis modus quidam , ut definiendo , probando , ampli-
 fican-

ficando erudita identidem fundas ad delectationem, non effundas ad satietatem; tanquam ornamenta pulcherrimæ domus, non cumulata, sed explicata. Verum sibi temperare nequit, ut maxime nitatur, qui cœpit ab infantia lectitare, & ^{universa} ~~universa~~ ^{conferre} ~~conferre~~ conficere. Proponitur huic aliquid ad dicendum, sive in templo, sive in Academia. Itur statim ad adversaria. Quid tum? Non inclusum, aut cogitantem videas, sed magna corporis animique contentione hac atque illac discurrentem, parantem undique libros, bibliothecas pæne ipsas sedibus convellentem. M. Tulli, quid præbes ex Tusculanis, quid ex Officiis? Cave diligenter, C. Plini, jam est in Historia tua. Plato, Læerti, Plutarche, præclare vobiscum agitur, si indice caretis; sin minus, conferte symbolam. Jam processit opus; versiculos numerat; non satis est: hæret, rodit ungues. Instauretur librorum acies; succedant sacri, Biblia, Concilia, Interpretes, Græci omnes Latinique Patres; nemini parcendum est. Quid expectatis, Auditores? Exit, non oratio, sed Polyanthea. Verum enimvero non novit ingenia, nec artem novit, qui ab hoc genere hominum aliter postulat. Cum enim lectioni a pueritia dedicissimi, nunquam assueverint cogitare, ac promerere sua, coguntur deinceps in omni vita aut rostris abstinere, aut aliena temere compacta profundere. Careat stilo necesse est, careat dicendi genere sibi proprio, qui

qui qua ætate maxime formandum erat , legendo tempus trivit , sive , ut ex ejus sensu loquar , eruditioni parandæ operam dedit. Sed quæ , malum , est ista eruditio vel frustra , vel intempestive ab Oratore quæsitæ ? Numquid non satis ad erudiendas vel Musas ipsas , numquid non satis ad fatigandas triginta illa rerum antiquarum volumina , nisi oratiuncula quælibet ad eruditionem traducatur ? Convenere homines judicaturi , sive suadeas , sive dissuadeas , sive laudes , sive vituperes , sive accuses , sive defendas ; teque tuamque causam , non si erudita , sed si vera dicas , aut vera dicere videaris , secuturi . Nolo hic dissimulare , Auditores , & esse , & me ipsum vidisse nonnullos ita laboris patientes , naturaque fecundos , ut cum multa quotidie legant , scribere tamen non supersedeant ; simulque exercitationem cum lectione jungant . Horum ego stilum non nego esse aliquem , sed nego esse probabilem , qui optime norim non ad unius hominis , aut ætatis imitationem , sed ex omnibus promisque Latinæ linguæ sæculis , & ex omni scriptorum genere conflatum esse ; ut cum dicunt , non uno ore , sed prope multiplici dicere videantur . Non enim potest esse unus , non constans , non æquabilis stilus ille , qui multorum librorum lectione trahitur in diversa ; nec oratorem sapit , quod poetica multa , nec poetam , quod oratoria contineat . Hoc virum est elocutionis maximum , in quod vel sapien-

Quin-
til. l. 8.
c. 3.

pietissimi viri necessitate quadam labun-
tur; hic *κρίσιμης*, quem evitare ne ille qui-
dem potuit summus in hac civitate pa-
trum nostrorum memoria litterarum arbi-
ter Octavius Ferrarius, quem tamen acce-
pimus & pro sua prudentia se probe no-
visse, & pro ingenuitate sæpe dixisse, Hu-
manitatem se, non Eloquentiam profiteri.
Quippe intelligebat vir immortalitate di-
gnissimus, publice docendi munus ab ipsa
adolescencia susceptum aditum sibi ad uni-
versam eruditionem Græcam Latinam-
que patefecisse, ad oratorias scriptiones in-
terclusisse. Cogebatur enim pro ea, quam
inierat, docendi ratione totam versare an-
tiquitatem, nec ullo unquam certo loco
consistere; modo esse in Tullio, modo in
Apulejo, a Livio descendere in Marcelli-
num, a Catullo in Aufonium, a Virgilio
in Claudianum: a Latinis continuo ad
Græca transire, a Græcis ad Latina; un-
dique autem ea colligere, simulque com-
mittere, quæ a stili similitudine longissi-
me abhorrebant. Libuit in rem hanc Fer-
rarium afferre, tum ut quibusdam respon-
derem, qui locutionem ejus ex orationi-
bus judicantes accusare solent; tum vero
maxime, ut tanti viri nomine orationi
meæ fidem & auctoritatem conciliarem.
Ad nostros redeo, quos video tanto pec-
care gravius, quanto minus peccare se sen-
tiunt. Ille enim adolescens, ille vir, ille
senex ex instituto multa legebat, isti ex
desidia. Etenim varia multorum Scripto-
rum

rum lectio, quid habet laudis, quod non sit vel cum ignavissimis commune? Nemo est tam otiosus, nemo tam bardus, modo litteras aliquando attigerit, quin poetarum saltem, aut historicos jucundissime legat. Hinc ad longissimas ætatis horas prætereundas, hinc ad leniendâ solitudinis tædia, hinc ad somnum conciliandum remedia petuntur: ut jam experientia didicerim eos fere, qui se mihi gloriantur multa legere, dulcissime otiosi, sed laudem ex otio callidissime quærere. Quos ego tantum abest, ut velim confirmata jam ætate ad scribendum compellere, ut etiam valde deterream; ne in vitium incidant, de quo ante dicebamus, hoc est in confusam, sibi que dissimilem dictionem, cujus partes singulæ latinæ sint, genus vero totum barbarum, ac pene monstrosum. Huc si spectant eorum consilia, in eo, quem instituerunt vitæ cursum, sapientissimi sunt, quod nihil audeant supra vires: sin autem laboris metu, quod plerique omnes consueverunt, abhorrent a pugillaribus, est quod illis bonam mentem precemur. Interim vero sine ulla dubitatione statuamus, legendi jucunditatem ab omni labore vacuum primam esse causam, cur adolescens libentissime legat. Altera aliquanto turpior solet esse furandi libido, orta procul dubio ex illa rerum, ac verborum inopia, quæ nondum progressum ad Philosophicam comitatur. Fit enim inde, ut de se ipse desperans, aliena

C

per-

perquirat; quæ siquando bene corrasa, & in rem propositam deducta magister laudet, actum de illo est: nihil amplius cogitabit, nihil inveniet; libros compilabit omnes, alia sumet, alia detorquebit, modo libere, modo furtim, apte, inepte, ut unumquodque implendæ tabulæ inservire videbitur. Scribatur dica, plagiarium est. Neque enim video, cur furti appelletur, qui totam ab uno orationem surripuit, parcatur vero illi, qui multorum lacinias usus est, & pessimum nobis quasi centonem venditavit. Sed hac ratione nimis plane multi inter oratores irrepsērunt, numeroque ipso defenduntur; atque adeo honestissimo imitatorum nomine, probante ac volente populo, gaudent. Ego equidem veteri Romano populo quid liceret in danda hominibus verbisque Romana civitate, satis intelligo; quid nostro huic Patavino, quid Veneto, quid Florentino liceat, prorsus ignoro. Inconditum hoc latinæ dictionis genus probent civitates omnes, probet Italia tota, Gallia, Germania, Hispania probet, nisi grande illud nomen, *Senatus Populusque Romanus* ab antiquissimis tumultibus excitetur, jubeatque ita fieri, intercedo. Etsi autem scribendi ratio hæc, seu potius describendi ex multorum lectione plerunque oritur, quod minus videantur ablata, quæ a multis, quam quæ ab uno auferuntur; non tamen negare auctum contingere posse, ut ex unius Scriptoris penu tale aliquid educatur. Quod si quis

quis in Longolio, viro ceteroquin elegantissimo, diligenter animadvertat, non multa fortasse inveniet orationis membra, quæ non sint Ciceroni tanquam domino adjudicanda. Sed ille cum cœpisset suum sibi formare dicendi genus, immatura morte præreptus, non potuit efficere, ut multis ad latinam eloquentiam exemplo esset. Quod vero Bembum italicum, latinique sermonis lumen in omnium sæculorum oculis splendidissimum barbari quidam Transalpini in eo accusare non dubitarunt, concedendum est illis, ut de re, quam ignorant, perperam judicent. In quibus tamen Justum Lipsium æquissimum virum censere nolo, qui cum esset aliquando non prorsus honorifice de Bembi stilo locutus, suum ipse errorem & in epistola sexta Centuriæ ad Italos, & in fine Taciti, & in Defensione posthuma ingenuè confessus est, magnique & oratoris & historici nomen immortalis genere laudum exornavit. Si tamen alterutra in parte delinquendum est, minus offendit aures, qui uni plus justo adhæret, quod aliena quidem, sed inter se similia conjungat, quam qui ex multis ætate, ac dicendi forma diversis nullo modo coherencia suffuratur. Jam vero ultima caussa afferenda est, cur adolescentes multa legant; quam unam si probatis (videte quantum tribuam sapientiæ vestræ) cedo vobis in re tota, puerosque nostros dux ego atque auctor in magnam bibliothecam statim ducō. Hoc nihil est aliud quam

modus legendi ita velox, ita præceps, ut singulis diebus singula volumina percurrantur: unde tantum existit ad eloquentiam comparandam adjumenti, quantum ad historiam ex eorum peregrinationibus, qui citatissimis equis quotidie feruntur. In quo ego ætatem illam non reprehendo, quæ impetum sequitur ac levitatem sibi propriam; utque ejusdem loci, ita ejusdem libri cito satietate tenetur. Illos reprehendo, qui levitatem istam laudando fovent, putantes magnæ cujusdam esse virtutis multorum scriptorum nomina recitare: siquidem nihil præter nomen tanta velocitate legentibus hæere potest. Sentio me oratione ipsa ducente, ad eos delapsum, qui sibi persuadent, & ubique prædicant, hujus ætatis studia, studiorumque famam librorum titulis & indicibus contineri. Isti si sapiunt, tota concidit oratio mea, in eoque laborandum est unice adolescenti, ut mature incipiat per bibliothecas cursitare. Irane vero patiemi, Auditores, futilem hanc doctrinæ speciem in sapientissima civitate jactari, ac vobis obtrudi? Impune ergo oratores laudabit, ac reprehendet; poetas, & historicos pensabit; de Philosophis, de Theologis, de Jurisperitis sententiam feret, qui gravissimas facultates prima Scriptorum pagina definierit? Est aliquid respondere posse de Plutarchi nomine & patria; quot in tomos ejus opera distribuuntur; quis quonam sermone verterit; quis primus, quis postremus ediderit;

derit; quis Anglus, aut Batavus variis lectionibus illustraverit: sed quod interim vacat ingenium nobilissima hominis pars, malim hæc in bibliopola, quam in viro litterato requirere. Video enim quam sit difficile hæc omnia præstare, quæ totam hominis vitam occupant; nec tamen illa omittere, quæ utilius & honestius occupare possunt. Non eo sane consilio pueros nobis vestros tradidistis: non huc spectant cogitationes illæ, labores, impensæ, quas eorum causa libentissime suscepistis, & suscipere nos una vobiscum tantopere vultis. Est aliquid supra librorum titulos, quo contendatur; sed illud ejusmodi est, ut in tanta legendi celeritate deprehendi non possit. Immorari oportet rebus singulis; idem submissa voce legere, idem elata; quodque semel legeris, iterum sæpiusque repetere; & cogitatione vehementissima in tuam quodammodo naturam transferre. Si enim lectio ad imitationem instituta est, imitari vero nihil est aliud, quam similes eorum fieri, quos nobis ad imitandum proponimus; certe non cursu, sed mora longissima opus est, ut illorum dicendi genus modo in universum, modo per partes singulas meditantes in nobis ipsis altissime defigamus. Ita si legat adolescens, vix unum, aut alterum latinæ linguæ Scriptorem ad multam ætatem evolvat; nec erit nobis a librorum multitudine revocandus. Non alia, credo, causa primi illi attritæ latinitatis ac pæne sepultæ reparato-

res tantopere floruerunt, ut uno tempore studium hoc & inchoasse videantur, & perfecisse, nisi quia paucissimos libros habebant, quibus se addicerent, vel nondum editis tot voluminibus, vel nondum fatis libratorum opera propagatis. Nunc vero quanta undique succrevit librorum seges! quanti multæ, atque operosæ officinæ! quot publicæ privatæque bibliothecæ, non modo ad litterarum studia, sed quod ostentationis est non ferendæ, ad parietum quoque ornamentum! Quæ copia multo quidem major, quam a nobis explicari possit; vel fastidium parit, vel levem illam legendi curam, quæ sine ullo eloquentiæ fructu, atque adeo cum detrimento plerumque expletur. Cavete, Adolescentes; magna animi provisione cavere. Insidiæ vobis ubique parantur, eoque periculosiores, quod parantur ab amicis. Nolite animum pravis libris vitare, nolite turbare multis. Habete rationem ætatis, habete studiorum, habete etiam aliquam voluntatis in vos meæ, quæ nihil me finit aut cogitare, aut efficere, quod non ante cognoverim certis exploratisque argumentis institutioni vestræ profuturum. Illos ipsos, qui ætate jam sunt confirmata, *non multa legere, sed multum*, ex veteri proverbio Plinius jubet: quanto vos minus vagari oportet, atque in varia discurrere, qui nunc primum ire aggressi, de via si paullum deflectitis, tanto magis errabitis, quanto solent esse aberrationes a scopo itineris

lib. 7.
cap. 9.

heris initio longiores. Unum vobis sufficere Ciceronem viri in hac arte peritissimi existimarunt. Querebamini: largius egimus: Cæsarem concessimus, Terentium, Nepotem. Non satis fuit: Horatium addidimus, & Virgilium. Pergentibus altius & Livium, & Curtium, & Ovidium, & alios præterea deinceps præbebimus. Sint alii de se solliciti: nihil vobis deesse potest, ubi tam multi libertatis obliti vestra causa laborant, ubi Princeps liberalissimus laborare jubet. Quamdiu nos per ætatem ac valetudinem gravissima onera sustinebimus, quamdiu ille, qui nequit a seipso desciscere, sustentibus benefaciet, non libros, non typos, non præceptores, non alia studiorum vestrorum adjumenta desiderabitis.

Edita est Patavii an. 1714. deinde alibi, addita hac Auctoris Epistola

AD LECTOREM.



Olitorum litterarum cognitionem, quod ad hominis naturam ac dignitatem supra ceteras artes ac disciplinas pertineret, veteres Humanitatem appellarunt: nos communem secuti schola-

rum nostrarum usum, eam dicimus Humanitatem, quæ Rhetorices elementa tradit, hoc est recte conscribenda periodi ornandæque præcepta. Huic proludere cum deberem, eam removi librorum copiam, quæ puerorum stilum aut retardare, aut vitare poterat tanto quidem periculosius, quanto rectius magna specie boni commendata incautis nocere solet. Ubi ætas ac stilus confirmata sunt, non ego homines a legendo deterreo: tametsi Plinius alter, et alter Seneca, tametsi Franciscus Petrarca utroque illo præterquam annis nihilo minor, cuilibet ætati ad solidam bonarum artium gloriam contendenti paucos libros concedunt. Sed alia fortasse aliis studiis atque temporibus præcipienda sunt. Interim ego pueros instituo; nec porro pergo, nisi ubi aliquorum vitia a pueritia contracta, præterque consuetudines jubent me viros senesque ad exemplum producere, et alia ab aliis ducendo per omnes ætates discurrere. Tu, si quid rectius habes, noli modeste petenti denegare, vel danti, quod habet, succensere.

AD

AD RHETORICAM

Oratio III.

*Præcipua Rhetoris cura debet esse
verborum.*



Etsi de primis puerorum studiis cum dicerem, non prorsus timore carebam, quem abjicere totum hoc in loco nemo potest, nisi prius verecundiam abiecerit; attamen res ipsa per se parva non tantam eloquentiæ vim postulare videbatur, nec tantam movere hominum expectationem, ut tamquam in magno discrimine exanimarer. Nunc vero longius progressus, ad Rhetoricen cum pervenerim, tantumque dicendi genus augere debeam, quanto res, de qua dico, sublimior est; incredibili quodam timore perfundor, nec animum qua ratione confirmem in hac meorum virium imbecillitate omnino reperio. Miserrum est enim, ne dicam turpe, de Rhetorica disputantem nihil afferre posse Rhetorica dignum; illamque orationis exilitatem arti ceterarum principi accommodare, quæ, de minutis rebus cum sermo esset, vix toleranda videbatur. Licuit de Grammatica sive summis, sive tempera-

te

te dicere, licuit de Humanitate: nunc autem nisi rerum ubertate ac magnitudine, nisi verborum ac sententiarum splendore, nisi vocis & gestus dignitate ostendimus eloquentiam ipsam in rostris esse, officio abutimur ac nomine tanto, abutimur celebritate hac, tempore, loco, patientia vestra plane abutimur. Neque vero tacere licet, ubi facultas hæc nostra malevolorum obrectationibus in magnam invidiam adducta, nobilissima sui parte, hoc est elocutione periclitatur. Increbuit enim sermo, latiusque ad ignaviam fovendam quotidie disseminatur, eloquentiæ nervos & gravitatem infringi verborum ornatu, frustra que adolescentes in elocutione paranda ad multam ætatem laborare. Id ego si mihi obrudi patiar, saxeus plane sim; si me tacente, obrudi aliis, turpissime videar mearum partium oblitus. Excusso igitur timore omni, ipsaque erectus Scholæ vindicandæ necessitate, hoc ipsum contendo in Rhetorica tradenda præcipuum esse, quod isti minimum putant, delectum & collocationem verborum: idque ita contendo, ut nisi penitus in aures vestras animosque inseruero, totum hunc studiorum nostrorum ordinem improbari velim, meque meosque omnes ab hoc intento cursu ad litterarum elementa tanquam ad carceres revocari.

Age, congrediamur. Quid est quod ægte ferant, nos in verborum cura tantopere occupari? Quoniam, inquiunt, ex tri-

tribus eloquentiæ partibus invenire ac dis-
ponere prima sunt; eloqui verò postre-
mum, minimique laboris, minimæque di-
gnitatis. Hic ego non tam doleo, quod
in illam artem disputant, cujus naturam,
& rationem ignorant, quam quod nomi-
na ipsa rerum non assequuntur, sibi-
que per summam imprudentiam contraria di-
cunt. Cur enim eloquentiam appellant,
cujus eloqui postrema pars est, cum pos-
sint ac debeant à principe parte suæ fa-
cultati nomen dare? Non decet gravissi-
mos homines eorum auctoritate moveri,
qui cum statuissent eloquendi virtutem in
oratore supra ceteras eminere, non eum
inventorem, non compositorem, sed elo-
quentem appellarunt. Quid non ludum a-
periunt? Quid tandem suam istam doctri-
nam nobis invident? Quid dubitant exire,
veteresque magistros, mutatis & rebus,
& rerum nominibus, docendi gloria disci-
pulisque spoliare? O te beatum, J. Cæ-
sar, si tales vel Romæ præceptores, vel
Athenis invenire potuisses. Profecto non
scripisses, *verborum delectum originem esse e-*
loquentiæ: Miseret me tui, M. Tulli, qui
tibi persuades, ac litteris mandas, *inven-*
tionem ac dispositionem prudentis hominis esse,
eloquentiam oratoris. Non hos audire potui-
sti arcana doctrina viros. Tu quoque, M.
Fabi, doctore indiges, cujus ea vox est,
elocutionis rationem partem operis difficillimam
esse, idque inter omnes oratores convenire.
Falleris; non convenit inter nostros. Ego
equi-

Cice-
ro in
orat. c.
19.

apud
Ciccr.
in Stu-
ro. c.
72.

in O.
rat. c.
14.

lib. 8.
de pro-
cem.

equidem, Auditores, cum diu multumque cogitasset, unde tantum esset quibusdam hominibus eloquendi fastidium, malleque ratione aliqua excusare, quam stultitiæ tribuere, illud unum inveniebam, quod logodædali nescio qui, omissa rerum cura, verbis se totos dedant, quæstionesque gravissimas molli & effeminato dicendi genere sine ulla verecundia tractent. Peccant hi quoque ex parte altera, gravissime peccant, quod debeat esse aliquid, ut in rebus omnibus, ita in elocutione satis: sed tamen turpissimum est, quod Græci dicunt, * *κατὰ κακὸς ἰσθμὸς*, eoque ornamento oratoriam artem spoliare, quo ferme uno ab aliis distinguitur, & in suo quodam genere collocatur. Qui nimius est in ornando, quamvis non ita bonus, tamen orator est; nec sane alia re ulla, nisi verborum copia & elegantia in oratorum numerum pervenisse Curionem, Oratorum Princeps judicavit. Qui vero invenire potest, sed ornare non potest, is disputator est, Dialecticus est, quidvis est potius quam orator: ut si quæras a M. Tullio de Pisistrato, de Solone, de Clisthene, deque aliis omnibus, qui Athenis dixerunt ante Periclem & Thucydidem, neget oratores fuisse; non quod Civitati omnium bonarum artium parenti per tot annos defuerit ingenium, sed quia defuit ingenium ad eloquendum. Poterant illi quidem, quemadmodum Romæ M. Scaurus, & P. Rutilius, res optimas inve-

* mala
malis
cura-
re.

2.1.3

61. 0

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

11. 11

invenire, apteque locare; verumtamen (ut ipsius Ciceronis verbis utar) *non refert videre, quid dicendum sit, nisi id queas solute & suaviter dicere*. Est enim alia quædam dicendi ratio, loquendi alia; nec debent Rhetorica, & Dialectica iisdem terminis concludi, unaque definiri facultate, quæ *ἀντίσποροι* ab Aristotele dictæ sunt. Idem *Rhet. l. 1. 1.* est utrique propositum, ut quid unaquæque res sit, definiendo explicet; ut separet ab ambiguis; ut in suas partes tribuat; ut genera, ut species, ut quæ antecedunt, quæque consequuntur, notare possit, & singula singulis conferendo dijudicare. Utraque interrogat ac responder, probat & improbat, impugnat ac defendit: sed altera anguste & exiliter, altera copiose & ornatè; illa disputatione, nostra hæc oratione. Quod cum Zeno Stoicorum Princeps ostendere vellet, manus similitudine utebatur, eandemque contractam dicebat esse Dialecticam, explicatam esse Rhetoricam. Quam ego multos putissimos Dialecticos arguere possem, qui olim hac ipsa in urbe habiti sunt oratores, non quidem a vobis, qui rectè sapitis, sed a multis tamen non infimi ordinis hominibus, quod ambiguas quæstiones ad rostra afferentes acute subtiliterque differerent. Sed nolo in eam invidiam recidere, quæ tum mihi conflata est, quod eos oratores non putarem. Prodeat in medium Brutus ille, cui tantum tribuere solebat M. Tullius, ut libros de hac arte pulcherrimos ejus maxime

*Cic. in
orat.
c. 32.*

apud
Cic. in
Brut.
c. 11.

me caussa scripserit, & ad eum instituerit: ille, ille, inquam, prodeat in medium, qui ab omni periculo invidiæ tutus affirmare non dubitabit, Stoicos fere omnes & suæ civitatis, & Græcos prudentissimos fuisse in disputando, sed eosdem traductos a disputando ad dicendum inopes esse repertos. Itane igitur sapientissimi viri cum de rerum humanarum contemptu dicerent, de magnitudine animi, de modo, de gravitate, de indolentia, deque alijs hujusmodi; cumque tam multi essent, omnesque ea viderent, quæ in re qualibet optima sunt, & ad persuadendum aptissima; nemo tamen unus ex iis aut eloqui potuit, aut sine elocutione placere? Nihil existimo afferri posse clarius, nihil certius, ut non solum intelligatis, sed oculis prope ipsis videatis, tantam illam oratoricæ artis magnitudinem ac difficultatem, quantæ efficere potuit, ut ex omni memoria temporum ac populorum vetera repetentes nihil rarius, quam præstantes oratores inveniamus, in una propemodum esse elocutione. Hæc oratores facit; hæc illos a ceteris, ipsosque inter se per varia genera, variisque, ut ita dicam, colores vel sola, vel pæne sola distinguit. Etenim cum dicimus orationis genus aliud esse sublime, aliud medium, aliud infimum; cumque in his ipsis generibus Asianos oratores a Laconicis, & Atticos ab utrisque distinguimus, non de iis, quæ dicuntur, cogitamus, sed de modo dicendi; non de

re-

rebus, sed de stilo, qui unus est in magna similitudine rerum pro cuiusque natura & exercitatione diversus. At enim stili nomine non verba solum, sed sententiæ quoque significantur. Ita videlicet: sed nulla tamen sententia illustris est, nulla Oratore L3. de orat. cap. 6. & in orat. c. 44. digna sine apta comprehensione verborum. Tuæ sunt omnes, M. Tulli, singulares, exquisitæ, ac prope divinæ sententiæ: ipsæ tamen illæ & cum dicerentur, ingenti Populi Romani admiratione exceptæ, & cum scriptæ sunt, totius Orbis omniumque ætatum consensione probatæ, si dura & inquinata aut Apuleji, aut Tertulliani, aut Marcellini dictione scæduntur, non secus ac pulcherrimæ matronæ obsoletis sordidisque vestibus indutæ, pulchritudinem omnem ac dignitatem amittent. Contra vero nulla est tam minuta sententia, tam nulla vulgaris, quæ Tulliana periodo comprehensa, Tullianis floribus ornata, Tulliano colore picta, non in aliam statim naturam migret, auresque hominum & novitate capiat, & suavitate detineat. Hoc vero non oratoribus proprium, sed etiam poetis esse commune cum ipsa probat artis utriusque cognatio, tum vir acutissimi ingenii T. Tassus animadvertit; qui de Italico Casæ epigrammate cum dissereret, ostenderetque præcipua ejus lumina esse verborum, sine ulla dubitatione affirmavit, communes tritasque sententias, elocutionis splendore illustratas, reconditis atque eximiiis, sed luce carentibus & ornatu, longissi-

gissime antecellere . Verum de poetis nihil ad nos : oratores quidem certe nisi huc labores omnes cogitationesque conferant , ut quæ invenerint , concinne & eleganter efferant , nihil invenille , nihil tenere videbuntur , vacuisque subselliis verba facient . Sin autem mirabili hac augendarum rerum & ornandarum virtute valerint , nihil tam modicum de administranda Rep. dicent , nihil de rerum natura , nihil de juris legumque scientia , quin plura & majora scire , quam illi ipsi , qui hæc tractant , judicentur . Est enim composita & expolita oratio instrumentis illis non valde dissimilis , quæ oculis admota ex una quidem parte res minimas in immensam magnitudinem amplificat , ex altera vero maximas ita contrahendo minuunt , ut vix esse , aut aliquo in numero esse facile credentibus persuadeant . Tale sibi quippiam , nisi fallor , Isocrates proponebat animo , qui oratoriam artem cum definiret , hoc totum volebat esse facere de parvis magna , de magnis parva : quod cum diceret , perspicuis sane verbis ornandi copiam & varietatem significabat . Quæ enim re ipsa parva sunt , omniumque experientia & confessione parva , non aliter fieri magna possunt , quam si multiplici ratione explicata , & per varia figurarum genera fusâ ita pingantur , ita colorentur , ut auditorum animos mentesque præstringant . Hæ sunt præstigiæ illæ , a quibus sibi suisque civibus cavebat Cato , qui Car-

nea-

Plu-
tar. in
Vita
Isocr.

neadem Atheniensium Legatum cum audisset ita pro justitia dicentem, ut nemo non assentiretur, eundemque rursus ita, quæ dixerat, impugnantem, ut omnes sententiam mutarent; ejicite, inquit, hunc hominem, cui nihil persuadere difficile est. In quo ego Catonem, si hominis mores damnavit, non reprehendo; si eloquentiam, Catonem in Catone requiro. Huc spectabant Leontinus Gorgias, Trasymachus Chalcedonius, Protagoras Abderites, Prodicus Chius, Hippias Eleus, cum *docere se profitebantur*, *quemadmodum causa inferior dicendo fieri superior posset*. Ingens sane promissio, & nimium fortasse audax, nisi quod tanta est elocutionis vis, ut novam quandam rebus formam inducens humilibus dignitatem tribuat, parvis magnitudinem, obscuris lumen, abjectis nobilitatem. Itaque in hoc qui dominatur, viresque suas & facultatem sentit, gloriatur per me licet, se vertere posse omnia, imponere omnibus, trahere, impellere, concutere, forum curiamque totam permiscere. Videtis, opinor, Auditores, in quo ea posita facultas sit, quæ nobis ad docendum proponitur: neque vero illi non vident, qui adversus nos disputant, sed quod assequi non poterunt, satis callide aspernantur. Verumtamen novimus homines: clament, irideant, Nizolium, Doletum, Calepinum nobis objiciant; numquam obtinere poterunt, ut desipiamus. Id antea si didicissent,

Cic. in
Brut.
cap. 8.

D sent,

sent, unde nos avocare conantur, efficere aliquid fortasse possent, quia ne eloquentia quidem ipsa oppugnari potest sine eloquentia. At vero illa sua jejunitate inopiaque sermonis tantum abest ut quippiam a nobis exprimant, ut modo risum moveant, modo stomachum, modo etiam miserationem. Quid quod etiamsi non tanta esset in eloquendo vis, non tanta dignitas, non denique difficultas tanta, quantam ex iis, quæ diximus, quilibet cognoscere potest; nihilo tamen secius puerorum studia, nec puerorum tantum, sed etiam adolescentum in verborum iudicio & constructione diutissime teneremus? Est enim præceptoris non desipientis sequi naturam, & ea singulis ætatibus addiscenda proponere, quæ singulis aptissima sint. Valet memoria juvenus, ingenio non satis valet; quin ea juventuti tradimus, quæ non tam ingenio indigent, quam memoria? Quid Stoa, quid Peripatus, quid Academia ad hanc ætatulam, ad hoc ingeniolum? Ipsum illud Philosophicum pallium, ora hominum ad rerum gravissimarum tractationem composita, ipsa scholæ species, nomen ipsum sapientiæ severitatis plenissimum accedentes perterrebit. Nullus est in Philosophia locus tam planus & facilis, quam qui de moribus inscribitur & officio: hunc tamen ipsum cum explicaret Aristoteles, adolescentem procul esse jubebat, & aliunde sibi, quæ discerent pro ætatis suæ viribus,

Ethic.
I. I. C.
p.

bus, comparare. Aut igitur nihil est, in
 quo ætatem primam exercere debeamus,
 aut una est verborum cura, quæ cum
 tam necessaria sit, quam est a nobis mul-
 tis rationibus confirmatum, cumque tam
 minuta appareat, ut neque viros deceat,
 neque senes, non potest nisi per sum-
 mam stultitiam a Rhetoricis scholis able-
 gari. Sed ablegetur, si Diis placet, ab-
 legetur: succedant ejus loco spinosæ Dia-
 lecticorum ambagēs, ambigua Juriscon-
 sultorum formulæ, retrusæ Philosophorum
 idæ; traducatur per hæc adolescentia;
 veniatur ad rostra: quid tum? Nonne vi-
 des, te populum habere judicem, hoc est
 qua parte minime vales, plurimos homi-
 nes, qua aliquis es, modo centesimum
 quemque, modo nullum? Itaque cum
 paucissimis placeas communiōne studiorum,
 plerisque omnibus insanire videris, Philo-
 sophica quædam delibas, & feliciter ex-
 plicas? Euge, Lucretius annuit. De pu-
 blico privatoque jure sermonem infers, sci-
 teque disceptas? Euge, Scævola probat.
 Altius assurgis, & siderum motus descri-
 bis non inepte? Euge, Manilius laudat.
 Interim verò in verbis peccantem ceteri om-
 nes reprehendunt, puerique ipsi, * *ὅς τις* * Tan-
ἀμάρτυς ἀλλήλους, impune irrident. En, in- *quæ e*
 quiunt, præclarum Oratorem, qui ne il- *plau*
 lum quidem sermonem callet, in quo se *ἀπολύ-*
 jaciāt. Audisti solœcismos? Vidisti quo o- *quæ*
 re, quam duro, quam impudenti in ma- *tes.*
 gna civitatis luce, velut in umbra ludo.

que nostro, ea diceret, quæ nulla posset Latini Scriptoris auctoritate confirmare? Ubi illa invenit adverbia *intrinsece*, *extrinsece*, *amodo*, *cælitus*, *divisim*, *fusim*, *jure merito*, *private*, *durissime*, *gnare*, *diversimode*, *seorsim*, *sepe*, *sepius*? Ubi verba *ablactio*, *abhorresco*, *elucesco*, *insolesco*, *correspondeo*, *exardeo*, *elucido*, *frigesco*, *irritio*, *intertexto*, *obtenebro*, *promano*, *unio*, *subintelligo*? Ubi nomina *historiola*, *historiuncula*, *derisio*, *extemporaneus*, *gratitudo*, *intimior*, *ostensio*, *versutia*, *valor*, *oscitantia*, *ironicus*, *panicus*, *cælicus*, *promittitudo*, *sublunaris*? Ut nihil pudet! Quid illa, inquit alter, quæ ferrea cum sint, ferreisque pejora, populo tanquam aurea venditavit? *Influxus* & *ingratitudo* Firmici; *latinior* & *latinissimus* Hieronymi; *incapax* Prudentii; *licite* Orosii; *proficius* Cassiodori; *titillamentum* Fulgentii; *nullatenus* Capellæ; *econtra* Servii; *accino* Diomedis; *adinvicem* Augustini; *abjuratio* Isidori; *certitudo*, *collimo*, *nuspian*, *versio*, *multoties* fortasse nullius. A barbaris ad *σέλινα* & impropria descendunt, sibi que invicem magno cum risu memorant *erubesco* negligentie; *gratulor* tecum, ut tu inquis, *siquæ* studia, *materna* lingua, *abs re*, *semel* & *bis*, *si fortasse*, & sexcenta. Talia qui ferre libenter potest, & fieri puerorum fabula, verborum curam abjiciat: sed nobis tamen aliquanto verecundioribus nolit esse molestus. Qui vero ferre non potest, mature incipiat de verbis quærere, & in memoriæ thesaurum ad prima quælibet reci-

recipienda paratissimum selecta recondere. Atqui non desunt, qui serius in viam revocati velis remisque conentur, summoque labore & ingenio adolescentiæ damna rependant. Non desunt enimvero, quia non debent ad hanc rerum humanarum pulchritudinem & varietatem nec in natura, nec in civili administratione, nec in litteris deesse monstra. Sed isti tamen, ut cetera consequantur, numquam profecto ita flectent orationem, quin ex orbe universo labor appareat ac difficultas, qualis in citharædo, qui sero fidibus didicit, obduratosque ætate digitos pertinaci exercitatione nonnihil mollivit. Et hi quidem nostri sunt, sed longo tamen intervallo nostri: quippe elocutionem probant, sed elocutionem similem suæ, ne ipsi non optima consecuti videantur. Nolunt sermonem nudum & rudem, sed si paullo sit ornator, tanquam muliebre & effeminatum rejiciunt. Nihil mite laudant, nihil suave, nihil fluens; sed vehementia, concitata, vibrantia; horrida etiam sæpe & antiqua; trunca & aspere cadentia; strigosa, hiulca, rigida, dissipata. Genus hoc orationis puræ & emendatæ, sed neque factæ, neque conclusæ libenter arripitur ab adolescentibus, tum quod numero caret, in quo tota est ducendæ periodi difficultas, tum quod crebris hiatibus consistens; gravitatem habere videtur, levesque sententias strepitu ipso sustinere. Ego equidem hoc malo, quam nullum; cetera

ra, quam hoc. Neminem enim vidi, qui cum posset ornate ac numerose dicere in hoc præsertim epidictico genere, in quo uno Latina eloquentia a foro curiaque pulsa denique constitit, non ita mallet, quam numeros incidere, & per abrupta inæqualiter ferri, seu potius subsultare. Adde quod Romani ipsi, quorum eloquentia non ad pompam, sed ad pugnam nutriebatur, non ante se foro populique judicio committebant, quam omnes orationis delicias sibi comparassent, vel comparare conati essent; non ut iis ubique uterentur, sed ut, cum res postularet, uti possent. In ipso enim judiciorum certamine remittenda est aliquando contentio, & judicis animus pacata suavique dictione relaxandus; quod perpetuus idemque cursus non euntis, sed bacchantis esse videatur. Ceterum quod verentur, ne concidat oratio, siquando motum inhi-beant, & moderatius progrediantur, velim eos cum Cicerone aliquanto versari familiarius. Quis illo ardentior, quis incitator, cum in Verrem, cum in Clodium, cum in Catilinam, cum in Pisonem, cum in Antonium invehitur? Quæ vis, quæ actio, qui cursus universa torrentis instar abripiens? Cum tamen satis putat calere animos, impetum cohibet, & ab acerrima contentione ad elegantem expositionem, ad lepores, ad facerías tamquam a Tragicis ad Comica repente descendit. Inde resectis viribus, rursus bellicum canit, crebroque mutato di-

dicendi genere urgendo, jocando, irridendo, execrando ad perorationem accedit, in qua præsertim ostendit, quantum ipse elegantia valeat & varietate, quantum varietas & elegantia valeat in eloquentia. Si ergo vitiosum est suaviter & numerosè dicere, amandetur hinc Cicero, cujus orationes aliquæ suavissimæ totæ sunt, ac pene Isocraticæ, ceteræ variæ, magnaque sui parte ad delectationem compositæ. Cicero autem? Amandetur eloquentia ipsa, quæ nisi splendida est, nisi compta, nisi elegans, nisi numeris perfecta & conclusa, eloquentia non est, sed incondita quædam & ingrata loquendi profluentia. Non ignoro futuros esse aliquos, qui totam orationem hanc ad invidiam detorquentes, dicant hoc ipso die, me rerum inventionem abstulisse oratori, inanem verborum sonitum reliquisse. Sed utcumque dicant, qui omnia referunt ad reprehensionem: ego illud primum dico, res oratori necessarias esse, quia probare necessitatis est; sed rebus fidem artificio verborum afferri, verborum artificio derogari: deinde dico, inventionem esse veluti solum & fundamentum elocutionis; sed illam ad multas facultates, hanc ad Rhetoricam solam pertinere: denique dico, inveniendi facilitatem longe melius, quam in prima, in aliis ætatibus comparari posse; facilitatem eloquendi nisi in prima & altera comparari non posse. Hæc nos in verborum studio detinere solent; hæc detineri nolentibus.

prædicamus. Hæc eadem Ciceronem, hæc Quintilianum, hæc ceteros dicendi magistros impulerunt, ut eloquendi præcepta multo plura scriberent, nobisque diligentius commendarent, quam inveniendi simul & disponendi. Itaque qui contra nos dicunt, non nos quidem adversarios habent, qui nulli sumus, sed viros in hac arte totius antiquitatis peritissimos. Quamquam neminem ego eloquentem virum contra dicentem audiui: audiui Theologos, audiui Philosophos, audiui Jurisperitos, audiui etiam clamatores aliquos, sed qui vel ingenii tarditate, vel laboris fuga, vel utroque ab hac laude repulsi, nihil sibi laudandum putarent, nisi quod ipsi præstare possent. Porro cum Theologos nomino, cum Philosophos, cum Jurisperitos, intelligo sane quos viros, quantæque auctoritatis! Sed meum est nihil cum fraude dissimulare, vestrum autem rationum momentis, non hominum opinione moveri. Illi enim quod sibi imperaverint, presse & acute ad veritatem inquirendam disputare, pati nullo modo possunt verborum circuitus, & illam figurarum copiam, quæ in sensus irrepit, eosque tractando ac permovendo, quocumque incubuerit, sequi jubet. Liceat illis amare sua; sed nobis quoque liceat amare nostra: illi subtiliter differant, nos eleganter; illi strictim, nos late; illi ad sapientes, nos ad populum; illi vera, nos non tam vera, quam vero similia. Quod
 si ob-

si obtinere poterimus sine pugna , præclaro fœdere juncti , Apollini Musisque litabimus : sin minus , æterna bella sustinere parati sumus , te duce atque auspice , Princeps Eminentissime , qui magno ingenio præditus optima vides , magna prudentia jubes , magna constantia tueris .

Edita est Patavii an. 1715. deinde alibi , addita hac Auctoris Epistola

A D L E C T O R E M .



*S*ive fato aliquo fiat , si-
ve tanta illa deterio-
rum orationum copia ,
que in lucem quotidie
mittuntur , certe fit , ut
in summa bonarum ar-

tium felicitate magnum sit eloquentiæ
fastidium , nec jam oratorem nisi de-
verendis Religionis mysteriis dicentem
æquo animo toleremus . Hinc & qui li-
bros parant , & qui typis mandant ,
ita sibi orationes cavent , ita omnes pæ-
ne ominosas putant , ut non modo ob-
latas rejiciant , sed (quod alicubi conti-
git)

git) ne sibi offerantur, propositis publice monitis, mature diligenterque provid-
deant. Quod si quis ea patientia et
humanitate est, ut donari sibi aliquam
sinat, non ea conditione accipit, ut ar-
tificio distincta sit, non ut electis ver-
bis gravibusque sententiis composita, non
ut equaliter constanterque ingrediens, et
in omnia genera prudenter fusa; sed
ut variarum rerum eruditione exagge-
rata ab orationis forma quam longissi-
me discedat, et quaedam quasi dispu-
tatio talia querenti seculo videatur.
Quasi vero domina illa fori, domina
curie eloquentia, ceterarum facultatum
apud Græcos Latinosque facile princeps,
nugatorium aliquid sit; nec diutius in
re litteraria ferri debeat, nisi suam il-
lam verborum copiam splendoremque
abjiciat, et in aliam quamdam facul-
tatem evadat. Audi-vi ego homines,
audi-vi, qui totum eloquendi studium
contemnerent; nosque pro sua quadam
bonitate monerent, ne miseros adolescer-
tes tantopere de verbis sollicitos redde-
remus. Id me potissimum movit, ut
ela-

elocutionis causam susciperem; et) quantum fieri per me posset, ostenderem, nihil tam esse ejus ætatis proprium, quæ Rhetoricis vacat, quam diligens ac diuturnum verborum studium. Itaque primum artem ipsam, tum eorum naturam considero, quorum mihi studia commendantur; unde partes existunt orationis duæ. Atque in prima quidem elocutionem potissimam esse oratoris virtutem ex nomine ipso confirmo; deinde ex Cæsaris, Ciceronis, et) Quintiliani auctoritate; tum quod sola sine inventione satis bonum oratorem faciat, inventio sine illa non faciat; postea quod eloquentiam ab aliis facultatibus distinguat; deinde quod oratorum genera inter se diversa constituat; postremo quod faciat de parvis magna, de magnis parva, in quo totam esse eloquentiæ vim Isocrates existimavit. In altera vero parte ita urgeo, quod institui, ut nihil magis adolescentiæ convenire, quam verborum studium, nihil verborum studio convenire magis, quam adolescentiam contendam. Itaque per quamdam

ᾧ τοῦτων ejus ætatis vitia subjicio, quæ, Verborum cura primis annis ommissa, ad dicendum accedit; multisque confirmo, perfectum oratorem esse nullum, nisi qui studiorum suorum tempora ab ipsa pueritia recte distribuit, et) ætati cuique propria mature assignavit. Hæc ii si legent, quos maxime optamus, desinent, ut spero, aliquando illorum calamitatem dolere, quos in hoc studio ferme uno diu multumque occupatos detinemus. Quod si non desinent, pergam nihilominus incudem hanc validissime tundere: neque enim mihi causam, sed vires ad eorum animos expugnandos defuisse putabo.

AD PHILOSOPHIAM

Oratio IV.

Nulla est adolescentibus tradenda Philosophia, nisi historica.



Uod eos fecisse puto, qui primum Abylam & Calpen prætervecti, nova ingredi maria, novasque regiones quærere ausi sunt, ut multis subinde difficultatibus impediti, aliisque ex aliis periculis territi suam ipsi levitatem audaciamque incusarent; id ego hodierna luce facio, qui ex minoribus facultatibus longo mihi usu familiarissimis, tamquam ex patrio littore solvens, Oceanum ipsum tentare cœpi, & Philosophicæ provinciæ velificari. Aliud est enim de oratiunculæ partibus, ac de naturæ principis disputare; aliud syllabas metiri, atque orbem terrarum; aliud denique rerum nomina, ac res ipsas, quæ cælo terraque continentur, ad multorum institutionem definire, dividere, illustrare. Nullus hic verborum globulis locus, nullus translationibus, nullus antithetis; exulat elegantia, jacet amplificatio, artificium omne figuræque frigent; quibus juventuri nostræ ali-

aliquando imposuimus, & in dicendo esse aliquid visi sumus. Quamquam sit hoc difficile multis, qui se Rhetorico ludo conclusos existimant, umbræque illius terminis tota vita circumscriptos; mihi vero non debet esse arduum, nec inusitatum, qui ab ipsa adolescentia ex loci hujus institutis in omnes disciplinas excurri, qui Philosophiam ipsam triennium professus sum, qui demum ita in oratoria facultate constitui, ut non eam Quintiliani præceptis definiri putarem, sed infinita quædam artium ac disciplinarum cognitione comprehendere, quibus pro re nata (quantum quidem popularis artis natura patitur) in foro, in curia, in judiciis uteretur. Accedit, quod ex omnibus disciplinis nulla est tam eloquentiæ conjuncta, quam Philosophia, quæ ne distincta quidem ante Socratem fuit; & tum per illum distincta est, pristinae tamen communionis memoriam adeo retinuit, ut consecutis inde temporibus Philosophi præstantissimi nimis contemplationis laborem, scholæque severitatem dicendi exercitatione temperare consueverint; & oratores eloquentissimi a fori curiæque tempestate in Philosophicas litteras tamquam in portum aliquem se se recipere. Verum, utcumque est, juvat fidem solvere tribus ab hinc annis vobis obstrictam, & id, quod sentio de hujus facultatis studiis, non ex officio solum, sed ex more quodam meo, mihi que insita dicendi libertate sine ulla

tre-

Cic. de
Orat.
l. 3. c.
19. &
Quin-
til. l. 1.
procr.

trepidatione patēfacere. Ego equidem, Auditores, & ab aliis sæpe quæsi, & mecum, ipse reputavi, quid causæ esset, quod cum adolescentes in Philosophicis scholis diutissime teneantur, nihil tamen inde nisi præjudicia quædam plerumque colligant, quibus quasi superstitione adstricti ne fieri umquam Philosophi possint, impediuntur: cumque & ejus ætatis imbecillitatem, & scientiæ naturam, & communem docendi rationem attente considerassem, in eam denique opinionem veni, ut existimem, constanterque defendam, nullam Philosophiam, seu veterem sive novam, adolescentibus tradendam esse, nisi historicam. Historicam porro cum dico Philosophiam, differendi studium prorsus excludo, & grandia illa Academicorum, Peripateticorum, Democriticorum nomina adolescentibus adimo, quæ consequi tam mature nequeunt, nec vero umquam consequentur, si immature affectabunt. Hoc ut ostendam, multa mihi de tota ratione Philosophiæ, multa de adolescentum ingenis, nonnulla etiam de magistris dicenda erunt; in quibus non vereor, ut æquissimos hujus civitatis Professores ne levissime quidem offendam, quos extra omnem ingenii aleam multis in rebus perspecta sapientia, ordinis dignitas, fortuna loci, & quod longe maximi momenti est, Principis judicium constituit. Non eadem est ratio privatæ, publicæque scholæ; quæque nos in hac umbra nostra angustis.

gustissimis definita regionibus vel probanda, vel saltem ferenda ducimus, ea si in tantam illam lucem hominumque conspectum afferantur, vel nimis exigua sunt, vel etiam fortasse inepta. Imo ne nostris quidem ita dico, ut statim majorum instituta mutari velim, novamque iniri philosophandi rationem: quippe mihi ipse imperavi, nova multa, si fieri per me possit, excogitare, sed paucissima facere.

Scholarum fere omnium consuetudine receptum est, ut Rhetoricis studiis Philosophica statim succedant, quod hæc omnibus disciplinis communia sint, viamque ad contemplandum, & intelligendum patefaciant. Sive enim Medicus esse velis, sive Theologus, sive Jurisperitus, sive demum ad poesim, aut eloquentiam redire, faciem veluti quamdam facultatibus ceteris præfert Philosophia, illis se omnibus inferit, magnamque sui partem pro cuiusque necessitate liberalissime suppeditat. Sed cum philosophandi rationes multæ sint, maximeque diversæ, nulla est earum tam diligenter colenda, si fructum quærimus institutionis, quam quæ latissime patet, & ad quamlibet disciplinam contendentibus auxilia plurima ferre potest. In quo si Philosophos ipsos consulamus, hanc sibi quisque laudem magnis clamoribus sumet atque arrogabit; sin autem ratione agamus, facile reperiemus, non vetus philosophandi genus, aut novum, non Academicum, non Stoicum, non

non Peripateticum tot tantisque rebus sufficere; sed unum illud, quod omnia cum veterum; tum recentium Philosophorum dogmata, sine ullo partium studio descripta & exposita complectatur. Si enim Theologis Aristoteles potissimum & Plato, si Pythagoras Mathematicis, si Moralibus Socrates, si Solon & Lycurgus Jurisperitis, si Medicis utiles illi sunt, qui non tam contemplando, quam experiundo philosophantur, ad omnes istorum libros adolescentes ducendi sunt, omniumque doctrinis instituendi, ut quocumque tandem sive necessitate, sive consilio, sive etiam casu aliquo deferantur, munitissimi accedant. Neque vero hoc tam est infinitum, quam sibi aliqui fortasse fingunt. Ita me Superi ament, ut multo plus operæ ac laboris infumunt, qui uni se Philosopho dediderunt, ejusque cogitata omnia per ambages æternasque lites proposita addiscunt, quam qui Philosophorum omnium opiniones simplici narratione conclusas memoriæ mandant. Ut enim principem totius Philosophiæ locum attingamus, nonne facilius est naturæ principia, quæcunque sunt pro sectarum varietate inventa, litterisque tradita, in medium afferre, & sine ullis controversiis explicare, quam se totum ad unius hominis auctoritatem conferre, cujus dicta innumeris quæstionibus enucleanda sint, argumentis munienda, privatis publicisque experimentis propugnanda? Memini ego,

E

me-

memini, quam multis non diebus, sed mensibus, quantoque cum tædio ingentia illa volumina aliquando volutarem, in quibus de Aristotelica materia, de forma, de privatione tantopere disputatur, nihilque demum percipitur, nisi hominis unius sententia, acuta certe quidem & Aristotele digna, sed immensis difficultatibus involuta, anceps, ambigua, & antiquis oraculis pæne similis. Animadverti sæpenumero, quam totum illud scrutandæ naturæ genus auditoribus identidem oscitantibus displiceret, cum magno verborum apparatu, magnaque animi contentione quærerem, *utrum privatio esset aliquid; utrum cum materia & forma componeret totum; utrum totum ipsum a suis partibus simul sumtis distingueretur; utrum materia potentia esset; utrum sola posset existere; utrum nihil, an non ens appellari deberet;* & id genus alia alio tempore, & aliis hominibus fortasse pulchra. Sed hæc cum more facerem institutoque majorum, nec aliter facere vellem, quam iuberer; id tamen inde usque decrevi, siquando mihi dicendi publice copia daretur, totum hoc, quidquid est operæ, improbare, & historicum quoddam philosophandi genus proponere, quod varietate rerum & facilitate juventutem alliceret, & sinē fatietate detineret. Quanto enim est ad docendum liberalius, & ad discendum expeditius, si dicas, res omnes apud Pythagoreos materia numerisque constare, hoc est materia certo partium numero compacta;

pacta ; materia & ideis apud Platonicos ,
 hoc est materia per varias divinæ mentis
 ideas varie disposita ; apud Peripateticos
 materia & forma , hoc est materia per
 suas formas absoluta & perfecta , & in
 certis rerum generibus collocata ? Quod si
 addas infinitum Xenophanis & Melissi ,
 chaos Empedoclis & Anaxagoræ , plenum
 & inane Democriti , frigidum & calidum
 Parmenidis , terram Hesiodi , aquam Tha-
 letis , aerem Anaximenis , ignem Heracli-
 ti , tantumque in singulis immoreris , quan-
 tum satis est ad explicationem , jam id ef-
 fecisti in parte totius Philosophiæ difficilli-
 ma & implicatissima , quod omnes de-
 beat adolescentes non dicam ingenuos , &
 ad studia natos , sed etiam bonarum artium
 osores mirifice delectare . Ex quo etiam
 fieri potest , ut illi ipsi , qui consuetudine
 potius , aut otio quodam , quam philoso-
 phandi cupiditate Philosophos audiunt ,
 multiplici hac & expedita cognitione pel-
 lecti , aliarum rerum cogitationem depo-
 nant , & in hoc studio perpetuo consistent .
 Quamquam quis est unus ita philosophan-
 di cupidus , & ad has præsertim Dialecti-
 corum ambages , unde gravissimæ facul-
 tatis initia ducuntur , ita factus , ut eas sta-
 tim avidissime arripiat , & sine ullo magi-
 stri artificio persequatur ? Omnes ferme
 adolescentes , quicumque ingenio aliquo &
 industria valent (tardis enim & inertibus
 æque omnia solent esse molesta & imper-
 via) omnes , inquam , istiusmodi adole-

scientes a suavissimo musarum amplexu inviti divelluntur, ut ad severissimos homines Zenonem & Aristotelem adducantur; nec mihi adhuc inventus est ullus, quin ipso in limine valde palluerit, tamquam ab amœnissimis hortis in vepres & dumeta compulsus. Quod siqua ratio est terroris hujus vel tollendi prorsus, vel minuendi, ut certe non deerit differendi libidinem coercenti, quid est cur nolimus auditoribus hilaritatem, & scholis frequentiam comparare? Sed hæc de illis, quorum vitæ ratio dubia est, necdum quo tendant, certo consilio constituerunt. Agedum ad illos veniamus, qui politiorum litterarum cupidissimi, eo curas omnes ac studia referunt: neque enim omnes tam brevi oratione complecti possumus, neque tamen illos omittere debemus, quorum ipsi laudem & gloriam sequimur, tametsi non assequamur. Jam porro cum litterarum & eruditionis nomine veterum scriptorum interpretatio præter cetera contineatur, tantumque pateat provincia hæc (nequid supra hominis vires ab homine postulemus) quantum Græcæ Romanæque litteræ; uter de se plura præstare poterit, & magnam illam eruditi personam sustinere, isne, qui totus sit Aristotelicus, vel Platonicus, vel Democriticus, an vero ille, qui Aristotelis, qui Democriti, qui Platonis, qui denique Philosophorum omnium, quicumque in aliquo numero sunt, & familiam aliquam ducunt, opiniones teneat,

neat , alias ab aliis distinguat , & ad auctorem quamque suum , ubicumque inveni-
nerit , referre possit ? Primus quidem ad
pugnandum paratior erit , & siquid inci-
det ex schola sua , Philosophus etiam ju-
dicabitur valde bonus ; sed ubi se alia ex
aliis scholis petita pro Scriptorum varie-
tate offerent , in plerisque deficiet , sibi-
que dissimillimus , nec Philosophus esse videbi-
tur , nec eruditus . Alter vero ad philoso-
phandum nullo certo genere acer , sed in
omnibus tamen diligenter instructus , per-
petua quadam , sibi-que consentiente do-
ctrina in omni antiquitate versabitur , &
quidquid occurret ex Philosophia , cujus-
cumque tandem sit ætatis , cujuscumque se-
ctæ , cujuscumque hominis , ita pertracta-
bit , ut id potissimum profiteri videatur ,
nec tamen ad loquacitatem & contentio-
nem profiteri . Vix dici potest , in poeta-
rum præsertim interpretatione quam mul-
ta requirantur ex omni Philosophica hi-
storia depromta . Stoici quidam sunt , non-
nulli Epicurei , plures Socratici ; sed ne-
que Academici desunt , neque Peripatetici ,
neque Pythagorei , & in uno sæpe car-
mine multorum Philosophorum placita
conjunguntur . Accedat huc aliquis ex il-
lis , qui tantopere sibi placent , quod se-
ctæ alicujus nomine censeantur : hærebit
identidem , dubitabit , hallucinabitur , mo-
do librarium negligentia , modo Poetam
obscuritatis postulabit , & ipsa illa , quæ
recte dicet , timide , cunctanter , ambigue ,

quasique divinando dicet . Ex hac totius Philosophicæ eruditionis ignoratione magna quædam Criticis scribendi seges exorta est , qui Homerum præsertim tamquam ineptum fabularum auctorem condemnarunt , quod multiplicis sapientiæ semina , ex vetusta Ægyptiorum ac Phœnicum disciplina collecta , fabulisque conclusa non intelligerent . At enim paucis loquimur ; nec tanti est in litteraria Rep, Grammaticorum & Rhetorum ordo , ut statim Philosophicæ institutiones ejus causa mutandæ sint . Non omnia brevissimo tempore afferri possunt , ut ante dixi : verumtamen si numero agenda res est , non eruditos modo , sed universam hominum societatem complectar , quibus ad honeste colloquendum , seque mutuis sermonibus oblectandum tanto magis studium hoc nostrum plurima cognitione diffusum prodesse ostendam , quanto pulchrius est multis in rebus versari dicendo posse , quam eodem semper vestigio hærrere , eademque recoquere . Etenim si humanæ vitæ conjunctio nulla re magis , quam honesta quadam & jucunda sermonis communione alitur , quid est quod hominum consuetudines & familiaritates magis ornare possit , quam collecta hæc ex omni Philosophiæ genere , de quacunque re , quæ in disceptationem cadat , dicendi copia & prudentia ? Etsi autem non omnis de rebus Philosophicis controversia est , nulla tamen ceterarum facultatum

tum tam ipsa per se constat, quin ad veteres Philosophos, unde omnis profuxit cujuscumque generis scientia, aliquo modo referatur; ut qui se hac in parte munierit, nullum doctissimorum hominum sermonem, nullam disputationem reformidet. Itaque si quis est, quem potissimum velim Philosophica historia ad elegantioris vitæ usum erudiri, ii certe sunt, a quibus nobilitas generis, & fortunarum copia nihilo plus scientiæ postulat, quam quantum ad honestas amicitias conciliandas, & probe colendas politissimis moribus satis sit. Nihil enim in amicitia potest esse insuavius, quam intemperantia illa subtilius disputandi, & quæsitæ alternis pæne verbis in uno aliquo genere scientiæ opinio: quo tamen morbo omnino carere nequeunt homines isti molestissimi, qui non multiplicem, sed magnam eximiamque cognitionem e scholis hausitam profitentur. Fac enim illos sibi videri Peripateticos (magnum sane nomen, & antiquæ gloriæ fama verendum, ac pæne sacrum, si loco & tempore usurpetur; ridiculum, si ad ostentationem obtrudatur) fac, inquam, eorum aliquem Peripateticum sibi videri: nullum jam licet inferre sermonem, quin eodem recidatur. Græcorum Remp. attingis? Græcorum, inquit, Aristoteles sapientissimus fuit. Macedonas appellas? Magnum, inquit, Alexandrum instituit Aristoteles. De Rhetore aliquo mentio

est? At ille, Rhetorica præcepta Aristoteles optime scripsit. Ad Philosophum transis? Hic vero magna voce clamat, Philosophorum princeps est Aristoteles. Nihil denique nec infra Lunam, neque supra nominabis, quin ad Aristotelem & Aristotelicos libros, velis nolis, citissime deducaris. Nimirum nihil præterea novit. Quare nobilissimi adolescentes, qui ad unam communis vitæ elegantiam, civilemque convictum instituuntur, ne quando per hæc, aut similia ridiculi fiant, non tam ut multum discant, curare debent, quam ut multa. Ergo, inquiet aliquis, adolescentes illi, qui Philosophi futuri sunt, totiusque gloriæ, aut etiam vitæ spem in hoc studio collocarunt, ceris se claudere finibus debent, partesque illas mature eligere, quas deinde sine ulla aberratione sequantur. Equidem non diffiteor, in re ceteroquin valde plana id unum esse scopulosum atque difficile, quod historica Philosophia satis ornare videatur ad alia pergentes, non satis munire philosophantes. Videte, Auditores, quam nihil dissimulem: sed simul illud pro vestra sapientia cogitate, quam nihil meæ causæ diffidam, qui locum maxime lubricum extrema oratione persequor, & quod ex arte declinare debueram, vel leviter attingere, id totum explico, vestrisque cogitationibus ac prope oculis, quantum quantum est, ingenue subjicio. Age igitur, habete quid sentiam. Mitto, quan-
to

to illi ornamento sit, qui se Philosophum putat, omnium Philosophorum historiam a primo illo inventore Thalete (quantum quidem antiquissimarum rerum memoria concedit) distincte cognoscere ; quæ singulæ sectæ fuerint, quando inventæ, quomodo propagatæ, quamdiu cultæ, qua ratione sublata : mitto ; quam sit etiam necessarium proponenti sua in eodem genere aliena non ignorare. Hoc unum dico, quod maximam vim apud homines sapientissimos habere debet, qui velit ex multis philosophandi rationibus unam eligere, eum temere prorsus facere, nisi omnes sibi ante oculos ponat, accurate perpendat, mature, prudenterque dijudicet. Nisi forte, quod accidit Chærephontri, ut ^{Luc. de lect.} oraculi voce ad Stoicos mitteretur, id sibi quisque promittit, mactatisque hostiis in ipso Philosophiæ limine, de secta eligenda Apollinem sciscitatur. Zeuxin ferunt ^{Cic. de Inv. l. 2. c. 1.} Heracleoten, cum pulcherrimæ mulieris simulacrum ex Crotoniatis virginibus effingere iussus esset ; cumque in palæstram ductus mira dignitate pueros vidisset, ex quorum sororibus formosissimas conijciendo deligeret, non prius tamen delectum habere voluisse, quam virgines ipsæ unum in locum publico consilio conductæ essent, & suismet oculis singularum formam aspexisset ac judicasset. Quod si nos parem in re multo gravissima diligentiam adhiberemus, profecto non committeremus, ut adolescentes nostri Philosophi casu sic-

de
sect.

fu fierent , & unam aliquam sectam fufpicando amplecterentur , contra ceteras propugnandam , quas illis non ratio , fed impetus & incitia reddit invifas . Nihil enim tam ridiculum dici poteft , quam quod ifti respondere folent , quoties interrogantur , quemadmodum Hermotimus a Luciano , quonam certo confilio ducti eam præter cæteras viam inierint , quam fequuntur ; eumque fibi ducem elegerint , cujus præceptionibus irretiti , reliquos omnes nulla re fibi nifi nomine cognitos contemnunt , irrident , & falſi crimine , indicta cauſſa , condemnant . Ecce autem præjudicia illa , quibus homines ab ipſa adoleſcentia occupatiſſimi ad philoſophandum accedunt , & rationi , & ſenſibus iſſis fidem potius negare parati , quam ſuſceptas partes umquam deferere , & aliena probare . Utinam vero hæc ut multi damnant in publicis privatiſque ſcholis , ita tollere conarentur . Sed nimirum facilius eſt recte dicere , quam recte facere . Cur enim qui maxime poſſunt , non tamen occurrunt morbo huic ? Quin ita adoleſcentum ſtudia regunt , ut quoniam ætas illa ad recipiendum aptiſſima eſt , nec Platonem Deum eſſe ſibi perſuadeant , nec Ariſtotelem , neque Democritum , ſed omnes omnium opiniones percurrant , tamdiuque retineant , donec iſſi per ſe , confirmata jam ætate , ſingulas ſingulis conferre poſſint , libereque rejicere , libereque probare ? Sunt illi quidem pro ſuo quiſque

que ingenio valde præstantes , & ea fama digni , quam sibi multorum sæculorum consensu pepererunt , sed nihil profecto est aut a natura , aut ab arte simplici in genere omnino perfectum , maximeque curare debemus , ne cujus doctrina tenellis mentibus altissime consignata ita illas assiduo usu , & quadam , ut ita dicam , familiaritate capiat , ut vitia quoque libenter suscipiant , aliorumque præclare inventis pertinacissime præponant : quod quidem tantum abest a recta veritatis inquirendæ ratione , nihil ut magis veritati possit esse contrarium . Ex quo Philosophi esse cœperunt , satis superque compertum est , convelli præjudicia non posse . Quin ergo curamus , ne fiant ? Quin scholas ea prudentia moderamur , ut odio & amore vacui exeant adolescentes ; ipsique per se libere , cum primum potuerint , philosophentur ? Nam illud quid attinet refutare , quod hæc mihi proponenti quispiam fortasse reponet ; nimis jam esse Philosophorum , nihilque pro tanta copia laborandum , nisi ut sapientissimum mature eligamus , a quo uno quidquid est in ceteris boni , & ipsum per se facillime cognoscamus ? Apagesis . Annon enim hoc ipsum sapientissimi hominis est statuere , quis sit sapientissimus ? Fac porro statuas . Ex veteribusne aliquem , an ex nostris ? Si ex veteribus , Platonis ideæ offendent Aristotelicos , Aristotelis forma non placet Democriticis , infinitæ Democriti atomi non pro-

probantur Pythagoreis, Pythagoræ monas displicet fere omnibus; tantaque se mutuo contentione petunt, ut alius alii non minus quidem sapere, sed plane desipere videatur. Si ex nostris, quis ita ingenii doctrinæque fama omnium hominum suffragium tulit, ut eum sapientissimæ antiquitati, totique Scriptorum ordini sine injuria præponas? Difficile est enim abstinere risus, quoties boni viri ludum aperiunt, magnisque promissis ante denunciant, se non Platonicos esse, non Aristotelicos, non Gassendicos, non Cartesianos; esse in veteribus, esse in novis quod sibi displiceat, esse etiam in utrisque quod placeat; nemini se auctoratos fore, sed ex omnibus optima colligendo, suisque miscendo liberum philosophandi genus ingenti cura & meditatione quæsitum allaturos. Euge, belle, pulchre, tibi Musisque gratulor. Accedant adolescentes, audiant, excipiant, in codicem referant: nihil est editum post homines natos æque divinum; exscribere oportet. Ac mihi quidem ita videtur, nihil esse adolescenti periculosius, quam hujusmodi homines ab initio offendere, qui non vident, quandoquidem certum Philosophiæ genus tradendum putant, satius esse unum aliquod ex illis tradere, quæ probatissima sunt, & auctoris fama commendata, quam suo de nomine Philosophos facere, & cito dediscenda venditare. Sed ego hæc adolescentibus persuadere fortasse potero, magistris persuadere

dere non potero ; qui nullam se laudem referre clamant , si nihil de suo , nisi vocem in scholam afferant . Hoc scilicet eorum vitium est , ut velint non ad discipulorum utilitatem , sed ad ingenii ostentationem docere , nec tam esse magistri , quam videri Philosophi . Sed heus tu , si ratio hæc qualiscumque Philosophiæ illis utilis est , quorum causa laboras , quid est , cur gloriam aliunde quæras ? Satis laudis retulisti , si officio satisfacisti . Præterquam quod itane sentis ex animo , hanc docendi rationem carere laude ? Ergo laude carent Theologi hujus ætatis præstantissimi , qui subtilissimas quæstiones ad exercendum ingenium excogitatas longissime ablegarunt , totamque gravissimam scientiam Scripturæ præceptionibus , Sanctorum Patrum dictis , & Conciliorum decretis concluderunt . Jam isti omnes , qui non sua , sed aliena fideliter referunt , Theologi nomine indigni sunt : inveniant oportet , excogitent , comminiscantur , tum vero sapere videbuntur . Sed alias erit de Theologis sermo : ad Philosophos redeamus , quos ego ab inveniendi non revoco , siquidem possint , sed rogo obtestorque , ut aliam quandam docendi , aliam contemplandi exercitationem esse constituent . Non est Philosophi narratorem agere : at est præceptoris . Historia Philosophica non est Philosophia : at neque possunt adolescentes , neque tam cito cupiunt esse Philosophi . Sed quænam istorum est , Dii immor-

mortales , Philosophia ? Annon humanæ mentis vires cognoscere pro varia corporis conformatione singulis ætatibus varias , pars quædam est , nec sane parva Philosophiæ ? Nunc illi quidem satis cognoscere videntur , quid tradere possint ; non satis tamen , quid illi capere , quibus tradunt . Si enim pro illa , quam sibi arrogant , naturæ cognitione reputarent , eam cerebri partem , qua hominis animus ad ingenii , memoriæque munia , quamdiu corpori conjunctus est , necessario utitur , ita in adolescentibus conformatam esse , ut sua quadam mollitie facile excipiat quidquid injicitur , ea tamen ipsa mollitie impediatur , ne spiritus ad intelligendum facile expediat & moderetur , non sane erubescerent , ætati illi consentanea narrando potius , quam disserendo consignare . Atqui dum sua crepant , dum eadem perpetuo dicunt , repetunt , confirmant , insinuant , non id assequuntur , ut auditores minime apti repente Philosophi prodant , sed ut ejus doctrinæ , quæcumque est , præjudiciis occupatissimi , ac veluti sacramento rogati , nullam præterea pati possint Philosophiam . Quam vero indecorum est , quam incongruum , quam a tota scientiæ natura alienum , adolescentem hominem de rebus abditissimis judicare , decernere , affirmare , & ut ejus ætatis est , tanto magis clamore & audacia , quanto minus ratione potest , susceptras partes propugnare ? Non ego cum
juve-

juventute tam dure agam, ut eam per multos annos Pythagorico more silere jubeam, nihilque respondere umquam, nihil interrogare; verumtamen si Philosophica eruditione contenta sit, nec sapientiam immature affectare videbitur, & in eo tamen valere, cujus præsidio perfectam absolutamque sapientiam comparare aliquando possit. Nam quod ipsa per se intempestive commentari velit, & sine prudentia garrere, iccirco factum est, ut nobilissima disciplina, non hominum ingeniiis parva, sed ut Plato existimavit, Deorum munere nobis concessa, incredibili invidia laboret, nihilque jam de rerum natura tam poeticum fingi posse videatur, quod non ab aliquo fingatur Philosophorum. Hinc modo cum horologiorum inconstantia, modo cum ægrotorum somniis, modo cum andabatarum pugnis a sapientissimis scriptoribus comparata: hinc senatusconsulto a Romanis expulsa, & ad suos Græculos redire iussa: hinc denique a Græcis ipsis simulandi ars sæpe dicta, cujus fama & auctoritas non ipsa dignitate rei, sed singulari habitu, & contemptu ceterorum sustineretur. Quemadmodum enim summi in Repub. Magistratus si vulgari cœperint, & cuilibet ætati mandari, splendorem & auctoritatem amittunt; unde fit ut habitus ipse, & antiqua potestatis insignia ad mores degeneres accommodata irrideantur; ita philosophica studia maximarum tractatione rerum

pæne

pæne divina, postquam in medio posita sunt, & cuique sine delectu communicata, in contemptum abiere, palliumque ipsum pristinae majestatis insigne ad irrisionem traductum est. Ago igitur causam vestram, sapientissimi viri, cum dico, non esse adolescentibus dandum, ut ipsi per se, cum paullum aliquid in schola sederint, statim philosophentur. Cum enim præstare nequeant, quod conantur, tanto nomini injuriam faciunt, & numerum quidem augent, si Diis placet, Philosophorum, sed pretium imminuunt. Ago etiam vestram, Adolescentes studiosissimi, quos cum videam in rerum difficillimarum tractatione magno cum labore fluctuare, ex illo velut Euripo in tranquillum pacatumque mare deduco, ubi & facilitas navigandi jucunditatem pariat, & opportunitas laudem, & modus utilitatem. Ago denique causam tuam, Princeps Eminentissime, qui cum velis, & identidem jubeas, juventutem hanc ad morum & litterarum institutionem tibi conceditam, non garrulam in differendo esse, non acerbam, non pugnacem, genus hoc nostrum adfiscere potes Philosophiæ, quod nullam sententiæ dictionem habet, sed solis narrationibus continetur.

Edita est Patavii an. 1716. deinde alibi, addita hac Auctoris Epistola

AD LECTOREM.



*V*eteres philosophandi institutiones, si numero censeantur, tam multe sunt, ut omnibus cognoscendis ne illius quidem anni sufficere videantur, qui tres hominum etates vixit; sin autem re, ita partim antiquitate obrute periere, partim vero similia continent, ut uno nec immodico volumine Thomas Stanlejus universas comprehenderit. Nihil ergo conficiunt, qui Jonicam sectam, Italicam, Eleaticam, Epicuream, Cyrenaicam, Eliacam, Megaricam, Academicam, Peripateticam, Cynicam, Stoicam, Pyrrhoniā, Potamoniam nobis commemorant; quasi vero immensum aliquod onus oratione hac adolescentibus imponamus, quod viros senesque opprimere possit. Hoc premonere idcirco volui, ne quis lemmate
 ipso.

ipso , quemadmodum sæpe accidit , a legendo deterreatur ; putetque a nobis ea proponi , quæ certis firmisque argumentis non solum non probentur , sed omnino probari non possint . Et vero cum de re hac sermonem apud amicos intulissem , dixissemque videri mihi multis de causis , non Philosophiam , sed historiam philosophicam adolescentibus tradendam esse , primum quidem lapides loqui visus sum , tum id pervici , ut de illis adolescentibus concederent , qui nollent tota vita philosophari ; sed ut ambas manus darent , mihiq; in univèrsam assentirentur , id vero nec exprimere potui , nec ut exprimerem , pro illo , qui in familiaritatibus servari debet disputandi modus , pertinaciter laboravi . Nunc vero tanquam in aciem ductus , nervis omnibus viribusque contendo , primum quidem adolescentibus , quorum vitæ ratio adhuc incerta est , deinde illis , qui Græcam Latinamque eruditionem unice spectant , tum illis , qui ad generis commendationem vitæque elegantiam bonis

nis artibus informantur , postremo illis , qui se totos philosophicis studiis dediderunt , per sectas omnes excurrendum esse , nihilque prater historiam ex tam longo itinere colligendum . Quid opus est pluribus ? Oratoriam scriptionem affero ; nec tam me , quod ostendo , persuasisse iuvabit , quam ad persuadendum non inepte dixisse . Vale .



AD THEOLOGIAM

Oratio V.

*Theologus nemo dici potest , nisi
probus vir .*



Am primo illo , quod mihi superiore anno ad altiores disciplinas progredienti a Philosophis iniciebatur , periculo defunctus , ad ipsum denique Sapientiæ fastigium ascendendo , & in gravissima Theologorum corona , quod bene vertat , alacris erectusque confido . Quo in loco mihi quidem honestissimo , & a prima adolescentia multis laboribus multaue industria quæsito , una me res sollicitum habet , quæ multorum sermone contrita veluti proverbium circumfertur , magnos Theologos nihil credere , & quod inde consequitur , sine Superum metu , ac sine ulla immortalitatis cogitatione suis legibus vivere . Sive autem id ipsorum levitate percubuit , quorum plurimi antiquitatis oppugnatione singularis reconditæque doctrinæ famam quærunt ; sive etiam superbia , quod aliqui revera nihil credant , nisi quod ipsi ingeniolis suis longe minimis consequi possunt ; sive de-
mum

num infana quorundam improbitate , ac ferme desperatione , qui eam sibi necessitatem vitiorum suorum legibus impositam putant , ut ne Deum quidem esse concedant , nisi forte cæcum & otiosum ; id ejusmodi est , ut magna animi provisione caveri debeat , & a nobis , nostrisque adolescentibus tamquam triste aliquid , ac detestabile averruncari . Quamobrem in ipso statim Theologiæ limine , pro eo , quod suscepi , monendæ juventutis officio , huc accedentibus edico , non solum ne exiguum ingenium asserant , quod est a natura impedimentum nulla fortasse industria nulloque artificio superandum , sed quod in cujusque potestate est , ne mores afferant liberos plusquam satis , & ad vivendi licentiam solutiores . Neque vero puteris , Auditores , me fines illos , quos mihi ipse circumdedi , sine causa perrumpere , & in eorum provinciam excurrere , qui cum vitiis & cupiditatibus bella gerunt : sed cum ita mihi videatur , mores & ingenium in hoc studii genere conjunctissima esse , & alterum ab altero mirifice adjuvari , id ipsum publice expono ; & quantum quidem per me licet non mediocris jam usus , sed minimæ facultatis hominem , ostendo , Theologum neminem dici posse , nisi probum virum . Quod si iis persuadere poterō , quorum mihi studia commissa sunt , ipsi se ab obtrectatoribus aliquando defendent , & nobilissimæ disciplinæ gloriam per has insidias petitam justo sacramento vindicabunt .

Priusquam vero rem ipsam aggredior ,
peto a vobis hanc veniam , Auditores , ut
de me , quod sæpe desideravi , pauca di-
cam : nam & brevissime faciam , & ea
moderatione , ut omnes intelligant , me
quidem non de me ipso laborare , sed de
hujus dignitate loci , quem quoniam Princi-
pis sapientissimi judicio tenere cœpi , for-
tissime constantissimeque in omni vita de-
fendam . Audiui , nostrum hoc dicendi ge-
nus planum & æquabile non satis imple-
re capacissimas quorundam aures , qui sa-
les identidem facetiarum , & exaggera-
tam multarum rerum eruditionem non ta-
cita voluntate requirunt . Et ad primum
quod attinet , utrum sit aliquis in nobis
urbanitatis lepos opportune adhibitus , cu-
jusmodi fuit in illis , quos nobis ad imi-
tandum proponimus , nec ipse judicare
possum , nec si possim , dicere ausim ; di-
cacitatis quidem certe & comicæ cavilla-
tionis est admodum nihil . Ut enim lenis-
simum mihi ingenium natura largita est ,
ita neque voci , neque oculis , neque fron-
ti addidit scurrile aliquid , cujus auxilio ad
hanc eximiam laudem dicendo contende-
rem . Nihil vero minus est , quod arte
comparari possit , quam ratio jocandi , &
mimica quædam ad movendum risum pro-
nunciatio : ac siqui comparare conati sunt ,
cum essent suoapte ingenio vultuque ad se-
ria compositi , stomachum & indignatio-
nem commoverunt . Quamquam si me &
natura ad istorum voluntatem conforma-
set ,

set, & tempus ita postulare, ipsi vos mihi gravitate vestra incredibilem verecundiam offunderetis, nec tam me voces quædam adolescentum levitatis indices ad audendum excitarent, quam mehercule primi hujus & alterius subsellii conspectus modestiæ moneret. At enim neque eruditi sumus. Si, quod isti faciunt, eruditio est, sexcenta Scriptorum nomina uno spiritu recitare, fateor equidem neque esse me, neque futurum umquam eruditum; non quod bibliothecis caream, unde talia sumuntur, sed quod longe diversum esse statuam oratoris officium, & quale demum cumque sit, nolim in eorum possessiones irruere, qui per hæc fucum facere consueverunt, seque pulchros beatosque plebeculæ litterariæ venditare. Sin autem eruditio est color quidam antiquitatis, non ille quidem ex librorum titulis semihoræ spatio collectus, & in omni sermone intemperanter fusus, sed ex diuturna priscorum monumentorum tractatione comparatus, eaque parsimonia & prudentia adhibitus, ut non facere ipse orationem, sed ornare videatur, est, si Diis placet, ut de eruditionis laude non omnino desperemus. Atque ut intelligatis, Auditores, quid hoc hominum sit, qui talia postulant, scitote illos non ingenio quidem carere, sed sanitate. Est in quo laudari possint, si sua laude contenti, aliis quoque nonnihil concedant. At vero cum ita populo persuadere velint, se unos sci-

re omnia; neque tamen id honesta aliqua ratione consequi possint, universam litterariam provinciam criminando perturbant, magnumque sui iudicii metum qualiacumque conantibus injiciunt. De his plus satis: ad rem veniamus.

Objiciunt quidam, ut ante dixi, Theologis præstantissimis *disertis*, omnisque, præter eam quæ a natura est, pietatis ac religionis contemtionem. Accusatoribus istiusmodi, qui nullorum omnino, vel paucorum vitia in omnes derivant, non esset mihi difficile audaciam excutere, si quidem vellent hoc in loco tamquam in iudicio calumniam ejurare: sed & illos abesse juvat, & nos ita dicere, ut nihil aliud spectasse videamur, nisi ut adolescentum nostrorum mores optimis monitis præceptisque componeremus. Veteres Socraticæ disciplinæ Philosophi, quorum doctrina Christianis legibus castigata in Theologicam scholam adscita est, non aliter se inter suos numeratum iri putabant, quam si ita viverent, quemadmodum docebant. Hinc magna illa rerum humanarum tolerantia, fortunæ contemptus, projectio divitiarum, mentis consiliique constantia, virtutesque reliquæ, quas in Socrate primum ipso, deinde vero in Aristippo, in Cratete, in Biante, in Diogene, in Anaxarcho, ceterisque Stoicis æquales eorum admirati sunt, nobisque ad exemplum tradiderunt. Neque vero aut Græca juvenus in eorum scholas convenisset, aut ipsi
pru-

prudentissimæ gentis magistratus convenire passi essent, nisi quæ dicerent, agendo confirmassent, totiusque vitæ ratio in publicis privatisque negotiis cum illius severitate doctrinæ consensisset. Tu vero, Theologe, quid mihi de Deo ejusque legibus; quid de Superis, atque Inferis; quid de vitiis, quid de virtutibus prædicas, si ita vivis, ut nihil eorum facias, quæ nos nisi faciamus, æternos cruciatus minitaris? Jam quid restat, nisi ut putemus, te ad ingenii commendationem talia confingere; & multorum credulitate velut ad ludum faciendum abuti? Levissimum est enim, nec omnino ferendum, quod vulgo dicunt, se neque Augustini quærere gloriam, neque Thomæ, neque Bonaventuræ; illos quidem, & præterea paucos illorum similes non communi hominum conditione natos, sed tamquam cælo demissos divinæ humanarumque rerum studio incredibilem in omni virtutum genere exercitationem non sine miraculo conjunxisse. Dii boni, quid ita nugantur? Anne unquam fando auditum est, pietatem pugnare cum litteris, aut opus esse portentis, ut res natura simillimæ conjungantur? Si enim mathematica siderum & planetarum contemplatio, ut septimo de Rep. libro contendit Plato, pios homines facit; si illa ipsa litterarum exercitatio, quæ poeticis fabulis continetur, tamen plurimas habet ad vitæ institutionem opportunitates, ut elegantissima oratione ὁρῶς

τὸν θεόν D. Basilius ostendit; quid est, quod esse possit in Theologicis studiis ad probitatem impedimento, nisi forte illis, qui stomacho laborant, optimosque cibos in pessimum succum convertunt? Neque tamen postulo, ut insignia illa sapientiæ ac bonitatis exempla, ne singula quidem singulis ætatibus visa, Theologi nostri continuo referant, quod esset Theologicis scholis solitudinem ac vastitatem afferre: id quæro unum, quod & facillimum est, & cum hoc litterarum genere suapte natura conjunctissimum, ut æqui, ut honesti, ut moderati sint; nihilque dicant, aut faciant, quod a sacræ professionis scientiæ abhorrere videatur. Cum enim omnes non parum offendere solent alterius cum altero de re tam gravi concertationes, tum nihil potest esse odiosius, quam ejusmodi cum ipso pugna, & tale aliquid, quale in histrionibus videmus, qui cum a scena discesserint, nihil sibi minus agendum putant, quam quod mimico illo habitu professi sunt. Quod si in facultatibus illis, quarum ratio & natura ad contemplandum unice refertur, totusque contemplationis fructus oblectatio est, qui ea ponit auditoribus suis, multumque commendat, a quibus ipse tamquam incertis assensionem cohibet, turpissime peccat; quanto minus ferendum erit, in Theologica disciplina, cujus pars maxima actionis gratia est, & ipsa contemplatio sempiternam beatitatem propositam habet, ea doceri, vetari, juberi,

beri, quæ magister ipse, ubi descendit, ante omnes contemnat, & ad irrisionem etiam, quod ipsum aliquando contingit, animi causa traducat? Qua in re si sibi noceret uni, pessimumque virus in ipso cohibitum, nequaquam glisceret ad aliorum innocentiam inficiendam, nihil insuper laborarem: sed cum ille in magna quadam luce vivere credatur, & cum Superis quodammodo colloqui, multis ad improbitatem exemplo est partim omnino cæcis, partim vero malitiose cæcutientibus; quod minime audeant sine duce & auctore pudenda patrare. Præclara vero Theologi laus, sceleri ducatum præbere; constituere signa facemque improbis; intemperanter, cupide, libidinose & agere ipsum, & agentibus excusationem comparare. Nolite porro existimare, Auditores, vitium ullum in hujusmodi homine modicum esse: omnia summa sunt, perdita omnia, & ad infinitum quoddam malitiæ genus profligata. Qui enim potest rerum divinarum tractationem cum vitiorum cæno componere, & in utroque dies noctesque versari, cum necesse est stimulos omnes extudisse conscientiæ, nihilque sibi ultra vitæ terminos polliceri. Huc ubi ventum est improbitatis, cave hominem reprehendas, aut ullo modo sanare coneris: conclamatum est. Non sibi ab ignorantia, non ab incogitantia, non ab infirmitate naturæ, unde ceteri solent, excusationem quærit: non patitur hoc Theologi

logi nomen; in Superos ipsos causam convertit; partim dubitat, partim negat, partim irridet, callidaque circuitione & anfractu eo denique recidit, ut ex diuturno divinarum rerum studio nihil se certi collegisse significet. Adde huc in familiari sermone identidem jactas de animæ immortalitate dubitationes, de sacrorum librorum sensu, de Ecclesiæ legibus, de alterius vitæ præniis, deque iis omnibus, quorum cogitatio monere homines solet, & in officii religione continere. Ex hoc uno fonte, vel prope uno novæ in dies effluunt opiniones, quas hæreticas appellamus, unde sibi istæ Theologorum quilibet sepe circumdant, causasque prætendunt, ne temere facere videantur, quod ipsi ceteroquin minime omnium facere deberent. Ac primum quidem suis moribus obtegendis talia prætexunt, ad tempus quæsitæ; deinde malo quodam inconstantia metu propugnare conantur; denique vitiosi ingenii pertinacia, & pessima famæ libidine eo usque deveniunt, ut spargant in vulgus, privatim publiceque confirment, nec solum gratia, auctoritate, fortunis omnibus, sed capite ipso, si opus sit, per summam desperationem insaniamque tueantur. Cavete igitur per Deos immortales, Adolescentes, ne moribus incompressis huc accedatis, ubi qui non sit optimus, pessimus, esse necesse est. Nihil artificiose dicimus. nihil perfunctorie, nihil ex illa consuetudine nostra, qua vobis officii jura, pudorem, hone-

honestatem, veritatem ; & in primo litterarum limine, & in Rhetorico, & in Philosophico ludo sine intermissione commendavimus . Est hic peculiare aliquid, quod nos pro vestra gloria & salute vehementer inflamat ; vocemque nostram & contentionem præcipuo quodam modo reposcit . Nam ceterarum professores artium , si in vitio sint , sibi in primis nocent , aliis vero vel nihil prorsus, vel parum, vel in eo nocent , quod non est momenti maximi . Grammaticus, & Philosophus sua sibi malitia obest , nullique præterea ; Medicus aliorum valetudini, Orator fortunis infestus est : at vero Theologus , si malus sit , animum lædit , quæ pars una est in homine excellentissima ; religionem , pietatem , Dei cultum non a se uno distrahit ; non a singulis hominibus eximit , sed a civitatibus & provinciis evellit, ejicit, exturbat . Hinc vero seditiones per omnem ætatem consecutæ , bella civilia , cædes , incendia , rerum pub. mutationes , & siquid calamitosius humanæ societati contingere potest . Testis mihi Germania sit , Helvetia , Anglia , Batavia crudelissimis bellis diu vexatæ atque afflictæ ; testis Gallia ipsa , quæ quamvis ad hanc diem singulari providentia ab hæreticorum insidiis erepta fuerit , identidem tamen a suis Theologis multo etiam gravius , quam ab externis hostibus conflictatur . Quod cum reputo , valde miror , ecquid tam diligenter ac severe illorum ingenia expendantur, qui inter Theologos

logos referendi sunt ; quamdiu , quo loco , quo magistro quisque studuerit ; quæ sit ejus ad res percipiendas retinendasque memoria ; quæ ad interrogandum ac respondendum calliditas ; quam cultus sermo , quam promptus , quam eruditus ; de moribus vero nihilo plus quærat , quam in milite de Theologia . Quamquam ipsa quoque ingenii inquisitio jamdiu cœpit esse remissior , nihilque facilius est homini non stolidissimo , quam Theologum salutari . Sed profecto ita sibi duo hæc conjuncta sunt probitas & sapientia , ita alterum altero nititur , ut a quo æstuantium cupiditatum moderatio non requiritur , ab eo neque cogitandi acumen , nec intelligendi celeritas , neque facilitas explicandi magnopere sit requirenda . Quæ cum ita sint , intelligitis , Auditores , non me Theologis rem utilem commendare , sed plane necessariam ; ut si nolint innocenter integreque vivere , aliud quoddam litterarum genus suscipere debeant , omnemque Theologicæ gloriæ cogitationem abjicere . Est enim Theologia in vehementi quadam altissimarum rerum contemplatione posita , quæ hominem totum occupat , absorbet , & a terra quodammodo abripit ; nec ullam ejus partem avelli patitur , ut in vitiorum fordibus tam dispari studio volutetur . Hoc sibi illa proprium vindicat supra reliquas disciplinas ob infinitam meditandi vim , ut nequeat inesse nisi illis , qui a rebus ceteris alienissimi sint . Cedo mihi , si lubet ,

bet, Ecclesiæ fastos: plures ego tibi Theologos ostendam, qui templis arisque coluntur, quam tu mihi ex omni litteraria Rep. Grammaticos, Rhetoras, Philosophos, Medicos, Mathematicos: Immo (dicam enim quod sæpe animadverti) vix mihi unum aut alterum ex tota antiquitate recitabis tam gravi dignum nomine, ut Theologus appelletur, quin insigni virtute excelluerit, suamque sapientiam non satis per se firmam probitatis accessione confirmaverit. Nihil de illis loquor, quos nondum *Libitina sacravit*: adhuc illis cum invidia confligendum est, quæ quoties a fronte nequit, a tergo, a lateribus aggreditur, & quorum sapientia in tuto est, vitæ morumque famam labefactare conatur. Qua in calamitate, si calamitas est habere aliquid invidia dignum, primum se benefactorum conscientia solari debent, sibi que ipsi perfugium esse; deinde vero aliquid etiam inimicis condonare, qui nihil hujusmodi auderent, nisi plurimi essent, qui se uno eodemque tempore & flagitiis, & Theologicis studiis nobilitare conarentur. Verumtamen aliud est Theologum videri, aliud esse: ac si quis vestrum, Auditores, signum sibi aliquod præberi cupit, cujus ope tamquam Lydio lapide singulos experiatur, sic habeat; vitia pervertere naturam omnem, & cum infimas animæ partes contaminaverint, in ipsam quoque arcem invadere, suisque tenebris obscurare, nequid
ma.

magnopere capiat nisi crassum materiaque concretum: idcirco tam esse difficile vitiis hominibus in Theologica facultate præstare, quam lippis & cæcutientibus in pictura. Nihil est, quod dici possit absurdius, quam in bene constituta Repub. ordines omnes sibi respondere, & in unum quasi corpus coalescere, hominem vero ipsum, ex cujus exemplo Reipub. ratio ducitur, partes habere naturæ quidem nexu colligatas, sed ita officio dispares, ut altera humi depressa flagitiis obruatur, altera prorsus libera in sublime feratur, & purissimis spiritibus se se immisceat. Dum animus corporis custodia continebitur, rerumque imagine sensibilibus indigebit, nisi sensus sedatissimi sint, nisi castigati, nisi prævæ cujuslibet cupiditatis expertes, numquam se totum explicare poterit, viresque omnes ad contemplandum intendere. Minima quæque perturbatio sive amoris, sive odii in supremam animæ partem impetum facit, & ubi certamen nequit, tumultum edit; qui si non est ejusmodi, ut omnem contemplandi ardorem extinguat, illas tamen commentationes interturbando impedit, quæ debent esse intensissimæ, & spiritum a corpore, ut ita dicam, alienare. Quod cum intelligerent utriusque Scholæ Principes, & in quodam veluti portu viverent ab humanæ vitæ tempestatibus remotissimo, numquam tamen Theologicum studium aggrediebantur, quemadmodum accepimus, quin se modo pre-

precationibus, modo votis, modo sacrificiis, modo etiam simul omnibus diligenter expiarent, omnique ceterarum rerum cura deposita, quantum mortali licet, cælesti naturæ conjungerent. In quo uno maxime consenserunt, imitatores habent admodum paucos; in quo sibi contrarii sunt, immensam uterque familiam ducit nimio quodam contentiōis amore, & superandi cupiditate flagrantem: quod maximum est Theologorum vitium nullo meo clamore sanandum, non tamen tacendum. Hinc enim exitium quoddam ortum est pulcherrimæ facultatis, in qua potissimum excellere creduntur, non qui gravissima ad cognoscendum, sed qui subtilissima ad fallendum excogitant: hinc vanæ quædam otiosæque disputationes, quæ mentem a S. Bibliorum doctrina, a Sanctorum Patrum dictis, a Conciliorum legibus, a Pontificum decretis longissime abducunt, & sine ulla utilitate fatigant: hinc pertinax & insanum partium studium, quo fit, ut acerrime decertemus, cum minime oportet; idque viribus omnibus propugnemus, non quod veritati proxime accedit, sed quod iis placet, quorum institutum amplexi sumus. Itane vero, Auditores, tot annos pallebimus; tot volumina diu noctuque teremus; tam multos dicendi scribendique labores non sine valetudinis detrimento, atque adeo cum vitæ periculo suscipiemus; ut id aliquando teneamus, quod nec placeat nisi nostris, neque no-

bis ipsis placere possit, aut debeat, si pallium commutemus? Agedum enim, bone vir, cur ita pronuncias, & ingenti bacchatione confirmas, *virtutes divinæ naturæ tributas nihil quicquam esse ab ipsa distinctum, quantumvis a nobis intelligendi gratia distinguantur?* Itane sentis ex animo? Itane ad docendum, non ad fallendum? Quid si te parentes tui in adversæ partis castra ab ipsa pueritia compulissent? quid sentires, quid propugnares? Contrarium scilicet. Ergo pro tuo illo libello pugnas, in cujus verba jurasti; pugnas pro pallio illo, non autem pro veritate. Tunc igitur me tibi adjungere conaberis; tu te mihi Theologum venditabis, quem video nihil minus quærere, quam veritatem; quem scia contraria prorsus fuisse dicturum, si te vel casus, vel consilium, vel domesticæ rationes alibi vivere coegissent, alioque colore uti? Grave est quod dico, grave est; sed nihil tamen reprehendendi causa dico. Fateor enim præstantissimos utrimque viros & majorum, & patrum nostrorum memoria prodiisse, qui magnam litteris & Ecclesiæ operam navarunt, suisque lucubrationibus immortalī gloria dignissimis multorum nugas compensarunt: sed hi quidem illam habebant, quam postulamus in omni vita probitatem, & cum arma tenerent omnia, quibus egregie pugnare possent, minime tamen pugnaces erant; ubi vero pugnarent, eo victoriæ genere delectabantur, cujus fructus veritatis

ratis cognitio esset, non ambitio triumph. De his nemo umquam dubitavit, utrum aliquid crederent; nemo illis tamquam crimen Theologiam objecit; nullam ipsi de se fallaciæ suspicionem commoverunt; sed benevolentiam & admirationem cum sibi, tum suæ facultati vel ab hominibus procacissimis compararunt. Quoniam tamen in magno numero pro rerum humanarum conditione plures sunt deteriores, inde ortæ multorum quærelæ, dictæria, criminationes. Sed vela tandem colligamus. Ego hac in re siquid sapio, ita constituendum puto, Theologum neminem esse, aut certe neminem haberi posse, cujus non sit vitæ ratio Theologo digna. Plurimum enim interest non solum quid dicatur, sed etiam a quo dicatur; sæpiusque contingit, ut ne optima quidem a malo auctore accipere velimus. Lacedæmonii acerrimi iudicii, suæque disciplinæ homines, cum de re gravissima in senatu confuleretur, & improbum civem, ut sit in Republica, non solum pati deberent, sed etiam sententiam rogare, ita decreverunt, ut cum optima aliquando dixisset, hæc ipsa a bono viro quamvis indiferto repeterentur, ejusque nomine senatusconsultum fieret, nequid auctoris infamia saluberrimo decreto apud populum derogaret. Quid si de virtute ipsa, aut religione in illo gravissimo consilio relatum esset? Futurum ne umquam fuisse putatis, ut flagitiosi hominis vocem ferrent; nedum in ejus ver-

Gel. l.
11. c.
1.

ba decreta facerent publicis monumentis
 consignanda, & populo proponenda? Vi-
 dete igitur, adulescentes, videte diligen-
 tissimè, quale quantumque sit, quod su-
 scipitis, præstandæ bonitatis onus, quoties
 in hanc classem nomina datis, & id vobis
 assumitis, ut de virtute ac religione con-
 sulentibus respondeatis. Disciplina augu-
 stissima est, ipsum hoc nomen Theologiæ
 divinæ aliquid sonat, parietes ipsi scho-
 læ hujus sanctissimis verbis quotidie percul-
 si religiosum aliquid animo, ac prope o-
 culis objiciunt. Sed ut omnia desint, quæ
 tamen deesse non possunt, hic certe non
 deest, quem nobis ex gravissimo morbo di-
 vina providentia restitutum lætissimi intue-
 mur, Princeps Eminentissimus. Ille, ille
 me quotidie urget & extimulat non jussu
 modo, quod est Principis; sed quod est
 mitissimi Præfulis, impulsu quodam & co-
 hortatione; addo etiam pæne præcibus,
 quod est amantissimi patris, immo patris
 hujus; ille, inquam, me magnopere ur-
 get, ut non tam vobis litteras, quam vir-
 tutem, & honestatem, quandocumque
 possum, quibuscumque rebus possum, as-
 sidue diligenterque commendem. Vidi e-
 go vos, vidi singulos & universos ejus in-
 commodi cogitatione defixos, prostratos,
 attonitos, illa etiam timentes vana & fu-
 tilia, quæ otiosi homines ad studium no-
 vitatis comminifcebantur. Jam salva res
 est: ejusque valetudine ad plurimos annos
 confirmata, nihil denique restat, nisi ut

vos magna modestia & pietate vivatis ,
ne ullo unquam tempore vestra causa la-
boret .

Edita est Patavii an. 1717.

deinde alibi , addita hac

Auctoris Epistola

A D L E C T O R E M .



*Ecce honestaque vita ratio-
nem ita sua plerique arti
conjunctam existimant , ut
sine illa ne ars quidem i-
psa esse possit : idcirco nec Oratorem
esse , nisi bonum virum , neque Phi-
losophum , neque Jurisperitum passim
audimus . De Theologo nihil simile ve-
teres scripserunt , nostri vero etiam
longe dissimilia . Ac veteribus quidem
veniam tribuamus ad ignoscendum ,
quod cum de Diis nihil certi statue-
rent , Theologos quoque ipsos inter nu-
gigerulos recensebant : nostri vero si-
quam Theologo impietatis dicam impin-
gunt , id ita faciunt , quemadmodum
solent & Medicis objicere , quod me-*

dicinis abstineant, et Jurisperitis, quod numquam lege agant, ipsi tamen et Medicorum, et Jurisperitorum opera maxime utuntur. Hoc ipsum mihi orationis habenda occasionem praebeuit, quam emitto. Quidam a nobis de Theologi industria et ingenio, quam de moribus audire malebant; sed mirum quam sint haec inter se conjuncta, non reputabant. De Digressione noli quicquam suspicari. Facile enim erratur; quod ea fere sibi quisque persuadeat, quae potissimum cupit. Ipse mihi accusatores apposui, crimenque confinxi, ut eam quoque Tulliana eloquentia partem attingerem, quae egreditur extra causam. Non deerant fortasse adversarii, in quos stilum exercerem; sed quia et natura me a jurgiis alienissimum fecit, et humanitas ipsa litterarum jubet esse mitissimum, malui tamquam in scena fabulam agere; quo etiam ostenderem, non me quidem armis, sed pugnandi voluntate carere. Quod superest, utinam hic consistendum sit, ut otio illo perfrui

*fruentes , quo uno litteræ maxime a-
luntur , suscepta studia sine ullius of-
fensione persequamur .*



AD S. SCRIPTURAM

Oratio VI.

*Sacrae Scripturae studium cum veterum
linguarum studiis conjun-
gendum est.*



Iquis forte dubitat, quid in tantam hanc sapientissimorum hominum frequentiam hodierna luce afferre statuerim, ad illa se animo tantisper referat, quæ superiore anno hoc ipso ex loco disputavi: nam & Sacras Litteras cum Theologicis studiis conjunctissimas esse statim intelliget, neque posse me ex instituto jam ordine alteras ab alteris separare judicabit. Nulla est in toto disciplinarum orbe rerum simillimarum cognatio tanta, nulla tam arcta societas, quæ cum illa comparari possit, quæ inter Theologiam Scripturamque intercedit: ut si quis vinculum hoc, non hominum opinione, sed ipsa rerum natura constrictum effringere velit, vehementer alteram debilitari necesse sit, alteram vero prorsus dilabi, aut in imum detrusam sine ulla nobilitate jacere. Etenim Scriptura

ptura quidem in Scholis sine Theologicis disputationibus manca est, multisque luminibus destituta; Theologia vero sine Scripturæ ope nimium depressa humi, sophistica, incerta sui, liberoque homine & ad elegantiam exulto prorsus indigna. Quare non fuit mihi magnopere dubitandum; qua de re dicerem; sed quid, & quomodo dicerem, id vero me, ut ingenue fatear, multis de causis iisdemque gravissimis sollicitum habuit. Cum enim ipsa per se Sacra Scriptura arcanum quiddam est, omniumque hominum existimatione & iudicio sublimius, tum ita quoque expositum, ut ne ipsæ quidem mulierculæ in re familiari occupatissimæ, otium sibi, aut ingenium ad legendum & interpretandum deesse arbitrentur. Quæ igitur me, cum de aliis facultatibus verba facerem, solari consueverat, iudicium intelligentia, & quæ cum intelligentia ferre conjungitur, summa æquitas, non ea quidem mihi in præsentia dicenti deest, sed quæ dixerò, de more vulganti, magna ex parte defuturam, cogitando præsentio. Neque verò hæc aut ipse artificiose confingo, aut primus in medium profero, ut laudem ex difficultatibus quarum; cum ille ipse Divinarum Scripturarum interpres, omnium ætatum omnisque memoriæ longe doctissimus, & interpretum ceterorum facile princeps D. Hieronymus, ad Paullinum cum scriberet, ita conquestus sit: *Quod medicorum est, promit-*

mittunt Medici, tractant fabrilis fabri; solæ ars Scripturarum est, quam omnes passim sibi vindicant; hanc garrula anus; hanc delirus senex, hanc sopbista verbosus, hanc universi præsumunt, lacerant, docent. Quod ego non eo dico, quo sacros codices e populi manibus excuti cupiam, & in abdito collocari, veluti carmina Sybillina non inspicienda nisi Duumviris. Nulla hinc tacenda mysteria sunt, non Nyctelia, non Faunæ, non Cereris arcana; sed omnia omnibus sine ullo discrimine patent, quia fucō carentia, & ab ipso veritatis fonte, non ab aliqua Ægeriæ spelunca, aut a Cumanis antris petita. Sed tamen cum sit litteratorum ordo ab omni prorsus vulgi commercio sejunctus, in hac quoque ceteroquin communi palæstra genus quoddam sibi proprium habere debet, armisque & exercitatione ab ignava turba differre. Siqua vero ratio est, ut id recte fiat, & nobilissimæ doctrinæ partes suis ingeniis suisque locis assignentur, ita constituo, Sacrarum Scripturarum studia ipsa per se pulchra, omnibusque communia, in Scholis tamen & Academiis vetustarum linguarum cognitione vehementer ornari, novaque hac accedente quasi supellectile, in propriam litteratorum hominum ditionem transire. Quod quidem ne gratis a me dictum putetis, aut vana quadam nostrarum exercitationum jactatione, aut illo fortasse studio, quo quidam solent ad ingenii subtilitatem difficilia consecrari, id ipsum,

ipsum , quam maxime potero , collectis undique , & excogitatis rationibus patefaciam . Itaque ipsa mihi dicendi difficultas initio proposita , orationis copiam facit , & eo me ultro sequentem adducit , quo jamdiu meditabar , ut adolescentibus nostris veterum linguarum curriculum ægerrime ingredientibus , ingenti laboris fructu proposito , stimulos addam ; ingressesque jam & sua sponte currentes , audientibus vobis , & ut spero , etiam probantibus , confirmem . Videam me negotium suscipere multis difficultatibus implicatum ; cumque animo reputo , quam ægre homines laudari sibi aliena patiantur , valde metuo , ne magnas invidiæ flammas ipse mihi succendam , ex quibus denique nisi ambustus egredi nequeam . Nam illud pro mea quadam verecundia facere non possum , quod tamen oratores plerique solent , ut nostris popularibus ea tribuam , quæ revera non insunt ; & solemne illud , tritæque adulationis plenum acroasma veteri more recinam , *Patavii dicimus* . Nulla est in Italia , in Italia autem ? Nulla est in Europa universa , atque adeo in orbe terrarum tam culta litteris civitas , quam nostra hæc , si simul omnia , quæ rem litterariam constituunt , complectamur : at in singulis generibus quædam sunt , quæ si nobis vindicare velimus , multæ nos Academiæ ex jure manum consertum statim vocabunt . Hoc ipsum est ex gravitate sapientis hominis , se aliqua necire facti ;

teri ; & quæcumque honesta sunt , aut utilia , non aliunde , quam ex rebus ipsis judicare . Hoc nimirum Patavinum est , hoc hujus soli cælique proprium , unde fucus & levitas ab Heroicis usque temporibus exularunt : nec vero me in locum tam lubricum conjecissem , ut vetustarum linguarum studio tantum tribuerem ; quantum mox audietis , si mihi omnes succensuros putassem , qui laude ista carerent . Ignavis quidem & socordibus concedo libens ut doleant , imo etiam ut reprehendant : quid enim potius ? nihil illis operosum placere potest . At vos , Viri optimi ac præstantissimi , quorum singuli in magna aliqua doctrina excellitis , multi vero etiam in multis , tam mihi benevolos fore confido ; quam longe abesse ab omni prorsus ignaviæ suspitione , certo scio .

Vetus est aliquorum opinio , eorum præsertim , qui se præter ceteros sapere arbitrantur , disciplinas artesque omnes , quæ ingenuis adolescentibus tradi solent , vernacula cujusque provincie lingua explicari oportere , ne florentissima ætas latinitatis addiscendæ labore frangatur , quæ Geometricis & Geographicis studiis multo gravioribus opportunissima esset . Quod si quis latina monumenta cognoscere velit , tam multas esse interpretationes ajunt , tam certas ; tam fideles , tam ornatas ; ut nihil melius ex ipso latinorum Scriptorum ore , siquando ex suis tumulis excitentur , accipi possit .

Ac

Ac de disciplinis quidem sine latinis litteris addiscendis nihil ajo, nihil nego: quod autem de latinis monumentis dicitur per interpretationes cognoscendis, si de aliquo genere dicitur, facile patior, sin autem de genere omni, vereor ne homines isti non solum otio suo, sed etiam patientia nostra turpiter abutantur. Cum enim poetica & oratoria non tam rerum, quam verborum artificio consent, & cujusque sermonis figuræ quædam propriæ sint, modo syllabarum sono, modo vocum ambiguitate, modo ipsa positione formatæ, qui fieri potest, ut latina carmina & orationes suis verbis, suæque constructione spoliata, non suam quoque naturam exuant? Utcumque tamen est, juvit & oratorum & poetarum opera in alias migrare linguas, ut bona pars hominum domesticis commodis & otio superfluentes, desidiam legendo fallerent, & quandoquidem eruditione carent, aliquam saltem eruditionis umbram consecrarentur. At vero si quis est ad docendum vocatus, qui interpretationes hujusmodi impigræ juventuti proponat, & ad latinas exhedras afferat, næ ille aut barbarus est, aut insanus, aut pestis aliqua longe deterrima ad tenellas animas labefactandas scholis affusa. Videris, Auditores, quorsum ista pertineant. Nimirum Sacra Biblia multiplici sermone vulgari pulchrum est, & pro humanarum mentium infirmitate etiam necessarium: at ipsos Bibliorum magistros ita cum vulgo torpere,

ut

ut nihil in scholas afferant, nisi communem aliquam & omnibus obviam interpretationem, valde miserum est, nec in tanta ceterorum studiorum felicitate ullo modo ferendum. Si enim latine scripta in nostrum hunc sermonem latino simillimum, & ab eo procul dubio propagatum sine fraude transferri nequeunt, quis mihi se tam eximium profiteatur, ut Palæstinum orationis genus, supra quam dici, aut cogitari possit, a latino diversum, ita tamen latine reddiderit, nihil ut præterea postulare debeamus? Quis ancipitem Hebraicarum dictionum significationem, quis pondus, quis brevitatem, quis denique illa omnia per ellipsim, per emphasim, per paragogem, per onomatopœiam abrupta, aucta, traducta, formata, latinis vocibus assequi potuit; & duas linguas toto genere disjunctas ita consociare, ut verba verbis, figuræ figuris, constructiones constructionibus ex æquo respondeant? Id, non dicam, si factum est umquam, sed omnino si fieri potest, sileant per me licet Hebraica omnia. Ne ipse quidem Græcus sermo, qui tamen aliquanto propius ab Hebraico distat, & copiosissimus reliquorum est, vim omnem Sacrorum Bibliorum capere potuit; nec Septuaginta illa Sapientum societas potentissimi Regis jussu in hoc uno certantium effecit, ut Hebraicis codicibus Græci non indigerent. Verumtamen interpretatio ista, sive instinctu instatuque divino, ut quidam putarunt, edita sit, sive tota,

ut

ut credibile est, humanis viribus debeat, tantum auctoritatis a primis usque temporibus obtinuit, tantoque usui Christianæ religionis Patribus fuit, ut ob eam præsertim Græcas litteras cum Hebraicis ad egregium Sacrarum Scripturarum studium conjungere oporteat. Id si firmum certumque constituatur, jam non Philosophus, non Rhetor, non Grammaticus, non recens a ferula litterator, paullummodo latinitatis attigerit, gravissimum sibi munus tradendæ Scripturæ deposcet; nec amplius in scholis inanes quæstiones ad explendam contentionis cupiditatem excitatæ, sed sacratissima religionis mysteria ab ipso religionis exordio fideliter ducta, quemadmodum decet, personabunt. Tunc ne igitur, inquiet aliquis, interpretationem excludis, quam Vulgatam appellant? Ego vero id ne cogitavi quidem umquam; nec si quis cogitet, satis mihi sanus videatur. Immo hæc dominetur una in privatis exercitationibus, dominetur in publicis, quam & multorum sæculorum vetustas, & Concilii Tridentini auctoritas, & plura deinceps Pontificum decreta adversus obrectatores in omnem ætatem permunierunt. Verum enimvero ubi explicanda est, & ad scholæ usum referenda, nisi & cum Græcis aliquando congruendis, & cum Hebræis, & cum Syris, & cum Arabibus, & cum Chaldæis, eorumque rationes suis momentis perpendas, tamquam unus paterfamilias judicaberis, de
dome.

domesticis religionibus cum pueris & uxore disputans. Si enim illa ita clara & expedita est, ut nullius egeat explicatione, quid te mihi operamque tuam fallaciter venditas? Sin autem alicubi obscura est, & verborum ambiguitate perplexa, quomodo aut explanabis ipse, aut aliorum explanationes judicabis, qui fontes illos adire nequis, unde omnia profluxerunt? Hærent enim adhuc in Vulgata aliarum linguarum idiotismi, alibi brevitās apparet. Hebraica, alibi Chaldæorum *ܐܡܪܐܢܐܬܐ*, alibi Septuaginta Interpretum *ἐκκλησιαστής*: quibus expediendis non Philosophus, non Theologus, non Civilis, aut Canonici juris peritus, sed exoticorum sermonum interpretēs adhibendus est. Quid vero idiotismos dico? Multæ etiam sibi voces hanc operam poscunt. Cedo enim, quid illa significant ab Hebræis sumpta, *ephod*, *sabaoth*, *Hosanna*, *Alleluia*; quid illa Syriaca, *Raca*, *Epheta*, *Golgotha*, *Gabbatha*, *Maranatha*; quid alia multa a Græcis inflexa? Non desunt, inquis, lexica, unde petam. Primum quidem, si D. Augustino credis (quem virum, bone Deus, quo ingenio, qua rerum divinarum humanarumque scientia!) si huic, inquam, credis, *Sunt quedam verba certarum linguarum, quæ in usum alterius lingue per interpretationem transire non possunt*: deinde gratulor egomet mihi, cui si lexicon suppetat, nihil est opus te Magistro. Sed cominus, quæso, congregiamur. Novi enim

de do
Orin
Chrif.
l. 2. c.
11.

nim esse aliquos, qui veteribus linguis amplissimas laudes tribuunt, sed nihilo plus temporis concedendum putant, quam quantum lexica versare volentibus necesse est. Age vero, lexicorum manceps, quid si ego verbo negem, quod tu de lexico recitas? Unde habes, ut confirmes? Ridicula sunt hæc, Auditores: neque enim omnia in lexicis esse possunt, neque debent: & ea ipsa, quæ sunt, memoriæ serviunt, non ingenio. Scilicet lexica confules, cum in capite Genescos quarto de voce פְּתִיחַ te quispiam interrogabit, u- n. 15.

trum ad gravitatem pœnæ, an ad rationem temporis sit referenda. Nam *septu-
plum*, quod est in Vulgata, non facile capies, nisi ab Arabibus auxilium petas, conjunctisque viribus adversus Rabbinos, & Chaldaicum Paraphrasten pugnare possis. Quid cum te de voce פְּתִיחַ in psal- n. 16.
mo quinquagesimo secundo percunctabimur? Quo te lexico expedies? cujus opem implorabis interpretis? Junius & Tremelius adverbium putant; Paulus Burgensis & Chircherus vocem *ἐγκατακλιω*; Matthæus Polus exclamationis signum; Calovius & Olearius pausæ significationem; Buxtorphius musicam notam. Ut vero tot capira concilies, adhuc tibi & cum Joanne Paschio, & cum Rabbinis, & cum Syris, & cum Æthiopibus interpretibus in diversa abeuntibus futura res est. Quam te porro miserum excruciabimus, cum ve-

H teres

teres ad te controversias afferemus de ver-
 bo חַסִּיד in capite Geneseos trigesimo sex-
 to ; de לֵךְ in Exodi trigesimo quarto ;
 de לֵךְ in vigesimo Levitici ; de רַב־שֵׁט
 in duodecimo Numerorum ; de אֶרְוֶה in
 libro Regum secundo ; atque insuper sex-
 centis , quæ sine magna Hebraici sermo-
 nis peritia frustra explicare contendes ? Au-
 divi nonnullos , qui talia contemnerent ,
 quippe magnis contentionibus non satis di-
 gna . Quibus primum respondere possum ,
 nihil in re tanti momenti minutum esse ;
 deinde libenter illos interrogarem , utrum
 id satis grave ad disputandum videatur ,
 quod est in verbis נִשְׁקִיב psalmi secun-
 di , unde Rabbini Trinitatis mysterium ex-
 turbare conantur ? Quid illud tantopere
 celebratum Jacobi vaticinium de Messia
 venturo , ablato Judæ imperio , cujus ver-
 ba singula Christiani nominis hostes calli-
 diffime oppugnant , & alio torquent ? Est
 ne par ingeniis tantis ? Quid quod habet
 Isaïas secundo , & septimo capite de nova
 lege , de Christi Euangelio , de Virginis
 partu , fatisne capit magnarum mentium
 cogitationes ? Verum siquid hujusmodi si-
 ne Hebraica pertractabis eruditione , no-
 stri illi ex Synagoga pertinacissimi adver-
 sarii aut dormitabunt , aut ridebunt . Sed
 jam Hebræorum natio parum nobis nego-
 tii faceffit , aut multo certe minus , quam
 ipsi Christiani homines heterodoxi . Nemo
 enim

enim se ab Ecclesia Romana subduxit, novumque sectæ genus molitus est, quin suis opinionibus vel monstrosissimis sacras litteras prætexuerit. Inde novæ interpretationes exortæ; quæ cum veterum linguarum auctoritate malitiosius adsumta plerumque propugnari soleant, inepti plane sumus, nisi paribus armis arma retundimus, & populum peregrinis litteris attonitum admirantemque, ab insidiis & fallaciis liberamus. Quid enim est, quod ex illo suggesto doceas, teque mihi Scripturæ professorem magnifice jactes, si cum suas tibi interpretationes objiciunt Junius, Castalio, Leo Judæ, Munsterus, Oecolampadius, fidemque veterum codicum, & Hebraici Græcique sermonis appellant, tu illos ne intelligis quidem, petitionesque gravissimas ignorantiae confessione declines? Tute tibi habe veteres illas de Terrestri Paradiso, de Turre Nembrothi, de Henoch & Elia, de Melchisedech, de Jobo disputationes, quæ tametsi pulchritudinis & jucunditatis plurimum habent, tam multis tamen libris expositæ sunt, profligatæ, & ad exitum prorsus adductæ, ut jam supervacaneum sit ad eas recoquendas magistros arcessere, & miseram juventutem fatigare. Licuit in summo Ecclesiæ otio per hæc inter nos velut ensibus præpilatis ludere; nunc vero ingruentibus undique Romani nominis hostibus, & alia super alia bella serentibus, in aciem prodire oportet, iisque armis con-

Clem
1. de
Mag.

figere, quæ ipsi potissimum pertimescunt. Atque ego ut inter Academicos hæctenus disputavi : quid si jam monere incipiam ? quid si leges Ecclesiæ proferam, quibus resistere nefas sit ? Annon enim Concilium Viennense tercentorum Episcoporum & Pontificis maximi præsentia verendum, gravissimo decreto fancivit, ut Hebraicis, ut Chaldaicis, ut Arabicis, ut Græcis literis in quavis locus esset Catholicæ ditioris provincia ? Nonne id ipsum Gregorius XIII, earum linguarum magistris & typographis Romam accitis, illustri ad imitandum exemplo confirmavit ? Quid Paulus V, quid reliqui subinde Pontifices ? nonne studia hæc magno favore ac benevolentia profecuti, ad Monachos ipsos traducere conati sunt, iisque privilegiis ornare, quæ vel ignavissimos excitarent ? Græcis, credo, fabulis, aut antiquitatis ambitione ducebantur. Quid enim est reliquum parere nolentibus, ut dicant ? Modestius agunt, tempora accusant : Græcos & Hebraicos codices tum ipsa vetustate exesos, tum etiam multorum audacia corruptos esse : huc ipsos Tridentini Concilii Patres spectavisse, cum Vulgatam unanimi consensu probarunt : & unam ex omnibus sacrorum Bibliorum editionem Christianis hominibus commendarunt. Non tantum mihi a vobis conceditur otii, ut veteri calumniæ sæpiusque retusæ hodierna luce respondeam : id unum dicam, quod ubi opus fuerit, gravissimorum Scriptorum

ptorum suffragiis confirmare possum, Vulgatam editionem non Græcæ, aut Hebrææ, sed reliquis Latinis, quarum magna copia & varietas in dies exibat, necessario illo Tridentinorum Patrum decreto præpositam fuisse. Multa quidem commoda, & prope innumera in Christianam Ecclesiam ad Fidei morumque leges componendas per Synodum Tridentinam redundarunt; sed nihil tam grave accepimus, nihilque tam utile, quam quod ex omnibus Latinis Sacrarum Scripturarum interpretationibus una illa probata est, quæ ceterarum optima ac fidelissima, nutantia multorum ingenia tamquam clavo firmaret, certisque regionibus circumscriberet. Neque tamen ideo Hebraicis, aut Græcis codicibus, unde Latini omnes, ceterique manarunt, quippiam auctoritatis detractum est: stat adhuc eorum fides firmissimis præfidiis fulta, licetque in rebus dubiis ad prima illa verbi divini exempla non modo sine crimine, verum etiam cum laude provocare. Haud equidem nego, mutila quædam in illis esse, nonnulla vero etiam mendosa; sed & menda ipsa verendæ antiquitatis indicia sunt, & partibus insunt minime necessariis; & in Vulgatam quoque librariorum incuria, si minuta quælibet animadvertimus, irrepperunt. Nihil novi afferro, nihil quod summi Vulgatæ patroni, si serio & ex animo agant, negare possint. Sed vereor, Auditores, ne quemadmodum qui dignitates in repub.

obtinere non possunt, privatum otium laudare solent, omnemque rei gerendæ rationem conquisitis difficultatibus improbare; ita qui Græca & Hebraica studia sive animi infirmitate, sive inertia defugiunt, eorum laudem malignius imminuant, tantumque Latinis concedant, ut modum fidemque superet. Hunc porro desidiæ morbum tum demum mihi videor depellere posse, si pauca quædam de Hebraica lingua dixerò, ejusque naturam & rationem minus multo implicatam, quam timidi homines sibi confingunt, patefecero. Nam Græca quidem multis jam locis reflorescens non indiget opera nostra. Agite dum qui Hebræorum pronuntiatione perterrefacti ab hoc litterarum genere tantopere abhorretis; quid est, si primos Grammaticæ labores superaveritis, quod studia vestra retardare possit? Num copia, num varietas, num inconstantia? Nihil sane hujusmodi esse potest in lingua illa, quæ multis abhinc sæculis oblitterata, in uno tantum Sacrarum Scripturarum codice, grandi quidem ac splendide scripto, sed tamen uno superstes est. Nisi forte Talmudica commentaria neque rebus, neque verbis pura recipimus, & multiplicem illam loquendi fartaginem ad Hebraicum sermonem revocandam existimamus. Fingite vobis animo unum ex omnibus Latinis Scriptoribus Ciceronem, ex omnibus Græcis Demosthenem unum superesse; jam intelligitis, quam in angustum copiosissi-

mæ

mæ ceteroquin linguæ compingantur ; vo-
cum numerus statim exiguus , dialectus
una , forma constructionis non admodum
varia . Nihil est enim aliud , quod Græ-
cas Latinasque litteras adeo in immensam
propagaverit , ut multos studiosis homini-
bus annos eripiant , quam ingens Scripto-
rum multitudo , qui pro ingenio quisque
suo , pro patriæ , pro ætatis , pro rerum
tractandarum natura verba dictionesque
formarunt , multisque ex omni lingua de-
tortis , infinitos labores discipulis ac do-
centibus proposuerunt . Adde , quod He-
braicus sermo ceterorum antiquissimus , &
mundo æqualis , nullam litteram aliunde
mutuatur , nihil in se barbari , nihil ex-
terni admixtum habet , sed ubique suis
sibiue similis , quod nulli præterea con-
tingit , in modico illo sacrorum Biblio-
rum ambitu planissime & expeditissime in-
cedit . Quamobrem paucis mensibus , ut
scribit Erpenius , & quidem duobus , aut
tribus , ut Amama , tantum ex illo per-
cipi potest , quantum est ad intelligendum
fatis , anno vero , & eo citius ita totus
memoria scientiaque comprehenditur , ut
jam difficultas supersit omnino nulla . Non
desunt , qui mense brevioris diem satis
esse affirmant ; quorum ego sententiæ ne-
que probare ausim , neque rejicere : sed
nulla certe veterum linguarum est , quæ
paucioribus verbis constet , nulla quæ tam
paucis plura significet . Nihil hîc vastum ,
nihil redundans , nihil effluens ; nulla ne-

Vest.
Bibl.
Polyg.
prole.
50. 3.

que^a μακρολογία, neque βατολογία; sed pressa omnia, tantaque brevitate castigata, ut una sæpe vocula, atque adeo syllaba una sententiam absolutissimam complectatur: unde est illud doctissimi Posslevini in *Bibliotheca selecta*, tot esse in Hebraica Scriptura sacramenta, quot sunt litteræ; tot mysteria, quot puncta; tot arcana, quot apices. Quæ cum ita sint, per mihi mirum videri solet, esse homines cetera non insipientes, qui quidquid Hebraicum vident, aut audiunt, statim explodant, nobisque etiam molestiam afferant, quod vulgaris interpretationibus contenti non simus. Quod sive difficultatem timent, sive præstantiam non agnoscunt, quæro ego ab illis, cur ea saltem cura non moveantur, quæ humani ingenii propria est, cognoscendi remota, siquo præsertim insignia facto ad religionem pertineant. Ergo difficillima & infesta itinera suscipient, ut illustrium virorum monumenta videant, easque regiones obeant, quas illi præsentia sua, rebusque mirabiliter gestis nobilitarunt; quæ vero longe pulcherrima curiositas est, ejus linguæ cognoscendæ, quam primi hominum parentes divinitus hauserunt; qua ipsi inter se, & cum suo conditore locuti sunt; qua rebus omnibus dedere nomina; qua se Deus ipse יהוה nuncupavit; qua Angelos interdum usos, qua Prophetas scripsisse accepimus; quæ omnium linguarum princeps ac mater, vestigia

stigia sua ubique impressit ; hac , inquam , tam honesta , tam splendida , tam homine digna curiositate nihil omnino commovebuntur ? Sed videant alii pro suo ingenio gloriæque cupiditate , quem sibi animum suscipiendum putent . Ego sic statuo , cum tanta sit ad Sacras Litteras profitendas veterum linguarum necessitas , cum Hebraicæ præsertim tanta facilitas sit , pulchritudo , dignitas , sanctimonia , etsi omnes omnium , qui nos quotidie circumstant , auctoritates repugnarent , nihilo tamen minus ad hanc præclarissimam laudem contendendum esse . Nunc vero cum re & ratione expressa veritas , ipsius quoque Ecclesiæ legibus , multarum Academicarum usu , & quod maximi apud me debet esse ponderis , nutu & admurmuratione vestra confirmetur , quid est præterea quod dubitemus ? Ac ne id quidem omittere debeo , ita esse in more institutoque loci hujus , ubi me Superi litterarum custodem ac vindicem collocarunt . Quod leve fortasse alicui videbitur : at ego quidquid reperio ab eximio illo atque immortalis studiorum nostrorum Auctore , quem honoris , atque adeo pietatis causa nomino ; Gregorio Cardinali Barbadico constitutum , ita accipio , quemadmodum divina debent . Quoties enim singula reputo , quæ vel ipse a se invenit , vel ab aliis inventa huc adduxit , artium , linguarum , ac disciplinarum genera tanto consilio distributa , tot præsidiiis munita , tam multis

exer.

exercitationibus a vana specie , in quam fere degenerant , ad rem & veritatem revocata , videtur ille mihi non humano consilio usus , sed divina quadam virtute præditus ea vidisse & fecisse , quæ posteri sine piaculo violare non possent . In quo etiam divina vis ac providentia magis apparet , quod cum ille ad vitæ exitum vocatus , præclarissimarum rerum initia nondum satis firma reliquisset , hic nobis Princeps Eminentiss. veluti parens alter Superum beneficio concessus est , qui positus ab illo fundamentis mirificas moles excitaret , tantumque proveheret , ut ad majorem amplificationem nihil jam desit , nisi locus . Ergo cum ille in magna , attentissimaque rerum omnium cura nihil æque cogitarit , atque ut totius Orientis linguas ad S. Scripturam illustrandam in scholas nostras advocaret , Græcæque ac Latinæ conjungeret ; cum hic ejus vestigiis insistens , qui tamen prægredi ipse poterat , idem velit , idem curet , idem jubeat , quo me animo esse oporteat , existimate . Id extremo loco ab adolescentibus nostris vehementer peto , ut quoniam illorum gratia omnia dicuntur ac fiunt , in eo libenter laborent , quod nos certis probatisque de causis optimum ducimus , ea insuper cogitatione præstantibus ingeniis digna , ut ornamenta sibi comparent , quæ paucis communia sint .

Edita est Patavii an. 1718. deinde alibi, addita hac Auctoris Epistola

AD LECTOREM.



*S*il forte fortuna fiat, ut nostra hæc jejuna lucubratio in eas regiones deferatur, ubi linguarum studia florent, plerique omnes mirabuntur, quid me tandem moverit, ut in re satis plana et expedita tam multo sermone laborarem. Ego vero patriæ rationem habui, ejusque auribus dicere institui; nihil admodum de illorum judicio sollicitus, qui hæc sibi dudum persuaserunt, a majoribus tradita, et quotidiana consuetudine usurpata. Sed hinc, opinor, nihil in me valde criminofum, utcumque accipiant. Ab iis potius mihi timendum, qui superioribus contraria sentiunt, et nimis enucleatum putant, quicquid vernaculum sermonem, et latinum supergreditur. His et nugari

gari ipse in re minus utili videbor,
 & ad nugas iuventutem allicere. Hoc
 vero non caret specie culpa: sed no-
 lo purgare. satis superque verborum
 in ipsa Oratione. Numquam ego pla-
 cere omnibus studui; imo neque pluri-
 bus: quia illi contraria, isti deterio-
 ra sequuntur. Si paucis illis, quos mi-
 hi animo & cogitatione proposui, feci
 dicendo satis, jam operam recte na-
 varvi. Vale.



AD JURISPRUDENTIAM

Oratio VII.

*Expedit, omnes gentes Romanis legibus
operam dare, sed suis vivere.*



Plendidum Jurisprudentiæ nomen, & quod uni ferme convenit, etiam solidum, omnique generi hominum sive meditando, sive agendi studio pulchrum atque utile, jubet me majore quadam animi securitate hoc anno descendere, & publicam hanc lucem vestramque omnium expectationem sustinere. Neque vero ante nugas egi, aut aliquid in medium attuli præter oratoris dignitatem; sed literæ omnes ad humanitatem pertinentes, & Philosophicæ ipsæ ac Theologicæ disciplinæ magis per se honestæ sunt, quam vulgo probabiles: & quæ perverse interpretantium malitia est, in invidiam quoque non raro vocantur, quod otium umbratile foveant, & a reipublicæ cura, quæ una illis gloriosa videtur, multos abducant. Una est legum scientia, de qua omnes magnifice sentiunt, & qui se litteratos ferunt, & qui ambitione ducuntur, & qui.

quibus medium ingenium est ; quod latissime diffusa publicam privatamque fortunam regat , nullumque sibi deditum jacerre patiatur ; etsi maxime lucem formidet , nec nisi inclusus domi de jure respondeat . Ac ceteri quidem liberalium professores artium , præter admodum paucos , silentio & inopia passim contabescunt ; ne Medicis quidem ipsis , generi tantopere necessario , reclusa ad opes via , nisi diu tolerando fatigatis , & naturæ necessitate prope confectis : cum interim Jurisconsultus ubique fere liberalius acceptus , mature floreat , & ad gratiam , & ad opes , & ad summas in republica dignitates , modo paullo diligentius connitatur , faciles sibi aditus patefaciat . Nihil est opus in hac republica , hisque temporibus , ubi homines a subselliis propemodum regnant , antiqua repetere ; sed tamen ut id exemplo fieri intelligatis , illa ipsa gentium domina , totiusque sapientiæ secundum Græcos magistra , Romana civitas initio statim de jure cogitavit , ejusque peritis honorem habuit ; cum ceteroquin incuriosa neque Grammaticos , neque Rhetoras , neque Philosophos , neque Medicos ipsos nisi multa post sæcula ferre potuerit . Verum tanta hæc gravissimæ scientiæ dignitas , tanta cum dignitate conjuncta fortuna , non caret invidiola , quod nondum omnes sibi persuaferint , Juris civilis studium Romanis legibus contineri , omnemque justitiæ rationem & æquitatis ex Justiniani codici-

dicibus tamquam ex oraculis petendam esse. Sua quidam libentius amplectuntur, alii Græca præferre malunt, nonnulli etiam sacras litteras in medium afferunt, unde omnem imperandi parendique rationem, omne æqui & iniqui discrimen sumendum putant. Non is ego profecto sum, qui tam veterem controversiam disceptare possim, suisque regionibus humani generis jura definire; sed tamen cum dicere aliqua necesse sit, ut hunc disciplinarum orbem absolvam, fidenter affirmateque oportere constituo, gentes omnes Romanis legibus operam dare, sed suis vivere. Porro autem Romanas leges cum dico, non hæc certi juris, sed ipsius prope justitiæ appellatio est, a recta ratione expromptæ, magnoque Deorum immortalium beneficio populo terrarum principi patefactæ; quæ si non cunctis civitatibus, aut negotiis, aut temporibus convenit, succus tamen inde, sanguisque existit, qui ad alios mores opportuna derivatione ductus, ingenia vel efferatissima lenire potest, & cujusque instituta gentis ad bonum & honestum conformare. Itaque duo mihi facienda sunt, primum ut ostendam, nullum esse jus ad cognoscendum Romano præstantius; alterum ut probem, patrias leges hoc jure temperari oportere, non abrogari.

Si quomodo jus in natura positum est, ita leges omnes, non hominum opinione, sed naturæ norma constituerentur, u-

na

Laert.
in Ar-
chelaus.

na esset omnium populorum vivendi ratio, magnaue cura liberarentur, qui se legum studiis dediderunt. Verum & ipsum jus quidam a natura abdicant, quorum princeps Archelaus Socratis præceptor, & leges juris magistræ pro vario judicio & consuetudine hominum variez sunt, sibi-que contrariæ. Quid enim a moribus nostris magis alienum, quam promiscuas uxores habere, prolemque incertam educare? Hoc tamen instituto Massagetæ usi sunt. Quid suapte natura fœdus, quam filias & sorores in matrimonium ducere? Alterum tamen Persis, alterum Atheniensibus familiare fuit. Esculentorum furta Spartani probarunt; otium & ignaviam Sybaritæ, alii denique alia, non re, sed suis opinionibus iusta & honesta judicant. Ergo prima illa cogitatio juris studiosos tenere debet, ut recti pravique discrimen ab eo populo petant, qui ceteris mortalibus sapientia & virtute præstitit; eoque assecutus est, ut longe omnium potentissimus multis regionibus, multisque sæculis leges scisceret. Is scilicet populus Romanus est, gravissima natio, maximæ cujusque virtutis exemplum, fortis, temperans, prudens, & ad jura componenda mirifice factus. Ceteras quidem artes, totamque humanitatem & eruditionem a Græcis discamus, disputandi peritissimis: at vero Jurisprudentia Romanorum est, ab illis & parva & exculta, & ad Græcos ipsos, non facile aliena probantes, incredi-

credibili plausu traducta. Nam qui dicunt ex Græcia venisse leges, nolim ignorent, magnarum quoque rerum initia parva esse, jusque omne Decemvirale Attica sapientia conspersum, vix primum magnæ hujus substructionis fundamentum fuisse, quæ deinde Romanis opibus paullatim elata, in hanc demum celsitudinem, quæ toti immineret orbi, exædificata est. Quibus enim terrarum imperium Superi concesserant, iisdem pro sua providentia par ingenium imperio dedere, ut aliarum nationum leges primum exciperent, suas deinde plane innumeras ipsi juberent, tum veluti justitiæ imaginem inde ducerent, quæ publicis tabulis ad æternitatem impressa, non Romæ solum, sed ubique placere posset. Est igitur hoc non unius civitatis, aut provinciæ, sed generis humani, & ipsius quodammodo naturæ jus, ex prisca omnium sæculorum sapientia conflatum, & cælo prope demissum ad barbariem tollendam, omnesque omnium populorum voluntates uno vinculo consociandas. Quid mihi adhuc Græcos commemoras? quid me in eas scholas mittis verborum refertissimas, rerum vacuas? Plato, Xenophon, Aristoteles tradunt quidem reipublicæ gubernandæ regulas; sed a communi consuetudine, & civilibus moribus longe recedunt; multa sibi permittunt, quæ extra umbram ferenda non sunt, & pro suo quisque stomacho civitatem effingit. Illi ipsi, qui in repu-

blica versabantur, prudentissimi viri, suisque civibus leges scribebant, ut est natio nimis acuta, mutuis se telis confecerunt, nullusque ex omnibus toti Græciæ satisfecit. Minos enim ex multis decretis Jovis nomine conditis vix pauca probavit Lycurgo; Lycurgi leges ab Apolline acceptas, ut ipse ferebat, agrestes ac feras Plato judicavit; Draconis instituta tanquam inhumana rejecit Solon; Solonis legibus addendum detrahendumque putarunt Clisthenes & Demetrius Phalereus. Etsi autem Solonis νόμοι (sic enim ille suas leges appellare maluit, ut nomine ipso, nisi fallor, a Draconis δεισιμαίης distinguerentur) etsi, inquam, Solonis νόμοι auctoritatem longe maximam in Græciâ obtinebant; attamen sublato Solone, velut intermortui, verbo quidem eorum fidei commissi sunt, quos ἐξηγῆταις nuncupabant, sed re ipsa non alios habuerunt interpretes, quam ipsos forenses oratores, causæ quemque suæ studio abreptos, & in id præsertim intentos, ut eloquentiæ fucō judices fallerent, tabulasque sanctissimas ad tempus & arbitrium explicando distorquerent. Nihil tale Romanis legibus contingere poterat. Ut enim rogatæ erant, & ab eo populo auctoritatem acceperant, qui populos omnes sui juris auctoritate continebat, ne ulla fontium interpretatione violari possent, custodes & explicatores habebant, quibus primum quidem civitatis consensus, deinde etiam Imperator tan-

tantum tribuit auctoritatis, ut iudices ipsi eorum responsis addicti, ita demum decernerent in lege esse, quemadmodum Prudentes (quod illis nomen scientiæ ac virtutis opinio dederat) respondissent. Hoc vero diligenter animadvertite, sapientissimi viri. Cum enim leges paucis verbis comprehendantur, verbaque ipsa tempore obsolescant, pulcherrima antiquitatis instituta intercidissent, nullaque omnino esset Jurisprudentia, si Romani quoque Græcorum exemplum secuti, suarum legum interpretationem oratorum arbitrio permisissent. Sed ut omnia a Græcis accepta fecere meliora, ita præsertim magis, quam illi ad regendum facti, cum leges accepissent, multisque amputatis & additis, suis moribus accommodassent, primum quidem Pontificibus, deinde vero, quos modo dixi, Prudentibus earum explicationem commendarunt, unde orta scientia juris, Romanorum propria, & una ex omnibus humanæ societati utilissima. Neque vero caret lumine illo philosophiæ, in quo tantopere se Græci jactant. Qui enim sibi tantum esse prudentiæ ingenique putabat, ut de jure respondere posset, is & antiquitatem omnem studio complexus erat, & Dialecticas regulas, & Moralem in primis philosophiam perdidicerat, sine quibus nec vetera legum vocabula expediri, nec sensa ad sæculi mores traduci, nec omnino generalis præceptio rebus singulis aptari potuisset. Quo illud spectat Ciceronis in

libro *de oratore* primo, c. 44. Jus civile Romanorum multis præclaris artibus excultum, ceterarum gentium inconditum fuisse, ac pane ridiculum, ne Lycurgi quidem libris, aut Draconis, aut Solonis exceptis. Nolite enim audire hominem *pro Muræna*. Causæ inservit more suo, & ut Sulpicium prosternat, nulli parcit Jurisconsulto. Tota illa oratio festiva est, & ad carpendum instituta, ut ne ipsi quidem parcat Stoicorum philosophiæ. Quam cum audiret Cato ejus adversarius, *Dii boni*, inquit, *quam ridiculum Consulem habemus?* Idem tamen, cum impetus ille forensis deferbuisset, amoris iræque expers, Duodecim Tabulas supra omnes philosophorum bibliothecas extulit, nihilque tam honorificum in pace judicavit, quam Juris scientiam profiteri. Et vero qui fieri poterat, ut nobilissimi Romæ viri vel hoc sibi studio ad honores ac dignitates viam munirent, vel honoribus jam perfuncti hinc sibi senectutis solatium & ornamentum quærerent, si tota juris scientia tenuis esset, ut ille contra Sulpicium dixerat, formulisque & actionibus contineretur? Adde his, qui respondendo jure privatis cavebant, illos etiam qui imperium meditabantur, seque ad leges ferendas, siquando opus esset, per hæc studia comparabant. Quod utinam semper ex hac schola magistratus exissent: neque enim tam cito tanta rerum moles corruisset. Equidem sæpe mecum ipse cogitare soleo,

quam-

Plut.
in Vit.
Cat.

de Or.
l. i. c.
44

quamobrem qui reipublicæ operam navant, aliis se potius litteris dedant, & politicam artem a Philosophis petant, hominibus plerumque sibi viventibus. Quod ego non reprehendo, sed nusquam certe, quam in Romana Jurisprudencia clarius apparent civium negotia, personarum gradus, rerum divisiones, acquirendi modi; nusquam publica & privata crimina, pœnæque criminibus constituendæ; nusquam officii veræque virtutis munus; nusquam demum cetera, quæ humanam societatem tollere, tuerive possunt. Atque hæc quidem ad omnem civilis administrationis formam apposite scripta; quia nullus est rerum status, in quo Roma, perpetuis agitata motibus, aliquando non fuerit. Nam a Romulo ad Tarquinium usque Superbum experta regnum est; tum ad Aristocratiam per Brutum & Valerium Consules transiit; surgentibus deinde Tribunis, partemque honorum omnium sibi vindicante plebe, in Democratiam commutata est; post a Cinnanis contentionibus ad Triumviros usque reipublicæ constituendæ Oligarchiæ speciem quamdam obtinuit; denique amissa libertate omni, modo regio dominatui similia, modo tyrannidi passia est, tam sibi ipsa dissimilis, quam Principes habuit genere, moribus, ætate, ingenio diversos. Numquid alii sunt antiquæ doctrinæ fontes, numquid ulla Græcorum volumina, unde plura temperandæ civitatis documenta, unde certiora, unde ma-

gis probata, quodcumque tibi regimen fortuna dederit, sive regium, sive populare, sive mistum, parari possint? Sed, ut spero, Græcarum rerum amatoribus satis id superque futurum est, quia ratione ducuntur; nec unius disciplinæ gloriam Romanis gravate concedunt, reliquas omnes ex Græcia, Musarum & Apollinis patria, tamquam mutuas exorantibus. Gravior mihi pugna, multoque periculosior cum illis ineunda est, qui se religione quadam ad tempus adscita callide tegunt, totamque juris scientiam Mosaicis legibus definiunt. Haud ego sane inficias iverim, ex fonte illo saluberrimo, omniumque antiquissimo leges ac jura manasse omnia; ajo etiam, & confirmo: sed quando hæc in flumen amplissimum propagata sunt, cur fonti adhuc aridulo segnes hæreamus? Omnia sunt in libro illo divino, quæ ad religionis institutionem, vitæque honestatem ullo modo pertinere possunt; sed nimia quadam licentia fit, ut & Politicas, & Philosophicas commentationes quidam ex illo eruant, alii oratorium, alii poeticum artificium, nonnulli etiam incredibili depravatione rerum mysteria Chymica, & siquid est illis ab homine excogitatum inanius. Hoc genus hominum, qui se multa in sacris litteris videre putant ab earum instituto, & a veritate remotissima, jam a mente discessit, & insanabili morbo laborat. Quos inter non eos censeo, qui summa juris capita ab ipso rerum parente Moy-

Moyſi tradita ex illis derivant : hi enim & valde ſapiunt , & ut ante dixi , nobiſcum faciunt : at qui privatum publicumque juſ , omnemque juſis legumque doctri-
nam indidem hauriunt , mihi quidem nimis videntur extendere , quæ ad unius populi regimen ſcripta ſunt , neque ſane perpetuum , ſed Chriſti ſummi regis adventu jam intermortuum . Anguſta fere ſunt hujusmodi ingenia , & in quo maxime gloriantur , in eo ſummam levitatem oſtendunt . Cum ad eam pervenerunt infaniam , ut hinc acuminis laudem quærant , omnia ſibi licere putant , contraria contrariis inferunt , nova ſenſa componunt , monſtroſas interpretationes effutiunt , nihilque tam alienum a Scriptura eſt , quod ejus auctoritate non confirment . Jam in eo quam ſibi placent , cum dicunt , Romanis legibus vetitas cærimonias atque impia ſacra juberi ! Ita nimirum . At nos ex iis , & præterea multis jam obſoletis de ſepulcrorum jure , de judiciis dandis , de bonis addicendis , de priſca parentum poteſtate , de ſervitute , eruditionem expromimus , juſſa temporis condonamus . Quod ſi grave aliquid afferre cupiunt , quin potius obſcuritatem objiciunt ? quod nos Romani juſis vitium pro noſtra ingenuitate fatemur ; ſi modo vitium eſt , quod rei majeſtatem parit , & hominum ſegnitiem exercet . Objiciunt enimvero multi : nec tamen deſunt , qui nimis plana omnia , & in medio poſita eſſe cœrantur ; quia ſibi convenire nequeunt,

queunt, qui res optimas temere oppugnant. Qua in re dicam univérse quod sentio. Sunt in Romana Jurisprudéntia, quæ maxima ingenia explere possint, nihil quod opprimere; jus continet verbis ac sententiis obscurum, non tamen antiquitatis studiosis; magnitudine immensum, non tamen promptis & incitatis; rebus varium, & alicubi etiam sibi contrarium, non tamen intelligentibus; uno verbo, pelago illam Justinianus comparavit procellis scopulisque infesto, in quo scilicet peritus nauta ingentem sibi laudem comparare potest, imperitus ne minimam quidem. Ergo huc, si viri sumus, operam omnem studiumque conferre debemus, in hoc contendere, hoc urgere, quod & pulcherrimum, & Romanum est, immo mehercule pulcherrimum, quia Romanum. Omnia sunt ab eo populo mirabiliter facta, & nescio quo pacto in commune hominum bonum æternitati consecrata. Lingua ipsa in eo solo, ut fit, temere nata, nec antiquissima, nec copiosissima, neque fortasse elegantissima omnium, quæ ad nos pervenerunt, Romanis tamen fatis quodammodo prædita, adhuc toto orbe diffusa est, omnesque gentes humanitate aliqua imbutæ latine discunt: quasi demum inter se tacito consensu convenerint, ut ingens illud damnum hac una reparent, quod ex eorum superbia tulerunt, qui Babelicam turrim auctore Nembrotho ædificantes, in varios sermones distracti sunt,

cam-

eamque vivendi communionem dissolvere coacti, quam sublato colloquendi usu, diutius servare non poterant. Quid igitur de Romanis legibus dicendum erit summo ejus reipublicæ consilio constitutis, suffragio gentium omnium probatis, prudentum hominum explicatione expeditis, magnorum Imperatorum auctoritate novisque constitutionibus roboratis? Sed hætenus de illis plus fatis. Nolo enim videri tantum Romanis tribuere, ut nostris detrahā, quibus non quidem studia, sed vitam moresque regere oportet. Quod tamen non sine auctore facerem; quia fere humana ingenia ad extrema delabuntur, & cum alii ne in scholis quidem Romanas leges ferre possint, alii contra & iudicii, & curiæ quotidie obtrudunt. Ego vero ad suas quemque mitto, modo sint ea sapientia conditæ, quam sibi a Romanarum studio legislator comparare potuit. Quid enim? An Ægyptii sua sibi jura statuerunt, sua Cretenses, sua Lacedæmonii, Athenienses, vetustique Italiæ populi sua, nos autem nobis diffusi aliunde mutabimur? Itane Gentes omnes, cum staret Roma & æterna videretur, de suis institutis sollicitæ erant, ut *αὐτονομίαν*, non secus ac libertatem, partim bello tuerentur, quod Antiochus fecit, partim pretio redimerent, quod Strabo de Tyriis narrat, l. 16. omnes autem, quæcumque possent, pulcherrimum hoc summæ nobilitatis ac felicitatis testimonium publicis monumentis ad poster-

posteror propagarent; nostri vero homines in rebus judicandis sollicitè quærent, quid Romanis Decuriis ante annos bis mille videretur? Ergo Athenis, non dicam sapientissima civitate, sed sapientiæ ipsius domicilio, hoc tanti erat, ut νομοφύλακες, peculiaris magistratus, omnibus consiliis interessent, naviterque caverent, ne patriis legibus injuria fieret; nos vero etiam indignabimur, nisi nostris antiquatis, peregrinæ valebunt? At enim nondum ea tempestate Romana erat Jurisprudentia. Vero: atqui tempestate nostra non mores sunt Romanorum. Hoc enim facit unum, ut ne optima quidem in usu esse perpetuo possint, quod longinquitas temporis abolet consuetudines priscas, & hominum ingenia commutat. Da scilicet nostris hominibus, his moribus, hoc Principe, sub hoc cælo viventibus, da Labeonis responsa summo jure, ac Dialecticis regulis adstricta; da spinosa illa ceterorum Proculianorum ex Zenonis & Chrysippi ducta principiis, qui omnia crimina æqualia judicant, nulloque discrimine punienda: Deum profecto atque hominum fidem ipsa judiciorum subsellia, non modo homines implorabunt. Id demum justum est, quod temporibus convenit, non secus atque illud salubre dicitur, quod loco & tempore laboranti adhibetur. Ut igitur in arte medica, non cuilibet omnia, nec eadem semper salutaria sunt, ita in regendo & judicando nisi justitiæ munia pro rerum ac tem-

temporum conditione statuantur, iusta cum iustis aliquando pugnabunt, legesque illæ, per quas civitatis morbi curari debent, modo insalubres, modo etiam exitiosæ videbuntur. Quid quæritis? Ipsa quoque Romanorum jura pro variis rerum conversionibus mutata sunt, suisque temporibus, & civium ingeniis accommodata. Neque enim aut jus Papyrianum, exactis Regibus, libero populo convenire potuit; aut Duodecim Tabulæ civibus in immensum auctis, variatisque opum magnitudine moribus satis fuere; aut plebiscita & senatusconsulta, amissa rursus libertate, non Principum constitutionibus indiguerunt. I nunc, & antiquas leges huic sæculo recita. Delectabis cognitione pulcherrimæ rei; at paucos, mihi crede, movebis, ut patrias deferant, & ad illos mores suorum dissimillimos adducantur. Quid vero si illis, quas Romanas appellant, nonnihil immiscuit avaritia compulsus Justinianus? quid si multas ipse quoque vitiavit partim celeritate conficiendi negotii, partim nescio qua malitia Tribonianus? Videlicet ita ferunt: quod ego nec sustinere ausim, neque refellere. Etenim utcumque sit, nostras ego malo, quam illas; sed illas, quam ceteras. Quod cum dico, non ego illis nostras oppono, quia meliores, sed quia tempori & moribus appositæ nostris. Si enim barbari cum Italianam occupassent, multisque sæculis beatissimam hanc orbis partem incoluissent,

num-

numquam tamen eius humanitatem & saluberrimam vivendi disciplinam ita fenserunt, ut suarum legum turpium ac ferinarum amore deposito, Romanas adsciscerent; cur nos nihilo minus ad elegantiam, quam Romani, ad æquitatem vero etiam magis exculti, antiqua illorum jura, nostris abiectis, revocabimus? Ego vero ne hoc quidem moleste fero, Gothos & Longobardos paullo belluarum dissimiliores, cum mores exuere in hac humanitatis patria nequivissent, pares moribus tenuisse leges; nedum velim, litteris ac religione cultissimas gentes suis se repente abdicare institutis, & ad aliena transire. Quid quod ipsius patriæ amor, & quædam veluti patriarum institutionum reverentia jubet unumquemque custodire sua, & adversus novatores propugnare? Ut enim commovemur, ut exardescimus, ut cælum terramque miscemus, quoties aliquis oblitus sui peregrinos mores usurpat; eaque arrogantia, quam quidam solent ex longis itineribus domum referre, patria quæque fastidit, mensas, vestes, studia, sermonem, nihilque nisi Gallicum, aut Anglicum admiratur! Quod si privatos homines sibi unis per hæc insanientes ferre non possumus, quomodo illos feremus, qui judicia administrant, unde pendet civitatis salus, si patrio receptoque jure contenti non sint? Quo loco Venetorum Patrum consilium, & præter omnia antiquitatis exempla insignem prudentiam silentio præterire non pos-

possum ; qui cum multa æternæ reipublicæ fundamenta jecerint , tum illud in primis religiose caverunt , nequid umquam in judicando novaretur . Hanc illis constantiæ laudem suarum legum confidentia parit , quæ certe non tanta esset , nisi optime nossent , majores suos officia vitæ omnia quam rectissime præscripsisse , omnesque posterorum conatus , jubendo optima , prævertisse . Quemadmodum enim omnium rerumpublicarum formis inter se comparatis , hanc denique unam constituerunt , quæ plurimas felicitate , diuturnitate omnes superavit ; ita Græcis Romanisque legibus simul compositis , multaque opera expensis & æstimatis , hoc demum condidere jus , quod Venetum dicitur , ex omni vetusto jure sapientissime expressum , & æquitatis nomine , ubicumque gentium cognoscitur æquitas , celebratum . Nullam esse regionem puto , ubi mores & ingenia hominum ab antiquis legislatoribus egregie explorata mitioribus vinculis in officio contineantur , quæ maxima est , ac ferme una Principis gloria non metu , sed amore imperantis : at hoc singulare bonum , siquando aliena subrepere jura pariemur , statim corrumpetur , & ut legum arbitria , ita rerum ceterarum (quod Superi avertant) ad alios migrabunt . Quamquam , quod fieri nolo , ne fieri quidem fortasse potest . Fuit hoc quondam Romanæ reipublicæ fatum , ut una prope modum esset omnium hominum civitas ,

no.

nomenque unum, tantumque Romana jura, quantum arma procederent; quod victæ nationes ne victæ quidem sibi viderentur, si Romano jure uti possent, civesque ejus urbis, quæ una credebatur ad imperium & immortalitatem constituta, nominari. Nunc quæ tantula civitas est, quæ non se ad imperandum natam existimet, cujus non magni ad gloriam tituli, legesque multæ aureis litteris descriptæ, & siquid adversi fortuna ferat, ipso civium sanguine custodiendæ? Qui paucorum juvenum regulus non se summis Principibus comparat, juris auctor sui, custosque tanto solertior, quanto plura infirmi timere solent? Non est igitur opus voce nostra, qua in re sibi quisque sapit. Id nobis curandum, ut, quod primo loco dixi, Romana jura in scholis teneamus, quibus homines instructi sua mehercule utilius tractabunt; eamque felicitatem civitatibus parient, quæ rectam judiciorum administrationem plerumque consequitur. Hæc nos præsertim exerceant, quibus si non conceditur in foro esse, operamque litibus dare, illud tamen propositum est, ut ex antiquis legum fontibus magnam propriorum verborum supellectilem, solennes formulas, omnemque eruditionis copiam reconditæ & exquisitæ ad aliarum disciplinarum usum colligamus. Utamur Principis Serenissimi beneficio, qui celeberrimos toto orbe Jurisconsultos magnis præmiis advocatos hac in urbe docere iussit:

fit: utamur sæculi sapientia, in quo cum litteræ facultatesque omnes pristinam dignitatem recuperarunt, tum maxime juris scientia, excussa barbarie, quæ per rabulas & leguleios obrepserat, rursus ad Alciatos, ad Goveanos, ad Cuiacios, ad Hotomanos, tamquam in sinum complexumque parentum, regressa est; utamur denique fortuna ipsa, quæ bonis artibus tandem aliquando conciliata, undique Augustos, undique Mæcenates excitat, & litterarum & litteratorum studiosissimos. Quod postremum video a multis negari; sed mihi quidem ad hujus orationis exitum properanti, in te unum, Princeps Eminentissime, veluti multorum exemplum conjicere oculos satis est, cui ad insignem, & absolutam erga litteras munificentiam, vel nihil omnino deest, vel illud unum, ut tantum illis prodesse possis, quantum cupis.

Edita est Patavii an. 1719.
deinde alibi, addita hac
Auctoris Epistola

AD LECTOREM.

SI quam libenter fit aliquid, tam etiam recte fieret, nihil a nobis exisset hac oratione tolerabilius: sed
hoc

hoc in genere tum maxime ineptire homines solent, cum minime volunt. Nimi-
us enim effusa voluntatis impetus in-
genium fere ultra modum movere solet,
tantumque agitare, ut neque parere pru-
denter possit, neque explicare disponere,
neque apte luculenterque ornare. Id e-
go mature prævidi, fecique diligenter,
ut ratione, non impetu ducerer: ve-
rumtamen ardua res est, neque illa
diffiteor, quæ me hominem communi-
bus vitiis obnoxium abripere potue-
runt, & in dervia propellere. Ergone
in-viti melius dicunt? Imo longe pejus.
Cum enim studia humanitatis omnia in
primis voluntate nutriantur, nihil ne-
que poeticum, neque oratorium, quod
agro animo fiat, potest esse probabile.
Quid quæris? Libenter in hoc argu-
mento versatus sum, quod ipsum per
se grave, cum ea insuper eruditione
conjugatur, quæ latina studia tractan-
tibus familiarissima est. Plura ego de
me polliceri non ausim. Quantum vo-
luntas & conatus in homine valeant
infirmissimo, alii viderint. Vale

AD

AD HISTORIAM

Oratio VIII.

*Qualecumque Historie studium ad omnes
pertinet, Criticum ad paucos.*



Agnopere vereor, ne nimio plus ab adolescentibus nostris hodierna luce postulare videar, humanaeque vires non satis prudenter aestimare, si gravissimis disciplinis, de quibus superioribus annis verba feci, Historicum studium suapte natura immensum nunc denique adjiciam: quasi vero rebus necessariis onustos, ac pæne impares, supervacuis opprimere velim; spiritumque illis, ut ita dicam, atque animam includere. Verum & me illi satis norunt neque multa, neque severius exigere solere; & ego illos quotidie video, quidquid socordia peccant, modo magistro, modo naturæ imputare; & utcumque tandem res se habeat, quidvis potius committendum est, quam ut majores nostros, quorum consilia plane divina vel in rebus minutissimis recognoscimus, in tam gravi litterarum negotio minus vidisse judicemus; quamque ipsi statuerunt Historicam

K scho-

scholam , nobisque in primis commendarunt , nos inani suspicione perterriti , aut levitate ducti prætermittamus . Equidem non diffiteor , nimis infinita esse , quæ hoc nomine comprehenduntur , quo cum antiqua monumenta veniunt obsoletis verbis fabulisque involuta , tum Geographicæ Chronicæque tabulæ æternis difficultatibus impeditæ , tum innumera rerum gestarum volumina non sine partium studio scripta , tum denique magna quædam controversiarum copia ad hæc ipsa , si fieri possit , expedienda , si non possit , magis magisque implicanda . Sed quemadmodum patrisfamilias prudentis est mensas apparatusissimas struere , non eundem tamen pueris cibum ac viris præbere ; ita officii nostri ratio postulat , ut cum omne studiorum genus , quæ libero homine digna sunt , in medio posuerimus , tum demum quid cuique , quove tempore conveniat , etiam atque etiam consideremus ; & pro ingeniorum ætatumque varietate onera laboresque distribuamus . Ac siqua ars , aut disciplina duce solertissimo indiget , ne quid in illa ætatis imprudentia committatur , Historicum certe studium tam lubricum est , ut quædam non ignobiles Academiæ , cum de tanta solertia desperarent , quantæ opus esse intelligebant , hoc tam insigni bono carere maluerint , quam levem juventutem periculo exponere . In quo , nequid dicam gravius , duobus Lycurgis similia fecerunt , sapientibus quidem viris ,
sed

sed in hoc præter modum severis, quod alter ut divitiarum aviditatem compesceret, omnem auri argentique usum Lacedæmoniis interdixit; alter, ut ebrietatem averteret, vires omnes in suo Thraciæ regno præcidi jussit. Nos exempla meliora secuti, moremque loci hujus, in quo alti educatique sumus, retinentes, ita statuimus, qualecumque Historiæ studium ad omnes pertinere, Criticum ad paucos. Hoc vero cujusmodi sit, quantum quidem animo ex vestra sapientia conjicio, plerique omnes intelligitis: sed ne quis tamen unus consilium hoc nostrum insimulet, oratione explicabo, simulque faciam, ut rerum præteritarum cognitio quanti sit in unoquoque genere, constet; simul illud ostendam, quam multis naturæ industriæque prædiis paratum esse atque instructum necesse sit, qui velit antiquitatem curiosius expendere, & severa Criticorum trutina sine periculo castigare.

Cum discendi desiderium ab ipsa nobis natura inditum Philosophi dicunt, tametsi universe loquuntur, nihilque prorsus excludunt, quod in hominis cognitionem cadere possit; ubi tamen eo descendunt, ut rem pluribus verbis exponant & confirmant, facile apparet, in quo uno scientiæ genere omnes homines desiderando conveniunt, id aut Historicum esse, aut ad Historiam quoquo modo referri. Quæ enim ætate plurimum natura valet, necdum iis affectibus tangimur, qui nos ad

ingrata etiam suscipienda compellunt, vix quippiam est tam invisum, quam schola & magister: at illa tamen ætatula ipsa narratiunculis delectamur, earumque studio ducimur; quæ licet plerumque falsæ sint, magisque poeticæ, quam historicæ; certe declarant, quantum natura nostra rerum præteritarum cognitione afficiatur, cujus rei gratia fingendum etiam nutriculæ putant. Ubi porro adolevimus, rationemque adhibere jam licet, hoc ipsum naturæ iudicium vel ex eo manifestum est, quod in aliis quidem disciplinis omnes industriæ nervos contendimus, nequid nobis nisi certum ac firmum, quantum rerum conditio patitur, inseratur; at in hac temporum præteritorum investigatione, etiam vero similia libenter audimus, scientesque ac volentes ad poetas convolamus, qui insitam humano ingenio cupiditatem fallendo expleant, suæque illa mendacia, quantumvis immania, nobis obtrudant. Curiositas hæc non unius, aut alterius hominis, sed plane omnium, quicumque; non dicam litteras norunt, sed litterarum nomen audierunt, quia scilicet naturalis est, nullo nos vitæ tempore, nullo loco deferit; & cum aliæ omnes tardius exortæ, ætatis flexu dilabantur, hæc una nobiscum nata, ad extremam usque senectutem perdurat. Igitur cum dico, Historiæ studium quaecumque ad omnes pertinere, naturam ipsam ducem sequor, cujus si ratio perpetuo haberetur, haud ita multos
 fulce-

suscepti consilii pœniteret . Nullam gentem esse puto tam incultam , tam vecordem , tam omnis humanitatis expertem , quæ suæ reipublicæ acta non litteris manderet , legique cupiat : carere barbari eloquentia possunt , carere philosophia , carere disciplinis omnibus , Historia carere non possunt . Hinc Spartani ad omnia rudes , præterquam ad arma , Dicæarchi tamen librum de majorum suorum gestis , totoque civitatis regimine quotannis in loco publico recitari volebant ; Romani vero antequam feritatem exuerent , rerum suarum annalibus dedere operam ; quos quidem non quivis unus ex populo , sed Pontifices ipsi scribere jubebantur , ut iidem & Sacrorum & Historiæ curam haberent , resque duas potissimum necessarias magistratus unus , idemque gravissimus procuraret . Quid Hebræi , tam antiqua natio , quam natura ipsa , in omnibus ferme rebus numine afflata , ut gentibus consecuturis auspicia præberet legesque vivendi , quid inquam Hebræi ? numquid aliunde suas litteras , quam ab Historia auspicati sunt ? Nullus est codex Mosaicis commentariis antiquior , ut ex hac tamquam naturæ voce discere possimus , quo homines suopte ingenio ferantur . Quod si parum est in natura momenti , anne parum etiam in Dei optimi maximi providentia , qui sacrum Historicum movit , ut religionis mysteria , morumque instituta hac via & ratione doceret ? Nolo enim hic plura

quærere : liber omnium diviniſſimus , quo uno ad ſalutem indigemus , quem ſine intermiſſione verſare , legere , memoriæ mandare debemus , hic , inquam , liber tam neceſſarius hiſtorice ſcriptus eſt ; num igitur ſapere ſine Hiſtoria ullo modo poſſumus ? Sed nimis longe res ducitur : cominus agamus . Jam enim ſcire velim , quodnam litterarum , aut doctrinæ genus ſine Hiſtoriæ adminiculo conſiſtere poſſit . non ſane poeſis , quæ facta imitari fingendo ſolet ; non noſtra hæc dicendi facultas , quæ rerum vetuſtarum exemplis tum ad ornandum , tum vero etiam ad probandum frequentiffime unitur ; non Jurisprudencia , quæ ſine Romani imperii totiusque antiquitatis notitia intelligi omnino nequit ; non denique Civilis ſcientia , quæ multiplici rerumpublicarum hiſtoria conſtat , & ex ea maxime conſtata eſt . De Philoſophia vero quid dicam ? Mitto quærere , utrum animalium & plantarum hiſtoria ad hoc ſpectet , quod inſtituimus : ſed cum quædam ſit Philoſophiæ pars de officio diſſerens , ſive a Pythagora , ſive a Socrate inventa , num hæc præceptis tantummodo continetur ? Nempe aut ipſa morum doctrina nihil eſt aliud , niſi Hiſtoria ; aut ita cum Hiſtoria conjuncta , ut ſi caret exemplis , ſcholastica ſit , jejuna , ſupervacanea . Tibi intus cane rigida illa & adducta virtutum genera , quorum uſu & poſſeſſione felicitatem definis : nihil nobis hujusmodi perſuadere poteris , niſi re-
rum

rum eventu & hominum factis ostendas, quid pati possit humana conditio, minime nota illis, qui pallio inclusi intra parietes philosophantur. Quid fieri debeat. o scitantes audimus; at cum id factum esse intelligimus, nec sine fructu, & a præstantibus viris factum, tum vero studio movemur conandi similia, tum æmulatione exardescimus. Magna est hæc Historici studiū ad philosophica tractanda necessitas, & haud scio an maxima; non tamen major illa, quæ Theologicas disputationes comitatur. Utrum enim ullus potest esse, aut dici Theologus, tanto par nomini, qui omni prorsus Historiæ cognitione careat? Iners profecto est, qui profanam ignorat, siquidem Canum, optimum ac solertissimum harum rerum disceptatorem, consulimus; at si quis ne sacram quidem tenet., quem ego illum Theologum dicam? Nisi forte parum pertinent ad Theologiam Mosaicæ narrationes, acta Pontificum & Conciliorum, priscorum Patrum memoriæ, Apostolorum & Martyrum vitæ, totius denique veteris disciplinæ cognitio, unde multo firmitus & clarius Christianorum sacra, quam ex *possibilium* & *impossibilium* contemplatione multarum scholarum otio familiarissima demonstrantur. Quod nolim perinde accipiatur, quasi ego Scholasticam Theologiam summovere cupiam; & eruditionem quamdam ejus loco ponere sine illo doctrinæ ordine, quam *μὴ δοξάω*. Græci dicunt, sine acumine, sine

de loc.
Theo.
l. XI.

disputationibus , uno verbo, quæ ingenio parcat , memoriam exerceat . Multa in Theologo esse oportet ; nec satis muneri facit , qui Dialecticis commentationibus tantarum rerum scientiam circumscribit ; nec item satis , qui omnia religionis dogmata ex Ecclesiæ fastis & annalibus egregie recitat , nisi eadem possit luculentis acutisque rationibus illustrare , & contra oppugnationum perfidiam communire . Ardeo , mihi credite , in parte tam ampla dicendi desiderio ; sed multa necessario omittere sunt , ut de Critico Historiæ studio , quemadmodum initio proposui , quæ sentio , vobis exponam . Vereor enim , ne sibi quidam emendandi gloriola abrepti nimis indulgeant , suisque illis judicandi regulis temere usi , non modo leviora antiquitatis monumenta concutiant , sed in arces quoque ipsas invadant , tantumque sibi licere putent , quantum Criticæ concedendum prædicant ; quæ ipsa per se optima est , magnoque in litteris usus , sed invidia laborat , quod ad ingenia furiosa aliquando perveniat . Neque vero iccirco actionem instituo , ut ea judicio persequar , quæ legitimæ censuræ modum & potestatem prætergrediuntur . Nimis hoc longum esset , majorisque ingenii opus . Sed illud mihi tamen non difficile erit ostendere , paucissimis hominibus ætate & sapientia valentibus arma hæc concedenda esse , quibus non recte adhibitis , solitudo & vastitas nobilissimis historiis , multarum

ætatum fide confirmatis, afferri potest. Et enim si Criticum hujus facultatis studium in eo consistit, ut nihil omnino credatur, quod non certissimis monumentis traditum ad nos devenerit, quotus quisque curam hanc tantam suscipere potest, ut obscurissimam antiquitatem excutiat, probet, castiget, excipiat, condemnet? Quot genera rerum, linguarum, studiorum teneat oportet; quam multa legerit, viderit, audierit, perceperit ex omni vetusta recentique doctrina, qui tantum in litteras sibi permittat, judiciumque tam periculosum, volentibus reliquis, aut saltem non ægre ferentibus, exerceat? Jamvero illud quantum est, vulgares opiniones deponere, ab omni odio atque amore sibi cavere, nimios animi motus modo in vetera, modo in nova pronioris coercere, veritatem unam tamquam ducem ac pæne Deam sibi proponere; contra suos, contra patriam, contra seipsum, si ita necesse sit, aliquando sentire, & quæ sentias, libere pronunciare? Nemo sane est, qui ita non profiteatur communi illo Criticis omnibus, ac fere jam ridiculo scribendi præmio, in quo vitia humanæ naturæ omnia, veritatem uni tenentes, statim ejurant, multis ingenio abutentibus maledicunt, de sua fide & integritate magnifice pollicentur. At Carneades tanta sapientia vir, quanta nemo ignorare potest, nisi qui totam antiquitatem ignorat, ita sibi hac in re diffidebat, ut cum adversus Zenonem scribere

bere constituisset, ad bilis imperus temperandos helleborum sumserit. Nunc tantam illam diligentiam plurimi rident, quibus purgandis ne tota quidem sufficiat Anticyra; vixque in provinciam tam difficilem ingressi, continuo stilum exacuunt, magnaue Scriptorum nomina ad eadem designant. Et hoc quidem juvenum solet esse vitium, aut eorum maxime, quod sibi videantur aliena obrectatione crescere, matureque ad famam sine multo labore pervenire. Herodotus, inquit, Xenophon, ceterique Græci poetarum similes sunt; Thucydides vero minus ad mentium aptus, obscuritate sermonis veritatem obnubit: Ex Latinis Livius superstitiones consecratur, nec patriam verborum positionem dediscere potest; Sallustius vetustatem affectat; Cæsar gloriosus, Curtius mendax, Florus declamator est: Ex Ecclesiasticis Sulpicius miracula venditat; Theodoretus fucis & metaphoris studet; Rufinus futilis est; Eusebius, Socrates, Sozomenus favent Hæreticis; omnes autem negligenter ac supine tempora signant. Utrum quilibet unus ira loqui potest? Non nego posse aliquos, sed eos scilicet, qui maximam vitæ partem in optimis studiis collocarunt; qui multas sibi litteras ac reconditas, præter latinas, addiderunt; qui summa denique opinione ingenii consecuti sunt, ut extra invidiam positi judicentur. Nempe hæc sibi multi tribuunt, sed pauci præstare possunt. Ex hoc enim tam ingenti ho-

ti hominum numero , qui in hoc pulvere
 deludamus , quique nobis , ut de me ipse
 ingenue fatear , tacito quodam sensu blan-
 dimur , aliis fere valetudo deest , aliis vo-
 luntas , aliis ingenium , aliis subsidia li-
 brorum , aliis in vestigando contentio , a-
 liis patientia , aliis denique alia , quæ sin-
 gula ubi deficiunt , multi adhuc ad planio-
 ra litterarum genera aditus patent , ad Cri-
 ticum Historiæ studium pæne nullus . Fac
 enim , se tam immenso ac scopuloso pela-
 go adolescentem committere : jam primus
 ejus labor Sacra Biblia , quo in codice si-
 ne controversia fidelissimo quam sæpe ta-
 men secum ipse luctabitur , si omnia ad
 Criticæ leges exigere velit ! Agedum inci-
 pe computare tempora , unde studium hoc
 exordia ducit : ecce tibi statim nubem of-
 fundunt Septuaginta Interpretes , qui an-
 nos centum generationibus singulis adjici-
 entes , Hebræam , vulgatamque *ἡεραπολιταν*
 in magnum discrimen conjiciunt . Consti-
 tue mihi Beli tempus , de quo non uno ,
 aut altero sæculo , sed annis ferme mille
 principes hoc in genere Scriptores inter se
 differunt . Quandonam Assyriorum , quan-
 do Persarum imperia cœpere ; quos in an-
 nos confers egregium Judithæ facinus ; un-
 de Babilonicæ captivitatis tempora nume-
 rare incipis , unde Danielis hebdomadas ,
 unde ipsum Christi Domini adventum tam
 celebrem , tam notum , tam illustrem , de
 cujus tamen anno , si orbis conditi ratio-
 nem habeas , opiniones plus nonaginta ,
 par-

partim aliquo modo varias , partim omnino contrarias invenies ? Te vero miserum , si sacra cum profanis componere velis , nomina nominibus , facta factis conciliare . Te Belus vexabit , te Nembrothus , te Cyrus , te Assuerus , te Artaxerxes , te multi Darii , te non modo temporum , sed regionum terrarumque descriptio ; quæ omnia si quis distinguere recte potest , & suo quæque loco statuere , hunc ego hominem non cum cetera Criticorum turba comparo , sed in primo subsellio colloco , & Musis ipsis proximum judico . Quod si tanta est in historico illo difficultas , qui nec falli potuit , neque fallere voluit , quo animo ad eos accedes , qui homines sunt , humanisque erroribus obnoxii ? Qua mentis acie , quo conatu opus erit , quâ prudentia , quo ingenio , ut cum te ad horum lectionem contuleris , quanti quisque valeat , statim attendas ; sitne natura sua ad laudandum inclinatio , an ad carpendum ; quam sit ambitiosus , quam credulus , quam superstitiosus ; utrum dubia , utrum contraria narret ; unde sumat , quomodo sciat , a quibus acceperit , quorum partes sequatur , quibus adversus sit ? Neque vero cum tantam animi intentionem , tantamque diligentiam adhibueris , salva res erit . Solent enim Scriptores , ubi imponere volunt , stilum naturamque commutare ; & interdum quidem veracissimi falsa dicunt , quemadmodum fallacissimi interdum vera . Quo fit , ut cum facta ,
& au-

& auctoritates inter se pugnant, nemo nisi sapientissimus momenta illa colligere possit, quibus in partem omnem pensatis, iudicium conjiciendo feratur. At enim regulæ Criticæ sunt ab hominibus perspicacissimis compositæ, quarum ope ne adulescenti quidem difficile fuerit istiusmodi freta, & si quid istis infestius est, superare. Fateor equidem eo me compulsus, velut in acie declinando atque effugiendo, quo minime volebam, non quod vulgari Sophistarum artificio usus, libenter graviora dissimulem, sed quod regulæ istæ a præstantissimis ingeniis excogitatæ magnam quamdam animo venerationem metumque obijciunt, nec liberam vocem erumpere sinunt. Verumtamen audendum in loco est; tametsi idipsum parcissime faciam, ne forte videar caput artis eatenus petere, ut totam convellam. Prætereo igitur, quod vulgo fit, regularum auctores sese invicem labefactare; non dico, ex iisdem contraria concludi, quod Abgari literæ, ne multa recenseam, per eadem oppugnatæ propugnatæque demonstrant; taceo, si quid in illis est nimis subtile, nimis varium, nimis multiplex, non tam ad veritatem enodandam, quam ad involvendam accommodatum; omitto præterea multa magni quidem momenti, sed quæ nec invidia carent, nec tantula oratione comprehendi possunt. Verum date mihi hanc, quæso; veniam, ut de illa nonnihil dicam, quam Critici omnes cetera-

terarum principem judicant, certissimam, inconcussam, ante oculos diu noctuque habendam. Age igitur, recita. SI QUID IN ANTIQUIS MONUMENTIS OBSCURUM, PERPLEXUMQUE ERIT, CRITICI INTERPRETES SUNTO. Euge, nihil moror. SI NARRATIO NARRATIONI OPPONITUR, HOC PRIMUM JUS ESTO, QUA QUIS ÆTATE, QUOVE LOCO VIXIT, EJUS ÆTATIS LOCIQUE HISTORIAM SCRIBENTI FIDEM HABETO; TUM QUI PROXIME VIXIT, CONSULTO; AB ALIIS CAVETO. Hoc tamquam filo per avia ducti memorias antiquissimas Critici quidam condemnarunt, & narratiunculas nescio quas multorum sæculorum contemtu situque obstitas in earum locum suffecerunt, parati negare verenda quælibet, si quis Scriptor ab inferis repente erumpat eorum æqualis, de quibus est controversia. Numquid igitur præcis temporibus nullæ erant animi perturbationes; affectus nulli, non amor, non odium, non injuria, non beneficium, quibus Scriptores labefacti rerum fidem violarent, seramque posteritatem aut malitia, aut infirmitate deciperent? Nunc certe Deum quendam esse oportet, qui potentum virorum facinora, seu pulchra, seu turpia, viventibus ipsis, fideliter scribat. Amicorum quoque ducenda ratio est, multo vero magis filiorum, interdum etiam nepotum; ut nunquam fere simplex ac nuda veritas, nisi tardissime efflorescat. Multa profecto in hac tem dici possent, nobis ipsis non audita
mo-

modo, sed visa, nisi esset hoc ipsum periculofum; ut jam conjicere possitis, quam vera de aliis historici dicant, cum de historicis ipsis vera dicere intutum fit. Quapropter ad illos redeamus, *quorum Flaminia regitur cinis, atque Latina*. Numquam enim ego eorum opinionem probavi, qui nova & inusitata vitia sæculo affingunt. Veteribus morbis laboramus, repente in singulos homines teterrima lue, qua se primus ille parensque ceterorum ad totius generis humani exitium contaminavit. Non est, opinor, Tacitus inter recentes adnumerandus; nec, ut videtur, inter illos, qui minus acute aliorum peccata vident. Is tamen tanti ingenii, tantæque calliditatis vir nihil valentius invenit, quo suam in narrando fidem commendaret, aliorum infringeret, quam si ostenderet, ceteros ante se Scriptores eorum facta retulisse, quibuscum vivebant. *Veritas*, inquit, *pluribus modis infracta: primum inscitia reip. ut* hist. l. 1. c. 1. *alienæ, mox libidine assentandi, aut rursus odio adversus dominantes. Ita neutris cura posteritatis inter insensos, vel obnoxios. Sed ambitionem Scriptoris facile adverseris, obtrusio & livor pronis auribus accipiuntur: quippe adulationi sædum crimen servitutis, malignitati falsa species libertatis inest. Mibi Galba, Otbo, Vitellius nec beneficio, nec injuria cogniti. Videte igitur, quanti sit ad veritatem canon iste, quem nobis Critici primo loco constituunt, nisi summa sapientia, quæ paucorum est, adhibeatur. Ac quo*

quo canone, quove duce per ea tempora
 ibis, quæ omni litterarum luce carent?
 Quis te, nisi sit multarum rerum cogni-
 tione firmata mens, quis te, inquam, in
 iis tenebris reget, in quibus Pontifices Pon-
 tificibus oppositi, sacerdotia pecuniis em-
 ta, magna rerum divinarum ignoratio,
 & ex ignoratione error, scelerum & ar-
 morum impunitas, exiguum sacri & pro-
 fani discrimen, quædam veluti nox Ec-
 clesiæ offusa, in qua vix oculatissimi sine
 periculo versari possunt? Ætatis æstus, &
 levitas, & humani ingenii curæ in pejo-
 ra vergentes, transversum agent: nihil
 jam sanum tibi videbitur, nihil certum;
 quodque ipse percipere non poteris, nemi-
 nem probe percepisse judicabis. Accedet
 illa etiam, quæ multis exitio fuit, an-
 quarum rerum satietas, & mutandi libi-
 do, qua fieri solet, non ut vera, sed
 nova delectent; omnino ut in cibis ali-
 quando usuvenit, quorum exquisitissimi
 consuetudine vulgati fastidium afferunt,
 deteriores novitate probantur. Quod si quis
 primos verecundiæ fines transierit, & an-
 tiquitatem contemnere cœperit, ubique
 Annios, ubique Inghiramos, ubique Cec-
 carellos, ubique Ligorios inveniet; modo
 hunc, modo illum auctorem criminabitur;
 nunc de stili varietate dolebit, quæ tamen
 potest esse quæsitæ; nunc de temporis fal-
 lacia queretur, quæ tamen ad librarium
 referri potest; nunc illum Scriptoris no-
 men, aut libri titulus commovebit, quæ
 multis

multis tamen casibus fere variantur . Quid multa? Vel in scirpo nodos quæret ; neque putabit ex Critica dignitate esse , si quippiam apud se valeat , quod vulgatum sit , multisque commune : ex quo etiam falsa consulto defendet , ubi vera ab aliis occupata videbuntur . Siquidem hoc ipsius artis proprium ac præcipuum est , ut homines faciat præstandi cupidos , aliorum contemtores , rerum mirabilium nimis studiosos ; quæ vitia tanto magis tantoque facilius penetrant , quanto molliori accedunt ætati . Ac nimis undique magna , & fortasse etiam aliquibus molesta dicendi seges mihi succrescit : temperandum orationi est , temporique serviendum . Quod reliquum est , ingenuam hanc studiosamque juventutem , quæ se nobis in disciplinam tradidit , oro atque obsecro , ut in suscepto præteriti temporis studio pergat . Neque enim est , cur antiquas statuas , arcus , thermas , theatra , sepulchra tam curiose inspiciamus ; eorum vero animos immortales ac splendidos , qui hæc posuerunt , quibusque posita sunt , in historiis descriptos cognoscere nolumus . Egregium quidam est ac dignitatis plenum majorum nostrorum memoriam revocare ; religionis initia , incrementa , propagationem intueri ; gentium ac populorum migrationes , bella , fœdera , regimina , fata ad prudentiæ usum perlustrare . Horum notitiam qui nullam habent , censentur inter pueros ; qui ne habere quidem volunt , inter amentes . At

L

simul

simul illud ex animi sententia moneo, ne plus capere velit, quam possit; hoc est ne nimis sapere, neve maturius, quam oporteat. Nemini umquam crimini datum est, quod tardius se ad reprehendendum contulisset; multis quod citius: & nimirum gravius est judicandi opus, quam ut prope-rari debeat. Ad hoc, qui narrat, aut laudat, impune alicubi peccare potest; qui censorem agit, ne in minimis quidem rebus sine summo dedecore delinquit. Neque vero Criticorum inopia laboramus, ut undique omnes assumendi sint: quin etiam affirmare licet, ut suum cuique sæculo ingenium est, quasque fidus, ita nostrum hoc ubertate atque indole quadam sua Criticos ferre. Verumtamen decus hoc tam pulchrum & exquisitum in quodam veluti præstantiæ acumine consistit, unde minima quavis inclinatione in vitium & noxam derorquetur; ex quo fit, ut tamquam e longinquo adolescentibus aspiciendum putem, nec ante attingendum, quam diuturna mentis exercitatione vires confir-maverint. Hanc mihi cogitationem Criticæ arti honorificentissimam cum illa iniece-runt, quæ hætenus dixi; tum etiam no-strum hoc vivendi institutum non nimis contentionis capax; tum denique tua, Princeps Eminentissime, toties testata voluntas prudensque iudicium, nequid nobis in rerum memoriam, præsertim sacra-rum, tam cito licere existimemus.

Edita

Edita est Patavii an. 1720. addita
hac Auctoris Epistola

AD LECTOREM.

RESTE judicandi studium, quod
mutuato à Grecis nomine,
Criticum dicitur, etsi per
omnia litterarum ac discipli-
narum genera late fusum, ubique lo-
cum habet, attamen Historicam pro-
vinciam jure quodam præcipuo tenet,
eamque in primis moderatur. Nam
præterquamquod ipsa per se narrandi
ratio, quod ex multorum fide pendeat,
lubrica est, magisque periculosa, quam
cogitandi; accedit insuper Historico vel
oculatissimo admirationis cura nimia,
qua fit, ut sponte aliquando aberret,
nec tam sollicitè vera persequatur,
quam mirabilia. Et ipsa igitur Histo-
ria natura, et Historicorum indoles
artis Criticæ auxilium flagitat, eoque
ninitur uno, ut nobilissima facultas ad
otiosos detrusa, in scholarum lucem in-
terdum

terdum exeat, & cum ceteris consistere possit. Id magis certum est atque exploratum, quam facile, praesertim vero illis, qui ob aetatis infirmitatem fidei nostrae ac tutelae commissi sunt. Itaque his publica oratione commendaturus Historiam, & quod Historiam sequitur, Criticum studium, non stimulos tantum, sed frenos quoque adhibendos putavi, ob eas causas, quae, ut alibi minus valeant, in hoc certe loco magnum momentum ac pondus habere debent. Siquis haec aut sibi, aut suis non satis existimat opportuna, ne me tamen iccirco ita fatuum credat, ut idem omnibus propinare velim.



A D E T H I C A

Oratio IX.

*Moralis institutio magis a Poetis,
quam a Philosophis petenda est.*



Non deerunt, qui mirentur; cur ego meo quodam consilio, fortasse non malo, sed certe inusitato, ex aliis in alia quotannis aberrans, nova dicendi argumenta quæram; singulisque facultatibus in hanc lucem adductis, perinde disputerem, quasi universum scientiæ orbem tantulò ingenio complecti velim; meque, ut vani Sophistæ solent, conflato ad invidiam nomine multiscium venditare. Attamen qui me, moresque meos parumper attendet, facile intelliget, neminem esse, qui istiusmodi ἐγκυκλοπαιδείαν aut minus sibi tribuat, aut aliis ægrius concedat, veluti quamdam mortalis ingenii intemperantiam ultra vires nitentis, & siquidem se posse, quod nititur; putat, etiam insani. Neque tamen inficior, id mihi a prima adolescentia fuisse propositum, ut studiorum decursu quam plurimas litterariæ provinciæ partes obirem; non ut aliquando im-

menſum aliquid profiterer, ſed nequid eorum omitterem, quæ ad Oratorium & Poeticum artificioſum aliquo modo conferre poſſent; tantumquæ doctrinæ & eruditionis haurirem; quantum de re omni probabilia dicturo in tempore ſatis eſſet. Nulla eſt enim ars, aut facultas ita cum alia conjuncta, ut omnes ſimul cum Poetica & Oratoria; quod cujuſque artificis ſit propria materia ſuique fines, Poeta vero & Orator nullam certam ac definitam regionem habeant, ſed late vagentur, omnemque dicendi & ſcribendi copiam, cujuſcumque ſit ordinis, jure ſuo ſibi arrogent, comprehendant, moderentur. Ac de Oratoribus quidem video inter omnes convenire; de Poetis autem, ne rem infinitam aggrediar, quo tempore aliud quiddam inſtituo, alii viderint. Hoc ego dumtaxat in præſentia dicam, ſive in omni ſermonis & humanitatis genere recte verſentur, ut multis viſum eſt ſapientiſſimis viris, & in hiſ etiam Ciceroni, Poetæ ceteroquin non valde bono; ſive aliqua tantum rerum capita completantur, ut moroſi quidam triſteſque Grammatici ab hac laude repulſi ſcriptitarunt; unum tamen eſſe, quod illis negari ſine injuria nequit, in quo præſertim tamquam in regno ſuo ab ipſa litterarum origine conſederunt, quodque uni cum maxima dignitate & utilitate generis humani diutiſſime tenuerunt. Hæc Moralis inſtitutio eſt, quam cum olim Philoſophi, ſive Pythagoræ

de O.
rat. I
1. c. 16.

thagora, five Socrate duce, ad certa officiorum capita redegressissent, quidque sit in unoquoque primum, quid proximum, quid postremum, ratione atque ordine explicassent, in ea repente tamquam in fundo occupato pedem posuerunt, non admodum reclamantibus Poetis, genere hominum minime frugi, litium incurioso, & in diem vivente. Verum si tandem aliquando expergefacti jus suum persequi velint, eoque restitui, unde sine causa dejecti sunt; ego illis hodie tamquam in iudicio Centumvirali fidem meam operamque præstabo; vobisque cognoscentibus, sponsonem faciam, ni pareat, officii præscribendi rationem, quam Latini Moralem dicunt, Ethicem Græci, non tam ad Philosophos, quam ad Poetas pertinere. Quod ut perspicue faciam, omnemque dubitationem tollam, altius mihi repetenda sunt Poeseos initia; ex quo cognoscetis; cui potissimum litterarum parti, velut ab ipsa natura, naturæque auctore morum disciplina commissa sit; tametsi postea Philotophi jura turbarint, & in rem alienam quasi vacuam & caducam dolo malo irrepserint.

Quod singuli homines facere solent, ut a prima pueritia fabulas sequantur, nullumque studii genus ad multam ætatem libentius tractent, quam Poeticum, id ipsum univèrse ab humano genere factum est, cujus prima cura Poetice fuit, eaque una divinæ humanæque littæ diutissime

comprehensæ sunt. Quicumque aliquo doctrinæ genere excellunt, suoque ordine censentur, Theologi, Philosophi, Jurisperiti, olim a Poeticis scholis exierunt, in quibus scientia omnis parta est, atque u-nice culta, ut Strabo, ut Plutarchus, ut Max. Tyrius, ut ille, qui unus nominari poterat, M. Tullius, nullo ferme repugnante, tradiderunt. Quod quidem non ad ipsa Mundi incunabula referendum est, nec divinando conjiciendum, cum ex hoc numero fuerint Musæus, Homerus, Hesiodus, Parmenides, Epimenides, Solon, Empedocles, aliique notissimæ memoriæ Græci, qui divisionem, ut nunc est, disciplinarum & artium cum præcessissent, variam multiplicemque eruditionem carminibus comprehenderunt, & modo Poetæ habiti sunt, modo generali nomine Sapientes dicti. Crevere ab eorum ætate mirandum in modum litterarum studia, exorientibus undique nescio quo sidere magnis ingeniis; laticesque ex uno fonte manantes in varios subinde rivulos deducti sunt, qui magis magisque una cum Græciæ opibus adaucti, ingenia doctrinarum flumina certis finibus distincta celeriter constituerunt. Hinc enim Juris & æqui scientia propagata est; hinc illa, quæ de Deo rebusque divinis disliceret, Theologia; hinc Physicæ & Mathematicæ disciplinæ, quæ naturam latentisque naturæ causas subtiliter investigando patefacerent. In quo sane Poetarum sapientiani & æquitatem

tatem recognoscimus, sed adversæ fortunæ conjunctam. Cum enim ultro rerum naturalium scholas abdicassent, quod viderent, in singulis partibus jam præter modum amplificatis totam hominis industriam desiderari; novæque litteratorum classi, qui se vel Sophos, vel Philosophos dicerent, provinciam hanc tam amplam, ac nobilem liberaliter concessissent; homines isti a Poetis, ut ita dicam, geniti in parentes arma verterunt, quamque illi sibi reservaverant, officii explicandi potestatem, eam ipsam compilare cōnati sunt. Sed quo successu jam habere. Prodierunt novi isti morum magistri, ut eorum est institutum, obsoleto nigroque pallio, obstipo capite, ore inculto atque horrido, barbati, capillati, superciliofi, hominum potius terculamenta, quam homines: cum autem se tamquam cælo demissos ad hominum licentiam coercendam magnifice jactassent, tum dogmata fundere cœperunt, quæ cum illo vultu atque habitu convenirent; peccata omnia esse æqualia; de re nulla dolendum, de nulla lætandum; voluptatem omnem turpem esse; paupertatem, morbos, captivitatem non recte haberi inter mala; jus omne, nisi sit summum, iniquum esse; nullum amicitiz locum, nullum gratiæ, nullum misericordiz tribui debere; & id genus multa, quæ si communiter persuadere potuissent, jam nullas haberemus civitates, hominesque cum hominibus vivere nequirent. Porro

au-

autem quia prava infinita sunt, sibi que minime cohærent, vulgato arcano, bonorum & malorum fines pro libidine philosophantium variari posse, multi se repente familiarum duces constituerunt; in eo sibi uno convenientes, quasque conjurati, ut per pudenda & ridicula officium omne perverterent. Vix equidem mihi persuadere possum tantam aliquando fuisse hominum patientiam, ne dicam stuporem, ut cum viderent Diogenem cum suis Cynicis nudum ac sordidum ex professo maledicta jacere, Aristippum cum Cyrenæicis mollem & unguentis delibutum voluptatibus operam dare, Zenonem Stoicosque ceteros veluti lapides nullo rerum humanarum sensu tangi, Democritum in ridendo occupatissimum, Heraclitum in lacrimando, hos tamen non solum ferrent, sed & sapientes, & morum quasi canones judicarent. Qui si aliquid probabile in tam ridiculo vitæ genere attulerunt, non tamen Poetas de antiqua possessione detrudere debuerunt, elegantes homines ac politos, qui sua præcepta ad naturam & communem sensum conformare solent, more hominum vivere, & id quod est in unaquaque re bonum, quamvis non sit admirabile, ad imitandum proponere. Et hæc quidem magnæ hujus disciplinæ principia fuerunt, quæ morum censuram tam prospere suscepit, quam videtis; donec ad Academicos, & Peripateticos ventum est, qui magis aliquanto ad humanitatem accede-

cederent, sed tamen Philosophi essent. Nomen hoc tam serium & grave jam apud omnes fide laborat, quod tota Philosophia litibus & controversiis implicita, cultores suos factionibus addicat, pugna-ces faciat, acerbos, acres, redarguendi cupidos, per abstrusa & difficilia admirationem sectantes. Ac si officia disputandi causa discerentur, isque optime moratus esset, qui subtilissime de moribus diceret, non esset ab his discedendum, qui in omnes humanas affectiones acutissime penetrant, multiplicique divisione rerum ac distributione minimas quasque differentias persequuntur: sed cum omnis hujusmodi disputatio ad actionem referri debeat, non video, tam minuta subtilitas quid valeat ad hominum animos permovendos, aut quomodo tandem plus valeat, quam poetica oratio, rebus confecta de medio sum- tis, lucida, suavis, ornata, per numeros, per imagines, per figuras, non in aures solum, sed in omnes pæne sensus contor- ta & vibrata. Nisi quis forte putet monogrammos, qui rem nudis lineis repræ- sentant, magis movere oculos, atque al- licere, quam picturas perfecte coloratas, umbrisque ac luminibus distinctas. Equi- dem non diffiteor, ut in monogrammis partium varietatem, numerum, ac posi- tionem, ita in Philosophicis libris omnes officii partes, & partis cujusque membra clare distincteque apparere; at in hac tan- ta luce rerum etiam minimarum friget a-
nimus,

nimus, & in sermone tam bono vir bonus desideratur. Neque vero magna doctrina opus est, ut virtutem, ejusque pulcritudinem cognoscamus; quod cum secundum naturam sit, suo se lumine prodit, & in cujusque oculos incurrit: itaque in eo potius præcipientis industria verari debet, ut per omnia artificiosæ dictionis instrumenta naturam revocet ad prava conversam, & in suæ dignitatis cogitationem adducat. Quod cum Æsopus, Philosophus non indiligens, animadvertisset, abjectis disputationibus, ad apologos animum convertit, in quoque cum Poëtis fœdere, spem omnem formandæ vitæ in rerum sensibilibus imaginibus collocavit. Genus hoc fabularum miræ urbanitatis ac virtutis ad persuadendum, non in familiari solum sermone, aut in cantunculis locum habet, sed etiam in gravissimis deliberationibus; quod juvenes præsertim & imperitos valde afficiat, trahat, deliniat, pertentet, callidoque artificio ducat ad earum rerum assensum, quæ certis ac valde notis similes sunt. Cedo mihi Philosophum aliquem, cujus scripta simul omnia tantum potuerint, quantum una illa fabella, qua Menenius Agrippa Romanam plebem cum Patribus conciliavit, & in urbem reduxit. Nimia sunt hæc. Cedo qui non gratis clamet, quem populus libenter ferat, cujus præcepta, quamvis egregia, si cum Æsopeis hisce nostris conferantur, non frigida sint, & audientibus

molesta. Agedum enim, si quis a Zenone contendat, aurum habenti nocere, quis patienter audit, quis non Stoicam severitatem accusat? At si idem Phædrus per apologum muli a latronibus spoliati eleganter, recteque ingerat, accipitur, probatur. Fac, nimium vindictæ studium Philosophus damnet: creditur scilicet umbraticus homo consulere timori suo. At si quid hujusmodi Poeta velit, equo illo descripto, qui hominem armavit adversus aprum, placet narratiuncula, perpenditur, imbibitur. Non est, cur singula commemorare. Quæcumque litteris consignata sunt de mendacio, de furtis, de fraudibus, de maleficiis, si ex schola Philosophica veniant, aures fatigant; si blanda & eleganti comprehensione verborum per fabellas efferantur, facile subeunt animos, & ubi insederunt, conscientiæ stimulos excitant. Si igitur res, non ex specie & magnitudine, sed ex usu judicandæ sunt, pluris mehercule Phædri opusculum, quam decem ipsi ad Nicomachum libri, & sexcenta volumina ad eorum interpretationem scripta, non meo quidem, quod video quam leve sit, sed multorum sapientum judicio æstimari debet. Atqui adhuc in limine sumus, nec nisi minimam fabularis industriæ partem nutriculis ipsis familiarum adversariorum contentionibus opposuimus. Quid si ad graviores fabulas, quas proprie *μύθους* appellant, orationem ducamus? Quid si Comicas fictiones, si

Tra-

Tragicas, si Epicas in partes vocemus? Tamen ne impetum morales Philosophi sustinebunt? Verum ego neminem vestrum tam expertem litterarum existimo; ut harum fabularum commoda & utilitates ad civilis prudentiæ usum, & communis vitæ institutionem non sæpe audierit; mihi-que potius verendum est, ne inopia dicendi latissimum campum quæsisse videar, in quem *μυθίζοντες* ipsi, Poetarum explanatores, Critici, & Grammatici omnes infinitam prope segetem congefferunt. Itaque non docebo, vivendi præcepta figmenti istis involuta latere; sed potius causas exequar, cur ita Poetæ latere voluerint, cum simplex rectusque sermo, a Philosophis tanto post occupatus, ne ipsis quidem deesse posset. Omitto quod ante dixi, non admodum egere homines schola & magistro, ut in quo sit virtus intellegant, ejusque contrarium; sed figuris potius & imaginibus, per quas moniti, de se ipsi cogitare cogantur, & digna suscipere natura sua. At si docendi tamen sumus, ut aliquo certè modo sumus, nonne qui docet, rationem inire debet, quæ cum maxime impellat, tum vero etiam molestia careat & satietate? Poterat enimvero, poterat Poeta quoque de laboribus ac periculis fortiter adeundis, quemadmodum Philosophus, multa verba facere; at quanto magis mulcet ac movet, cum Herculem nobis monstra superantem ab oculos ponit, & per hæc divinos sibi hono-

honores promerentem? Poterat de calamitatibus æquo animo tolerandis illa omnia proferre, quæ Philosophis tam pulchra videntur; at cum Ulysses & Æneam per magnas ærumnas ad immortalitatem perducit, non ne & eadem canit, & canendo ad æmulationem incendit? Poterat denique de virtutibus omnibus, de amore patriæ, de fide, de justitia, de religione præclaros istos libellos ipse quoque conficere, nisi vidisset, quanto magis per exempla proficeretur. Unum vero neque ille consequi verbis poterat, neque Philosophi, quantumvis se ament, consequentur umquam, ut heroicam virtutem, quæ in summo præstantiæ fastigio, ac pæne supra hominem posita est, suis coloribus ornent, & recte subjiciant imitaturis. Eximiam hanc & inusitatam excellentiam, quæ ad Superos proxime accedit, ut exprimeret Aristoteles, ipse quoque ad poetica simulacra confugit, & Homérico Hectoræ productæ, fidem quæsit ex fabula. Et vero unum hominem exercitiis resistere, maria & navigationes aperire, populis salutem reddere ac libertatem, condere urbes ac gentes, orbem terrarum a tyrannis liberare, cujus putatis esse facultatis, quam divinæ, quam incredibilis? Quis talia, aut cui differendo persuadeat, quamvis disrumpatur? Aut omnis profecto inanis conatus est, aut unus historiæ fabularis heros ab egregio Poeta descriptus in tam difficili negotio plus valet, quam

Eth. I.
7. c. 1.

quam omnes omnium Philosophorum disputationes de hoc toto virtutis genere , de natura , de partibus , de fine , de sede , de nomine , de adjunctis , de contrariis ; quæ ipsa dum nomino tam macra & spinosa , jam in ore vestro molestiæ signa conspicio . Malebam equidem scholarum tædia præterire , quæ nimis jam multos inimicos habent : sed hæc potissima ratio est , quæ fabulas peperit , veluti quædam blandimenta sanitatis , per quæ salutaria pocula promte & alacriter fumerentur . Quam porro suave , in theatro sedentem sine ulla animi corporisque contentione , non audire modo , quid sit honestum & inhonestum , quid utile & inutile , sed hæc ipsa in illustribus personis varia fortuna jactatis aspicere , eo rerum apparatu , ac verborum genere proposita , quod cum ad monendum plurimum valet , tum etiam ad movendum ? Videtis , ut ad hæc omnes ordines libentissime conveniant , ut attente audiant , ut numquam fatigentur , ut vel in lacrimas jucunde soluti Tragicos eventus excipiant ? Conferte nunc frequentiam istam cum solitudine , quæ circa Philosophos est ; & plane intelligetis , utrum præstet per nostras hæc Poeticas blanditias , an per acuminis Philosophica mores civitatis castigare . Ægre homines apertum monitorem audiunt ; gravia sunt verba illa *ne dicas , ne facias , debet , non debet , licet , non licet* ; & cum vitia aliqua , nullo compellato nomine , reprehendun-

tur, ille sibi exprobrari putat, cui conveniunt. In scena neque histrioni, neque satyro irascimur. Irascimur autem? Tanto magis favemus, quanto acrius aspergunt; modo amicos, modo sodales, modo nos ipsos in iis moribus recognoscimus, & abditum ulcus ridendo tractari patimur. Ergo tota illa juvenum turba, quam aperto Morali ludo, Aristoteles exclusit, habet ex hac officina unde sanetur; hinc nemo repellitur; nulla ætas, nullus ordo, nulla conditio Poetæ gravis est; omnibus animi perturbationibus, iræ, libidini, invidiæ, cupiditati medicamenta hæc adhiberi possunt. Huc etiam viri Principes invitandi sunt, quibus nullum monitum nisi callido artificio, & per ambages ingeri potest: quod tamen non ad reprehensionem referri velim, sed ad ipsam principatus naturam, quæ tueri majestatem quacumque ratione, modo honesta, debet; & privatorum in se arbitria cavere. Ad hos scilicet Philosophus accedat de jure & injuria disputaturus; his, si quis animus, edicat, ne tantum sibi licere putent, quantum possint; hos doceat aliud regem esse, aliud dominum; illum in primis parere legibus debere, cui legum cura commissa est; neminem peccare gravius, quam cuius exemplum transit ad alios. Amentem esse oportet, qui tantum audeat, præsertim proposito ante oculos Seneca, qui si tantum sapuisset, quantum profitebatur, non dicam tantas opes non collegisset, in

Eth. I.
I. c. 4.

M quo

quo a multis est accusatus, sed & opes quascumque habuisset, & quæsitam in habendo paupertatis laudem, & totam illam, qualiscumque esset, Philosophiam procul a Nerone vendidisset. Id tamen, quod Philosophus sine invidia atque adeo sine vitæ discrimine facere nequit, per suas fabulas Poeta facit, ita Principibus fere omnibus gratus, ita acceptus, ita aliquando etiam necessarius, ut jam inter aulæ instrumenta censeatur. Hic unus monere potest imperantem sibi, ancipitem fortunam, fœdosque tyrannorum exitus adumbrando; hæc una reliqua est virtuti via, qua se per poetica involucra non quærentibus insinuet, & in illo etiam fastigio aliquando consistat. Quo in loco id velim tantisper cogiteris, quam angustis regionibus Philosophorum diligentia contineatur, quæ primum ultra privatos non progreditur; deinde hos ipsos, si adolescentiæ cupiditatibus irretiti curatione indigeant, tamquam sibi minus idoneos alio dimittit. Ergo nihil restat aliud, nisi ut tota hæc gravissima disciplina, quæ ad mores formandos spectare deberet, ingenio & disputationibus serviat, consuetudinem sequuta reliquæ Philosophiæ, quæ mentes contemplando conterit, & in se ipsa quodammodo vertitur. Quare nihil mirum si tota est in argutiis, nec jam laborat, ut optima edat, sed ut σοφιστικά, & quæ minime probentur in vulgus, *Sapientiam bonum esse, sapere bonum non esse; inter*

Sen.
ep. 61.

*inter magistratum & repulsam interesse nihil ; 116.
bona esse paria ; mortem a vita non differre ; 117.
virtutes esse animalia ; & multa similia istis.*

Tune igitur , bone Seneca , hæc scribe-
res , si vitiis sanandis non ex Stoica super-
bia , sed ex animi sententia operam nava-
res ? Tu hisce lusionibus felicitatem inesse
putas , summum illud humani generis ne-
gotium ; nostroque Homero tamquam nu-
gatori dicam impingis ? At is per suas fa-
bulas , si recte intelligeres , aut quod in-
telligis , sine invidia fateri velles ,

—quid sit pulchrum , quid turpe , quid uti-
le , quid non ,

Hor. 1.
epist. 2.

Plenius ac melius Chrysippo , & Cranto-
re dicit .

Nolite , quæso , mihi succensere , Audito-
res , quod de summo viro , & ut illa tem-
pora ferebant , etiam probo libere dicam .
Concoquere enim nullo modo possum ,
quæ ille in Homerum sive Poetam , sive
Philosophum , certe sapientissimum , atque
adeo sapientiæ parentem , audacter scribit ,
ubi ad ludificandum aggressus more suo , ep. 11.
cuncta liberalia studia contemnit , & nu-
merat in supervacuis . Hæc si in illa Me-
tronaëdis schola jactabantur , injuria pro-
fecto populum Romanum accusat epistola
septuagesima sexta , quod ad pithaulē
& tibicinem libentius iret . Quamquam ut
nihil dissimulem ex veritate & fide loci
hujus , ipse quoque Plato ab ea republica , De
Rep.
l. 1.
quam sibi animo ad perfectissimam for-
mam effinxerat , Homerum , Poetasque

ceteros, qui omnia promiscue imitarentur, abesse iussit: quod nobis adversarii tamquam ex iudicato objicere solent. Grave est hoc, Auditores, non tam ipsum per se, quippe a Philosopho; quam fama & auctoritate Platonis; cuius iudicio vel in sua causa multum deferre pro nostra æquitate volumus. Alios igitur sibi Heraclides Ponticus subscriptores adjungat, cum divinum hunc Philosophum; tamquam *Ὀλεῖται σοφὸν ἀνθρώπου*, calumniæ postulat. Nos quandoquidem reputamus, Platonem Homeri studiosissimum fuisse; imò poetas omnes tanto studio, seu potius veneratione coluisse, ut Deorum filios appellaret, & ipsi quoque Antimacho Clario, inepto ac verboso versificatori, unus ex omni Atheniensi populo aures præberet; quandoquidem, inquam, hoc reputamus, aliud quiddam illum spectasse credimus, quam quod vulgo existimatur, cum has delicias suas ab ea civitate removit, quæ nulla esset, aut si esse posset, heroum magis, quam hominum congregatio dici deberet. Pistores etiam mehercule & cupediarios exclusisset, si cives suos, quemadmodum sine vitiis & multarum voluptatum usu, ita sine cibis vivere posse existimasset. At enim ne Epicurus quidem Poetas probavit. Videlicet intemperantiæ patronus. Parcat vitiis necesse est, qui istius hominis benevolentiam captat. Ego vero non miror, poetica studia alicui Philosopho displicere, sed ob eam displicere causant, quæ

Cic. in
Brut.
c. 51.

quæ solet afferri, quod obscena multa a Poetis scripta sint; quasi vero quod multa herbarum ac frugum genera valetudinem lædant, herbas frugesque omnes odisse oporteat. Ac primum si negem, qui ita scribunt, esse Poetas, non injuria facere videar, sed ex ipso antiquitatis judicio, quæcum Musas huic studio præfecerit, satis superque ostendit, quam esset hoc nomine indignus, qui puellas honestissimas turpi lenocinio contaminaret: deinde si dicam, artibus omnibus ad salutem inventis commune infortunium esse, ut improborum scelere ad perniciem convertantur, dicam id, quod & notissimum est, & vel in summa Poetarum nequitia poesim tamen ab omni reprehensione liberare debeat. Quod si quidquam eorum querelæ valerent, qui tam male animati in poetica sunt, quodnam de D. Basilio judicium ferendum esset, qui Græcorum Poetarum lectionem adolescentibus commendat, multasque ad virtutem opportunitates apud Homerum, apud Theognidem, apud Hesiodum, apud Prodicum Chium eloquentissima oratione demonstrat? quodnam de ipso D. Paulo, qui cum ex Arato, ex Mæandro, ex Epimenide aliqua referat, perspicue significat, in hoc litterarum genus quo animo fuerit. Esto, jure queruntur; Poetas ablegemus, totamque arenam Philosophi teneant, si ita demum salva res est, Quid? Utrum nos ignorare putant, quid doceat Epicurus, totusque ille volu-

orat.
+ 2
tas 2/2

ptarius grex? an ita bonos esse, ut Calliphoni, & Dinomacho credamus, qui Epicuream voluptatem cum honestate copularunt, *tamquam cum bomine pœudem*, ut
 Cic. 3. off. c. 33 Tullianis verbis utar. Hi nempe nobis Poetarum nomina recitant, qui a modestia desciverunt. At ego illis non unum aut alterum Philosophum, sed sectas obiectiam, Hegeliacos, Theodorios, Annicerios, & quos modo dixi, Epicureos, qui facto agmine virtutem oppugnant; nec ut Poetæ in conviviis & ludis genio indulgentes licentius canunt, sed in locis ad docendum gravissimis serio & ex instituto turpitudinis illecebras, & indignas homine voluptates commendant, inculcant, ratas faciunt. Adde his & qui contra verecundiam disputant, & qui fraudes tuentur, & qui utile ab honesto sejungunt, & qui privata commoda anteponunt publicis, & qui Deorum timore sublato, cetera concedunt sine discrimine. Quæ ego vitia hominum non commemoro, quod in facultatem innocentissimam redundare putem; sed ut hac in parte si vincere non possumus, ex æquo pugnemus; nec magis Poetarum licentia Poesi noceat, quam Philosophorum imprudentia Philosophiæ. Sed jam amoris criminationibus, in viam redeamus, ut pauca quædam extremo loco de poeticis numeris habeatis, quandoquidem in fabulæ commodis satis, ut opinor, versati sumus. Altera igitur pars, & nescio etiam an prima, quæ poesim constituit,

Apud
Cicer.
off. 3.

ruit, carmen est, a quo res subjectæ tantum virium & virtutis accipiunt, ut se in animos facile insinuent, firmiter adhæreant, motusque illos vehementissime excitent, quorum gratia comparatæ sunt. Quod cum totum quantum est, explicari non possit, majus etiam aliquid ac mirabilius, quam veritas patiatur, huic arti tribui solet, ut & feras mitigare dicatur, & morari flumina, & silvas lapidesque commovere. Quare ut Poeta nihilo plus rerum, quam Philosophus, ad vitæ præcepta conferat, quantum tamen in eo putatis esse momenti, quod alter soluta ac simplici, alter ligata & numerosa oratione utitur? Certe nisi quid excellens ac divinum ad mentes impellendas in poetico sono numeroque esset, neque Archilochus Lycambem ad suspendium adigere per jambos potuisset; neque Tyrtæi versibus fuisset in acie locus; neque Solon, aut Terpander suas leges carminibus conclusissent. Nunc si quis officia & vitæ communis rationem numeris adstringere possit, morbisque animi tam valida remedia adhibere, hunc tamen Philosophus extrudet, suisque Dialecticis commentationibus ad differendum excogitatis subsellia occupabit? Sed urget indictus mihi orationis modus. Jam ex veteri Quiritium more, unde initio constituendæ causæ formulas duximus, ite in consilium, Viri sapientissimi; & quod bonum, faustum, felix, fortunatumque sit, tuam legitimis dominis possessionem frau-

de interceptam restitui jubete. Tu vero, P. Eminentissime, huic judicio moderando præpositus, cum plurimum legibus, quemadmodum semper soles, tum aliquid etiam benevolentia tribue: siquidem & Romani Cornelii suæ gentis principes Ennio, Lucilio, Terentio familiarissime usi, hæc se Poetarum amicitia vel in primis nobilitarunt. Nihil tibi a Philosophis polliceri potes, in suas contemplationes abditis, nullique viventibus; Poetæ cum singulorum officia juvant, tum publicam gloriam, & magnorum virorum gesta ad immortalitatem propagant. Quamquam nihil te magis in præsentii movere potest, aut debet, quam si tibi persuadeas, vera esse, quæ dixi; tuamque istam Juventutem, de cujus institutione majorem in modum sollicitus es, ad virtutem & optimos mores per poetica studia fingi posse: qua de re si testimonium quoque flagitas, Horatianum producam, eoque vel apud Philosophos longe gravissimo finem dicendi faciam.

2. ep. ist.

2.

Os tenerum pueri blandumque Poeta figurat,

Torquet ab obscenis jam nunc sermonibus aurem,

Mox etiam pectus præceptis format amicis,

Asperitatis, & invidia corrector, & ira.

Edita est Patavii an. 1721. addita hac Auctoris Epistola

A D L E C T O R E M.

Quo die Orationem hanc habere debebam, studiisque nostris ex more atque instituto proludere, accidit ut abesset hujus Seminarii Auspex Eminentissimus gravissima illa de causa, quae totius Christiani Orbis Cardinales Romam concivit. Itaque supersedi, maluique carere voluptate illa, quae mihi quidem mortalium omnium maxima est, publice dicendi, quam dicere inauspicato. Ne tamen videar ignavia potius, quam ratione fecisse, ut publico judicio abstinerem, hoc quidquid est, in lucem edo; in quo etiam superiorum annorum consuetudinem sequor, sed mehercule parum fidenter. Nam antea cum vulgarem, quae recitaveram, videbar quodammodo mihi tenere judicia hominum, eosque sponsores habere, qui mihi aures non gra-

vate

vate prabuissent. Nunc me totum fortune committo, plane incertus quo casura res sit. Neque enim, ut audientium, ita legentium ora vultusque notare licet, ubi caput avertant, ubi oscitent, ubi lacunar spectent, ubi proximum de hora interrogent; nequid postea librario tradatur, quod fatigaverit, aut offenderit. Hoc anno jacta est alea: ferendum quidquid evenierit. Quamquam ego, ut verum fatear, ex recitatione magis speravi fructum aliquem, quam perceperim; quod fere nugarum tadia brevitate compensem, habeamque auditores vel ad ea, que minus probant, attentos. Quod igitur dictioni audientiam facere consuevit, idem, ut spero, benevolentiam scriptioni conciliabit; brevitatis videlicet, in qua ego mihi maxime placeo, que me in primis, measque lucubrationes ornare solet, quam ego unus si desero, jam quomodo consistat in hujusmodi exercitationibus, omnino non habet. Nam plerique omnes, quos identidem audio, disertissimi cum sint, temperare sibi ne-

quimus;

queunt; ego vel si velim multa dicere, tamen inopia ingenii intra cuticulam cohibear. Sed jam tertia pagella procedit; ac pene in epistola modum præterii, quem tibi in oratione polliceor. Hactenus satis. Vale.



AD MATHEMATICAM

Oratio X.

*Ad-versus eos, qui nimis paucis Mathe-
matica studia concedunt; tum ad-
versus eos, qui nimis multis.*



Uod opus decem abhinc
annis jussu & auspicio
tuo, P. E., ex hoc il-
lustri atque edito loco so-
lemnibus verbis institui,
tandem aliquando exædi-
fico; Diisque immortali-
bus grates ago, quod mihi homini vale-
tudinis parum firmæ, ingenii vero infir-
missimi, tantum virium vitæque tribue-
rint, ut cursum hunc decennalem, quem
ne ipse quidem, cum auspicarer, totum-
que prospicerem animo, conficere me pos-
se sperabam, tamen confecerim; & ad
Mathematicam facultatem, quæ orbem
claudit ceterarum, non sine aliqua certe
felicitate, quantum ex hujus lectissimæ co-
ronæ benevolentia conjicio, nunc demum
pervenerim. Verum quod in magnis ope-
ribus fere accidit, ut ultima quæque diffi-
cillima sint, aut fessis jam viribus difficilli-
ma videantur, hic me postremus quasi a-
ctus

ctus vehementer terret, graviore quādam, ut sentio, persona imposita, novaque objecta non laboris modo, sed etiam difficultatis ac periculi specie. Nam de aliis quidem cum dicerem facultatibus, id unum requiri videbam, ut quæ cujusque tradendæ ratio mihi maxime probaretur, ex animi sententia declararem: nunc ipsa rei possessio in controversiam vocatur, nec jam ostendere oportet, cujusmodi sit Mathematica scientia, aut quomodo comparetur, sed quem deceat, quemve dedecet. Scilicet non desunt asperi homines ac difficiles, qui eam nobis invident; & cum ipsi inter se de toto hoc genere sermones conferant minime æquos, tum nos quoque ipsos, ut sibi videntur arguti, aliquando interrogent, ecquid juventutem in spem Ecclesiæ nobis concreditam, in angulis ac triangulis dimetiendis inaniter occupemus. His ego animis tam parvis & angustis, ut magnam partem generis humani, eandemque studiosissimam ad Euclidem & Archimedem accedere nolint, aliud quoddam genus hominum opponere consuevi, qui neminem doctum virum existimant, cujuscumque sit ordinis, si doctrinis careat Mathematicis. Cum enim utrique abeant ad extrema, ipsi se mutuo conficiunt. Sed jam ego quoque manus conferere tamquam in judicio constituo, nec solum priores illos propellere, qui nos aggrediuntur, sed hos quoque laceßere, quorum opinionem utilem quidem nostris ratio-

rationibus ad tempus duxi, universe autem numquam probabilem. Quod ut ratione & ordine faciam, duplex mihi via non diversa modo, sed etiam adversa incunda est, quarum prima veluti defensione constet, altera accusatione. Defendam operam & industriam nostram, quæ in Mathematicis disciplinis impenditur; accusabo labores eorum nimis, ut ita dicam, ambitiosos, qui has ipsas disciplinas in aliarum fines inducunt, infinitaque contentione suscepta, quæ Dii Deæque separarunt, communi vinculo jungere & copulare conantur. Ac defendendi quidem propositum sive sit necessarium, sive supervacuum, quod nolo in præsentī quærere, a nemine reprehendi potest; illud vero accusandi cum re ipsa, tum nomine odiosum ita moderabor, ut omnes intelligant, non me levitate aut perturbatione aliqua ductum, sed studio veritatis ac iustitiæ, suis finibus Mathematicam terminare; quos dum tenebit, in maximo ubique honore erit; ubi egredi incipiat, multas in se gravesque offensiones concitabit. Id vero quemadmodum se habeat, non ausim mehercule in hac luce exponere, nisi vestræ sapientiæ multis mihi rebus perspectæ magnopere considerem; qua me una tamquam scuto adversus invidiam tuebor, si quis forte tam cæcus atque audax obrektor erit, ut cum audierit, quo ego sim in Artem plane nostram animo, quam benevolæ, quam studioso, quam illius amplifi-

plificandæ cupido, mihi tamen crimini tribuat, quod omnem litterariam provinciam per fas nefasve occupatam Mathematico non condonem. Nemo profecto est, qui possit de re ulla publice dicere sine periculo: at me præter ceteros time-re oportet, qui quod sentio, non circuitione & anfractu regere, non ad gratiam & voluntatem audientium temperare possum, sed cujusque modi est, ex officio & gravitate personæ, quam hoc loco sustineo, perinde proferre debeo, ac si aram tenerem. Atque hæc valere semper: illud vero hujus anni proprium ac peculiarre est, quod peregrinus atque hospes in difficillimam regionem venio; nec ducere argumenta nisi ex universo genere possum, & ex communi quadam ratione, in quam litteræ omnes ac disciplinæ conveniunt. In his difficultatibus atque angustiis siquid efficere tamen potero, plane intelligetis, neque nobis Ecclesiasticam vitæ rationem ingressis omittenda esse Mathematica studia, neque ulli ultra modum & rerum naturam promovenda.

Qui in hanc facultatem alieno sunt animo, apertasque gerunt inimicitias, nihil sane afferunt valde firmum, sed tamen ita multa dicunt, ut si respondere singulari velim, in re non tam difficili, quam longa & molesta nullo litterarum bono tempus teram. At est callidum quoddam & insidiosum genus hominum, quod ut cognoscam, Auditores, indigeo sapientia

vestra , ut refellam , auctoritate & auxilio . Soleo enim pro munere hoc meo , quod neque ego tanta assiduitate ac vigilantia obirem , neque ullus obibit pro hac rerum temporumque conditione , qui non se divinitus vocatum existimet , Deumque unum , contentis mortalium consiliis , in omni actione & procuratione sibi proponat ; soleo , inquam , diligenter omnia circumspicere ; neque amicos solum , sed inimicos etiam , siqui sunt , audire , ut quantum fieri per me potest , studia nostra perficiam , & ab omni reprehensione liberem . Sunt igitur quidam ad litteras juvandas voce atque ore præclare compositi , qui Mathematicæ dignitatem multis verbis extollunt , sed usum ajunt non videri Clericis convenire . Quid hoc sit , non satis explicant ; sed ita tamen multa turbant , ut eos appareat profanum aliquid hoc nomine designare , quod in militari Architectura , aut in vana divinandi arte positum sit . Quid dicam , Auditores ? quid suspicer ? Eosne malitiose facere , ut inde alios absterreant , quo ipsi accedere non potuerunt ? At illi certe non sunt ita vafri : quamvis non negem , esse aliquos , ubicumque tandem sint (nam & Momo debet esse locus) qui pulcherrima quæque studia ob id unum carpere audent , quod se ab illis exclusos videant . Cum his nobis nulla res est , qui toti sunt a mendacio , quorum vita fallaciis constat , quibus siquis unus fidem habet , is ipse fabula fiat.

fiat . Ergo illud est reliquum , ut qui nos a Mathematica revocant , non satis advertant , quam multa hoc nomen complectatur , quæ cum hoc nostro vitæ instituto consentiunt optime . Age enim , quid est in Physica scientia , nisi forte hanc quoque nobis denegant ; quid est , inquam , in Physica scientia tam Philosophi privatum ac proprium , ut non magnam illius partem Mathematicus vindicet ? Ratione quidem atque ordine contemplandi inter se differunt , rebus non differunt , nisi perpaucis . Quidquid numero , aut figura aliqua constat , quidquid sono judicatur , quidquid luce distinguitur , quidquid aliquo mensuræ genere comprehendi potest in toto terrarum orbe , non tam Philosophici , quam Mathematici juris est . Atque hæc ante pedes . Quid *μετεωρα* , quid astra , quid planetæ , quid cælorum orbes ? An hæc ignorare Philosophus potest , aut sine Mathematico studio scire ? Ego vero ne satis quidem puto ad philosophandi præstantiam hæc studia conjungere : præcedant Mathematica necesse est , quæ animum a sensibus excitent , & ad intelligendi celeritatem exacuant ; siquid modo vidisse Pythagoram credimus , qui nullum auditorem in sua illa Philosophica adyta *Gell.* admittebat , nisi prius Geometriam , Gno- *l. c. 94* monicam , Musicam , Astronomiam didicisset . Hunc secutus est Plato , qui Ma- *de rep.* thematicam iccirco *μεταμαθηματικὴν* vocat ; Pla- *l. 7* toni accesserunt Xenocrates , & Speusip-

N pus,

Eth. l.
6. c. 2.

pus, qui eisdem legibus Academiam post ipsum tenuerunt; tum ipse quoque Aristoteles, qui certe a Magistri sententia discessisset, si ullo modo adolescentem his auxiliis destitutum fieri posse Philosophum existimasset. Itaque homines isti divino ingenio præditi, non Philosophorum modo principes, sed Philosophiæ parentes ea scripta reliquerunt de Physicis rebus, quæ ne legi quidem nisi a Mathematico possent. Aut igitur nobis tota interdicatur Physica provincia, aut concedatur, ut in eam tamquam cives & habitatores, non ut servi furesve ingrediamur. Physica porro commemoro, non quod Logica & Metaphysica Mathematicis commodis careant, non quod Ethica ipsa alicubi non indigeant, non quod facultates reliquæ vim suam omnem ac dignitatem sine illis obtinere possint; sed quia nihil asferre constitui, quod subtiliter excogitatum videatur, magis ad ingenium, siquod sit in nobis, quam ad veritatem ostendendam. At enim Philosophi sunt, & valde etiam, si Diis placet, beati, qui ne ipsum quidem quid significet Mathematicæ nomen, didicerunt. Esto: non tam bene cum litteris agitur, ut sapere non videantur, nisi qui sapiunt. Adhuc tamen est, quod nobis ætatiq; nostræ gratulemur. Nam sæculis ante Galilæum bene multis unum illud Philosophicum studium privatas Scholas publicasque tenuit, quo isti boni viri videntur esse contenti. Habete autem, quale fuerit. Sectæ hostili odio

odio invicem infestæ; ingenia certis hominibus sacramento addicta; impotens atque infinita pugnandi libido; nova rebus nomina indita ad lites alendas ex compacto institutas; fallaces & captiosæ argumentationes; insanæ formulæ, quibus nihil subesset nisi strepitus; subtiles & acutæ speculationes de iis, quæ numquam fuissent, aut vero esse possent; perpetuæ & ad ravim usque productæ disputationes, seu potius rixæ; omnia prius quæsita, quam veritas & natura. Videtis familias Gladiatorias (nolo enim Scholasticas dicere, quod nomen est, aut esse debet honestissimi ordinis) at hæ tamen ipsæ, silentibus Mathematicis, famam occuparunt Philosophiæ; cum caput Mathematica extulit, suasque vires Physicæ adjunxit, tum veluti renovato orbe, magni illi extitere naturæ interpretes cum omni antiquitate comparandi, Galilæus, Cartesius, Gassendus, Neutonus, Borellus, Hugenius, Leibnitius; & qui horum secuti vestigia, Philosophi re vera sunt, & habentur. Quis igitur nobis tam erit infensus, ut inventis frugibus, rursus ad glandes mittat? Ergo si tempus & industriam vanis contentionibus impendamus, simul Physici, simul Clerici nomen præclare tuebimur; si naturam serio scrutemur, saltabimus extra chorum? voces & nomina persequi licebit; res non licebit? pro sectæ studio disrumpi gloriosum erit, pro studio veritatis indecorum philosophari?

Nihilo plus dico, quam quilibet unus ex
 imis litterarum subfelliis cognoscere possit,
 modo non ignoret, quam viam & ratio-
 nem Philosophi teneant, ex quo iidem
 Mathematici esse cœperunt, suisque spe-
 culationibus sensuum testimonia & mecha-
 nicam operam adjecerunt. Atqui ego ni-
 mis exiguam laudem Mathematicis studiis
 tribuo, si nobis eatenus retinenda statuo,
 ut Physicis opem ferant: stant ipsa meri-
 to suo, eoque in primis magno atque ad-
 mirabili, quod nullum vitæ statum nul-
 lumque ingenium respuunt. Si enim is
 non inditus arte, sed animis innatus scien-
 tiæ amor, quo cuncti exardescimus, ho-
 nestissimus est, locisque omnibus ac tem-
 poribus aptus, quid est, quod Clericus
 ignorare illa debeat, quæ cum maxime
 ad discendum referantur, præstabile hoc
 disciplinæ genus constituerunt, non a re-
 bus ipsis, quas comprehenderet, sed *αὐτὸ
 τὸ μαθεῖν* nuncupatæ? Pœniteret me profe-
 cto conditionis hujus, si mihi naturam adi-
 meret, qua impellor ad sciendum; aut si
 cum multa ad ingenium exercendum con-
 cedat, sive levia, sive fallacia, sive am-
 bigua, hoc tamen intercluderet, quod u-
 num propemodum cadit in scientiam. Ha-
 beant sibi Peripatetici contentiones suas,
 habeant Academici, Sceptici, Dogmatici,
 Nominales; volumina voluminibus oppo-
 nant, factiones factionibus, ætates ætati-
 bus, omnia sollicitent, turbent, misceant;
 ut non solum sempiternis laboribus nihil
 sciant,

sciant, sed illud etiam dubium faciant, utrum sciri possit aliquid. Mathematica sane una ab incertis certa separat; ubicumque sit veritas, eo accedit; non de tempore, non de loco, non de secta laborat; libera, soluta, expedita, uti est unumquidque, seu album seu nigrum, sine ambage demonstrat. Hanc nobis qui auferunt, si nullum præterea litterarum genus relinquunt, parum abest, quin pecudes faciant; sin autem & Poetica, & Critica, & Dialectica, & Philosophica omnia liberaliter condonant, quid est quod illa excipiant, quæ ad doctrinam & eruditionem omnium certissima atque exploratissima sunt? Nisi forte, ut initio significavi, quod multæ Mathematicæ partes sint, aliquæ vero etiam hominum vitio corruptæ, unius aut alterius invidiam ad universas traducunt. Ita siquidem fit in rebus omnibus; ut cujusque laus ac reprehensio sumatur ex proximo. In quo ego tam communi malo nihil nobis præsertim dolendum puto: tantum dico, siqua sunt in Mathematicis, quæ cum hoc nostro instituto non apte cohæreant, ea, judicio & temperatione adhibita, secerni posse, & quatenus expediat, conciliari. Si me a militari Architectura abstinere volueris, parebo lubens; si a civili quoque, honeste resistam: si Musicam extorquebis, nobilissimam illius partem mihi reservabo, mollem ac theatralem sponte remittam: si Arithmeticam interdices, Pythagoricam re-

de Ha-
mip
reip.
c. 9.

tinere conabor, sed illam illiteratissimam
ultra abjiciam; quæ tamen (pro mores!)
fortunatissima est, riderque Theologiam
nostram: si me divinatricem Astrologiam
ejurare jubebis, ejurabo non invitus, quam
nemo umquam coluit nisi stultus, vel ut
stultos deciperet; at interim non desinam
de corporibus cælestibus quærere, quid sint,
ubi sint, quid efficiant, quomodo movean-
tur, quando concurrant: quod genus A-
stronomiam vocant, nulli magis propriam,
quam qui mente atque animo assurgere su-
pra ceteros debet, ea contemplando, in
quibus, vel ipso Tullio teste, divinæ vir-
tutis ratio maxime apparet atque existat.
Tantus hic amplissimæ disciplinæ modus,
tantopere castigatus ac sanus, video tamen
quibus non probetur; quorum haberi for-
tasse ratio non deberet: sed quandoquidem
in animum induxi, ut omnibus per nos sa-
tisfieret, id ab illis peto, ut quam opinio-
nem animo comprehenderunt, si ego il-
lam hodie ratione labefactabo, tandem
aliquando in hoc loco confessuque vestro
deponant. Quodnam igitur est horum ho-
minum de studiis nostris judicium? Qua-
le scilicet rudi ævo illorum fuit, qui no-
bilissima Græcarum Latinarumque littera-
rum monumenta undique conquesta, tam-
quam impura & execranda, devovebant;
veriti ne se a divinarum rerum cogitatio-
ne averterent, aut etiam contagione ali-
qua religionis ejus, unde essent profecta,
contaminarent. Quantam tempestate illa
jactu-

jacturam fecerimus, nihil attinet commemorare. Nunc id agitur, ut cognoscatis, unde isti præclari monitores exierint, qui omnia perhorrescunt, quæ ad sacrarum rerum intelligentiam, aut morum compositionem aliquo modo non referantur. Hos enim nobis fines præstituunt, a quibus Mathematicos judicant abesse longissime. At non hercle ita judicabat Origenes, qui (ut est apud Eusebium) quos maxime idoneos ad sacra studia crederet, eos in Geometricis & Arithmeticis mature exercebat; ut tamquam præsidio aliquo eorum ingenia muniret, sine quo multi defecissent. Verum non accipiunt Origenis testimonium: credo quod erraverit in rebus maximis; at in hoc certe sapuit, in quo subscriptores approbatoresque habuit sine controversia sapientissimos, Hieronymum & Augustinum, qui in sacrorum librorum interpretatione numerorum ac siderum scientiam tamquam ad multa necessariam adsciscunt. Sed quid opus est testibus, ubi ratio non deest? Mitto, quantum momenti habeant Geometrici atque Arithmetici calculi in disputationibus de Arca Noe, de Babelica turri, de Salomonis templo, de Holocaustorum altari: mitto, quam sibi partem vindicet Astronomia in controversiis longe maximis de Hebræorum annis Solaribus, & Lunaribus; de computo Diluviali, de principis Planetæ motu vel inhibito, vel revocato; de variis denique modis, quibus hæc explicant Ptolemaici,

Hist.
Eccles.
6. c. 14.

Copernicani, & qui Gigantum more cum Superis bella gerunt, Spinofistæ: mitto etiam, quæ novi Testamenti studiosos exercere solent, Eclipsis Christi mortem consecuta, Magorum stella, cærimoniarum ad Lunæ tempora ordinatarum, omnisque calendarum ratio, quam Ecclesiæ Proceres, non adhibitis in consilium Mathematicis, numquam constituerent: hæc, inquam, mitto omnia, non quod exigua sint, sed quia nimis nota; multisque usurpata. Unum illud in præsentis vestris judiciis subijcio, de quo nescio an multi cogitent, sed mihi tamen gravissimum est: si quis Mathematicus pro ea, quæ nunc gliscit in dies magis, hujus facultatis propagandæ cupiditate fortasse nimia, ut mox ostendam; si quis, inquam, tantum sibi sumat, ut sacrorum mysteriorum veritatem Geometricis momentis expendere velit, hunc ne feremus arma tractare nobis ignota; nec solum Ecclesiasticam pœnam, ubi jus lædat Religionis, sed etiam judicium effugere? Non hic vanus metus est. Vidi ego, qui tamen in alio pulvere verfor, lepidulum libellum, cui titulus, *Theologiæ Christianæ principia Mathematica*; quibus callidissimus auctor Joannes Craigius cælestis doctrinæ fidem non tam ex divino testimonio, quam ex rerum humanarum conditione metitur, & utriusque Testamenti auctoritatem specie confirmantis infirmat. Anne hæc sua quadam lingua & notis arcanis scripta Theologi nostri ita ignorabunt,

ut ne

ut ne legere quidem valeant? Nihil ne ju-
vabit, cum ejusmodi bella ingruent, esse
ex hoc ordine, qui resistere possit? Non
id ab omnibus requiro: at esse tamen ali-
quos singulis ætatibus necesse est, qui com-
munem causam quoquo modo petitam,
ubi res postulet, æquis armis defendant.
Non deerunt exempla, quæ sequantur,
Riccius, de Cusa, Caramuel, Cavalerius,
Ricciolius, Petavius, Tacquettus, Mer-
sennus, Villalpandus, & præterea multi
pietatis ac doctrinæ fama nobiles, qui cum
se sacramento obligatos Ecclesiæ dedissent,
non ideo tamen existimarunt, Mathema-
ticam palæstram sibi esse præclusam. Sive
autem operam suam Religioni navarunt,
sive navandi defuit occasio, nemo certe
reperitus est, qui non eos magnopere ad-
miraretur, summisque honoribus dignos
censeret. Numquid habent, quod istis ob-
jiciant, qui nos ab eorum imitatione de-
terrent? Nam quod a Seneca sumunt, ni-
hil Mathematicis doctrinis inesse frugis;
quod a Polyæno & Aristippo, nihil veri-
tatis; cum tam sit aperte falsum, miror
equidem, cur Stoica & Sophistica ingenia
non agnoscant. De toto hoc genere ho-
minum anno superiore diximus: neque o-
pus est pluribus, in his præsertim angu-
stis, in quibus alteri quoque parti initio
positæ debet esse locus. Jam vero ad il-
lam venio, quam pro modo temporis mi-
hi ad dicendum constituti brevissime ab-
solvam, magis ut rem tantam attigisse vi-
dear,

Ep. 88.

Cic. A.

cad. 4.

& A.

rist. 3.

Met.

dear, quam tractasse. Neque vero mihi in animo est illos arguere, qui cum sibi Mathematicam laudandam proponunt, eam in omnes artes ac doctrinas, maximas minimasque, nobiles atque ignobiles, tamquam necessariam inducere conantur, ut neque bonus aliptes, neque coquus, neque pistor esse possit, nisi Mathematicos diligenter audierit. Vetus est hæc, communis, protrita laudatorum consuetudo, ut nihil se dixisse putent, nisi omnia rerum genera comprehendant, fidemque hominum, & naturæ modum prætergrediantur. Non deerit alius querelis locus, quæ neque cessabunt umquam, neque proficient. Illa me hoc tempore cura sollicitat, quid tandem in mentem venerit Medicæ artis professoribus, ut sua omnia ad Mathematicam referant; nihil jam loquantur, nisi particularum figuras; fluida, solida, media, quæcumque corpori adhærent, aut corpus constituunt, ex pondere, ex nisu, ex mole, ex numero pensitent; medicamentorum vim & facultatem, bonam malamve corporis habitudinem, ipsum quoque spiritus motum Geometricis notis definiant; tandem illud efficiant, Medicum esse neminem, in quem Euclidis anima non migrarit. Non sum nescius, Hippocratem quoque ad Theſſalum filium scripsisse, ut animum ad Geometriam & Arithmeticam converteret, unde esset aliquis in Medicina facienda usus: at nunc eo res adducta est, ut non jam Medicus studia

dia sua Geometricis ornet, sed totus Geometra sit. Illud etiam fateor, morbos plane omnes, eorumque curaciones formulis explicari posse ex arte Mechanica ductis, sicui tantum sit otii, ut nihil novi ad hominum salutem cum afferat, usitata verba mutare velit: verumtamen cum id fecerit, tam certum erit, Medicum iccirco esse Mathematicum oportere, quam certum est, sutorem ac textorem esse Geometram, quod sutrina ac textrina Geometricis formis explicari possint. Non vereor, ne nimio plus dicam, quoties reputo, Joannem Fernelium, qui ad Celsum elegantia, doctrina ad Hippocratem proxime accessit, nihil Mathematicum suis scriptis, quibus universam Medicinam complexus est, aspergere voluisse, cum tamen ita ductus natura ipsa, omnes industriæ nervos in Mathematica contenderet; & ^{Plant.} ^{Vita} ^{Fernel.} quamdiu per uxorem licuit, multo maximam diei partem, & domesticas fortunas in hoc studium infunderet. Quid? Huncne admirabili ingenio virum, non suæ modo ætatis, sed omnis ab illa memoriæ Medicum præstantissimum, cum omnes morborum causas & remedia persequeretur, possetque unus, siquis umquam, Mathematicis speculationibus scientissime uti, penitus abstinuisse, nostros vero ne reduviam quidem sine illis curare? Discrimen hoc tantum unde sit, alii viderint: interim accipite, quid cum a nobis urgentur, minus recti respondeant. Sæculum causan-

fantur Methodicis averſum; potentum mores nihil probantium, quod ipſi intelligant; divitum avaritiam, unde abradi pecunia nequeat, niſi per iſtiusmodi miraculorum ambages. Haſtenus ſapiunt: pergant, quod bene vertat, in hoc curriculo. Huc addunt; magnam ſuæ Arti injuriam fieri, ſi ejus criminis poſtuletur, quod ſibi fortaſſe aliquam levitatis notam inurit, at in Politicis, in Theologis, in Jurisperitiis, quorum jam multi audire Mathematici volunt, capitale eſt. Ne hic quidem prorsus aberrant a vero. Quas enim præſtigias afferat neceſſe eſt, qui ſibi imperavit movere omnia, quæcumque ingenio poſſit, ut Theologicas doctrinas, omnemque civilem & Eccleſiaſticam gubernandi rationem Mathematicis momentis adſtringat? Tituli ipſi horum librorum, de quibus nihil amplius commemoro, offendunt oculos, & in quo ſe putant gratiam & auctoritatem Mathematicæ conciliare, in eo plane ipſo faſtidium pariunt & ſatietatem. Atqui malum malo mederi nequit. Non dico, Medicos tantum aliud agere: utinam quidem ſoli peccarent; at illi tamen, quod eſt in primis grave, noſtro periculo peccant. Ceterum in libros quoque Philoſophorum jam nimis multæ videntur mihi irrepiſſe Mathematicæ tabulæ; quamvis alioquin non tam ipſæ inter ſe Philoſophiæ partes conjunctæ ſint, quam earum quædam, ut paullo ante dixi, cum Mathematica. Sic artibus ac diſciplinis inter ipſas

Elemē-
ta Poli-
tic. Ci-
vil. &
Eccleſ.
metho-
do Ma-
them.
propo-
ſita.
Lond.
1716.

ipsas conjunctio & societas, sed cujusmo-
 di solet esse fœderatis civitatibus, quarum
 unaquæque suo jure utitur. Quid in rem
 quamlibet Mathematicos appellas; quid eo-
 rum methodum ad omnem disputationem
 traducis; quid jura perturbas? Non est
 ille ad veritatem satis numerorum linea-
 rumque apparatus. Neque enim Mathe-
 matica demonstrandi ratio tantam sibi fi-
 dem & auctoritatem acquisivit, quod per
 lineas & numeros conficiatur, sed quod
 principiis fulta certissimis, quæ ex his col-
 ligit, ea quoque certa esse necesse est. Li-
 nearis & numerica probatio in omnem fe-
 re artem ac disciplinam adduci potest,
 principia poni Mathematicis æqualia vix
 alicubi possunt. Quoties igitur in magna
 illa volumina incidimus, quæ in latentibus
 causis & naturæ obscuritate versan-
 tur, nos quidem nihil moveant Geome-
 tricæ figuræ tabellis inscriptæ elegantissi-
 mis, nihil illa Mathematica methodus tan-
 topere jactata, si rebus inædificetur natu-
 ra labantibus, ut sæpe usuvenit. Haud
 equidem ausim magnos Auctores nomina-
 re, præsertim & supra nos positos, & fa-
 mæ securos: at videte tamen, quam ni-
 hil ferre nimium possim. Ille ipse Artis
 nostræ magister Quintilianus, Rhetorum ^{Inst. l.}
 oculus ac delicia, cum jubet oratorem ^{l. c. 10.}
 Geometrica percipere, ut ubi necessitas fla-
 gitet, de terminis ac mensuris apposite di-
 cat, gestumque digitorum ad computatio-
 nes accommodet, videtur mihi propemo-
 dum

dum fui oblitus ad Sophistarum sollicitudinem delabi. Nam id si accipimus, jam & Miles, & Architectus, & Histrio, & Musicus debet esse orator, ut de his artificiiis verba facere possit, vocemque & manus ex arte moderari. Quid illi, qui Grammaticum quoque ad Geometras mittunt, ut de orationis numero, & syllabarum quantitate recte judicet? Satisne sani habendi sunt? Sentio me magno quodam æstu commoveri; & ab eo litore, cui sponte mea consilioque adhæsi, in altum quodammodo abripi: sed jam, ut in lubrico, nimis multa. Summa sit; Mathematica studia patere latissime; nec ipsa per se solum, quæ colantur, dignissima esse, sed aliis præterea multis suffragari: nobis vero in primis amplectenda videri, illustranda, promovenda; quod status hic vulgari conditione exemptus, & in illustri fastigio collocatus, rebus ornari debeat omnibus, quæcumque humani ingenii solertia parari possunt; ut non muneris tantum dignitate atque excellentia ceteros mortales Clericus superet, sed seipsum quoque dignum ostendat, cui tale tantumque munus committeretur. His se igitur dabunt adolescentes nostri, modo, quod Fabius de Græco sermone præcipit, ne usque ad superstitionem. Facio equidem minus libenter, ut eorum industriæ modum ponam, cum ceteroquin alunde non careant desidiæ invitamentis: sed nihil in omni vita tam lædit officium, quam quod
extre-

Inst. l.
1. c. 1.

extremum est. Magnum crimen istius ætatis, atque adeo ætatum omnium, ignavia; sed nihilo tamen minus ingenii ostentatio: tametsi utrūque fortuna, orbis terræ domina, suis bonis sæpissime cumulæ. Ego illos in omni re & actione veritatem & honestatem sequi volo, nec omnino spectare aliud, quam quod tibi, P. Eminentissime, in cujus tutela positi sunt, mea voce declarandum videtur.

Edita est Patavii an. 1722. addita hac Auctoris Epistola

AD LECTOREM.

*Æ*Gre admodum tuli, quosdam se altera hujus Orationis parte læsos putasse, quos ego nec fando audieram, neque omnino suspicabar Medicos esse. Dispeream, siquid egi malitiose. Cum illa scriberem, gravi quodam valetudinis genere conflictabar: itaque dolor iram concitavit, ira veritatem expressit. Cum recte valeo, Medicos omnes, eorumque technas libentissime laudo; sed quædam agrotanti condonanda sunt. Jam extra jocum. Ego. equidem societatis ejus, quæ Medi-
cina

cina cum Mathematica intercedit, utilitatem agnosco, fateor, inculco; nec mihi aliud propositum fuit, quam quod nimium videretur, oratorio stilo notare. Si quis hoc tamen in crimen vocabit (nam quibusdam nihil est satis) is sciat, rem sibi cum homine fore neque Medico, neque Mathematico, at certe rerum humanarum non prorsus ignaro. Vale



IN FUNERE

*Eminentiss. ac Reverendiss.*GEORGI
CARD. CORNELII

EPISCOPI PATAVINI.

Oratio XI.

Habita in Æde Cathedrali idib. Aug.

Ideo vos, NN, sicuti præter consuetudinem mœstos ac sordidatos, ita in me oculis animoque defixos valde mirari, quomodo possim tam misero ac luctuoso tempore, non dicam verba facere, sed in hanc lucem acerbissimo casu contaminatam prodire; eumque jacentem aspicere, qui me a prima ætate educavit; quicum perpetuo vixi; quem, in ipso adolescentiæ flore parentibus orbatus, parentis loco habui; cui uni tantum debeo, quantum homo homini proxime ac secundum naturam debere potest. At si quis umquam filius, quod & Tiberium admodum juvenem, & multos præterea veterum Romanorum

O mo-

more atque instituto fecisse accepimus, si quis, inquam, filius in patris funere tamdiu compescere lacrimas potuit, dum illi oratione parentaret, hanc mihi, quæso vos atque obsecro, veniam date, ut cum præter ceteros quærere sordes ac latebras ad explendum dolorem debeam, tamen aliquantisper in hominum conspectum procedam, ea dicturus, quæ ad deplorandum **GEORGII CARDINALIS CORNELII** Episcopi nostri interitum ego illi tam multis rebus addictus pertinere existimabo. Nullum jam est eximiae virtutis ac nobilitatis testimonium, quod levitas & adulatio non vulgaret; ipsaque hæc laudandi funeris consuetudo jamdiu ab antiqua institutione descivit, & ad multitudinem tracta est: ex quo fit, ut cum honor ipse obsoleverit, non videatur Principibus viris dignus, nisi pondus aliquod ab eo, qui dicit, ad hominum existimationem judiciumque accipiat. Atque in me quidem neque ullus dignitatis titulus, quarum rerum numquam studiosus fui; neque præstabilis dicendi facultas, quam mihi comparare pro hac ingenii tenuitate non potui; neque aliud quippiam ad speciem & pompam ornamenti est: sed ea tamen semper fuit observantiae ac pietatis meae erga Principem beneficentissimum vis & magnitudo, tam diuturna, tam constans, tam omnibus nota, ut hoc ipsum, quod ego loqui, quod hiscere, quod respirare in tanta calamitate possim, mirabile quiddam

dam sit, vestrisque cogitationibus & posterorum memoria aliquo modo dignum ac celebrandum. Itaque hæc ne laudatio quidem dici poterit, sed debita quædam mœroris ac luctus publico in loco significatio; in qua si vobis, quemadmodum spero, satisfecero, mihi tamen certe nunquam satisfaciam: quia cum plus etiam contendero, quam possim, minus tamen semper, quam debere me intelligo, ipse mihi contendisse videbor. Non deerunt memoriæ tanti Viri laudatores, donec stabit virtuti honos; eoque plures erunt, quod tale genus, dum viveret, pati non poterat: ego ea dicam, quæ ipse quoque si vivus adesset, atque audiret, improbare non posset; quæque boni filii & officii memoris, non viri callidi & ad dicendum exercitati judicentur. Sustinete me tanto dolori imparem, atque identidem deficientem, humanitate & auctoritate vestra; *Nobiles ac Reverendissimi Viri*, princeps hujus Ecclesiæ pars, in quorum fidem ac tutelam Patavina sacra, & sacrorum Ministri concesserunt; sustinete, inquam, me, atque adeste supremo hoc in illum officio, qui vos universos perpetuæ concordiæ & caritatis vinculo complexus, plurimi semper fecit atque adamavit; qui multos ex vobis in celsam hanc amplitudinis sedem evexit, familiariter adhibuit, privatis publicisque benevolentia testimoniis ornavit; neque plus quippiam postuletis, quam quantum a mœsto turbatoque ingenio

nio in tam magna ac recenti ægritudine præstari potest.

Quantum igitur ad humana ac divina præsidium in unius hominis morte amissimus, Auditores! Amisit patria Civem ornatissimum suæ nobilitatis & gloriæ amplificatorem; amisit Christiana respublica Cardinalem religionis studio, consilii magnitudine, rerum gerendarum experientia præstantem; amisit Pontificem Patavina Ecclesia (pro Deum atque hominum fidem, quo tempore, quam importuno!) amisit tamen Pontificem integritate morum, pietate, intelligentia, vigilantia, liberalitate dignum prorsus, qui Ven. Gregorii Barbadici exemplum, non in hujus tantum Civitatis oculis, sed in totius Europæ luce positum unus exciperet; ipseque aliis, qui succederent, exemplo esset. Jacturam hanc tantam si quis ex nostris sine lacrimis ac lamentatione ferre potest, si quis cogitando non commoveri, non plorare, non ingemiscere, is duritia & immanitate efferatus, ne inter homines quidem, nedum inter nostros habendus est. Sed ut tantisper a nobis discedamus, eique Urbi ac Familiæ donemus aliquid, unde ortum Georgius duxit, quem esse putatis in vulnere tam acerbo Venerorum civium sensum, eorum præsertim, qui illi cognatione aliqua conjuncti fuere, hoc est nobilissimorum? quem Serenissimi Fratris uno eodemque tempore, nescio quo fiderum consensu & conjuratione, ut omnia

mnia dira essent , letali morbo prostrati ?
 Sed qua ego te voce appellem , optime
 Princeps , amantissime Frater , Joannes
 Corneliorum decus atque ornamentum ,
 qui jam vel mortuus , vel morti prox-
 imus , squalori squalorem addis ? O nos
 miseros atque perditos ! Itane duo lumi-
 na patriæ suæ longe maxima , tam illu-
 stria , tam splendida , tam benefica uno pæ-
 ne articulo temporis obscurata jacere ? Itane
 Imperium nostrum , ac Sacerdotium uno
 ictu repente perculsum funebri specie sor-
 didisque fœdari ? O tempora nobis aspe-
 ra , o fata fera , o dies atri ! Quis ita re-
 rum humanarum sensu caret , ut cogita-
 tione mali fatalibus causis impliciti non
 frangatur ? Quis si non privata , at com-
 muni saltem causa non dolet ? Quis Dei
 præpotentis indignationem non sentit ; aut
 si sentit , cur non placare atque avertere
 conatur ? Subeat animos vestros Gentis
 hujus splendor tam antiquus , quam pa-
 tria ipsa , tam magnus , quam qui esse in
 privata fortuna potest , tam late fusus ac
 sublimis , ut non supremum modo Civi-
 tatis suæ gradum iterum ac sæpius occu-
 paverit , sed ad Regium quoque fastigium
 pertingere potuerit : hic porro vetusta quæ-
 que nomina uno intuitu prætereuntes ; duo
 hæc ætatis nostræ decora splendidissima
 mentibus vestris infigite , attenteque con-
 templamini , Joannem Venetorum Du-
 cem , Georgium Cardinalem Patavinorum
 Episcopum ; utrumque altissimo loco posi-

tum, eique parem; utrumque complexum virtutes omnes, maximas minimasque, quæ tantam dignitatem ornarent, utilemque humano generi facerent; sed ea præsertim animorum ac voluntatum consensione, eoque amore conjunctos, qui sanguinis vim & naturam ipsam quodammodo superaret: tum vero reputate, par hoc Principum tam insigne, & pro temporum ratione plane unicum, eodem fere articulo temporis, quod certe ne posterorum quidem admiratione carebit, eodem inquam articulo sublatum. Me miserum atque infelicem, cui hæc tam fœda atque ominosa commemorare contingit! Vereor, ne aliquid in tantis terroribus lateat, quod nobis irati Superi hac ratione denuntient, ut ad veterem disciplinam moresque redeamus. Verum quomodo me rapit doloris impetus? Dii meliora. Exeamus jam patria, in qua satis querularum, satis mœstitiæ luctusque est. Te, Roma, te inquam jam appello, altera veluti Georgii patria, quam sibi ipse divino consilio elegit, ubi gravissimos Magistratus gessit, cujus nomine celeberrimam Legationem ad Lusitanæ Regem obivit, cui suffragio suo bis Principem ac Pontificem Maximum dedit, visus ipse non longo intervallo abesse ab illo dignitatum omnium culmine, si quantum valebat animo, tantum etiam corporis viribus & valetudinis firmitate valuisset. Audiat summus religionis Antistes, idemque optimus,
 ex-

extinctum sibi & Ecclesiæ Cardinalem ,
 qui nihil umquam aggressus temere , fide
 ac veritate sacra jura defendit , magnum-
 que prudentiæ exemplum litteris & poste-
 ritati mandandum reliquit. Scio equidem ,
 quam ex iismulta , quæ nobis admirationi
 esse solent , in urbe illa omnium principe
 exigua sint ; sed tempora ipsa faciunt , ut
 cui aliqua Ecclesiæ procuratio commissa
 est , is mirifica sapientia præditus ibi quo-
 que videri debeat , si in tot hominum cu-
 piditatibus sine ullius offensione , ac sine
 turbis suam provinciam administret. Hæc
 singularis prorsus Cornelii laus fuit , quod
 per annos quatuor & viginti in regimine
 tam varie diffuso , ac difficili nihil accide-
 rit singulare . Neque enim tam periti Me-
 dici est accedentes morbos curare , quam
 ne accedant præcavere. Viderat hoc , mul-
 tisque ad imitationem memorare solebat ,
 verum illud summi Sacerdotii exemplum
 cum antiquis comparandum , Clemens XI;
 in cujus egregia sensa successisse creden-
 dum est , qui in ipsam humanarum divina-
 rumque rerum potestatem Dei Optimi Ma-
 ximi providentia successit Innocentius XIII.
 Atque hunc etiam multo magis vidisse ex-
 istimo , qui olim Georgio in Lusitana Le-
 gatione susceptus , recentia adhuc admira-
 bilis virtutis uestigia in florentissimo illo
 regno ad immortalitatem impressa legit ,
 & qualis quantusque esset , jam inde ab eo
 tempore cognovit. Hic tamen tanti nomi-
 nis tantæque gloriæ Cardinalis creptus est ;

hic inquam tibi, Roma, ereptus fenestute prima, qui ne extrema quidem sine bonorum querimonia decedere potuisset. Verum ego quid diutius Romæ jacturas queror, nostrarum immemor? quid in tam lugubri hujus Civitatis conditione lugendi causas aliunde peto? Nobis ille, nobis ereptus est; nostrum est totum hoc infortunium; Patavium amisit sacrorum præsidem, religionis custodem, pietatis assertorem, Pastorem, Patronum, Parentem. Revocate animo, quicumque Georgium paullo familiarius cognovistis, compositam illam in tanta dignitate facilemque naturam, sensa illa in rem quamlibet prudentissima, acumen illud ingenii ad difficillima quæque expediti, intelligendi celeritatem, decernendi consilium, agendi industriam: reputate cum mentibus vestris perpetuam illam verborum vitæque continentiam, flagrans ad omnia pietatis opera studium, sollicitam Christianæ institutionis curam, effusam in egentes ac miseros benignitatem, totam denique illam optimæ indolis rationem, quæ ubi se alicui dederat, in eo statim admirationem & benevolentiam commovebat. Id cujuscumque sit, intelligi magis potest, quam ex toto explicari: sed multi tamen animadverterunt, hoc proprium ejus ac peculiare fuisse, ut minimæ quoque virtutes excellentem quandam speciem ac dignitatem ab ejus moribus fumerent, & quod in aliis vulgare esset, in eo tamen insigne atque eximium appareret.

An

An ille, nisi tantus fuisset, aut etiam major, Barbadiçi famam, ut modo dicebam, excipere potuisset, ejusque locum magna omnium voluntate ac lætitia tenere, qui tamquam e cælo descendisse visus, eoque regressus unde venerat, non humanis tantum laudibus, sed prope Superum voce ac prodigiis celebrabatur? Jacebat populus fere omnis ingentium damnorum memoria abjectus atque afflictus; mœrebant sacrorum Ministri præteritorum memores, anxii trepidique futurorum; querebantur sacri mulierum ac virorum cœtus in diem viventes, & ad incerta casuum solliciti; ejulabat egentium puellarum ac viduarum turba, tam certo subsidio ad vitam tuendam atque honestatem privata; litteræ quoque ac disciplinæ tam secura spe dejectæ atque exanimatæ sibi metuebant. Hic tamen in tanto doloris ac timoris æstu superveniens, veluti Sol post atram ac turbidam tempestatem, omnium vultus explicuit; brevique effecit, ut hominem interiisse tota Civitas judicaret, non virtutem. Nihil mutandum ratus eorum, quæ invenisset a Viro illo divino constituta, eandem ubique justitiæ, disciplinæ, religionis viam tenuit; quidquid ingrueret, ad illius decreta & majorum consuetudinem confugere consuevit; ac si quando nascentes novi generis morbi nova remedia postularunt, quæ ipse egregie constitueret, maluit videri reperisse, quam fecisse. Quamquam ita quieta sub hoc Præfule

fule ac tranquilla fuere omnia, ut cunctas
 amplissimæ diœceseos rationes qui suis mo-
 mentis expenderent, & tempora tempori-
 bus compararent, præstantissimum homi-
 nis ingenium ex hoc maxime agnoscerent,
 & supra omnem sæculorum memoriam
 prædicando efferrent. Princeps Veneta pru-
 dentia & Romana gravitate compositus,
 duas res non tam natura diversas, quam
 moribus dissociatas præclare copulaverat,
 obsequium, & libertatem; obtinueratque
 ut boni mores æquitate temperati plus va-
 lerent, quam antea bonæ leges. Ipse autem
 præibat omnibus intaminata quadam inno-
 centia vitæ, ingentique instructu virtutum
 omnium, quæ in hunc statum cadere pos-
 sent: cumque initio esset paullo natura ira-
 cundior, ut plerique omnes sollertis ac vivi-
 di ingenii homines, ita seipsum brevi tem-
 pore edomuit, ut inditos ignes pertinaci
 exercitatione patientiæ non compescuisse,
 sed prope extinxisse videretur. Utinam ve-
 ro eam valetudinem vegetam ac firmam,
 quam primum in hanc Urbem attulit, non
 intercepisset aliquanto post articulorum do-
 lor, qui cum in dies magis cœpisset esse
 gravis ac frequens, in causa demum
 fuit, ut ipse per se diœcesim suam non
 tam sæpe, quam voluisset, obire posset;
 insuper vero etiam aliqua omittere, aut
 differre, aut ad alios delegare cogeretur,
 quæ non animi solum imperio, sed cor-
 poris etiam ministerio indigerent. Hæc il-
 lum cura magis, quam morbus ipse con-
 ficie-

faciebat ; hoc unum , de quo assidue quer-
 rebatur ; hoc pretio æstimata valetudo ; huc
 vota precesque conversæ ; sensu cetero-
 quin ad perpetuos dolores obdurato . Ut
 vero aliquantum respiraverat , lecto adhuc
 affixus admittore humanissime omnes , au-
 dire gravissima negotia , inquirere , decer-
 nere , expedire ingenio ita libero , ita ce-
 leri , ita experrecto , ut ipso corporis la-
 bore purgari animus atque illustrari vide-
 retur , tantoque magis exsurgere atque u-
 nus dominari , quanto illud magis excru-
 ciatum ac miserum contabesceret . Ubi
 porro stare , ubi sacras vestes sumere , u-
 bi exire cubiculo poterat , statim quæ Pon-
 tificis munia essent , peragere omnia ; nul-
 la in re sibi parcere ; non infirmæ adhuc
 valetudinis , non ætus , non frigoris ra-
 tione habita , quo commissi sibi gregis u-
 tilitate vocaretur , promptissime advolare .
 Quoties ego illum imbecillis adhuc viri-
 bus , pedibusque labantibus ad Seminarium
 accedentem vidi , quem locum , traditæ si-
 bi provinciæ partem certe non ultimam ,
 miro patrocínio ac benevolentia prosequ-
 batur ; quoties cum mane ibi fuisset , ve-
 sperí redibat ; quoties per multos dies si-
 ne intermissione exercitationibus nostris
 aderat ; ut studiorum morumque rationes
 exigeret ; ut omnes non præceptores mo-
 do , sed etiam discipulos nosceret ; ut o-
 mnia investigaret , pervideret , distribue-
 ret ; ut litterulas nostras , qui maximus mi-
 hi semper fructus laboris fuit , sua præsen-
 tia

ria iudicioque honestaret? Hinc sibi potissimum, nomine ipso admonitus, furculos illos fumendos esse intelligebat, qui in omnem Patavinæ Ecclesiæ agrum pro temporum ac locorum necessitate transferrentur: de hoc & ipse libenter loquebatur, & alios loquentes audiebat; in hoc sibi magnopere placebat; huc hospites mittebat suos; nihilque abire patiebatur, quod ad istius pulcherrimæ atque utilissimæ institutionis incrementum quispiam moneret. Jamvero eo deveni, ubi cogor tamquam scopulo adhærescere. Cogitatio hæc una ita me totum obruit atque occupat, ut nihil versare aliud animo possim; ita me angit atque enecat, ut vocem jam ipsam pæne intercludat. Tene ne Seminario tuo, tene mihi, Optime Præsul ac Parens, tam subito casu ablatum? O cæcas hominum mentes! Tene mihi tam multa, pridie quam ægrotares, benevole amanterque dixisse, quæ nostra causa cuperes, nulla plane tantæ hujus calamitatis præensione, quæ tibi tam prope nobisque imminebat? Itane illa omnia momento temporis cecidere, quæ mihi constitueras, ut hoc ipso die, quo studiorum nostrorum cursus veteri more absolvi consuevit, tuo nomine edicerem? Ille, ille igitur dies mihi ultimus erat, quo te alloquerer, nec tamen, homo tibi devinctissimus, ullo naturæ motu commonebar, quam dicunt sentire in posterum terribilia? Pro dolor, pro fatum, pro rerum omnium repente facta conversio!

trio filoso al morfo

sio ! Sed ille jamdiu humanarum rerum
 tædio affectus , quod æterno dolore consi-
 claretur , usuque pedum ferme omni care-
 ret , ad quietem & beatitatem æquo animo
 ac libenti commigravit ; neque mehercule
 verbum ullum protulit his totis octo die-
 bus , quibus se morti proximum unus sen-
 sit , dimissaque cura rerum ceterarum asse-
 veravit ; nullum , inquam , verbum protu-
 lit , quo vitæ longioris desiderium ostende-
 ret , malletque aliud , quam quod Deus ip-
 se vitæ necisque dominus constituisset :
 nos vero lacrimarum pleni , multarum
 rerum meditatione suspensi , abjecti , pro-
 fligati , unde abierit aspicimus , non quo
 ascenderit . Erigamus tantisper animum ,
 Auditores , & siquid esse solatii potest ,
 ab eo loco ducamus , ubi ille susceptæ ad
 nostram utilitatem sollicitudinis præmio
 fruïtur ; quod certe ægre ferre non debemus ,
 nisi ingrati videri volumus . Quamquam
 quæ ego solatia quæro ? Vix humana mens
 humi defixa summum illud immortalitatis
 bonum , quod nemo nisi moriens conse-
 quitur , intelligere potest , & ad hujusmo-
 di calamitatum levamen sincere vereque
 transferre : nos autem , ut in hoc tandem
 illius causâ conquiescamus , adhuc rerum
 nostrarum cura tangit , tangerque diu , mi-
 nuenda fortasse aliquando , numquam prorsus
 deponenda .

Edita est Patavii an. 1722. die
17. Aug. addita hac
Auctoris Epistola

AD LECTOREM.



Erruens adhuc erga Episcopum de se optime meritum Civitatis studium et voluntas, insolito omnium ordinum luctu significata, jubet me Orationem hanc emittere, quam ad ejus funus impetu quodam doloris effudi. Ac si mihi persuaderem, laudes ejus equari dicendo posse, valde dolerem, paullo plus biduo ad rem tantam comparandam ingenio tam exiguo concessum fuisse: sed cum ita vixerit, ut a nemine pro dignitate laudari possit, id unum insuper faciendum puto, ut de tota ejus Vita quadam præmittam annalium more, qualia fere ad Ughelli supplementum altero abhinc anno brevi simplici narratione exaravi. Ego equidem virtutem ejus, dum viveret,

veret, non fortunam admiratus, mortuum quoque perpetuo colam; nihilque omittam eorum, quæ ad ejus memorie propagationem quoquo modo facere videbuntur.



GEORGIUS CARD. CORNELIUS natus est ex Federico Equ. & Cornelia Contarena Kal. Aug. MDCLVIII. Paucis post annis Melitensem Ordinem accepit, & Magni Commendatarii Cypri titulum, hujus Familiae hereditarium. Politioribus litteris Verona, Philosophia & Jurisprudentia Patavii instructus, more majorum, anno MDCLXXVII Doctoris nomen & insignia sumsit; statimque per Europam iter instituit. In patriam cum redisset, Navalibus perfectus est anno MDCLXXXV: quo in munere ita se temporibus difficillimis gessit, ut gravioribus curis par judicatus, ad Gallicam Legationem designatus sit. Sed ille quidem alio spectabat. Itaque Ecclesiastica militiæ nomen dedit, Romamque commigravit anno MDCXC. Biennium fere in ea urbe

com-

commoratus, per eos Magistratus, quibus maxime solent Præfulum ingenia explorari, magnam de se expectationem movit. Proinde maritima oræ in magna pestilentie suspitione præpositus est, deinde annonam curare jussus, deum vero ad Petrum II Lusitanie Regem Legatus missus anno MDCXCII. Insignem jacturam rerum suarum in eo itinere cum fecisset, incredibili virtute fortunam elusit. Tanta enim rerum omnium apparatione & magnificentia, tanta fide ac sapientia munus illud longe gravissimum sustinuit, ut XI Kal. Aug. MDCXCVII ab Innocentio XII Cardinalis creatus sit, & paullo post Episcopus Patavinus, cum in ipso Legationis initio Archiepiscopi Rhodiensis titulum obtinuisset. Inde igitur Patavium venit ingenti omnium civium letitia & expectatione, quam postea non explevit modo, sed etiam superavit. Omnino is unus efficere poterat, ut optimi Decessoris Gregorii Card. Barbadii desiderium in hac urbe moderate ferretur: quippe instituta ejus omnia

non

non retinuit solum, sed etiam amplifi-
 cavit; ac siquid necessitate temporum
 aut moderari, aut tollere coactus est,
 id singulari quadam prudentia fecit, si-
 ne qua ipsum quoque religionis ac di-
 scipline studium interdum vanum, in-
 terdum etiam exitiale est. Diocesim
 litteris, aut pietate cultiorem haud fa-
 cile invenies: unde satis apparet, tan-
 te rei momentum in uno fere Episcopo
 esse. Capitulum habuit magna sibi obser-
 vantia et caritate conjunctum, sed prae-
 sertim Ecclesiastica disciplina et morum
 honestate supra vetera exempla lauda-
 bile. Trestense Collegium sustulit, quod
 a prima institutione degenerare cepisset,
 nec jam remedium pati posset. Ejus
 loco publicum Grammaticae Gymnasium
 in urbe aperuit, optimosque praeceptores
 sine ulla juvenutis impensa docere ius-
 sit. In Seminario multa egregie consti-
 tuit, quae undique alumnos supra ipsam
 loci capacitatem invitarunt: sed quod
 caput est, Magistrorum numerum au-
 xit; suaeque humanitate et aequitate ob-
 tinuit, ut non deessent, qui se, liber-
 tatem,

tatem, ac valetudinem, tenuissima spe
proposita, deuo verent. Duobus Conci-
liis Pontificiis interfuit, quorum altero
Clemens XI, altero Innocentius XIII
Summus Ecclesie Pontifex creatus est.
Patarvii diem obiit IV Id. August.
MDCCXXII: ipsisque Idibus elatus est,
cum paucis ante horis Joannes Vene-
tiarum Dux, frater ejus carissimus at-
que amantissimus, dira prorsus fatorum
consensione decessisset.



COMMENTARIOLUM

DE ORTU, INTERITU, ET INSTAURATIONE

LINGUÆ LATINÆ,

Ac de ejus Scriptoribus ad sæculum
usque XVII.

Edidit an. 1713. post Orationem ad Grammat.

Nunc vero diligentius lucubratum.



Uemadmodum aperto Ro-
mæ asylo, dataque vi-
ctis hostibus liberalissime
civitate, dispari genere
homines in unam gentem
coaluerunt, ita linguæ va-
riæ ac dissimiles, inter se
commixtæ unam illam pepererunt, quæ
Romana ab urbis, Latina a regionis
nomine appellata est. Sed quia primi Ur-
bis incolæ Græci generis fuere; & Ro-
mulus ipse de rebus suis, & Numa de di-
sciplina sapientiæ Græce scribentes, ser-
monem hunc in primis populo commen-
darunt; hinc magna consecuta est simili-
tudo inter utriusque Gentis litteras, & lit-
terarum sonum, atque adeo inter verba i-

P 2

psa,

psa, & verborum constructionem. Quocirca Quintilianus l. 1. c. 5. *Hæc*, inquit, *divisio mea ad Græcum sermonem præcipue pertinet: nam maxima ex parte Romanus inde conversus est.* Adde, quod per sæcula quinque, & eo amplius, vel nullæ, vel peraræ fuere Romæ litteræ præter Grajas: cumque Romanus sermo ad eam copiam & elegantiam pervenisse visus est, ut ad artes ac disciplinas transferri posset, nescio qua tamen semper verecundia Græcæ linguæ tamquam parenti honorem detulit; & a victa debellataque provincia Populus Romanus gentium dominus leges dicendi scribendique accipere non recusavit. Hor. l. 2. epist. 1. *Græcia capta ferum victorem cepit, & artes intulit agresti Latio.* Quod cum reputo, vix mihi persuadeo fuisse ullum, aut esse, aut vero umquam esse posse, qui Græca studia in homine Latino non probet.

Ex iis, qui Latinæ Linguæ tempora in certas ætates velut hominis vitam distribunt, illi nobis videntur probandi maxime; qui Infantiam ejus ad annum Urbis conditæ DXIV, cons. C. Clodio & M. Tuditano, perducunt; quo anno Livius Andronicus fabulam dedit, ut tradit Cic. in Bruto c. 18. & lib. 1. Tuscul. c. 1. Etsi enim & Salios Sacerdotes Numa constituit, qui armatos Deos canerent, & Pontifices, qui Romanarum rerum annales conficerent, rudia tamen & incondita fuere omnia, qualia novi Imperii status, perpetuis bellis post Numam petitus patiebatur.

Ejus

Ejus ævi monumenta partim, incensa a Gallis Urbe anno CCCLXVI, periire; partim vetustate ipsa absumpta sunt, præter legum fragmenta pauca, quorum specimen velut prima balbutientis Romæ verba præbemus.

Lex Romuli, seu Tatii Collegæ ejus, seu Tullii sexti Romanorum Regis apud Festum in voce **PLORARE**.

Sei parentem puer verberit, ast oloe plorasit, puer Deiveis parentom sacer estod. Sei nuros sacra Deiveis : estod.

Hoc est

Si parentem puer verberet, at ille ploret & conqueratur, puer sacer esto Divis parentum, eisque tamquam hostia mactari possit. Si nurus socerum verberet, sacra Divis ejus esto.

Anno ab Urbe condita CCLXI, cujus ætatis sermonem *horridum* appellat T. Livius l. 2. c. 32. Lex prima Tribunicia apud Festum in voce **SACER** ex emendatione partim Scaligeri, partim F. Ursini. Qui aliuta facit, cum pecunia familiarique sacer estod. Sei quis em occidit, paricidea nec estod.

Hoc est

Qui aliter fecerit, cum pecunia & familia sua sacer esto. Si quis cum occiderit, parricidea ne esto.

Anno ab Urbe condita CCCIV. Ex XII Tabulis lex prima de Jure privato ex optimis monumentis concinnata.

P 3 Sein

Sein ious vocat, atque eat. Neit, endocapito antestariet. Si calvitor, pedemve struit, manom endoiacito. Si morbos aevitalve vitiom escit, quein ious vocat, iumentom dato. Sei nolet, arceram nei sternito.

Hoc est

Si in ius aliquis vocat, statim vocatus eat. Ni it, incipiat vocans testes appellare. Si frustratur, pedemve fugiendo refert, manum illi iniicito. Si morbus vel etas impedimento sit, quominus ire possit, qui in ius vocat, iumentum illi dato. Si nolis iumentum accipere, lœtlicam illi ne parato.

Novi sane, viros præstantissimos & leges Regias, & Tribunicias, & ex XII Tabulis multo nitidiores edidisse, ut sæculo pæne aureo scriptæ videantur; nihil veritos affirmare, se illas ex antiquissimis tabulis descripsisse. Verum sit earum fides penes ipsos. Ego enim Scriptores fecutus vel pares, vel prope pares, non solum elegantiora monumenta illitteratissimæ antiquitati convenire non puto, sed ne illa quidem ipsa, quæ modo attuli, satis mihi rudia & obscura videntur, ut in ea jurare paratus sim. Quod ut confirmem, non Ciceronem appellabo, non Quintilianum, non Festum, non Gellium, non Polybium, qui ejus ætatis stilum ita inconditum & obscurum dixerunt, ut quædam vix peritissimi interpretes intelligerent; sed inscriptionem afferam ævi mul-
to po-

to posterioris, & ad linguæ adolescentiam proxime accedentis, quæ tamen ruditate verborum allata monumenta, nisi fallor, longissime superat: ut si quis velit utraque tueri, eum necesse sit affirmare, linguam Latinam ad annos usque CCCCXCIV non modo nihil profecisse, sed etiam declinasse.

Inscriptio L. Scipionis, qui anno ab Urbe condita CCCCXCIV. Consul fuit, effossa ad Portam Capenam.

HONC. OINO. PLOIRVME. CONSENTIONT. R
DVONORO. OPTVMO. FUISE. VIRO
LVCIOM. SCIPIONE. FILIOS. BARBATI
CONSOL. CENSOR. AIDILIS. H C. FVETA
HEC. CEPIT. CORSICA. ALERIAQVE. VRBE
DEDET. TEMPESTATEBUS, AIDE. MERETO

Hoc est

*Hunc unum plurimi consentiunt Romæ
Bonorum optimum fuisse virum
Lucium Scipionem. Filius Barbati,
Consul, Censor, Ædilis hic fuit.
Hic cepit Corsicam, Aleriamque Urbem.
Dedit Tempestatibus ædem merito.*

Paullo antiquius est monumentum Dui-lio positum in basi Columnæ Rostratæ, quod ingeniose admodum restituit & illustravit Ciacconius. Affertur in Græviana Flori editione, in Tractatu valde erudito de puerit. Linguæ Latinæ clariss. Funccii, & inter Gruteri Inscriptiones pag. ccciv. n. 1. Sed cum ejus fides ex toto non constet, ego omittere malui.

Per hæc & similia lingua Latina transegit pueritiam suam.

Inde cœpit adolescere per *Livium Andronicum*, per *Nævium*, *Cæbegum*, *Ennium*, *Cæcilium*, *Catonem*, *Pacuvium*, *Plautum*, *Accium*, *Afranium*, *Lucilium*, *Terentium*, aliosque præterea non paucos, quos inter eminet *Plautus*, ac *Terentius*. *Livius* itaque *Andronicus* primus fuit Romanorum Poeta, qui Anno ab Urbe condita DXIV. fabulas dare cœpit, non tamen dignas, quæ iterum legerentur, ut ait *Cicero* in *Brut.* c. 18. Primus Orator fuit *Cæbegus*, ut ex *Ennii* testimonio scripsit idem *Cicero*. Primus historicus *Nævius*, qui bellum Punicum primum versibus Jambicis descripsit. quam autem luculente, non erit, opinor, difficile ex hoc ejus operis initio colligere.

Quei terrai Latiai hemones tuserunt
Vires fraudesque Poinicas fabor.

Hoc est

*Qui terra Latia homines tuderunt
Vires, fraudesque Punicas, fabor.*

Quanto politius *Ennius*, qui carmine heroico paucis post annis idem bellum est persecutus!

Horrida Romuleum certamina pango
duellum.

Hic tamen ipse cum *Catone* & *Pacuvio* ad infantiam Latini sermonis relatus est a *Scaligero*, *Becmanno*, *Gifanio*, & præterea multis: sed injuria, ut diserte ostendit *Andreas Borrichius* in suis *Vindiciis*.
Adole-

Adolescentiam excepit virilis ætas, hoc est absoluta illa & constans Latinæ linguæ elegantia, gravitas, pulchritudo: Sed, ut fere solent maxima bona, cito intercidit, & in senium prolapsa est. A Cicerone enim cum cœpisset, idest ab extremis Romanæ libertatis temporibus, vix ad tertium Imperatorem pervenit. Sed profecto visa est mirabili quodam ingeniorum fœtu numeri damna compensare, cum *Ciceronem* tulit, *Virgilium*, *Horatium*, *T. Livium*, *Cæsarem*, *Nepotem*, *Catullum*, *Ovidium*, litterarum lumina non ad eam solum ætatem, sed ad omnem posteritatem illustrandam. Adde huc *Sallustium*, *Varronem*, *Lucretium*, *Vitruvium*, *Manilium*, *Tibullum*, *Propertium*, *Hirtium*, *Gratum*, *Cornificium*, *Phædrum*, & insuper multos, quorum vel fragmenta, vel sola nomina ad nos pervenerunt. Priores tamen tres sæculi sui locutionem dedignati, κακοζυγίᾳ nescio qua rudem antiquitatem suis scriptis repararunt, ut potius ad linguæ adolescentiam videantur rejiciendi. Cujusmodi ingenia nulla umquam ætate defuerunt, nostra vero præsertim, qua viris ceteroquin litteratissimis nihil Italicum sapit, nisi sit ex *Dante* petatum, aut *Passavantio*, aut horum æqualibus, hoc est ab ipsis Italicæ linguæ incunabulis.

Jam vero imperante Tiberio, cœperant Romani veteris obliti libertatis demittere animum, & similia facere ac loqui fortunæ suæ. Hinc sermonis majestas & gravitas in adulatoriam ac pæne servilem formam dege-

degenerare, viresque fenſim amittendo ad ſenium properare. Ecce hic tibi ſtatim *Q. Curtius* dignus etiam meliore ævo, quocumque tandem vixerit, *Vellejus*, *Juvenalis*, *Martialis*, *Persius*, *Florus*, *Quintilianus*, *Suetonius*, *Celsus*, *Valerius Maximus*, uterque *Seneca*, uterque *Plinius*, *Pomponius Mela*, *Aſconius Pedianus*, *Scribonius Largus*, *Petronius*, *Columella*, *Silius Italicus*, *Valerius Flaccus*, *Statius*, *Juſtinus*, *Terentianus*, *Frontinus*, *Tacitus*, *Palladius*, *Gellius*, *Apulejus*, ceterique ad alterum uſque Antoninum Imperatorem Latini ſcriptores.

Hic vero ad ſummam ſenectutem perveniffe Romanus ſermo viſus eſt, nihilque poſtea dignum peperiffe, quod ad imitandum proponatur.

Sunt qui ad Gordianum uſque, non deſunt qui etiam ad Conſtantinum Latinæ Linguae ætatem producant: Sed minorem ſane nobiliſſimæ linguae injuriam facit, qui eam interiſſe, quam qui lutulenter vixiſſe putat. Juvat nihilominus eos ſcriptores commemorare, qui Antoninos ſubſecuti, conati ſunt aliquid ad ea uſque tempora, quibus litteræ omnino omnes conticuerunt. Hi autem ſunt *Tertullianus*, *Cenſorinus*, *Spartianus*, *Capitolinus*, *Lampridius*, *Arnobius*, *Minutius Felix*, *Lactantius*, *Marcellinus*, *Aurelius Viſtor*, *Eutropius*, *Auſonius*, *Prudentius*, *Macrobius*, *Servius*, *Claudianus*, *Vegetius*, *Solinus*, *Eumenius*, *Nazarius*, *Pacatus*, multique non contemnendi Jurisconſulti. Huc adde Auctores finium regundo-
rum,

rum, Medicos, Rhetoras, & Grammaticos veteres. Adde *Juvencum*, *Augustinum*, *Orosium*, *Sidonium Apollinarem*, *Boetium*, *Martianum Capellam*, *Priscianum*, *Cassiodorum*, *Jornandem*, *Venantium Fortunatum*, *Corippum*, *Isidorum*, & paucos præterea, quos non est operæ pretium referre.

Tacere deinde litteræ non latinæ modo, sed omnes usque ad magnam sæculi XIV partem, cum excitatæ sunt ab immortali viro *Francisco Petrarca*. Ex eo tempore cœpit rursus vires sumere Latinitas quodammodo renata; jamque sæculo quintodecimo ad floridam ætatem properabat per *Laurentium Vallam*, *Franciscum Philelpbum*, *Poggium*, *Faccium*, *Vergerium*, *Ambrrosium Camaldulensem*, utrumque *Barbarum*, *Leonardum Aretinum*, *Guarinum Veronensem*, *Blondum*, *Perottum*, & præterea multos. At vero sæculo XVI ita florere visa est in *Bembo*, *Palcario*, *Mureto*, *Manutio*, *Sigonio*, *Sadoletto*, *Naugerio*, *Riccio*, *Amaseo*, *Luisino*, *Alcionio*, & aliis, ut ad auream illam Augusti ætatem proxime accesserit. Etsi autem elapso proxime sæculo rursus cœperat declinare, non quidem, ut ante, magistrorum inopia, sed nimia quadam copia in ejus interitum studiorum similitudine conjurata; tamen hoc tempore, implorata undique ope, respirare videtur, & in pristinam dignitatem assurgere.

LINGUÆ LATINÆ

ÆTATES,

*Aurea, Argentea, Ænea, Ferrea,
& Lutea.*



Ntequam pueri Seminarii nostri ad hanc tabulam accedant, velim animadvertant, non omnes ætatis aureæ Scriptores esse aureos, & imitatione dignissimos. Sunt enim hîc etiam, ut in aliis rebus, mala mista bonis. Itaque in uno primum *Cicerone* diu multumque versentur; deinde *Terentium*, *Cæsarem*, *Virgilium*, *Horatium* sibi adsciscant; demum *Nepotem*, *Livium*, *Catullum*, & ad carminis facilitatem comparandam *Ovidium*, *Tibullum*, *Propertium* in manus sumant. A ceteris abstineant, donec ipsi per se judicare possint, tanto singulos esse meliores, quanto ad hæc latinitatis exempla propius accedunt. Quosdam vero numquam attingant, nisi ad eruditionem: ego enim plerosque assero, non quia probem, sed quia volenti per sæcula omnia discurrere, nihil melius se se offert. In sæculis XV & XVI plura sane nomina censerî poterant: sed ego legentibus, non bibliothecam conficientibus scribere institui.

LATI-

LATINI SCRIPTORES

in suas ætates distributi.

ÆTAS AUREA

Incipit ab anno Urbis conditæ DXIV.

Definit in annum Urbis conditæ

DCCLXVII, qui est a

Christo nato XIV.

-Horum
non ex-
tant nisi
fragme-
ta.

Livius Andronicus.

C. Nevius.

Statius Cæcilius.

Q. Ennius.

M. Pacuvius.

L. Attius.

C. Lucilius.

Sex. Turpilius.

L. Afranius.

L. Cornelius Sisenna.

P. Nigidius Figulus.

C. Decius Laberius.

Verrius Flaccus.

M. Accius Plautus.

M. Terentius Afer.

M. Porcius Cato.

T. Lucretius Carnus.

C. Valerius Catullus.

P. Surns.

C. Julius Cæsar.

Cornelius Nepos.

M. Tullius Cicero.

Sex.

238 COMMENTAR.

Sex. Aurelius Propertius.

C. Sallustius Crispus.

M. Terentius Varro.

Albius Tibullus.

P. Virgilius Maro.

T. Livius.

M. Manilius.

M. Vitruvius.

P. Ovidius.

Horatius Flaccus.

Pedo Albinovanus.

Gratius Faliscus.

T. Phædrus.

C. Cornificius, cui tribuunt libros quatuor Rhetoricorum ad Herennium:

Aulus Hirtius, vel Oppius, quorum alteruter Caesaris Commentarios supplevit.

P. Cornelius Severus, ad quem referunt Carmen de Æsna.

Jurif.
consul.,
quorum
fragmen-
ta in di-
gestis.

Q. Mutius Scævola.

Asenus Varus.

M. Antistius Labeo.

Masurius Sabinus.

Supra ceteros eminent **TERENTIUS, CATUL-
LUS, CAESAR, NEPOS, CICERO, VIRGI-
LIUS, HORATIUS, OVIDIUS, T. LIVIUS, SAL-
LUSTIUS:** sed hic quidem verborum novator
est, ut ait Gellius lib. II c. 15., ideoque non
omnibus ingeniis aptus.

ÆTAS

ÆTAS ARGENTEA

Incipit anno a Christo nato XIV.

Definit in annum CXVII.

Cornelius Celsus.

Scribonius Largus.

P. Vellejus Paterculus.

L. Junius Columella.

Pomponius Mela.

A. Persius Flaccus.

Q. Asconius Pedianus.

M. Annaeus Seneca.

L. Annaeus Seneca.

M. Annaeus Lucanus.

T. Petronius Arbiter.

C. Plinius Secundus.

C. Silius Italicus.

C. Valerius Flaccus.

C. Julius Solinus.

D. Junius Juvenalis.

P. Papirius Statius.

M. Valerius Martialis.

M. Fabius Quintilianus.

Sex. Iulius Frontinus.

C. Cornelius Tacitus.

C. Plinius Cæcilius Secundus.

A. Gellius.

L. Annaeus Florus.

C. Suetonius Tranquillus.

Q. Curtius Rufus.

Val. Probus Grammat.

Sulpitia.

L. Feneftella annal. fragmenta.

Supra

Ætatis
nō prout
fuit cer-
tiz.

Supra ceteros eminent CELSUS, VELLBIUS,
SENECA, PLINII, SUTTONIUS, JUVENA-
LIS, QUINTILIANUS, FLORUS, CURTIUS.

ÆTAS ÆNEA

Incipit a Christo nato CXVII.

Definit in annum CCCC.

Jurif-
consulti,
eorum
fragmē-
ta in Di-
gestis,

Licinius Proculus.
Neratius Priscus.
P. Juvencius Celsus.
Priscus Fabolenus.
Domitius Ulpianus.
Herennius Modestinus.
Salvius Julianus.
J. Cajus.
Callistratus.
Emilius Papinianus.
Julius Paulus.
Sex. Pomponius.
Venulejus Saturninus.
Ælius Martianus.
Ælius Gallus, & alii.

Ætatis
non o-
mnino
certæ.

Valerius Maximus.
Justinus.
Palladius Rutilius.
Terentianus Maurus.
Minucius Felix.
Sofipater Charisius.

L. Apulejus.
Q. Septimius Tertullianus.
Q. Serenus Sammonicus.

Cen-

Censorinus.
Cæcilius Cyprianus.
T. Julius Calpurnius.
M. Aurelius Nemesianus.
Ælius Spartianus.
Julius Capitolinus.
Ælius Lampridius.
Vulcatius Gallicanus.
Trebellius Pollio.
Flavius Vopiscus.
Cælius Aurelianus.
Flavius Eutropius.
Rhemnius Fannius.
Arnobius Afer.
L. Cælius Lactantius.
Ælius Donatus.
Commodianus.
C. Vettus Juvenius.
Julius Firmicus.
D. Hilarius.
Fab. Marius Victorinus.
Sex. Rufus, seu Rufus Festus Histe-
ricus.
Rufus Festus Avienus Poeta.
Ammianus Marcellinus.
Fl. Vegetius Renatus.
Aurelius Theodorus Macrobius.
Q. Aurelius Symmachus.
Dec. Magnus Ausonius.
Sex. Aurelius Victor.
D. Ambrosius.
Aur. Prudentius Clemens.
Cl. Claudianus.
Marcellus Empiricus.

Q

Pro-

Proba Falconia.

Theodorus Priscianus, aliis Octavius

Horatianus dictus.

Supra ceteros eminent JUSTINUS, PALLADIUS, TERENTIANUS, VICTOR, LACTANTIUS, CLAUDIANUS.

Auctores ætatis incertæ

Hic collocandi videntur : tametsi aliquis eorum, si ratio scribendi habeatur, quocumque tandem tempore vixerit, in superioribus ætatibus cum dignitate stare possit ; aliquis vero etiam infra luteos detrudendus videatur.

Æmilius Macer.

Messala Corvinus.

Vibius Sequester.

Jul. Exsuperantius.

Jul. Obsequens.

L. Ampelius.

Apicius Cælius.

Sex. Pompejus Festus.

Chalcidius.

Zeno.

Probus Auctor Notarum.

Fulgentius Planciades.

Hygini Fabulæ, & Astronomicon.

C. Casarii Germanici Aratea, quæ alii ad Augusti, alii ad Domitiani ætatem referunt.

P. Viſtor de Regionibus Urbis Romæ.

Vegetius de re Veterinaria.

AN.

- Auctores Priapeorum.*
Auctores Catalecticorum, quæ Virgilio, & Ovidio tribui solent.
Auctor Elegiarum, quæ Cor. Gallo tribuuntur.
Auctor Orationis Sallustii in Ciceronem, & Ciceronis in Sallustium: item illius Antequam Cicero iret in exilium.
Auctor Epistolæ ad Octavium, quæ Ciceroni tribuitur.
Auctor Panegyrici in Pisonem, qui videtur aliis Statius, aliis Lucanus.
Declamationes, quæ tribuuntur Quintiliano; item quæ Porcio Latroni; item quæ Calpurnio Flacco.
Interpres Irenæi.
Interpres Daretis Phrygiæ, & Difyos Cretensis.
Catonis Disticha moralia.
Scholiasæ veteres.
Grammatici antiqui.
Rhetores antiqui.
Medici antiqui.
Rei agrariæ Scriptores.
Catalecta Petroniana, & Errores Venerci, qui cum Petronio edi solent.
Pervigilium Veneris cum variis opusculis, qui inscribuntur Baudii Amores.
Poematia, & Epigrammata vetera a Pithæo, & Almeloventio collecta.
Fragmenta Historicorum collecta ab Augustino, & Riccobono.

*Monumentum Ancyranum , & insuper
Monumenta varia antiqua , a Geor-
gio Fabricio collecta.*

Fasti Consulares .

Inscriptiones Veteres .

Legum antiquarum fragmenta .

Notitia dignitatum utriusque Imperii &c.

ÆTAS FERREA, & LUTEA

Incipit anno a Christo nato CCCC.
Definit in Sæculum IX.

Sæculi
V.

Servius Honoratus .

Rutilius Numatianus .

D. Hieronymus .

D. Augustinus .

D. Damasus .

Rufinus .

Sulpicius Severus .

Paulus Orosius .

Cælius Sedulius .

Paulinus Nolanus .

Codex Theodosianus .

Dracontius .

Salvianus .

Petrus Chrysologus .

Prosper Aquitanicus .

Martianus Capella .

Paulinus Petrocorius .

Claudianus Mamertus .

Sidonius Apollinaris .

C. Plinius Valerianus .

Lati-

Latinus Pacatus.
Claudius Mamertinus.
Nazarius.
Eumenius.

D. Fulgentius.
Alcimus Avitus.
Orientius.
Ennodius.
Manl. Severinus Boetbius.
Priscianus Grammaticus.
Nonius Marcellus.
Diomedes.
Justiniani Institutiones.
Justiniani Codex.
Arator.
Jornandes.
M. Aurelius Cassiodorus.
Cresconius Corippus.
Venantius Fortunatus.
Gregorius Magnus.
Gregorius Turonensis.

Sæculi
 VI.

Isidorus Hispalensis.
Eugenius Tolctanus.
Drepanius Florus.
Marculphus.
Anonymus Ravennas.

Sæculi
 VII.

Aldhelmus, seu Adelhelmus.
Beda.
Flaccus Alculmus.
Paulus Diaconus.

Sæculi
 VIII.

Sæculi
VIII,

Rabanus Maurus.
Freculphus.
Eginhardus.
Strabus Gallus.
Aimonius.
Theodulphus Aurelianensis.

LINGUA LATINA JACENTE

Sæculo X.

Luitprandus.
Odo Severus.
Flodoardus.
Regino.
Wuicbindus.

Sæculo XI.

Haymo.
Rodulphus.
Hermanus.
Lambertus.
Medici Salernitani.
Marbodæus.
Constantinus Africanus.
Petrus Damiani.
Marianus Scotus.
Raimundus.
Villeramus.
Baldericus.

Sæcu-

Sæculo XII.

Guntbertus.
Sigebertus.
Joannes Saresberienſis.
Otto Friſingenſis.
Saxo Grammaticus.
Hilдебertus.
Helmoldus.
Gratianus.
Hugo.
Petrus Abaillardus.
S. Bernardus.
Petrus de Riga.
Guillelmus Tyrinus.
Petrus Bleceſis.
Joſephus Devonius.

Sæculo XIII.

Phil. Gualterus.
Comadus Abb. Urſp.
Matthæus Pariſienſis.
Vincentius Bellovacenſis.
Martinus Polonus.
Albertus Magnus.
S. Thomas Aquinas.
S. Bonaventura.

Initio Sæculi XIV.

Joannes Scotus.
Alanus de Insulis.
Mattheus Vindocinensis.
Robertus Bestonus.
Gualterus Burlæus.

LINGUA LATINA INSTAURATA
post initium Sæculi XIV.

Franciscus Petrarcha.
Joannes Boccaccius.
Lombardus Sericus.

Sæculo XV.

Poggius.
Trapezuntius.
Laurentius Valla.
Bartholomæus Faccius.
Flavius Blondus.
Franciscus Philolophus.
Bessario.
Theodorus Gaza.
Æneas Sylvius.
Nicolæus Perottus.
Rodolphus Agricola.
Bartholomæus Platina.
Franciscus Barbarus.
Hermolaus Barbarus.

Mar.

Marsilius Ficinus.
Nicolaus Leonicens.
Pomponius Latus.
Jovianus Pontanus.
Angelus Politianus.
P. Paulus Vergerius.
Ambrosius Camaldulensis.
Leonardus Aretinus.
Guarinus Veronensis.
M. Antonius Sabellicus.
porcellius.
Palmerius.
Franciscus Contarenus.
Jo: Antonius Campanus.
Joannes Tortellius.
Benedictus Accoltius.
Janotius Manettus.
Leonardus Justinianus.
Antonius Panormita.
Baptista Albertus.
Baptista Mantuanus.
Jo: Andreas Lascaris.
Joannes Aurispa.
Georgius Merula.
Palladius Fuscus.
Bartholomæus Scala.
Jacobus Antiquarius.
Colutus Salutati.
Victorinus Feltrensis.
Gabriel Altilius. & alii.

Sæculo XVI.

Jacobus Sannazarius .
Ludovicus Vives .
Cælius Rhodiginus .
Thomas Linacer .
Petrus Alcionius .
Petrus Bembus .
Aonius Palearius .
M. Antonius Flaminius .
Joannes Cotta .
Christophorus Longolius .
Janus Parrhasius .
Andreas Nangerius .
Bartholomæus Riccius .
Jacobus Sadoletus .
Balibassar Castilio .
Honoratus Fasciellus .
Marius Molsa .
Marius Corradus .
Vincentius Madius .
Jo: Baptista Egnatius .
Romulus Amasæus .
Lazarus Bonamicus .
Gabriel Faernus .
Joannes Sturmius .
Pierius Valerianus .
Thomas Morus .
Gulielmus Budæus .
Melchior Canus .
Bernardinus Scardeonius .
Lilius Gyraldus .

Hiero.

Hieronymus Fracastorius.
Henricus Glareanus.
Andreas Alciatus.
Scaliger pater, & filius.
Joannes Fernelius.
Scipio Capicius.
Gaspar Contarennus.
Nonius Pintianus.
Reginaldus Polus.
Paulus Jovius.
Robertus Stephanus.
Joannes de Casa.
Joannes Brodaus.
Antonius Goveanus.
Petrus Victorius.
Hieronymus Vidas.
Adrianus Turnebus.
Franciscus Robortellus.
Dionysius Lambinus.
Paulus Manutius.
Franciscus Luissinus.
Jo: Baptista Pigna.
Onuphrius Panvinus.
Hubertus Folietæ.
Antonius Augustinus.
Gulielmus Canterus.
Petrus Ciacconius.
Carolus Sigonius.
M. Antonius Muretus.
Fulvius Ursinus.
Barnabas Briffonius.
Henricus Stephanus.
Lævinus Torrentius.
Doufa pater, & filius.

Joan:

Joannes Passeratius.
Uberius Gifanius.
Matthæus Raderus.
Horatius Tursellinus.
Petrus Perpinianus.
Andreas Schottus.
Jovita Rapicius.
Jo: Petrus Mapbejus.
Bartholomæus Latomius.
M. Antonius Majoragius,
Marius Nizolius.
Gregorius Cortesius.
Andreas Maurocenus. & alii.



VITA PHILIPPI A TURRE

EPISCOPI ADRIENSIS

Edita Cenetæ & alibi an. 1717.

*Nunc prodit ad Auctoris mentem &
exemplar autographum.*



Hilippus a Turre ea morum probitate fuit, eaque litterarum gloria, ut merito de fortuna queri potuerit, nisi ad ceteras animi dotes insignem moderationem addidisset.

Non caruit ille quidem bonis, quæ fortunæ dicuntur; abundavit etiam, si fortunæ dumtaxat ratio ducatur; sed singularis illius, atque inaudita virtus majus aliquid postulare visa est, unde hominem posteri metirentur. Natus est in Civitate Austria, vulgo *Cividale*, Kal. Maj. an. MDCLVII. parentibus apprime nobilibus Mario a Turre, & Camilla de Fru-
men-

mentinis. Quod in prima ætate rarissimum est, libros semper maluit, quam crepundia: cumque Rhetoricum & Philosophicum cursum in Patria celerrime absolvisset, Patavium migravit. Ibi rursus humanitatem, & politiores litteras tractare cœpit, ad quas potissimum factus videbatur; tum se Jurisprudentiæ dedit; nec interim Mathematicum, aut Anatomicum studium, qua erat ingenii abundantia, prætermisit. Annos natus fere viginti, publicum utriusque Juris examen subiit, probatusque suffragiis omnibus, in patriam revertit; ubi paucis post annis Patruo Civitatis Canonico sussectus, antiquæ eruditionis studium suscepit, seu potius revocavit. Hunc enim amorem jam tum imbiberat, cum Patavii esset, & Octavium Ferrarium, eruditissimum superioris sæculi virum, frequentissime audiret. Tametsi Ferrarius elegantioris antiquitatem sequebatur; Philippus vero ad eam se contulit, quæ rudioribus monumentis, & iccirco magis reconditis continetur; cujusmodi sane in ejus Capituli archivo plurima sunt. Per hæc & ornandæ patriæ & obscurissimæ ætatis illustrandæ incredibili ardore succensus est: sed cum intelligeret hoc studii genus magnam librorum copiam, & eruditorum commercium postulare, Romam demigravit anno MDCLXXXVII, ibique ita se totum antiquæ historiæ tradidit, præsertim vero Ecclesiasticæ, ut non multo post inter Academicos Collegii de *Propaganda* relatus

latus fuerit. Tum vero primum in magna illa non dicam multorum hominum, sed omnium fere nationum luce fulgere cœpit, & quantus futurus esset, ostendere. Ingenium multi admirabantur, sed acerrimus hominum æstimator Carolus Augustinus Fabronus, nunc S. R. E. Cardinalis, in primis ornavit, ejusque commendatione factum est, ut cum Eminentissimus Josephus Renatus Imperialius Ferrariam Legatus missus esset, Philippum sibi adjungeret, & juri dicundo præficeret, quod officium *Auditoris* appellant. Sexennium in ea Legatione commoratus, ita se omnibus singulari prudentia, fide, integritate commendavit, ut cum Cardinalis provincia decederet, eum sibi retinendum putaverit, ut Romæ quoque in multarum *Congregationum* negotiis ejus opera uteretur. Quo in munere sane gravissimo, quidquid supererat otii, id totum in antiquitatis studium conferebat: eaque industria celeberrimo Cardinali Norisio plurimum probatus, ad intima ejus litterarum consilia admissus est, multisque benevolentiae testimoniis supra ceteros ornatus. Accidit per ea tempora, ut Antii rudera ad portus constructionem effoderentur; ex quo intellectum est, litteras quoque fortuna indigere, nihilque admodum valere sive ad opes, sive etiam ad famam, nisi illam sibi sociam adsciscant. Cum enim magnis illis effossionibus monumenta quædam antiquissimæ formæ detecta essent, hinc si-

bi

bi Philippus occasionem arripuit ingenii prodendi sui eo Commentario, qui est *de Monumentis Antii*; in quem tam multa, tam varia, tam recondita ex omni eruditione coniecit, ut minima pars titulo significetur. Egregiam lucubrationem Innocentius XII Pont. Max. valde probavit, nec laudibus solum, quarum multi solent esse liberalissimi, sed etiam beneficiis ornavit, plura daturus, nisi fato interceptus fuisset. Verumtamen quod ille præstare non potuit, abunde præstitit Clemens XI, qui pro sua quadam non religionis modo, sed etiam litterarum cura Philippum complexus, Adriensem Episcopum renunciavit viii. Id. Febr. MDCCII. Qui hominis virtutes & ingenium noverant, non eum libenter discedere Roma patiebantur, ut in Italiæ angulo, nec prorsus illustri, neque saluberrimo delitesceret: sed ille tamen nihil tale recusandum ratus, in quo divina quædam vis apparebat & providentia, Rhodigium statim profectus est, totumque se ejus Ecclesiæ rationibus addixit. Magna in eo fuit & intelligendi & agendi celeritas: itaque cum omnia suæ provinciæ negotia ipse per se diligentissime expediret, optimique Præfulis partes impleret, sua tamen tempora Musis quoque tribuebat. Hujus industriæ quærenti focium, non defuit Comes Camillus de Silvestris, notum in rep. litteraria nomen, ætate pæne pari, morum vero elegantia & antiquitatis studio nihil dissimili. Hunc sibi Phi-

Philippus tamquam divinitus datum in urbe multis quidem rebus ornata, sed literis colendis non admodum opportuna, cupidissime adjunxit, eoque uno familiarissime, quamdiu vixit, usus est. Curavit etiam sibi a Dominicana familia virum in primis clarum Thomam Minorellum, ex cujus politissimo ingenio, quo tempore Rhodigii fuit, & ipse magnum cepit consuetudinis fructum, & Rhodigina juvenus institutionis. Sed & absentium amicitias studiosissime coluit, quicumque aliquo insigni literaturæ genere præstarent, & Patavium identidem excurrerat, iis præsertim diebus, quibus Seminarii census ab Eminentissimo Georgio Card. Cornelio haberi solet, cum ut se omnium fere disciplinarum linguarumque disputationibus continenter habitis recrearet, tum vero maxime ut Antistiti optimo, & ad literas promovendas incitatissimo gratificaretur. Cetera lætus, & quod in humanis rarissimum est, sua contentus sorte, id unum primis annis dolebat, quod librorum copia careret; nec satis haberet forum, quibus & Episcopalem dignitatem sustinere posset, & honestissimum hoc desiderium explere. Post aliquanto respiravit, instructaque decenter domo, de libris comparandis cogitare cœpit, quod ipsum ita præstitit, ut vel ex hoc uno de summa ejus sapientia conjici possit. Per hæc adjumenta non paucas pro re nata dissertationes composuit *de Taurobolio, de Vermibus*

R

bus

bus corporis humani, de Solis Eclipsi, de Annæ Faustinae numo, de annis Imperii Elagabali, ab iis editas, ad quos per epistolam missæ sunt, præter ultimam, quam edidit ipse typis Seminarii Patavini an. MDCCXIII. Scripsit præterea ad amicos multa, non soluta modo, sed etiam ligata oratione; quæ singula quidem minuta sunt, sed in unum tamen collecta corpus, justum volumen efficerent. Nolim equidem quæcumque in scriptis reliquit sive serio, sive joco fusa, statim vulgari, quam ego librariorum curam magnorum virorum existimationi sæpe fatalem animadverti: sed quædam tamen de militaribus itineribus, & de tota illa controversia, quæ ipsi cum præstantissimo adversario Joanne Vignolio de Imperio Severi Alexandri fuit, omnino jacere non debent, quod jam ad umbilicos pervenerint, & famam ejus sustinere possint. Multa etiam mihi de Patriarchis Aquilejensibus legit, multa ostendit ex abditissima antiquitate depromta; sed pleraque informia sunt, nec lucem sperare possunt, nisi forte a clarissimo viro Justo Fontanino, qui & ea eruditione est, ut nihil hujusmodi formidare debeat, & iis moribus, ut nihil omittere possit, quod ad Præfulis amicissimi gloriam conducere videatur. Reliquum est, ut de ejus morte dicamus, quod paucis absolvetur; nam ne dissecto quidem exploratoque cadavere, medici ipsi ceteroquin peritissimi statuere poterunt, quo genere morbi consumtus sit, qui-

quique hydropem accusant, ita rem involvunt, ut nec satis appareat quomodo gigni potuerit, nec quomodo cognosci, nec quomodo sanari. Quod certum est, duos ferme antequam moreretur menses, perpetua siti laboravit, eodemque tempore *diversi*, morbo illo quidem non novo, sed pæne jam familiari. Sitis in febriculam desiit, quæ & ab ipso contempta est, nec a medicis valde oppugnata, quod ex *diversis* proficisci crederetur, nihilque ejusmodi portenderet, quale postea consecutum est. Quid plura? Sic erat in fatis; repente in extremis fuit. Iraque cum se ad supremum illud certamen rebus divinis comparasset, incredibili virtute & constantia decessit V. Kal. Mart. MDCCXVII. Rhodigii sepultus est ingenti totius civitatis luctu, quæ calamitatem hanc acerbissime tulit, & pro summa temporum difficultate etiam in omen vertit. Talis fuit Episcopus, ut non solum cum probatissimis hujus ætatis, sed cum veteribus etiam comparari potuerit. Severus & gravis, sed idem, cum tempus posceret, blandus & affabilis, supra quam ejus vultus plane censorius polliceri videretur. Sermo compositus, & in re qualibet ita eruditus, ut semper meditatum crederes. Id fuit in illo singulare, quod cum plurimum temporis litterarum studiis concederet, non tamen se rebus agendis subducebat; quo factum est, ut doctissimus esset, idemque prudentissimus. Id ipsi apud suos magnam

auctoritatem conciliavit , liberalitas vero gratiam & benevolentiam . Amicitiiis usus est omnium ferme sui temporis litteratorum , multorum etiam hospitiiis : nam id in primis curabat , ut hospites frequenter haberet ; cumque ipse tenuissimo victu uteretur , alios splendidissime excipiebat . Sed hæc narratori fatis : plura dabunt laudatores .



EPISTOLA

AD C. V. JOANNEM FABRICIUM
HELMSTADIENSEM

Edita ante Dissertat. OCT. FERRARII
de Pantomimis an, 1714.

*Nunc prodit ad Auctoris mentem &
exemplar autographum.*



Etsi non una de causa statue-
ram Dissertationem hanc O-
stavii Ferrarii $\pi\acute{\alpha}\nu\upsilon$, quæ
de publico suggesto olim ex-
cepta, perque manus homi-
num tradita, ad me deni-
que pervenit, intra domesticos parietes
perpetuo retinere; id tamen accidit per
hosce dies, quod me sententiam mutare
jussit, opesque privatas in medium profer-
re. Cum enim legissem nuper emissum
Nicolai Calliachii de Mimis & Pantomi-
mis libellum, videbar quodammodo mihi
Ferrarii memoriæ injuriam facere, nisi quæ
ille de eodem argumento lucubravisset, in
scenam producerem. Te porro libuit tam-
quam auspiciem appellare, quod olim Fer-
rario familiarissime usus, hac ipsa de re
Patavii disputantem audieris, & una for-
tasse audieris cum Calliachio. Fuit enim
& ipse inter Ferrarii auditores, cujus præ-
R 3 ceptis

ceptis ac disciplina tantum profecit, ut ejus defuncti locum occupare potuerit, & ad extremum usque spiritum magna cum laude tenere. Quod si nec ulla tibi cum viro illo immortalī necessitudo fuisset, nec disputationibus ejus interfuisses umquam, tamen erat, cur ad te potissimum Ferrarii opera mitterem, qui ea undique studiosissime colligis, typisque consignata ad hominum utilitatem producis. Consilium hoc nostrum probavit in primis ornatissimus vir Julius Ferrarius, Octavii Filius, qui multa jamdiu patris sui ἀπερχομένητα φρονήματα edidisset, tibi que inscripseret, nisi testamenti religione prohiberetur. Accidit etiam hoc peropportune ad meum in te studium singulare declarandum; ut publice ostenderem, quanti a me fieres, ea que potissimum re ostenderem, quæ tibi esset probatissima. Non debuit sane, neque potuit angustis Germaniæ finibus nominis tui fama contineri, sed late vagata, ut omnes ubique, ita me præsertim in tui admirationem pertraxit; ut causas sæpe aliquas cupide quæsierim, quibus literarum commercio & benevolentia conjungeremur. Ubi autem se primum occasio dedit, statim arripui. Siquid est, quod in hac nostra erga te voluntate probandum putes, mutuo primum amore significa, deinde iis rebus, quibus studia nostra Græcæ Latinæque humanitatis juvari possint. Vale. Prid. Id. Mart. MDCCXIV. Patavio.

EPI.

EPISTOLA I.

ad N * * *.

de voce *Nepos*.

Inas a te his quatuor ferventissimis diebus accepi litteras, & quidem latinas. Itane igitur neque tibi parcis, neque mihi? Urget te scilicet Pædianus iste cum sua caterva, monet in singulas horas, ac pæne in iudicium rapit, quod eum *nepotem ex fratre* dixeris, qui fratris filius dicendus erat. Quamquam ego istorum hominum nullam esse habendam rationem duco, qui quod pauculas voces, in quibus vulgo peccari solet, a Vossio sumserint, ac memoriæ mandaverint, magnos se Cicerones putant, cetera indocti: attamen ostendere conabor, quomodo possis cornicum oculos configere. Sed tu vide, quid jubeas; ego enim spectabo aliud nihil, nisi ut paream. Aio igitur, vocem *Nepos*, quæ natura sua ad filios filiorum pertinet, ceterosque ex iis genitos, aliquando etiam ad fratris & sororis filios, & ab iis natos traduci posse, atque adeo debere; ne hunc veluti scopulum plus nimio declinantes, ad alium appellamus, qui scædior sit ac periculosior.

R 4 Ea

Ea enim interdum animi senſa exprimenda ſunt, quorum ratio non aliter conſtet, quam ſi hoc nomine declarentur. Siquidem vaſta illa verborum circumductio, & ſimilium caſuum continuatio, qua moroſi iſti aureæ latinitatſ cultodes fraternas cognationes deſcribunt, ſermonem non ſolum enervat, ſed plerumque etiam obſcurat, ut paucis poſt diebus ne ipſi quidem intelligant, qui ſcripſerunt. Ego itaque non in ſingulis latinæ linguæ particulis, ſed univerſe in toto genere aurum requiro: ac ſæpe quidem animadverti, ex aureis verbis luteam orationem fuiſſe conſtatam. Sed nunc tuis iſtis obtreſcatoribus, quandoquidem nihil detrimenti latinitas capit, morem geramus; valeat in minima quoque vocula aurum; indulgeamusque tam ſplendidæ cupiditati; verumtamen ita, ut conveniat inter nos quid ſit aureum. Auguſti obitus, inquiunt, auream clauſit ætatem. Ecce tibi igitur aurum ab Ovidio, qui Cupidinem pro Auguſti felicitate precatur, ex Ponto lib. 3. Eleg. 3. v. 61.

*Sic regat imperium, terrasque coerceat omnes
Cæſar, ab Ænea qui tibi fratre nepos.*

Vides, ut Poeta elegantiffimus Cæſarem Auguſtum appelleret nepotem Cupidinis, quod genus duceret ab ejus fratre, ideſt ab Ænea Veneris filio? Quid ſi dicant, inquis, tam alte peti cognationem hanc, ut in nomina minus propria degeneraverit? Id ſi dicant, pulchre eludent, ſeu potius eludere tentabunt; ſed ne nos quidem

dem ex toto gladiaturam ignoramus. Nimirum quo stirpes longius procedunt, nepotes quidem minus propinqui sunt, sed tamen nepotes: cognatio minuitur, non variatur. Verum agamus cum iis liberaliter. Nosti, opinor, qua sit Plautus auctoritate, cujus ore Romanas Musas prius illo sæculo locutas ferunt: hic igitur tam locuples auctor in Amphitr. Act. 4. sc. *Quis tam vasto &c.* sic habet: *ego ille idem sum Amphitruo, Gorgophones nepos, imperator Thebanorum*. Fuit autem Gorgophone Amphitruonis amita, quia soror Alcei ejus patris. Videturne tibi satis propinqua cognatio, quæ tueri vocabulorum dignitatem possit? Hic tu me etiam rides hominem semidoctum, qui carmina supposita a Plautinis non distinguam. Rideas licet, dummodo illud mihi primum concedas, Comædiæ hujus Supposita omnia latini hominis esse, & quidem antiqui, ut Grammatici peritissimi constituunt; deinde moneri te sinas, hanc, quæ Suppositorum ultima scena est, Plauti germanam judicari cum ab Jano Gulielmio in quæst. Plaut. c. 7. tum ab aliis Criticis viris, quos refert Frid. Taubmannus in Plauti commentario. Quod si quam nos liberales sumus, tam Pædianus tuus æquus esse velit, nec aureis tantum verbis, sed argenteis quoque, & quod multos fecisse video politissimos scriptores, etiam æneis locum aliquem in Latio concedat, jam ea illi ex omni memoria exempla proponam, quibus fidem

fidem negare non possit. Quid enim? An illum Quintiliani auctoritas parum movebit, qui, si ætatem quæris, ab ipso Neronis exitu florere cœpit; si doctrinam & eruditionem, viginti annos erudiendæ juventuti impendit, tanta æstimatione ingenii, ut & salarium e fisco, & senatoriam dignitatem, & consularia ornamenta consecutus sit? Hic igitur tantus eloquentiæ magister in procæmio, quæ pars Orationis cultum & elegantiam maxime postulat, in procæmio, inquam, libri quarti suarum Institutionum, multum se debere profitetur Domitiano Imperatori, quod *sibi sororis suæ nepotum curam delegaverit*. Ad quem locum accipe Turnebi animadversionem: *Nove dixit sororis Nepotes pro Nepotes ex sorore*. Neque enim dubitari debet, quin isti fuerint Flavii Clementis filii, quos etiam tum parvulos Domitianus successores destinaverat, ut narrat Suetonius in Domit. cap. 15. Hujus autem Clementis uxorem fuisse Domitillam Domitiani sororem refert Philostratus in vita Apollonii Tyan. lib. 8. c. 10. (al. 25.) Ε'τυχς κλήματα ἀπεκτινώς ἀνδρῶν ὑπατον, ᾧ τὴν ἀδελφὴν τὴν αὐτῆ ἐδεδώκεν. h. e. *Interfecit Clementem virum Consularem, cui sororem suam collocaverat*. At enim Suetonius in Vespas. c. 3. unam dumtaxat memorat Domitillam Flaviæ filiam, Domitiani sororem, quæ, vivo adhuc imo & privato Vespasiano patre, diem obiit, cum Domitilla Clementis uxor, in insulam Pandatariam a Domitiano relegata, illi superstes

stes fuerit. Esto, num iccirco neganda Philostrato fides, qui proxima ætate vixit, & in ipsa domo Augusta epistolarum magister fuit? Fortasse alteram hanc Domitillam Vespasianus suscepit ex Cænide, quam, mortua Flavia, *pæne justæ uxoris loco habuit*, ut est in eodem Suetonii loco. Fortasse hanc quoque Flavia genuit, sed ex Statilio Capella, quo tempore in ejus contubernio erat: quod in causa esse potest, ut a Dione, seu potius Xiphilino, non ἀδελφεῖς, sed συγγενῆς, idest cognata Domitiani dicatur. Nonnulli Philostrati auctoritatem subruere conati sunt, sed adhuc inani conatu; ac ne timorem quidem ullum tibi injicere debent, nisi siquando ipsius verba sollicitare incipient, ut ἀδελφὴν ver-
tant in ἀδελφοῦν, hoc est *sororem in sororis filiam*: nam fuit altera Domitilla Domitillæ filia, de qua inscriptio apud Gruter. p. 245. n. 5. FLAVIA DOMITILLA FLIA FLAVIÆ DOMITILLÆ IMP. CÆSARIS VESPASIANI NEPTIS. Majus illi negotium exhibent, qui nos ad Grammaticorum subsellia vocant, justoque sacramento contendunt, genus hoc constructionis aut aliud significare, ac nos existimamus, aut, quod Turnebus animadvertit, ab usitata latini sermonis consuetudine abesse. Ergo si Quintilianus *ne-
potes ex sorore* dixisset, manus darent. At mihi diligenter perquirenti, idiotismus hic toties occurrit, ut fidentissime statuam sororis meæ filium a Latinis scriptoribus tam
recte

recte dici *sororis nepotem*, quam *nepotem ex sorore*, aut *nepotem per sororem*; omnino ut vernaculo sermone dicimus *mio nipote di sorella*, vel *nipote per via di sorella*. Quod ita ostendam, ut non solum Turnebo, homini quam erudito, tam etiam facili satisfiat, sed illis quoque, qui vocem *Nepos* omnibus prorsus ex fratre ac sorore genitis denegant, siue sola sit, siue adjunctis ex fratre, aut per fratrem, ex sorore, aut per sororem applicata. Suetonius in Cæs. c. 83. Tres, inquit, constituit beredes, sororum nepotes, C. Octavium, Q. Pedium, L. Pinarium. En tibi, Turnebe, nepos sororis pro nepos ex sorore; nam Pedius & Pinarius ex Julia majore geniti erant Cæsaris sorore: Octavius autem, natus ex Atia Juliae minoris filia, nequid de hujus loci sensu dubites, simpliciter ac sine ulla adjectione Cæsaris nepos dicitur ab Eutropio in Breviar. l. 7. c. 1. & in nostra Epitomæ Livianæ editione lib. 116. Cæsaris nepos ex sorore. Jamvero Tacitus prodeat, dignus etiam fortasse, qui Suetonio præiret. Crispum (inquit annal. l. 3. c. 30.) equestri ortum loco C. Sallustius rerum Romanarum florentissimus auctor sororis nepotem in nomen adscivit. Fuit autem Crispi mater Sallustia C. Sallustii Historici soror, ut videre potes in Glandorpii Onomastico. Prodeat Spartianus, qui sic habet in Hadriano, c. 2. Nepte per sororem Trajani uxore accepta. h. e. Sabina nepte Trajani per sororem ejus Marcianam. Prodeat denique cetera turba, sed non

non sine nomine. Orosius l. 7. c. 28. *Licinius adolescens, Licinii Augusti filius, Constantini autem ex sorore nepos*. Vetus monumentum, Gallieno imperante positum, apud Reines. Class. 8. num. 37. AVUNCVLVS NEPOTI B. ME. Ambrosius l. 6. epist. ad Pater. num. 48. *Avunculus iste illius, ista huius neptis vocatur*. Venant. Fortunatus l. 6. carm. 4. v. 16. *Non cecidit patruus, dum stat in Urbe nepos*. Sed jam ad ea tempora pervenimus, quibus ferme nemo latine scripsit, quin promiscue nepotem dixerit cum filii, tum fratris filium: quod ita notum est omnibus, ut ridiculum sit auctoritates congerere. Illud cave, ne tibi persuadeant, Latinam linguam exinde interiisse, quæ quamvis in communi loquendi consuetudine esse desierit, atramen in Scholis, in Academiis, in publicis monumentis, & universe in optimo quoque scriptionis genere, quæ singula populari locutioni infinito intervallo præstant, semper viguit ac dominata est: qua de re multa jamdiu animo volvo, sed ea non capit epistola. Etiamne igitur quis dubitabit de hujus vocabuli potestate; seque miris modis contorquebit, quoties fratris, aut sororis filium unica voce notare voluerit, aut etiam pluribus, sed quæ tamen cognationem hanc sine magno verborum circuitu, ac sine ambiguitate significant? Muretus sui sæculi Tullius, ex Apulejo quoque, ac Sidonio quædam esse petenda scribit lib. 1. Epist. 36. nos vero ne ab Ovidio quidem audebimus? Hinc videli-

delicet nostræ illæ macræ atque jejunæ scriptiones, in quibus nihil magis apparet atque extat, quam metus & sollicitudo. Qui quidem morbus vetustissimus est, & ab ipso Quintiliano exploratus. *Iniqui iudices* (inquit lib. 8. cap. 3.) *erga nos sumus, id eoque paupertate sermonis laboramus.* Mone igitur monitorem tuum, ne sibi, ac tibi sine causa crucem figat. Hactenus iussu tuo: nunc aliqua etiam sponte mea, ne, ut soles, de litterarum brevitate queri possis. Atque ego quidem non valde miror, nomen *Nepos* fratris filiis posterisque eorum fuisse tributum, quia cum proprio cognatio ista careret nomine, ex proximo arcessere debuit: quod in aliis quoque linguis ex Latina propagatis postea factum est, *exemplo monstrante viam.* Illud mihi potius mirum videtur, cur etiam ad prodigos appellationem hanc pertinere Latini voluerint: cum enim multæ rationes afferri soleant, nullam tamen adhuc video, quæ homini veritatis studioso possit esse satis. Accipe, quid ego de re hac, homo, ut scis, non valde acutus, nudius tertius excogitaverim. Cum Romani inter antiquas virtutes frugalitatem in primis numerarent, inter sæculi vitia maxime prodigiam, hinc factum esse crediderim, ut profusum hominem & æquo largiorem nepotem dicerent: Quid palles, quid ad extrema oculos abjicis? Nempe times, ne multa de veterum Romanorum frugalitate exempla, historias, versiculos, quandoquidem

dem ita usuvenit, ad eruditionis speciem & pompam tibi recitem. Non ita sum laudis cupidus, aut certe non laudis hujus. Sed fac me unum aliquem eruditum ex *Theatro vite humane*: ego ne tibi tam vulgares eruditiones? Scio cui scribam. Id modo dico, Romanos scriptores nihil frequentius memorare, quam nepotum luxuriam ab avita parsimonia degenerantium; quod apud illos adeo increbuit, ut ne nominis quidem inter nepotem, & prodigum voluerint esse discrimen. Hic tu mihi Calpini lexicon objicis tres ante annos mea opera editum. Vide, numquid gravius. Sed primum de toto illo volumine ita velim judices, ut est in epistola ad Lectorem, nec plus a me poscas, quam promiserim; deinde ad hoc ipsum quod attinet, sic tibi persuadeas, nihil prorsus certi atque explorati constitui posse; ex quo factum est, ut non solum alii alia, sed ego ipse alias aliter scripserim. Erit fortasse, cui priora illa magis arrideant, erit qui neutra probet: sed, quod in re hac facilimum est, multi reprehendent; quod unum in rebus omnibus est difficile, nemo optima reponet. Habes jam quo studio ea curem, quæ te velle, quæque ad tuam laudem pertinere intelligo; neque vereor, ne te non expleverim: quod utinam tu quoque nostrum desiderium expleas videndi tui, istisque silvis aliquando relictis, in sole rursus vivere incipias. Vale.

Non. Sextil. MDCCXXI. Patavio.

EPI-

EPISTOLA II.

ad N * * *.

de vocibus *Artopta*, *Loco*,
& *Nota*.

Quod Pædiano isti tuo Juvenalis & Persii Satyræ tantum placeant, quantum scribis, haud equidem miror: placent enim magnopere etiam nobis, quamvis non audeamus Horatianis opponere. Illud vero per mihi mirum videtur, qui fiat, ut sibi persuaserit, nullum esse horum Poetarum versiculum, quem ipse non probe intelligat. Ut ut est, ego tibi auctor sum, ut litibus abstineas. Quod tamen consilium ne videar dedisse defugiendi laboris gratia, duo loca adscribam, alterum Juvenalis, Persii alterum, quibus tentare hominis ingenium possis, & belle, nisi fallor, includere. Debes igitur te in laudantis speciem totum conformare; os ejus atque oculos ingenii indices admirari; interrogare, quam pridem se dederit his auctoribus; quidquid responderit, magna accipere admiratione. Cum maxime intumuerit, tum veluti discipulus aliquis in Pythagoræ ludo post

post silentium quinquennale , callide argue-
 que urge , nec quidquam abire patia-
 ris . Est, inquires, in quinta Juvenalis Sa-
 tyra vox *Artopta* (v. 71. *salva sit artoptæ
 reverentia*) cujus , quæso , vim ac signifi-
 cationem pro tua ista intelligentia mihi ex-
 pedi . Si imparatum invenies , ut fere so-
 lent esse gloriosi homines , mitte ad In-
 terpretes , unde verbosiorredibit , sed paul-
 lo doctior . Cum enim omnes excusserit
 postrema editione ab Henninio collectos ,
 id , si recte conjicio , pronunciabit , quod
 Henninio ipsi probatur , *artoptam panem es-
 se non nihil assatum* . Hæc scilicet opinio
 fuit Octavii Ferrarii Elect. l. 2. c. 10. qui
 tamen si animadvertisset Plauti verba in
 Aulular. a. 2. sc. 9. *Ego hinc artoptam ex
 proximo utendam peto* , facile sibi persuasisset,
artoptam vas esse , in quo panis assa-
 tur , non panem ipsum . Vides enim , o-
 pinor , vas utendum a sene Plautino peti
 potuisse , panem utendum non item . Jam
 vero cum *artopta* vox Græca sit ab ἀρτοπτήν,
 quam describit Pollux lib. 10. c. 25. τὸ
 ἀρτόπτεον , ἐν ᾧ τὰς ἀρτους ἐνπύεισι , *vas in quo pa-
 nes coquunt* , quære a Pædiano tuo , cur
 putet a propria certaue significatione ab-
 eundum . An non sensus & urbanitas con-
 stat , cum jubetur Parasitus abstinere pa-
 ne , qui in *artopta* coctus est ; atque ita
 vereri vas in domini delicias , velut in u-
 sum sacrum , comparatum ? In quo qui-
 dem non tam usum ipsum , quam Græ-
 cam appellationem irridet more suo .

S

Quod

Quod si malit Lubini interpretationem tibi obtrudere, qui *artoptam* panis dispensatorem & custodem esse putat, ab ἄρτοπα^ν panis, & ἄρτοπα^ν video, fac primum ostendat, ubi novam hanc vocem, & quidem masculini generis, sive apud Græcos, sive apud Latinos invenerit; deinde quomodo cohærere existimet consequentis carminis verba, *superest illic, qui ponere cogat*: nam si *artopta* custos est, ipse quidem *ponere coget*, non alius servus. Sudabit, mihi crede, atque algebit; sed explicare se ex ambagibus non poterit. Fortasse ad illos accedet, qui *artoptam* pistorem dixerunt, tamquam ab ἀρτοπῆς. Esto, amplificemus Latinam linguam, siquidem vox ἀρτοπῆς apud ullum Græcum scriptorem reperitur. Quid si dicat, mulierem panificam significari, testemque appellet Plinium? Nihil novi dixerit, sed nihil item veri. Ecce tibi Plinii verba lib. 18. c. 11. *Pistores Romæ non fuisse ad Persicum usque bellum &c. Ipsi panem faciebant Quirites, mulierumque id opus erat, sicut etiam nunc in plurimis gentium. Artoptam Plautus appellat in fabula, quam Aululariam scripsit; magna ob id concertatione eruditorum, an is versus Poetæ sit illius; certumque sit A. Atteii Capitonis sententia, coquos tum panem lautioribus coquere solitos. Primum igitur narrat Historicus, pistores ad Persicum usque bellum Romæ non fuisse; deinde ipse sibi hac super re difficultatem movet, quod in Plauti fabula mentio fiat artoptæ, hoc est*

est pistorii vasis, & quidem ex Græcia allati, ut ex ipso nomine patet; denique difficultatem tollit, tum quia non satis constat, an is versus Plauti sit, tum vero maxime quod *artopta* coqui uterentur, non pistores. Hinc *artopticii panis* eodem capite meminit, qui ab *artopta* dicitur, sicut a *furno furnaceus*. Vides ne, quam nihil afferant probabile, qui *artoptam* apud Plinium mulierem putant? Igitur pro certo habeas, *artoptam* vas esse ad panem delictiorem coquendum; neque sinas te per vanas commentationes induci. Vide porro, ne Pædianus ad incitas redactus veterem Juvenalis editionem in medium afferat anni 1473, quæ non *artoptæ* habet, sed *artocopi*. Vox *artocopus*, qualiscumque est, etiam Britannico placuit: sed tu illi & invidiam novitatis oppone, & optimorum codicum fidem, & eruditorum consensum pro *artopta*. Antequam manum de tabula, illud quoque te monitum volo, unum ex omnibus veterem Scholiastem subdubitasse, utrum *artopta* pistor esset, an vas: qui hunc consecuti sunt Juvenalis enarratores, pro pistore nonnulli steterunt, vas omnes omnino rejecerunt.

Jam ad Persium veniamus. Sed victus atque afflictus Pædianus suis se castris tenebit. Si tamen provocando rursus educere in aciem potes, quære ab illo, quid putet per vocem *Rbenos* significari in Satyra Persii VI. v. 47. *ingentesque locat Cæsonia Rbenos*. Si accipis, inquiet suo pe-

riculo cautus, quod scribunt Interpretes
Rhenos posuit pro *Rheni* incolis. Tum tu:
 Principio quidem perinde loquebaris, ac
 si *Juvenalis*, & *Persii* anima in te mi-
 grasset; sed ut nunc est, de tuo vivis:
 Itane vero nihil nisi ab Interpretibus?
 Recita, o bone, quinque ipsos *Persii* ver-
 sus, quibus tota clauditur sententia.

----- *Missa est a Cæsare laurus*
Insignem ob cladem Germanæ pubis, & aris
Frigidus excutitur cinis: ac jam postibus
arma,

Jam chlamydes regum, jam lutea gausapa
capitis,

Effedaque, ingentesque locat Cæsonia Rhe-
nos.

Describit igitur apparatus triumphalem
C. Caligulæ, qui victoriam de Germanis
 relatam jactabat, laureatis litteris ad Se-
 natum missis: qua de re legendus *Suetoni-*
us in ejus *Vita*, cap. 45. & seq. Itaque
Cæsonia ejus uxor parabat aras ad sacrifi-
 cia, & inter ceteras triumphi pompas Bel-
 gica vehicula, & *Rheni* imagines fieri cu-
 rabat. Nosti oppidorum ac fluminum ico-
 nas, imo rerum & locorum omnium,
 quæ ullo modo ad victoriam pertinerent,
 in triumphum ferri consuevisse. *Tacitus*
Annal. 2. c. 41. *Vesta spolia* (in triumpho
Germanici) *simulacra montium, fluminum,*
præliorum. *Ovidius* de triumpho *Drusi* l. 4.
Trist. Eleg. 2. v. 37.

Hic lacus, bi montes, hæc tot castella, tot
amnes,

Ple-

Plena feræ cædis, plena cruoris erant.

Imo ipsum Rheni simulacrum ejus pompæ pars fuit v. 41.

Cornibus hic fractis viridi male tectus ab ulva,

Decolor ipse suo sanguine Rhenus erat.

Quare Cæsonia *ingentes Rhenos*, hoc est ingentes Rheni imagines fieri volebat, quoniam ad Rhenum ridiculam illam victoriam maritus retulisse dicebatur. Rheni porro incolas, qui tamquam captivi ante currum ducerentur, non Cæsonia, quæ in Urbe erat, sed Caligula comparare debebat; & revera comparavit, & ad pompam seposuit, ut narrat Suetonius cap. 47. Equidem non video, quid opus sit in tanta sententiæ perspicuitate ad hanc *μικρονυμψα* confugere præsertim tam duram, ut aliquos coegerit de codicum fide male suspicari, vocemque *Rhenos* in *Rbedas* convertere. Et vero si *Rhenus* pro Rheni incola dici potest, jam reliquum est, ut & Patavium pro homine Patavino, & Adria pro pisce Adriatico, & alia hujusmodi nimis ridicula dicantur.


Si vis autem illum uno telo prorsus conficere, hic veluti duplicato ictu, ad explanationem compelle verbi *Locat*. Quid tibi ab illo expectes, nisi quod interpretes omnes docti indoctique habent, videlicet idem valere atque accommodat, collocat, disponit? Id cum dixerit, impune ridebis. Quid enim minus ad rem? quasi vero Cæsonia tanto ante triumphum diem,

qui dies ne advenit quidem umquam, arma in templorum postibus collocaret, captivos vestiret, esseda & imagines in pompa dis- poneret. Tu, si paullo reputabis attentius, statim intelliges, *locare* nihil esse aliud, quam opus faciendum redemptoribus tra- dere: nam cum Caligula *procuratoribus scrip- sisset* (Sueton. c. 47.) *triumphum appa- rent, quantus numquam alius fuisset*, invenien- di erant artifices, quibus & arma postibus figenda, & vestes ad captivos ornandos, & esseda, & imagines, & apparatus de- nique totus locaretur. Id vero usuveniebat etiam in veris ac legitimis triumphis, ut vel tota, vel maxima pompæ pars, quam- vis in speciem advecta longius, in Urbe tamen conderetur; ideoque deesse non po- terant id genus redemptores. Non aliter, credo, quinque Julii Cæsaris triumphi, quorum quatuor eodem mense acti, pa- rari tanta celeritate & varietate potuerunt. De his Vell. Paternus l. 2. cap. 56. *Quinque egit triumphos; Gallici apparatus ex citio, Pontici ex acantho, Alexandrini testu- dine, Africi ebore, Hispaniensis argento rasili constitit.* Hæc si tu magna asseveratio- ne & confidentia dices, non solum tam- quam vera, sed etiam tamquam tua, ex- cuties vano istius Grammatici jactatio- nem; nec amplius audebit mirificum se ti- bi Juvenalis, aut Persii interpretem ven- ditare. Quod reliquum est, noli de patria queri: sunt & nobis Pædiani nostri; verum- tamen non audent cuilibet imponere.

Jam

Jam flagitat tabellarius ; nec tamen scribendi finem facere possum , antequam te moneam , ne , quod in tuis litteris semel atque iterum animadverti , vocem *Nota* pro adnotatione seu explicatione temere usurpes . Quid stupes ? Latina non est . Nihil te pulcherrimorum librorum tituli moveant , in quibus *Notæ variorum* , *Notæ Criticæ* , *Notæ Selectæ* , & similia ; nihil quotidianus eruditorum hominum usus ; nihil ne nostræ quidem scriptiunculæ olim emissæ , cum magnis nominibus crederemus . *Nota* signum est ; *notasque apponere* , quod habet Cicero in *Pison.* c. 30. est signa quædam appingere ad ea probanda , vel improbanda , quibus appingimus ; non explicare , ut vulgo increbuit . Multa generis ejusdem in Latinis Scholis & Academiis quotidie resonant ; at ego nolo movere Camarinam , quam olim cum tentassem , vix *me servavit Apollo* . Ea cum tibi excident ad nos scribenti , nisi ægre feres , significabo . Pauci , mihi crede , Latine sciunt : neque ego mihi tantam hanc laudem assumo , sed tamen quid ea sit , & quibus desit , intelligere mihi videor . Vale .

Kal. Aprilis MDCCXXII. Patavio.



EXERCITATIONES

Ex more atque instituto

SEMINARII PATAVINI.

JACOBUS
FACCIOLATUS
A D
LECTOREM.



Institute a Majoribus nostris in qualibet disciplina, seu magna seu parva, Disputationes ita frequentes sunt, ut nullum sit tam exiguum ingenium, quin prodire in arenam cogatur, suasque vires qualescumque in omnium conspectu experiri. Prima difficultas, et haud scio an maxima, in eo est, quod initio statim eleganti aliqua et ad tempus comparata orationcula Auditorum animos parare oportet; tum iis absoluta concertatione, officiosis verbis gratias agere: quo in loco cum illi etiam plerumque deficiant, qui ceteroquin doctrina excellunt, quivis intelligit, quid possit adolescentulus, nisi aliena ope et auxilio utatur. Totum hoc corrigendi munus atque officium Praefecti

fecti Stud. est: at ego, quod in operibus quoque manufactis probatur, sapere facere malui, quam reficere; ut ex his apparebit, quæ nunc certo consilio ductus, publico iudicio committo. Ac si nihil huiusmodi perire si-uissem, jam non librum, sed bibliothecam, ut ita dicam, dare possem. Verum & sero colligere in mentem venit, & pauca opus esse duxi, quibus Furventus hæc, tamquam imaginibus ante oculos positus, cogitationes suas regeret, ac pro re nata similia faceret.

Sed quia disciplinarum studiosi carere prorsus mitiorum litterarum studiis non solent, neque mehercule debent, ecce tibi huius generis exercitationibus quemadmodum consuluerim. In hac quoque parte Proæmia & Gratiarum actiones requiruntur; sed Silvas insuper, & lucubratiunculas, ut mos est, Grace reddendas singulis argumentis adjunxi; cum ut totum nostrarum scholarum ordinem ostenderem; tum vero maxime, ut iis, qui me in munere tam operoso ac molesto.
confe-

consequentur, testimonium aliquod diligentie ad commonendum relinquerem. Hac porro amœniora, velut omnis gratia, primo loco ponamus.



LIT:

LITTERARIÆ
EXERCITATIONES,

vulgo *Academie*, quæ qualibet
hebdomada in

SEMINARIO PATAVINO
haberi solent.



EXERCITATIO I.

De linguæ Latinæ studio

PROOEMIUM.



Ereor, ne mihi in præ-
senti exercitatione simile
quippiam eveniat, ac ve-
teri cuidam Sophistæ, qui
in publica concione Her-
culis laudes persequi con-
stituerat. Cum hic flo-
rem ipsum Spartanorum magnæ cujusdam
expectatione rei uno in loco adesse iussis-
set, jamque spectantibus omnibus in sug-
gestum ascenderet, tum ex iis unus, qui
in corona sedebant, Antalcidas nomine,
vir cum primis dignitate & auctoritate
gra-

gravis, Sophistam interrogavit, qua de re dicere vellet: Herculem, inquit, laudandum suscipio. Hic vero Antalcidas otiosum Declamatorem nova interrogatione exanimavit, percunctatus, quis Herculem reprehendisset, ut opus esset laudatore. Habebant enim Herculem Lacedæmonii in Deorum numero, eumque omnes in primis colebant. Ecce me vobis, Auditores, eo consilio, ut Linguae Latinae studium in hoc ejus quasi portu, in quem denique multis jactata tempestatibus, Deorum immortalium providentia confugit, quam maximis potero, laudibus ornem. Video, quam nihil indigeat laudatore, me vero praesertim, quem ex hac ipsa contentione intelligetis neque Latine admodum scire, neque ullo doctrinae aut eruditionis genere valere. Illud vos tamen etiam atque etiam obsecro, ne putetis, mihi temere cogitanti in mentem venisse, ut Sophistam agerem. Nam si quis a nobis Antalcidas quaerat, utrum sit aliquis tam vecordis animi ac desperati, ut Latini sermonis praestantiam dignitatemque non agnoscat, respondebo, ne litteris quidem sua monstra deesse. Absunt enimvero ab hoc loco: utinam aliquando absint provincia tota; cedant humanitati ac veritati locum; purgent caelum hoc fallacis; in suas terras, hoc est barbaras concedant. Interim tamen necui nostrum officere possint, siquando conentur huc quoque pestilens virus afflare, ergo hodie pro virili industriam omnem operam-

peramque adhibebo; non sane quod sperem me posse aliquid, sed ut eorum studia commoveam, quos & plurimum posse video, & ubi opus fuerit, paratos esse ad resistendum certo scio.

S I L V A.

EXercitatio hæc ad genus Laudativum pertinet. Laudabitis enim Latine Lingue studium.

Primum ob dignitatem: quia lingua hæc fuit principis terrarum populi; & quia adhuc in publicis monumentis fere omnibus, in sacris, in cærimoniis locum habet.

Deinde ob jucunditatem: quia pulcherrima est, gravis, numerosa, dives, ad omnia animi sensa exprimenda & ornanda supra ceteras apta.

Hinc ab omnibus nationibus, tamquam cujusque propria, arrepta est: qua ratione gradum facietis ad ejus utilitatem ostendendam: Nam per hanc unam cum omnibus hominibus jungere commercia possumus, & Babelicæ turris incommoda compensare.

Postremo ob necessitatem: nam qui literis deditus est, aliis omnibus linguis carere potest, hac una non potest. Omnes enim artes ac disciplinæ Latine traduntur; omnes Academiæ Latino sermone circumsonant; frigidus est Theologus, Philosophus,

phus, Jurisperitus, qui suarum rerum gravitatem aliis verbis assequi conatur, quam Latinis.

Ergo hæc litteratorum lingua dici quodammodo debet, in qua qui præstat, non jam inter turbam, sed inter ipsos litteratos eminet. Quod si homines brutis animalibus antecellunt, quod animi sensa inter se conferre loquendo possint; litterati ceteris hominibus, quod melius possint; quanta erit ejus præstantia, qui litteratos ipsos elegantia sermonis prætergrediatur?

Ultimo loco ad absurdum res duci poterit. Nam cum in tanta brevitate vitæ tam multa discere debeamus, absurdum est per alias linguas vagari, quarum monumenta omnia in hac una continentur. Ac siqua contendere cum Latina posset, Græca scilicet esset. Verum quid habent Græci, quod non sit Latinis litteris mandatum? Cum tamen contra ex Latinis paucissima Græco sermone legantur. &c.

A D G R Æ C A M

INTERPRETATIONEM.

*Lingua Latina per Ven. GREGORIUM
CARD. BARBADICUM in Pa-
lavino Seminario restituta.*

ITalico regina solo dominabar, & ipse
Læteus edebat verba Latina puer.

At

At cum se nostro Gens barbara miscuit
orbi,

In latebras linguæ me pepulere novæ.

Pulvere sub turpi damnata silentia duxi,

Et blattas Cicero, Virgiliusque tulit.

Tum Petrarcha meis sumsit pro juribus
arma,

Conatus veterem restituisse locum.

Jamque reflorescens complebam lumine
terras,

Visæque sunt nobis aurea sæcla iterum.

Postea sed variis rursus concussa duellis,

Heu, dixi, melius doluisse fuit.

Denique Gregorius sortem miseratus acer-
bam,

Me sedis voluit sceptrâ tenere suæ.

Regna angusta nimis, tantoque minora
verusto,

Non placuere mihi, sed placuit Domi-
nus.

GRATIARUM ACTIO.

MUnera multiplici creverunt ordine ve-
stra,

Nec pensari ulla jam bene voce queunt.

Huc linguæ coeant omnes, & pignore cer-
tent,

In re non facili quæ sit inepta minus.

Siqua suis poterit tam grandia reddere ver-
bis,

Huic uni cedit Lingua Latina locum.

EXERCITATIO II.

De studio linguæ Græcæ.

PRO O E M I U M.



Æpe ego constitui, siquando mihi dicendi copia apud vos daretur, in disceptionem vocare, cur Græcæ litteræ, florentibus Romanorum rebus, tam male audirent, ut mores corrumpere crederentur; tamen nemo esset unus, qui negaret, disciplinas artesque omnes ad civilem cultum libero homini necessarias ex illis profectas esse. Ut enim nihil de Satyrarum scriptoribus dicam, morosis ingeniis atque acerbis, quorum princeps Juvenalis (si modo princeps appellari debet) neque hortinibus Græcis, neque verbis pepercit; nonne Cato ille Censorius, gravitatis & sapientiz imago, ad Marcum filium scripsit, *Bonum esse Græcas litteras inspicere, non perdiscere?* Quid M. Cicero Oratoris pater? Nonne hujus viri omnium opinione prudentissimi illud est, quod refertur in libris de Orat. a Filio conscriptis, *Ut quisque optime Græce scit, ita esse nequissimum?* Quod vero mihi magis mirum videtur, tantum absuit ut voces istæ Romanorum studia retardarent, ut ipse quoque Cato, nihil incon-

Flin. l.
39. c. 1.

l. 1. c.
66.

Cic. de
Sen. c.
1.

inconstantiae famam veritus, inclinata iam ætate Græcas litteras avidissime secutus sit, quas recta firmaque improbaverat. Verum id totum ut excutiat, suisque momenti in partem omnem examinetur, longioris disputationis est, multoque gravioris, quam ut a nobis suscipi possit, & in horæ spatium vel paullo amplius includi. Itaque ad nostra potius tempora conversi, de illis queramus, quod Græcæ litteræ, incredibili rerum ac voluntatum mutatione facta; laudatoribus abundant, cultoribus vero magnopere egeant. Neque enim nos eas colere dicendi sumus; quorum plerique inviti nolentesque accedimus; tantumque operæ illis tribuimus, quantum ferulæ metu tribuere cogimur. Sic enim fit, ut eorum, quæ quotidie discimus, nihil animo adhareat, & cum universum scholarum cursum obierimus, adhuc de Grammaticis elementis timide dubitanterque respondeamus. Fastidium hoc rerum optimarum gravissimi morbi indicium est: cui demum ut aliqua ratione occurramus, declamationem adversus nos ipsos præsentis exercitatione instituimus. Quo quidem stimuli genere siquid nos ad ignaviam abigendam proficere intelligemus, reliquas omnes litterarii negotii partes hunc in locum afferemus, eandemque singulis operam & diligentiam adhibebimus.

S I L V A.

DEclamationem institute adversus illos, qui Græcarum litterarum studia vel prorsus oderunt, vel segniter colunt: quod commodè præstabitis earundem litterarum laudatione.

In duo genera dividi possunt, quæ faciunt in rem hanc; alterum est eorum, ex quibus efficitur Græcarum litterarum dignitas, eorum alterum, ex quibus utilitas existit.

I. Pars. A nobilitate rerum, quæ Græce scriptæ sunt. Ea lingua plena est dignitatis ac splendoris, qua usi sunt principes liberalium artium ac disciplinarum auctores: atqui a Græcis omnes fere artes ac disciplinas accepimus: ergo eorum lingua, &c.

Ab antiquitate. Antiquissima litterarum monumenta, si sacra Biblia excipias, Græca sunt. Ab his autem reliqua omnia sunt propagata, Latina præsertim.

A multitudine Scriptorum. Magnus est eorum numerus, qui in quolibet rerum genere Græce scripserunt: unde in hanc linguam tanta verborum copia redundavit, tam varia declinandi, componendi, figurandi ratio; tot schemata, tot dialecti, &c.

A testimonio. Romani, omnium ætatum omnisque memoriæ prudentissima natio,

tio , tantum honoris Græcis litteris detulerunt , ut iis ferme unis per annos quingentos usi sint ; & cum gentes omnes , quibus imperabant , barbaras dicerent , Græcos tamen & honorifice appellare consueverunt , & vel in summa potentia bonarum artium magistros habuerunt.

II. Pars . Ostendite ad solidam eruditionem non satis esse Latinas litteras : sed quia res non caret invidia , antequam rationibus confirmetur , præmittite magnorum virorum testimonia . Familiam ducat M. Varro , qui apud Cic. Academ. I. c. 2. eos qui Græce scirent , *doctos* appellavit , reliquos omnes *indoctos* .

Varronem sequatur Cicero , qui in Bruto c. 45. ait , *C. Titium eo pervenisse , quo potest Latinus orator sine Græcis litteris* .

His adjungatur orator sæculi sui eloquentissimus idemque doctissimus , M. Antonius Muretus , cujus hæc sunt verba lib. 2. Var. lect. c. 20. *Sine Græci sermonis cognitione manca omnis & mutila est doctrina : & qui ejus expertos sint , ab eis ne Latine quidem scripta penitus percipiuntur* .

Tum rationes in medium asserite : Nam pulcherrima litterarum atque artium monumenta Græca sunt , quorum cognitione qui caret , quomodo dici potest eruditus ?

At enim Latino sermoni , atque adeo etiam vernaculo reddita sunt .

Respondebitis primum non omnia reddita esse ; deinde non fideliter ; postremo illa ipsa , quæ fideliter reddita dicuntur ,

T 3 tamen

tamen in pluribus deficere & claudicare ; quod nulla lingua vim & venustatem Græcæ assequi possit , Quam in rem Gellii auctoritatem affereris , qui toto capite sexto decimo lib. xi. contendit quædam esse , quæ ne pluribus quidem Latinis verbis dici possunt nisi obscurissime , cum a Græcis perfectissime & planissime uno verbo dicantur.

Demonstrabitis igitur , qui carent Græcis litteris , eos carere usu pulcherrimæ artis , quæ Critice dicitur , in veteribus scriptis interpretandis ac dijudicandis posita . Nomine autem veterum scriptorum Latina quoque complector , quæ cum magnam partem a Græcis fluxerint , nequeunt sine ope illorum perfecte intelligi

Si vacat , errores aliquot illorum hominum recensete , qui aleam hanc sine Græcæ linguæ præsidio tentare voluerunt ; eorum vero in primis , qui rationes & origines vocum sunt persecuti ; qui sane ridicula protulerunt .

Hæc ad interpretandum . Multa porro etiam ad componendum facere videntur , si quam copiosa , quam fusa , quam varia Græca lingua sit , cogitare velitis . Sed hoc veluti prætereuntes attingite , ne solitæ exercitationis modum prætergrediamini .

Parænesi orationem claudetis , cui auctoritatem conciliabit Horatii monitum in epist. ad Pisones de Art. Poet.

..... *Vos exemplaria Græca
Nocturna versate manu , versate diurna .*

AD

A D G R Æ C A M INTERPRETATIONEM.

*Lingua Græca per Ven. GREGORIUM
CARD. BARBADICUM in Se-
minatio Patavino restituta:*

Musarum Phœbique parens pulcherri-
ma quondam,

Græcia nunc fœdo dat sua colla iugo.
Heu, Superi, prohibete nefas: quo cri-
mine tanto

Amisit priscum patria vestra decus?
Sic erat in fatis. Artes migrate Pelasgæ:

Explicat en vobis Itala terra sinum.
Nec mora: jam lætæ subeunt Antenoris
Urbem,

Illas Gregorius quo jubet esse loco.
Scilicet hic unus mirandi fœderis auctor,
Trojugenas Græcis conciliare potest.

GRATIARUM ACTIO.

Non agimus Græce vestro pro mu-
nere grates:

Scilicet hoc unum Dorica lingua nequit.
Aptior haud ulla est benefacta rependere
verbis;

Sed nondum veteri suspicione vacat.
Artibus ingenium juvit coluisse Pelasgis:
At Romana tenet pectora nostra fides.

EXERCITATIO III.

Accusatur Solœcismus.

P R O O E M I U M.



Ullus est capitalior litterarum ac litteratorum hostis, quam Solœcismus, a quo vix illi cavere sibi possunt, qui florentissimam ætatem assidua ingenii exercitatione triverunt, omnemque Grammaticorum studiorum cursum per summos labores ac vigilias semel atque iterum obierunt. Itaque non est cur miremini, Auditores, si nos pestem hanc justo iudicio persequi hodierna luce decrevimus, tantoque conatu debilitare atque affligere, ut ex hoc Musarum domicilio longe cultissimo statim excedat, & in suas illas, unde exiit, Solorum latebras, sese conjiciat. Itane igitur esse labem, quæ sermonem nostrum, hoc est maximum Deorum beneficium hominibus concessum turpissime sædet, neque solum in triviis & tabernis, sed in foro, in templis, in curia, in academiis impune grassetur? Dii vestram fidem! Nimis jam mites, nimis patientes adhuc fuimus. Expedienda sunt arma omnia, explicanda signa, procedendum in aciem, debellandum aliquando est.

est. Sed illius quidem tam multæ insidiæ sunt, tam abditæ, tam callide positæ, ut in ejus sinu sæpe lateat, tamquam in tuto, quicum depugnat, nec ante se prodatur, quam victoriam reportarit. Quocirca mihi ipsi timendum magnopere est, ne dum Solæcismo gloriosus miles bellum indico, Solæcismum admiserim; ipsisque armis hostem contexerim, quæ in ipsum distingo. Id ne forte fiat, quæso vos, Auditores, intendite oculos animosque, monete pro vestra benevolentia, pro vestra auctoritate reprehendite: nam cum animadvertierim sæpenumero, ideo scelus hoc impune abire, quod ab his ipsis defenditur, qui huc descendunt ut oppugnent, ego firmissime statui conjunctis vobiscum viribus prælium inire, & in me ipsum arma convertere, siquidem in meipso deprehenderetur. Tu vero, *Præsul amplissime*, quem nobis judicem nec opinatum fortuna obtulit, noli mirari de rebus tam minutis a nobis disputari. *Ætas* videlicet, & prima hæc studiorum ratio ita postulat: nec illi ipsi, qui in litteris regnant, ad eam gloriam pervenissent, nisi ab his tenuissimis exercitationibus incepissent.

S I L V A.

Compositio versabitur in genere judiciali: postulabitis enim Solæcismum hostem vestrum velut apud Prætorem actione

atione de vi & infidiis; quod nolentibus vobis, in possessiones vestras invadat, modo per insidias, modo per vim, stipatus barbarismis, idiotismis, impropriis, macrológis, battologis, & aliis orationis pestibus.

Dicetis, vos operam omnem & industriam adhibuisse, rogasse, obsecrasse, contendisse modis omnibus, ut a vobis rebusque vestris abesset; sed audaciam tantam coerceri non posse nisi publica auctoritate.

Describetis labe, quas lucubrationibus vestris saepe intulit; dolorem inde consecutum, verecundiam, jejunia, verbera, &c.

Si monstrum hoc abigatur, ætatem vestram felicissimam fore, quæ hac una de causa infelicissima est. &c.

A D G R Æ C A M I N T E R P R E T A T I O N E M,

Pro Solœcismo.

CUM hæc audisset Solœcismus, neque patronum inveniret, ipse pro se dixit; & quidem ita graviter & facunde, ut nihil desideratum in ejus oratione sit, nisi causa melior. Innocentiæ suæ illud in primis argumento esse, quod cum ætate innocentissima, hoc est cum pueris maxime vivat; a viris autem fere absit, nisi boni viri

viri sint. Grammaticorum nationem, quod
 sibi bella moverit, Deorum immortalium
 iudicio ad perpetuas nugas tamquam ad
 metalla fuisse damnatam. Neque vero ma-
 gis miseram illorum conditionem fuisse, qui
 olim sua crimina luere in fodinis cogeban-
 tur, quam sit istorum, qui inter obsoleta
 atque exesa veterum linguarum rudera dies
 noctesque versantur. Se adhuc unum ser-
 monis libertatem ab illis oppugnatam de-
 fendisse; se Theologis, se Philosophis, se
 Medicis, se Jurisperitis suffragatum, ut præ-
 claras animorum suorum cogitationes, qui-
 bus generis humani salus continetur, di-
 cendo scribendoque exponere possent. Ro-
 gare atque orare, ne se ejicerent, ni vel-
 lent, magnam repente in omnibus biblio-
 thecis & academiis solitudinem fieri. I-
 psos quoque latinitatis magistros ac pæne
 canonas, non raro ad Solæcismum confu-
 gisse, ne optimas sententias Grammatica
 superstitione debilitare cogerentur. Quid
 enim esse aliud Virgilio schemata, quibus
 obtinuit, ut Grammaticorum malleus di-
 ceretur? Nomina varia, rem unam & ean-
 dem. Scilicet ostenderent Grammaticum
 aliquem, qui latine & eleganter scriberet:
 omnes ad unum aridos esse, jejunos, ine-
 ptos, exsuccos, vix ossibus hære. Ipsi se
 igitur prius accusatores in ordinem redige-
 rent, tum de aliis cogitarent. Quamquam
 se quidem libenter in exilium abiturum, si
 possit aliquando inter homines istos ad con-
 tentiones natos convenire. Hoc vero quis
 ferre

ferre possit , adversarios suos oppugnationem instituisse , de cuius ratione atque ordine nondum statuere unanimi consensu potuerint ? Alios enim alia præcipere ; quod unus probet , alterum improbare : non esse mirum , si Solæcismo non parcant , qui pugnant secum ipsi . Hic vero tam ingeniosus visus est , ut ipsi illi , qui accusabant , cogitare cœperint , numquid sibi timendum esset , quod reo minime malo periculum creassent .

GRATIARUM ACTIO .

Si quando litterulæ nostræ de fortuna conquestæ sunt , quod minime videretur desiderio respondere , hodie quidem jure ac merito queruntur , quod te nobis , *Præsul Illustrissime ac Reverendissime* , jamdiu optatissimum non sâtis opportuno tempore concefferit . Nec enim aut hujus diei schola ex illis est , quæ principes habentur , aut ipsa scholæ exercitatio auribus tam eruditis ullo modo digna . Sed tamen , ut de nobis ingenuè fateamur , quemcumque tandem adventus hic tuus in diem incidisset ; nihil profecto erat in toto hoc scholarum nostrarum ordine , quod in tantam hanc lucem sine verecundia exponeretur , teque judicem totius Italiæ sapientissimum non formidaret . Ergo quidquid hoc est sive laboris , sive industriæ , exiguum certe quidem , noli præ tua ista singulari

gulari atque recondita eruditione contemne-
re, sed reputa tantam hanc litterariæ glo-
riæ famam, quantam nemo unus post na-
tas litteras vivens obtinuit, ita demum te
beatum efficere posse, si sit cum illa hu-
manitate conjuncta, a qua litteræ ipsæ no-
men adeptæ sunt.

EXERCITATIO IV.

Curas hominum ridere oportet,
sed sapientius, quam Demo-
critus solebat.

P R O O E M I U M.



Uos ferunt fuisse Philosophos,
Democritum & Heraclitum,
ita inter se natura studiisque
diversos, ut alter perpetuo ri-
deret, alter perpetuo quodam
luctu conficeretur. Prodigabat Democritus
in forum ridenti similis, adunco naso,
buccis pæne ad aures diductis; & ut
mercatores offendebat, vel artificem, vel
causidicum, ad singulos, veluti rem no-
vam sibi que lætissimam, risum instaurabat.
Narrabat, quis de magistratu sibi delato?
Ille ridebat. Alius querebatur de repulsa?
Ille ridebat. Erat qui venderet, qui eme-
ret, qui transigeret, testesque in rem suam
appellaret? Ille vero suavissime ridebat.
Deni-

Denique quidquid diceret, quidquid peteret, quidquid interrogaret, omnia promiscue, teque ipsum tamquam scenicum hominem risu excipiebat. Accedebat ex parte altera mœstus & sordidus senex Heraclitus, promissa impexaque barba squalidissimus, obducta fronte, lippis oculis, acutis naribus, distorto ore, temporibus collapsis, genis enectis, qualem prorsus decet esse hominem rebus omnibus illacrimantem. Hunc si quis recreare conatus esset vel ostentatione rerum, vel narratione lætissima, laterem lavabat; quod sibi ad sapientiæ famam æternum squalorem luctumque indixisset. Habetis, Auditores, stultorum par lepidissimum. Non enim video, quemadmodum inter Philosophos isthoc nescio quid hominum numerare possim. Tamen siquod stultitiæ genus ferendum est, & humanæ imbecillitati condonandum, multo malim in nostra civitate Democritos esse, quam Heraclitos. Et si enim tam in adversis rebus ridere vitium est, quam flere in secundis; attamen hoc asperioris naturæ est, neque excusari interpretando potest, nec in hominum societate tolerari. At vero qui sibi imperavit in qualibet fortuna hilariter vivere, & omnes rerum humanarum eventus ridere, nec valde a sapiente distat, & magnum sibi præsidium ad aliorum convictum & benevolentiam comparavit. Si paullum igitur sibi temperet Democritos, si effrenem ridendi licentiam paullulum cohi-

cohibeat, jam noster est, & cum sapientibus sedet. Id totum cujusmodi sit, Auditores, adsumus explicaturi; ea tamen sive lege, sive consuetudine, ut nos pro nostra imbecillitate atque infantia impune ridenda dicamus, vos vero pro vestra bonitate & patientia ne talia quidem rideatis.

S I L V A.

A Nimadvertite argumenti hujus duas esse partes, quarum prima significat, curas fere omnes, quæ ab hominibus suscipiuntur, leves esse ac ritu dignas; altera, non admodum prudenter se gessisse Democritum, quem ferunt humana omnia promiscue risisse.

I. pars. Homines plerumque sunt occupati vel in honoribus comparandis, vel in divitiis congerendis, vel in utroque: at qui honores ac divitiæ non possunt humanum appetitum explere, eique beatitatem impertiri: sunt igitur ridendi tot tantique conatus. Videte hanc in rem Aristotel. l. 1. Ethic. c. 5. & ibi Interpretes, præsertim vero Tarquinius Gallutium.

Civitatis ordines recensebitis, in foro, in curia, in officinis nimio plus occupatos atque intentos, ut bona tam exigua, tam incerta, tam habentibus noxia per fas nefasque sibi parent. Videte hic Juvenalis Satyram X. Ipsos quoque litterarum

rum ac sapientiæ studiosos, eorumque contentiones ad trutinam revocabitis; ostendentes, quam stultum sit diu noctuque impallescere chartis, summumque hujus vitæ bonum valetudinem exsuccæ gloriolæ devovere. Nihil enim fere fit intra modum.

II. pars. Democriti vultum, habitum, mores urbana atque eleganti ethopœja describetis; ut appareat, nulla certa ratione, sed potius levitate, aut etiam fortasse ambitione ductum hominum studia ridere consuevisse.

Quodnam enim judicium de illo ferendum est, qui & possessiones suas deseruit, & oculis se privavit, ut nulla re a cogitando averteretur? Dicetis, hanc ipsam opinionem sapientiæ, quam quærebat, fuisse ridiculam. Nihil enim probari debet, quod nimium sit.

Ostendetis, multa esse in hominum societate, quæ rideri non debent, si modo & ratione consent, Deorum immortalium religiones, artium ac disciplinarum studia, rei familiaris ac publicæ curam, &c.

Denique Democritum, ceterosque ejus mentis Philosophos ob antiquitatis reverentiam per quamdam veluti correctionem excusabitis. Nam cum vellent hominum animos nimis perturbationibus liberare, ad extrema hæc adducere conabantur; non quod id totum fieri posse crederent, quod contendebant, sed ut naturam nimis aberrantem revocarent ac reflecterent.

Ve-

Verumtamen correctionem hanc ita adhibebitis, ut excusare quidem magna nomina videamini, non tamen eorum institutum probare.

AD GRÆCAM

INTERPRETATIONEM.

Veteres scriptores in Democriti Philosophi famam conjurasse videntur. Adeo multa de illo ridicula memoriæ prodiderunt. Ego uni fidem habeo Diogeni Laertio, qui & gravis Historicus est, & hoc sibi argumentum sumsit, ut Philosophorum Vitas moresque describeret. Alii mirabilia magis, quam vera consectantur: itaque etiam contraria dicunt. Valerius Maximus l. 8. c. 7. scribit, eum bona sua patriæ donasse, Cicero de fin. l. 5. c. 29. deseruisse: qua etiam de causâ stultitiæ insimulatur a Lactantio l. 3. c. 23. Revera neque donavit, neque deseruit, sed in pecuniam redacta peregrinando absumsit. In quibusdam Græcis monumentis apud Gellium l. 10. c. 17. habetur, illum se oculis sua sponte privasse, ne unquam videndi illecebris a contemplando avocaretur. Id ipsum confirmat Laberius Poeta, & Tertullianus in Apologetico c. 46. sed alter causam assert, quod improborum fortunas aspicere nolle; alter, quod mulieres sine cupiditate intueri non pos-

V fer.

set. *Credat Judæus Apella*. Perpetuo ridens inducitur a Seneca de tranq. c. 15. & ab aliis antitheta quærentibus. Sic enim præclare opponitur Heraclito sine intermissione ploranti. Ex Philosopho Mimus. Vitæ genus tam varium varia item consecuta est opinio mortis. Senio defecit, cum annos vixisset plusquam centum: sed magis ex dignitate tanti viri Athenæo l. 2. *de vit.* visum est, si persuadere posteritati posset, ipsum sibi mortem ultro consciville. Quidam tradit *ὁ δαιμόνιος* confectum objisse; haud alio sane fundamento, quam quod a tanta paupertate, in quam inciderat, pediculi abesse non possent. Miror equidem, neminem unum ex ejus discipulis inveniri, qui magistri nomen ab injuria vindiceret.

GRATIARUM ACTIO.

SI quis Democritus tantam hanc gravissimorum viro-
rum, & nobilium adolescentum frequentiam videret, statim a meridie uno in loco, eo-
que pro ratione temporis valde angusto coactam; assidens-
que paullum, audiret de Latinis Græcis-
que litterulis, de syllabis, de apicibus cer-
tamen institui, quot quantosque cachin-
nos tolleret, quam solutos, quam effu-
sos! Mira enimvero est patientia vestra,
quæ hujusmodi tædia ad duas pæne horas
producta, qualibet hebdomada ferre pot-
est;

est; nosque etiam excitare cunctantes ad
 segnes, ut hoc vobis negotii afferamus.
 In quo cum reputo nihil vos spectare al-
 liud, quam quod e re nostra sit, incredi-
 bili quadam verecundia perfundor; maxi-
 meque velim meum erga vos animum,
 voluntatem, studium, observantiam sin-
 gulari aliquo verborum genere declarare.
 At in hac officii parte tam difficili si va-
 lerem, jam non vestra institutione indi-
 gerem: nisi vero qui aquilam pingere re-
 cte novit, is ad muscam doctore indiget.
 Illi igitur hæc rideant, qui se sibi dum-
 taxat natos existimant; nec nisi privato-
 rum commodorum rationem habent: vos
 nobis semper in magna admiratione eritis,
 qui rerum vestrarum fere obliti, nihil agi-
 tis, nihilque cogitatis nisi nostra causa.
 Idque eo magis mirum est, quod benefi-
 cia vestra in illos confertis, qui non so-
 lum referre nullam gratiam possunt, sed
 ne ipsum quidem beneficiorum pondus ex
 toto cognoscere.



EXERCITATIO V.

Qui recte paret, dignus est
ut imperet.

P R O O E M I U M.



Uod de bello dici solet, nondum expertis iucundum esse, id de imperio dici debet. Et si enim imperare pulcherrima in speciem & suavissima res est, in his tamen veluti floribus multiplex latet anguis, idemque ejusmodi, ut non modo corpus, sed animum in primis fauciet, partem hominis præstantissimam. Ingredere magnificas illas aedes. Videsne stantes in limine armatas copias? Non tam ad populi, quam ad ipsius domini terrorem aluntur. *Multos enim timeat, qui a multis timetur, necesse est.* Agedum profer pedem, tolle oculos. Delectantne te lacunaria illa argento auroque distincta? At inde in ejus beati cervices gladii pendent filo tenuissimo illigati, quemadmodum Damocli ostendit Dionysius. Circumfer te undique. Placetne folium nobilissimis servis ad nutum & obsequium utrinque stipatum? At multi in eo Reges ab iis ipsis trucidati sunt, quorum opera utebantur; atque adeo ab illis, quos sibi unice ad præsidium consti-

constitutos, corporis custodes appellabant. Quid mihi mensas apparatusissimas innuis? Ita quotidie multi veneno interficiuntur, ut jam mensa, crux Regum appellari possit. Quid dominatus majestatem, quid chlamydem, quid sceptrum, quid coronam ostendis? Nempe ostendis onus: tanto enim ista graviora sunt, tanto curæ molestiæque pleniora, quanto pluribus gemmis ornata. Noli mihi ærarium, noli mihi fiscum indicare. Nihil potest esse hujusmodi sine magna invidia & populi imprecationibus. Sed jam per Deos immortales exeamus; omnia hic suspicionis plena, intuta omnia; non amicitiae, non fidei, non benevolentiae locus. In aula sumus, & intelligenti satis est. Sed numquam tamen satis ambitioso, qui sua cupiditate tamquam nocte aliqua circumfusus, nihil tale videt, aut omnia videt viro illo colorato, quo crudelissimus Princeps suppliciis ipsis humano sanguine foeditissimis pulchritudinem aliquam comparabat. Nihil vero tam miserum est, ut ex omni parte circumspectum, non aliquam bonitatis speciem præferat, movea que desiderium sui. Ergo parcamus homini imperandi cupido, vel quia sua est & imperio felicitas, vel quia videtur esse. Id unum ab illo contendamus, ut hæc ipsa cupiditas virtutis administra sit, hoc est ita sibi persuadeat, privatum hominem tum demum imperio dignum esse, si recte pareat. Si hac ad imperandum nitetur via, nos illi ultro impe-

rium concedemus, rei que publicæ egregie consultum per ambitionem existimabimus. Id dum fusius ostendimus, adeste humaniter, totamque hanc exercitationem ita temperate, ut nobis quotidie magis magisque placeat, talibus dominis obtemperare.

S I L V A.

Plato lib. 6. de leg. & Aristoteles lib. Polit. 3. non de suo modo sensu, sed ex communi hominum opinione pro-verbio firmata pronunciant, vix fieri posse, ut aliquis recte imperet, qui non antea paruerit. *οὐ γὰρ ἔστιν ὃς ἀρχεῖν μὴ ἀρχόμενος.* Id vobis tamquam exordii loco ponetis, ut propositam a me sententiam oratiuncula explicetis. Utrumque enim conjunxit Cicero, cum dixit initio lib. 3. de leg. *Et qui bene imperat, paruerit aliquando necesse est; & qui modeste parer, videtur qui aliquando imperet, dignus esse.*

Dicetis igitur hoc maxime locum habere in liberis civitatibus, in quibus ex ipsa civium ordine summi magistratus eliguntur; iidemque homines modo imperant, modo parent.

Explicabitis recte parendi difficultates; quas qui expertus est, & superavit, magnum dedit virtutis ac prudentiæ testimonium.

Dicetis terminos esse aliquos; intra quos impe-

Imperia in liberum hominem contineri debeant ; quos quidem terminos nemo melius cognoscere potest , quam qui privatam fortunam belle ac modeste tulit.

A contrariis quoque argumenta ducetis , ostendentes , quam stolide , atque impotenter rempublicam administrent , qui cum essent privati , magistratibus ipsis imperare voluerunt , & cum summa rerum omnium licentia vivere .

Denique quascumque obedientiae laudes invenietis , huc trahi recte poterunt .

AD GRÆCAM

INTERPRETATIONEM.

*Responsio Jugurthæ nomine ad Micipsæ orationem , quæ est apud Sallustium
De Bel. Jugurt. c. 10.*

NE dii siverint , Rex , ut Numidiæ immaturè adeo rapiaris . Etsi enim satis gloriæ vixisti ; & tibi etiam fortasse satis , qua es moderatione rerumque humanarum satietate ; nobis quidem certe nondum satis . Tamen quod caveas in posterum rebus tuis , veritus multo ante , quæ aliquando naturæ necessitate futura sunt , facis tu quidem pro tua ista ubique commendata sapientia . Mihi sane invi-

sum regni nomen, si tua funera consequi debet. Præterquamquod innutritus ego bellicis laboribus ac venatione, quomodo possum ad civilem rerum curam & urbanam quietem animum convertere? Adherbali & Hiempſali facile erit patris virtutes imitari, quibus licuit manentibus domi proxime intueri. Quod si me tamen jubeas uti beneficio tuo, & in partem venire summæ dignitatis, id efficiam diligentissime, ut videaris potius laboris aliquid imminuisse filiis, quam regni. Numquam excidet animo meritorum tuorum recordatio; eamque prædicabo & habebo nomini tuo gratiam, quam tibi referre non potero. Dic mihi vel regnandi, vel paren- di leges; impera quod videtur, aut vera; omnia non minore fide, quam tibi, præstabo memoriæ tuæ. Quod & faciam, diis bene juvantibus; & eo libentius, quo tardius.

GRATIARUM ACTIO.

Q Uemadmodum ad recte parendum obsequio & solertia opus est, ita ad imperandum prudentia & æquitate. Nihil porro in humana societate miserius excogitari potest, quam impotens dominus. Siquidem servus moneri, castigari, dimitti potest, dominum pati necesse est. Quorsum hæc, Auditores? Scilicet eo denique ventum est, ut grates postuletis; mul-

multumque veremur, nequid nobis supra virium nostrarum modum imponatur: non quod iniquius aliquid a vobis esse possit, sed quod pro insigni quadam bonitate naturæ de meritorum vestrorum magnitudine cogitare nolitis; quæ, ut nos quidem existimamus, nulla verborum copia æquari potest. Ergo date hoc observantiæ in vos nostræ, ut non parere aliquando liceat: ex quo potissimum intelligetis, hominibus vos de vestra dignitate sollicitis imperare. In reliquis pro vestra auctoritate jubete: nam ita nobis in animum induximus, huic in primis ætati obedientiam convenire, & per eam unam fieri posse, ut cum vos ad majora progressi eritis, non desint ex nobis, qui loca ista vestra occupare possint.

EXERCITATIO VI.

Populo imponere facile est.

PROOEMIUM.



Quando umquam lætus & alacer ad dicendum, aut scribendum accessi, quod ipsa me rei propositæ facilitas ceteroquin timidum ac refugientem invitet, id certe mihi hodie contigit, cum de hominum fraudibus & fallaciis commentari aliqua jussus sum, & in conspectum

clum vestrum asferre. Neque enim putavi in eo mihi deesse orationem posse, quod ita commune omnibus esset, ita vetus, ita frequens, ita privatim publiceque usurpatum, ut quocumque me verterem, quidquid aspicerem, quidquid audirem, vel totum ex mendacio constaret, vel mendacii partem maximam complecteretur. Curia, forum, judicia, compita omnia, summi infimique cives, quantam, bone Deus, quamque perspicuam civilium negotiorum non imperito dicendi copiam suppeditant! Sed ne a schola discedamus, quid est in poetica facultate non fallacissimum, quæ vel ipsum nomen a fingendo ducit? Quid nostra hæc, cujus in præsentia periculum facimus? Nonne ita in fallendo est, ut præceptores ante Aristotelem omnes nullam dicendi artem, nisi ad concitandos auditorum animos tradiderint; Aristoteles vero ipse, qui primus probandi locos excogitavit atque edidit, non tamen vera, sed vero similia ab oratore requirat? Quid plura? Ipsi illi barbari Philosophi, qui se gravissimo nomine veritatis indagatores appellant, multis animi motibus abrepti, & partium studiis veluti milites auctorati fallacissime disputant; eoque se feliciores arbitrantur, quo plures adolescentes magistrorum fallacias in ipsam posteritatem propagaturos inducere possunt. Neque vero si quis est ita solers & acutus, ut sibi nolit imponi, fraudum isti ac fallaciarum artifices quippiam de solita

con-

contentione remittunt. Satis illis est, si plures in errorem inducant; populo canunt, non Platoni, nec hominum de se judicia ponderant, sed numerant. Id utrum recte faciant, nolo in presenti quærere; sed tamen quandoquidem faciunt, eorum artes explorare lubet, ut quantum quidem ætatis hujus nostræ imbecillitas patitur, populares infidias nobis caveamus. In quo primum facilitate vestra indigemus, deinde vero sapientia; ut cum patienter tuleritis nugas nostras, ipsi talia reponatis, qualia argumenti gravitas postulare videtur. Id a vobis præsertim speramus, N N N N, quos ex inopinato sedentes hoc in loco conspiciamus. Neque enim, opinor, tantam hanc incommodissimi temporis molestiam animo tam æquo ferretis, nisi magno quodam erga litteras amore, & aliqua etiam erga nos benevolentia duceremini.

S I L V A.

STilum vestrum in eos expedire debetis, qui se populo venditant, idque laborant, ut sapientes habeantur, quamvis nullam operam nullumque laborem impenderit in comparanda sapientia.

Initio quidem explicabitis, quid nomine populi intelligatis; quæ vox non plebem dumtaxat comprehendit, sed nobiles promiscue atque ignobiles, tum viros quoque principes, si sint indocti.

Tur.

Turba hæc magis specie rerum ducitur, quam rebus ipsis. Itaque mendacia ingeniose colorata plus valent apud illam, quam simplex ac nuda veritas: Medicum probat garrulum, Philosophum contentiosum, Causidicum impudentem, Militem jactabundum; quo quidem genere hominum quid frequentius?

Nihil facilius, quam in eos cœtus cooptari, quas litterarias Academias vocant. Ubi quis tamen eo loco sedet, tamquam ita demum Musis initiatus, cum litteratis numeratur. Advenit solemnis recitationis dies, tota urbe discurritur; vix unus aut alter de suo: hoc tamen populo satis.

Quid si quis libellos aliquot sibi compareret? quid si pauca quædam magnorum virorum nomina memoriæ mandet? quid si publicas acroases frequentet, in iisque caput belle moveat? Apollo est.

Sed inter omnia hujusmodi fallaciarum instrumenta nullum potentius est opibus, quibus & fama sapientiæ; & laudatores, & testes facili negotio comparantur. &c.

A D G R Æ C A M

INTERPRETATIONEM.

De simulationis et fallacie bonis.

FAllendi ars vetustissima est; & ex quo virtus cœpit esse, virtutis simulatio fuit.

fuit. Qua de re adeo nihil querendum
 judico, ut etiam miseramejus civitatis con-
 ditionem putem, quæ istiusmodi vitio ca-
 ret. Apparet enim in nullo pretio veram
 laudem esse, ubi nemo est, qui eam fal-
 laciter imitando simulet. Illi tantum nu-
 mi adulterari solent, quibus publica forma
 & auctoritas est. Miror equidem, Juve-
 nalem tantopere doluisse Sat. 2. quod es-
 sent Romæ qui *Curios simularent*, & *bac-
 chanalia viverent*. Quam enim hæc si-
 gnificationem habebant, nisi probitatem
 & honestatem in ea gentium omnium
 patria tanti fieri, ut illi etiam, qui ad
 vitia profligatissimi erant, tamen se Cu-
 riorum similes videri mallent? Non tan-
 ta est virtutis ostendendæ cura, ubi vi-
 tia valent & dominantur. Sed ne a li-
 terulis nostris longius abeamus, vix dici
 potest, quanta ego lætitia exultem, cum
 video in aliqua civitate opifices quoque ac
 fellularios scientiæ opinionem aucupari.
 Neque enim se tamquam scientes vendita-
 rent indocti, nisi crederent in honore es-
 se, qui vere sciunt. Quoties tibi se tam-
 quam magnos historicos jactabunt, quos
 transalpinæ ephemerides erudierunt? At-
 tamen patere. Quoties Gellium cum Ci-
 cerone component; quoties de Sallustio
 tamquam de Poeta loquentur; quoties tem-
 pora temporibus, nomina nominibus mu-
 rabunt, *delphinum silvis appingentos, flucti-
 bus aprum*? Attamen patere. Sed vide,
 quam te velim ad patientiam compara-
 tum.

tum . Tum quoque illos sine fastidio aspicere debes , cum viros principes inducunt , suaque illis mendacia venditant . Grave est hoc , nec facile ferendum ; verum tamen ita fiet , ut tuam tibi fortunam gratulere , regiasque opes contempnas , quæ talibus infidiis obnoxie sunt .

GRATIARUM ACTIO.

Multi se vobis bene gratos carmine præbent ;

Sed mirum si quis vera Poeta canit .

Qui nullas vestro reddit pro munere grates ,
Scilicet is pretium muneris omne videt .

EXERCITATIO VII.

Jucundius est reprehendere , quam
laudare ; sed tutius laudare ,
quam reprehendere .

P R O O E M I U M



Uidam sunt ingenio tam difficili & acerbo , ut omnes hominum actiones agre ferentes , quidquid vident , quidquid audiunt , promiscue reprehendant : rursus alii tam bono ac facili , ut omnia ad laudem convertant .
Utrum-

Utrumque mea quidem sententia malum : nani neque reprehensore vitia carere debent , neque virtus laudatore ; ut æqui & iniqui discrimina appareant , habeantque homines officii studiosi atque honestatis , quid sequantur , ac fugiant . Pejus tamen illud ; quod a reprehensione proficiscitur : nam laudare omnia levitatis est ; at reprehendere intolerandæ cujusdam malitiæ , quæ odia inter homines ferit , eorumque societatem & communionem , alterum in alterum armando , dissolvit . Ac ne filere quidem prorsus laudabile est : oportet enim hominem ratione & voce præditum non quasi mutum animal vivere , sed de rebus humanis judicare , colloqui cum altero , turpia & honesta perpendere , probare , improbare . Qui medium nosse ac tenere potest , is mihi est sapientissimus : proximum locum tenet , qui minimum peccat , vel in ea parte peccat , quæ minus periculi habet . In hanc rem totam quædam de more afferimus , sed nihil prorsus aut vestro judicio , aut loco dignum . Et multi quidem se modestiæ causa initio statim abjiciunt , ut in ipsa exercitatione tanto magis excellent : nos hoc uno fortasse laudandi erimus , quod de nostra infirmitate vere ingenuæque fatemur .

S I L V A .

Duplex erit orationis pars .
Ad primam hæc pertinent . Quia qui repre-

reprehendit, videtur esse quodammodo iudex ejus, qui reprehenditur.

Secundo, quia ex vitiis ejus, qui reprehenditur, magis apparet præstantia & virtus illius, qui reprehendit.

Tertio, quia qui reprehendit, sibi videtur acutus & perspicax, atque adeo etiam urbanus, siquidem possit cum aliquo sale aliena peccata notare.

Quarto, quia reprehensor sibi videtur rem gratam audientibus facere; quippe omnes libentius reprehensionem aliorum, quam laudes excipiunt.

Ad secundam hæc. Quia qui reprehendunt, inimicos, qui laudant, amicos sibi parant. Quo referri Terentianum illud poterit Andr. 1. 1. 41. *Obsequium amicos, veritas odium parit.*

Secundo, quia laudatores facile inveniunt, qui seipsos quoque laudent, reprehensores frequenter in reprehensionem incidunt.

Tertio, quia qui reprehendit, facile modum excedit; qui laudat, non item, aut si excedit, nullam injuriam facit.

Quarto, quia neminem umquam laudasse poenituit; reprehendisse, permultos. Hic commemorare poteritis infelices eorum exitus, qui se satyris scribendis dederunt: & ne longius abeat, infandam Ciceronis necem referetis, quam certe sibi ipse per suas Philippicas peperit. &c.

AD GRÆCAM

INTERPRETATIONEM.

Epistola C. Verris, qua Ciceronem ab instituta in se accusatione deterret.

SI eo cœpisti, M. Tulli, in foro & iudiciis tanta contentione versari, ut te levium adolescentum & quadruplatorum agmini nunc demum conjungeres, vereor, ne non satis tutam vitæ rationem ad laudem & gloriam, ac ne ad opes quidem institueris. Ad hominum certe benevolentiam nihil importunius. Quo est mirandum magis, te petitionis tuæ tempore ad accusandum descendere, & a Cornelia gente invisæ admodum rei auspicia capere. Ædilitatem petis; comitia imminet. Itane prensas? Itane Romanos cives tibi concilias? Nempe Siculi præsto erunt; Siculi pro Cicerone suffragia ferent; aderunt tibi gratia & auctoritate Siculi. O te rerum omnium ignarum, si necessitudinis vinculo nescio quo seditiosis provinciæ ingeniis obstrictus, non iis modo, quibuscum eadem in urbe, in foro, in curia vivendum, sed fortunis etiam tuis bellum indicis! Noli, quæso, M. Tulli, susceptum ambitionis cursum tute tibi intervertere, ut provinciarum audaciam foveas ad Prætores

X accu-

accusandos plus nimio effusam . Jamvero si principes civitatis ad dicendum idonei sociorum querelas temere excipiant , & in judicium deferant , profecto neque Curiis , neque Catonibus salva res erit . Sunt enim adhuc libertatis memores , verbo socii , revera populi Romani hostes ; cumque ipsi per se non possint , id contendunt , ut nos per nos ipsos intestino bello conficiant . Vide ergo etiam atque etiam , diligenterque considera , utrum alienis morem geras , an tuis ; Siculis ne , an Verri . Aliunde quid speres nec scio , nec ut sciam , valde laboro . Ego certe , si evadere per te potero , id efficiam gentis opibus , amicorum gratia , & quod his temporibus caput est , pecuniarum largitione , ut in Comitibus tuis nihilo plus a Quinto Fratre desideres . Novi equidem magnanimi viri ingenium , qui malis omnibus Reip. carere honoribus , quam ulla re niti præter virtutem & honestatem . Sed tamen ut libere fateamur quod res est , prisca illa prensandi simplicitas , & frigida majorum ambitio in Campo obsolescunt ; & ipsi illi integerrimi libertatis auctores , Bruti ac Valerii , si in hæc tempora incidissent , sæculi moribus communi-que consuetudini intervirent . Cum enim hæc una ad Præturas & Consulatus via reliqua sit , operæ pretium est vel invitos huc pertrahi bonos cives , ut quoquo modo ab improbis Reip. administrationem vindicent . Siqua ergo in nobis præsidia esse putas ad multorum tibi studia & voluntates conciliandas,

andas, ea potes hoc tempore demereri omnia. Sive enim delationem Cæcilio concedas; sive iudices ex composito rejicias; sive demum in sequentem annum causam produci ultro citroque disputando patiaris, & amice facies, & sine ulla clientum suspicione facies. Interim vide, quam de animo tuo nihil dubitem, qui statim fiscos tibi aliquot recte obsignatos per puerum mitto, quos Comitiorum nomine distribuas. Sic ea tibi adjumento futura sunt, quibus si uti nolis, oppugnabere. Itaque consule non mihi modo, sed tibi etiam multo magis, rebusque tuis. Mihi siquidem in hoc iudicio nihil te amico periculi comparatur, te inimico parum. Satis enim intelligis pro tua sapientia, & rerum forensium usu, quid nobis præsidii in Hortensio, quid in Metellis, aliisque summa auctoritate viris, quid in civitatibus Siciliae non unis, quid denique in causa ipsa futurum sit. Sed jam familiaris epistolæ modum pæne excessi. Vale; & reputa, mihi quidem, ut omnia cedant improspere, nihil impendere gravius exilio: at vero eas esse nostræ familiæ opes, quibus & amicorum beneficiis, & inimicorum injuriis paria rependi possint.

GRATIARUM ACTIO.

Non nos pro vestro referemus munere verba.
In tacito melius gratia corde sedet.

EXERCITATIO VIII.

Litterati solent esse mites.

PROOEMIUM.



Qui de vitiis ac virtutibus crassius judicant, nec inter lenitatem, ac lentitudinem satis distinguunt, putant sapientem hominem omni prorsus ira vacare oportere, omnesque injurias utcumque illatas fatue stolidęque tolerare. Hinc non desuerunt, qui Zenonem Eleatem valde reprehenderent, quod conviciis petitus non conticuisset; quasi vero philosophica præcepta, non animi perturbationes, sed animum ipsum retunderent, & ad servilem patientiam abjicerent. At ille, quomodo, inquit, laudes sentiam, si convicia non sensero? Non igitur infitos naturæ ignes virtus extinguit, sed moderatur,isque demum mansuetus ac mitis est, qui ab omni tumultu liber eatenus irascitur, quatenus ratio postulat. Habetis, Auditores, quid revera sentiamus, cum litteratis hominibus lenitatem tribuimus, qui si omni motu iræ carerent, & *avaiōv* essent, ne litterati quidem appellari possent; quippe illo instrumento spoliati, quo ingenium acuitur & accen-

accenditur. Res est hujusmodi, ut non facile ab adolescente tractari possit: me tamen ideo conari juvat, tantumque discrimen subire, quod cogitarim non posse vos, qui tam multa sapientia litterisque floretis, mecum agere nisi mitissime.

SILVA.

ARgumentum hoc ejusmodi est, ut primum more & exemplis, deinde ratione explicari debeat.

Videmus igitur litteratorum ingenia lenissima esse, & ad timendum potius, quam ad audendum prona. Multa hoc in genere de Cicerone ac Demosthene narrantur, quæ eos ab armorum strepitu valde alienos fuisse significant, quamvis uterque in acie fuerit, alter vero etiam exercitum duxerit, seque Imperatorem appellandum curaverit.

Ratio ea videtur esse, quod litterarum studia molliunt animos, & humanitatis memores faciunt.

Juvat ad iram moderandam, ex Philosophia didicisse, quam gravis morbus sit; quantopere ipsi noceat, in quo est; quam hominem ratione præditum dedeceat, ferisque similem reddat, &c.

Accedit vitæ genus, quod litterati ducere solent, umbratile ac remotum a turbis, quæ homines ad iram inclinant.

Hinc puellas litterarum præsidēs fecit an-

tiquitas , easque in altissimo jugo colloca-
vit procul a rerum humanarum curis &
solicitudinibus ; ex quibus fere *surgit lutea-
bilis* . &c.

A D G R Æ C A M I N T E R P R E T A T I O N E M .

Vetus est barbarorum accusatio, Musarum studia animum frangere . Hinc narrat Procopius , Gothos procures nullo pacto permittere voluisse , ut Amalasuntha eorum Regina filium Athalaricum litteris imbueret . Quid vero Gothos appello ? Licinius ipse Romanorum Imperator adeo litteris hac una de causa infestus fuit , ut eas virus ac pestem publicam appellaret . Horum non dicam hominum , sed brutorum stultitiam satis arguit Julius Cæsar . Quis illo fortior , quis item ex omni antiquitate doctior ? Nemo plura bella gessit , nemo plures victorias retulit , nemo majus imperium occupavit . Idem tamen cum hæc ageret , suos illos commentarios scribebat , quibus nihil est in tota latinitate elegantius . Quid Cicero , alter , ut ita dicam , litterarum Reipublicæ Consul ? Nonne is quoque & Pompeji castra sequutus est , & ipse exercitum duxit , & Imperator est appellatus ? Ergo litteræ cautos homines faciunt non timidos , lenes non ignavos .

G R A .

GRATIARUM ACTIO.

R Eddimus en nullas veltro pro munere
grates;
Qui poterit nobis parcere, mitis erit.

EXERCITATIO IX.

Magnum est in paupertate ad bonas artes acquirendas profittendasque impedimentum.

PROOEMIUM.



Nihil est in orbe terrarum, quod pluribus conviciis ac maledictis petatur, quam pecunia; nihil item quod magis anxie avidaque comparetur. Si Senecam audis, pecunia pestis est, curarum parens & origo, vitiorum administra, satelles maiorum omnium, hominibus in pœnam concessa, ut sese ipsi non habentes habentesque excruciant. Interim tamen nemo Seneca ditior: prædia rustica, & urbana supra modum privatæ fortunæ; equi, servi, statuae, horti, vis auri & argenti tanta, quanta Imperatorem, orbis terrarum dominum, movere possit, & ad prædam allicere. In hac rerum omnium copia pau-

pertatem laudat , quæ animi libera , quæ
secura & expedita , quæ paucis contenta ,
quæ ad philosophandum aptissima. Dii bo-
ni ! Tune is , Seneca , esses ; aut omnino
Senecam esse homines scirent ; nisi per com-
moda ista ad philosophiam pervenisses ,
tuamque sapientiam divitiarum splendore
illustrasses ? Philosophiam dico ; non Cy-
nicam illam in reprehendendo positam , ce-
tera inertem , fordidam , dolioque & Dio-
gene dignam ; uno verbo Senecæ Philoso-
phiam , quæ & aulæ par sit , & convivii
interfit , & jocis delectetur , & vivere ho-
mines cum hominibus sinat . Huc qui con-
tendit , næ ille multis ab ipsa pueritia in-
diget , in primis vero schola & magistro ,
quæ maximo fere impendio constant . Fac
porro te felicissimo ingenio præditum per
omnia paupertatis incommoda evasisse , &
ad aliquam cognitionem , diis hominibus-
que juvantibus , devenisse . Quid tum in-
de ? Quot quantisque fortunæ adjumentis
opus est , quibus amicis ac patronis , quan-
to otio , quam multis libris , ut aliorum ju-
dicio satisfacias , eumque te omnibus pro-
bes , quem esse revera sentis ? Toga ipsa
suas partes agit , annulus , ædes , comita-
tus ; quibus deficientibus , jacere ingenia
vel laureata necesse est , molisque ac taber-
nis operam dare . Nemo Medicum advocat ,
cui trita lacerna sit ; nemo litem ad Caus-
fidicum defert , cujus facundiam non am-
pla domus opibusque referta commendat .
Bene ac feliciter in hoc argumento Saty-
rico-

ricorum princeps Juvenalis versatus est, cuius ingenium placet nobis hodierna exercitatione imitari; non quod similia fieri posse putemus præsertim ab adolescentibus, sed ut rem natura sua veram, sæculisque omnibus exploratam magis magisque confirmari ætate moribusque nostris ostendamus.

S I L V A .

DUplex difficultatis genus perpendere debetis, quod pauperi impedimento est, ne possit emergere, & in hoc quasi theatro litterarum suas partes agere.

Prima difficultas est in litteris ac disciplinis acquirendis, eaque primam orationum vestrarum partem constituet; altera in profitendis, quæ partis alterius argumentum erit.

Pars I. Hic explicare debetis, quanti prima institutio constet: nam pueri, quos proficere in litteris volumus, domo ablegandi sunt; & in iis locis qualibet impensa collocandi, in quibus neque optimorum magistrorum copia desit, neque frequens exercitatio, neque æmulatio, &c.

Tum paullatim progressi ad studia, quæ majora dicuntur, ostendetis, quibus facultatibus opus sit, ut quis librorum suppellectilem sibi comparet, ut in celeberrimis Academiis præstantes viros audiat, ut publicas exercitationes de more habeat, iis
que

que titulis ornetur, quos majores nostri sapientissime instituerunt, ut doctos ab indoctis etiam vulgus distinguere posset.

Ex his & similibus recte expositis apparebit, quantum sit ad bonas artes acquirendas in paupertate impedimenti.

Pars II. Sed fac aliquem acquisivisse: cui quæso bono erunt? sibi uni sapiat necesse est, suæque in umbra vivat, qui opibus caret. Nam ne ad eos quidem gradus, quos Sapientes occupant, vel occupare debent, nisi per numos ascendi potest. Hic vero cavere diligenter, ne quid nimis odiosum attingatis.

Quid si emittere lucubrationes suas velit, & hominum judicia subire? Num ad typographum accedere potest sine pecunia?

At enim vel Medicinam facere, vel in causis judiciisque versari poterit, unde opes comparantur. Ita videlicet, si quis vellet aut Medico uti pannofo, aut Causfidico.

Neque vero hoc ad sæculi mores referendum; quæ communis quidem, sed vetus & vana querela est: cujus rei vobis argumento erit Satyra Juvenalis vii. Quippe ipsa rerum natura ita ferre solet, ut cui ad vitam commode ducendam necessaria defunt, is animo depressus atque abjectus, nihil eximium proferre possit.

Artes aluntur laude; at paupertas ridiculos homines facit. &c.

AD

AD GRÆCAM INTERPRETATIONEM.

SI felicitas venalis esset, nemo nisi dives feliciter viveret. Quamquam divites fere omnes ita sunt avari, ut ne ipsam quidem felicitatem emturi videantur, si emi pecunia possit. Itaque sumus omnes infelices; pauper laborat, ut aliquas opes acquirat, dives ut plures; ille nequit uti, hic uti renuit. Et hujus quidem major calamitas: neque enim mirum est pauperem appetere pecuniam, qua caret, quemadmodum non est mirum eum sitire, qui nondum bibit. At divitem inhiare pecuniæ, ejusque cupiditate contabescere, hoc vero quid est aliud, quam illum, qui immodice bibit, adhuc sitire, nullaque ratione expleri posse? Sitis hujusmodi morbus est, & quidem insanabilis, quia cupiditas superfluatorum infinita est. Paupertas si morbus est, facile sanatur; quia necessaria pauca sunt & parabilia.

GRATIARUM ACTIO.

Reddere pauperie prohibemur munera vobis.
Sic ea pauperibus, divitibusque nocet.

EXER.

EXERCITATIO X.

Litteratus homo non debet
latere.

PROOEMIUM.



Disciplinarum & artium studium ita cum famæ studio conjunctum est, ut nemo neque nostra, neque majorum, neque ulla sæculorum memoria inventus sit, qui cum esset excellenti virtute præditus, prædicationem nobilitatemque contemneret. Ac si quis forte modestiæ simulatione lucem splendoremque fugit, nobisque persuadere conatur, satis se multa scire, sed hominum judicia famamque despiciere; hunc scitote ignaviæ morem esse, ut falsam quamdam moderationis speciem comminiscatur, qua se primum tegat adversus reprehensionem, deinde etiam, si fieri possit, nova ingenia & industria in invidiam adducat. Scilicet ubi quis in animum induxit pigram & desidem vitam agere, nihil est reliquum nisi ut vires ingenii omnes, quas cumque habet, in id conferat, ut ejus vitii notam effugiat, in quo est: id autem facere commodius nequit, quam si ad proximam virtutem confugiat, ex eaque sibi personam adum-

adumbret, quæ minus acutos plebeculæ oculos eludat. Hæc fere illa modestia est, quam quidam in litteris jactant, non sibi tantum, aut privato nomine improbi, sed ipsi rerum naturæ injuriosi, quæ sensum hunc laudis & gloriæ præclare agentibus indidit, ut si cetera diligentiae præmia aliquando desint, hoc tamen non assumptum aut adventitium, sed innatum atque inditum perpetuo illam comitetur. Hoc illi tam insignæ bonum prava opinione corrumpunt; rati, se industriam tollere posse, si tam certum probatumque industriæ incitamentum suo judicio sustulerint. Quod si quis forte non nihil valet, & tamen revera ita sentit, hic quidem non improbus est, sed tamen stultus. Sapientia, inquit, seipsa contenta est; splendet sibi lumine suo; non debet ex ore vulgi pendere. Egregie. Tu igitur in tuis latebris ac silentio sapias. At quo teste? cui bono? quam in rem? Hujusmodi nempe sunt avarorum pecuniæ, quæ tam desunt, si adsint; quam si non adsint. Quis mihi lyram laudet; quæ semper taceat? quis arcum, qui numquam tendatur? quis ratem, quæ navalibus nondum exierit? Tute tibi habemus mutum hoc sive scientiæ, sive sapientiæ genus: Sed interim noli mirari, quod nos non tam subtilis ingenii homines hoc, quidquid est, inertiam appellemus. Intellegitis, Auditores, quibuscum nobis præsentis exercitatione futura res sit; nec vero umquam tantopere de nostra infantia dolui-

doluimus , quam hoc tempore dolemus , quo tenebriones isti ignaviæ patroni con-
ficiendi essent . Agenius , pugnabimus ,
contendemus viribus omnibus ; ac si nihil
aliud , hoc certe efficiemus , ut cogno-
scatis , quam vehementi laudis studio du-
camur , qui ne has quidem lucubration-
eulas latere volumus .

S I L V A .

Vulgatum est argumentum , quod mul-
tis rationibus firmari potest , sed quæ
sequuntur , potissimæ sunt .

Prima , quia litteræ debent perficere na-
turam hominis , non corrumpere ; cor-
rumperent autem , si solitariam facerent ;
quia homo natura sua societatem amat .

II. Nullus homo sibi soli natus est , er-
go multo minus litteratus homo , qui quan-
to pluribus naturæ beneficiis ornatus est ,
tanto magis debet humanæ societati prod-
esse .

III. Hominibus natura sermonem de-
dit , ut inter se colloquerentur , & animi
fensa ad commune bonum inter se con-
ferrent . Ergo litteratus homo , qui opti-
ma cogitat , & cogitata optime explicat ,
non debet mutarum animantium more la-
tere .

IV. Ipsa litterarum doctrinæque natura
abhorret a latebris , lucemque poscit . Qua-
propter Varro apud Cicer. Acad. 1. c. 1.
ait ,

ait, *Intemperantis esse scribere, quod occultari velis.*

At enim in alto montis vertice Musarum domicilium sapientissimi homines, litterarum parentes, collocarunt. Scilicet significarunt, hominis litterati vitam non esse valde negotiosam, non tamen solitariam: neque enim singulas Musas in singulis montibus statuerunt, sed omnes simul cum Gratiis & Apolline, & magna præterea illorum frequentia, qui in eam civitatem quotidie contenderent.

V. Litteratus homo non potest excellere si careat æmulis, multo vero minus si careat amicis; nam eum & excitari aliquando necesse est, & moneri, & provocari, &c. Ergo ejus vita non debet esse solitaria.

Ultimo loco repellite vanas ac ridiculas illorum excusationes, qui per quamdam *δυσωπία* latere se dicunt, suæque ignaviæ culpam in modestiam conjiciunt, &c.

AD GRÆCAM

INTERPRETATIONEM.

GLoriæ cupiditas magnum est ad recte agendum incitamentum; nec ullus eam contempsit, quin fuerit ignavus. Hæc ipsa tamen aliquando modum excedit, ut in Zeuxi contigisse accepimus, qui cum ad ludos Olympicos se contulisset, quo tota fe-

ta fere Græcia conveniebat, nomen suum aureis litteris pallio inscripsit, ut ab omnibus agnosceretur. Porro tam alte de se sentiebat, ut quas pinxisset tabulas, nullo pretio æstimari posse putaret; ideoque non eas quidem vendebat, sed donabat. Quod vitium in illo fuit, multi deinde sunt imitati, virtutem paucissimi.

GRATIARUM ACTIO.

MUnera quod nequeat persolvere debita vobis,
Scilicet idcirco gratia nostra latet.

EXERCITATIO XI.

De urbis commodis.

PROOEMIUM.



I mihi verba ad ignavos adolescentem facienda essent, nihil diligentius caverem, quam ne urbem, aut urbanum aliquid laudarem. Cum enim illi tunicatam libertatem vehementer ament, rustica otia, aucupia, venationes, acerbissime indignantur, quoties audiunt fori curiæque occupationes, Magistratus, Scholas, Academias, ceterasque, ut ipsi ap-
pel-

pellant, civitatis cruces celebrari. Sed cum apud eos dicam, qui discendi studio inflammati, & ad omnem urbanam elegantiam exculi, cum hominibus vivere malunt, quam cum feris, videor mihi magnam inire posse gratiam, si urbis commoda persequar, & in aliquo litterarum lumine collocem. Vestra scilicet bona vobis commendo, vestraeque fortunæ gratulor, qui in hac præclarissimarum rerum communione vivitis, ubi quæ ad scientiam, quæ ad virtutem, quæ ad felicitatem pertinent, vobis non modo abundant, sed, siquid huiusmodi redundare potest, plane redundant. In Urbe vivitis origine antiqua, mœnibus ampla, publicis privatisque ædibus splendida, solo ac cælo temperatissima, multiplici flumine irrigua, monti marique proxima, & quod in primis ex usu vestro est, omnium bonarum artium ac disciplinarum libris & magistris refertissima. Siquis alio cogitet, hunc ego omnis humanitatis expertem ad infelicissimum illud vitæ genus redire jussurum, a quo sive Oratorum opera, sive Poetarum, sive etiam Philosophorum (nam multi sibi hanc laudem sumunt) vetustissimi homines abducti sunt, & in hoc veluti corpus consociati. Illud vero mihi verendum est, ne in tam lata atque ubere dicendi segete jejunos videar; cui quidem accusationi ut prævertam, non dicam me eloquentia carere, quæ ab hac ætate postulari non potest; sed quod eloquentes

Y

ipfi

ipsi dicere solent, inopem me copia factum. Atamen, ut spero, industriam probabitis, quam ego unam præstare debeo: nam quod a natura est, vires ita sunt infirmæ, ut ne agello quidem laudando sufficiant.

S I L V A.

Multa sunt urbis commoda primum quidem ratione loci, qui solet esse saluberrimus: id enim in primis urbium conditores advertere solent. Quod si forte natura non sit hujusmodi, ignium multitudine purgatur.

Deinde ad mercimonia exercenda opportunus est; fere enim urbes ad fluminum ripas, & maritimos portus statui solent, ut omnia importari & exportari facile possint.

Demum tutus est; quia mœnibus claudi solet, & adversus hostium incursus communiri.

Sed multo plura, multoque majora sunt commoda illa, quæ ex ipsa societate & communione civium proficiuntur; quia nemo sibi unus satis est ad omnia vitæ officia.

Quo loco explicabitis commoda exercendæ religionis, dicetis de cûria, de judiciis, de reliquis magistratibus, de artificum & mercatorum collegiis, de academiis, deque iis omnibus, quæ homines hominum causa

caussa excogitarunt, ut simul vivere possent, mutuisque officiis & auxiliis fruerentur.

AD GRÆCAM INTERPRETATIONEM.

De urbis incommodis.

BEne hercule disputas, sed videris tertiam Juvenalis satyram nondum legisse. Fac, quæso, in manus sumas; & quæ ille de urbanis incommodis narrat, cum tua ista oratiuncula compone: tum vero judicium feremus. Quod si ad fallendum dicis, auditores quæras oportet, qui adhuc in silvis degant & glande vescantur. At nobis nimis quotidie in oculis sunt ingentes animi corporisque agitationes, vitia, pericula, morbi, quæ urbanam vitam comitantur, eamque infelicissimam faciunt. Magnus est curiæ splendor; at ambitione contaminatur. Utilis est judiciorum administratio; scilicet si corruptelis vacare posset. Pulchra est ordinum distributio, & hominum inter se societas; ita videlicet nisi contentionibus, calumniis, invidia, malevolentia, ceterisque urbanis pestibus corrumperetur. Mercatura commoda est; nimirum si posset carere fraudibus. Nul- lum profecto bonum nobis ostendes, quod non aliqua tabe inficiatur. Temples & religio.

ligiones non tam splendide coluntur, quam ambitiose; litterariæ Academiæ ineptis hominibus, & insulis recitationibus affluunt; ædium magnitudo ac frequentia casibus & incendiis obnoxia est; opportunitas loci vicinorum avaritiam & cupiditatem alligit; arces & mœnia bella provocant. Hæc sunt bona illa tua: nunc si mala referre incipiam, vereor ne ita te commoveam, ut ex hoc loco statim avoles, & in agrum concedas. Sed parcamus ægrotis; siquidem
 1. 1. c. 2. urbani bene multi, ut Celsò videretur, aut ægroti sunt, aut ab ægrotis parum distant.

GRATIARUM ACTIO.

Gratia cum Musis habitare Heliconia fertur,
 Urbanisque locis præposuisse juga.
 Quod si forte subit, veteres oblita recessus,
 Mœnia, num fallax occupat illa forum?
 Sedibus his gaudet, quas non sprevere Camœnæ,
 Scilicet antiqui fœderis usque memor.

EXERCITATIO XII.

Ignava adolescentia nihil est
turpius.

P R O O E M I U M.

SOphocles, Isocrates, Plato, multique præterea Græci Latini que homines, quos in litteris consenuisse acceperimus, ita sibi scribendi operam ad bene beateque vivendum necessariam existimaverunt, ut ne in summa quidem senectute, coram ipsa, ut ita dicam, incumbente ac minitante Libitina, calamo pepercerint. Nimia illa fortasse agitatio fuit, & siquidem recte judico, extra locum; quod postrema vitæ pars longo jam cursu defatigata, contentionem ferre nequeat: sed tamen cum multi viribus & ætate florentes laborem recusent, ad annos minus idoneos migrare debuit. Quod si parum intenta & operosa senectus non admodum probatur, quid de adolescentia dicendum erit otiosa & ignava? Monstrum hoc simile est ac si tellus per nivem & brumam diligenter subigatur, anni tempore incalcescente quiescat. Ac nos quidem ibi vivimus, ubi ipsa natura loci nullam ætatem esse patitur nisi occupatissimam. Ni-

hil hic deterius habetur otio ; nulla est
tam fœda lues, nulla labes, nulla pestis,
quæ possit cum ignavia comparari. Parie-
tes isti citius ruent, quam desides tegant;
quia instituta studiorum ratio perpetuo la-
bore constat, eoque intermisso, non jam
debilitatur, sed omnino dissolvitur. Faci-
le igitur mihi erit in hac exercitatione,
quemadmodum jubeor, ignavos reprehen-
dere, invisum nomen, & omni patrocini-
o destitutum : sed tamen timide facio,
veritus nimirum, ne cum aliquid ingenii
infirmirate peccavero, minus benevole ju-
dicantibus ipse quoque ignavus videar.

S I L V A.

QUæcumque de otio dicta, aut scripta
invenietis, huc omnia, iudicio &
ratione adhibita, adduci possunt. Sed ita
efferranda sunt, ut vim maximam capiant
ex comparatione adolescentiæ cum reliquis
ætatibus.

In eo præsertim operam & industriam
vestram collocabitis, ut adolescentem ali-
quem urbane describatis, qui inter nostras
hasce numquam intermissas contentiones
otari velit, & per causas quotidie novas
magistrorum curam eludere.

Orationem parænesi concludetis, ea o-
mnia commemorando, quæ pudorem i-
gnavo adolescenti afferre possint, & in
sui ipsius suarumque virium cogitationem
adducere. &c.

AD

A D G R Æ C A M INTERPRETATIONEM.

Pro Ignavia.

Ignavus tibi videor : numquid iccirco minus sapiens ? Scilicet ardelionibus insipientia est modeste agere domi suæ ; honesto otio frui ; non foro , non curiæ , non suis , non alienis molestiam exhibere . At hoc nostro vitæ genere qui delectantur , vacant invidia & inimicitiis , non capite dolent , non distillationibus laborant , felices fortunatique ævum longissimum ducunt . Et esse igitur , & dici ignavum facile patior , si Superi terrarum cælorumque domini ignavos fortunant . Apagè te cum tua ista diligentia laboris ac periculorum plena , valetudini infesta , anxia , sollicita , æmulis , invidis , inimicis obnoxia . Num pauca tibi videntur humani generis incommoda ab ipsa rerum natura profluentia , nisi sibi quisque carnifex sit , & ad interitum ruat voluntarium ? Audio gloriæ nomen jactari : quam vanum , quam inane , quam ridiculum , Dii boni ! Hoc vero vel in primis hominum levitatem ostendit , quorum multi vitam cum gloria commutant , quæ siquid est , a mortuo quidem percipi nequit . Atqui hoc , quidquid est , immortalitatem appellant , ut etiam

in summo malo sibi blandiantur. Ego ex mortalibus natus, mortalis æquo animo sum: idque unum peto, quod, nisi fallor, æquissimum est, ut mihi inter illos vivere liceat, qui & plerumque tarde moriuntur, & numquam certe se ipsi conficiunt.

GRATIARUM ACTIO.

SI bene pugnatum est, Musæ Charitesque favete,

Ut sua pro meritis præmia quisque ferat.

Si male pugnatum est, Musæ Charitesque favete,

Ut melior faciat nobile finis opus.

EXERCITATIO XIII.

Litteris deditus adolescens debet esse vigilans & operosus.

P R O O E M I U M.

NCipionem ferunt dicere solitum, se numquam minus esse otiosum, quam cum esset otiosus. Ego vero multos animadverti numquam minus esse operosos, quam cum sunt operosi. Ille enim longa consuetudine obtin-

nuerat, ut ne otium quidem otiose confumeret; isti autem languoris ac desidii pleni vel gravissima negotia socorditer agunt: Fac rursus, ne in sæculi offensio- nem incidas, Romanam curiam esse; quid gravius, Dii immortales? Hic tamen sedere videas nescio quid hominum, quibus nihil est senatorium præter togam. Accedunt vel pœnæ, vel infamiæ metu, & quidem eo tardius, quo ægrius. Ex ipso ore motuque corporis statim apparet, quanto otio ac socordia diffluant. Prima illis cura de subsellio, tum quota sit hora, & multa subinde de itinere, de scallis, de publico servo querela. Sequitur aliquid de valetudine; sed inter hæc hesternæ crapula fessis somnus obrepit: obdormiscunt, ructant, cruditates inhalant vicinis omnibus. Tandem Senatus dimittitur, surgunt semisopiti, incuriosi abeunt. Tu vero cave homines offendas. O te beatum, inquiunt, qui nostris laboribus vitam securam ducis; noli enim de privata conditione dolere; magna cruce cares; nulla est Senatori quies. Papæ, nimis exhaustum laboris est; vacationem petant, ætatemque publicis jactationibus ingravescentem domestico otio reficiant. Hæc aliquis fortasse ridebit: ego vero indignationem tenere non possum. Nullum enim turpius est otium, & homine indignius, quam quod negotii simulatione tegitur. Neque vero putetis, Auditores, litterarios ludos hoc vitio carere. Videtis, ut ignavi quidam

dam de suis laboribus querantur; lectos deferi ante lucem; æternas scholas haberi; publicas exercitationes privatis succedere; modo Latine componi, modo Græce; ne ipsam quidem mensam lectione vacare; quin etiam ludos ipsos animi causa institutos latina locutione contaminari? Operosum sane vitæ genus, si ita est; ridiculum, si adsit laboris fallendi ratio. Surgimus scilicet ut inviti solent, iterum ac sæpius urgente monitore; libros in manus sumimus, sed tam lente atque oscitanter, ut statim decident; non pluteus recte habet, non calamus, non atramentum: monitor interim abit, rursus obdormitur, donec procedente die, præclara illa ientandi hora omnes omnino excitat. Hic vero totus est homo, itur, reditur, clamatur, nihil fingi potest negotiosius. Sed jam schola, magister adest, animi cadunt; alius capite, alius ventre laborat; hic libros invenire non potuit, illi pensum ablatum est; per excusationes & fallacias tempus ducitur. Itane vero operosi sumus? Hæcine adolescentis ingenui occupatio? Honestius, opinor, Nattæ vivunt ac Nomentani, qui otium & ignaviam sine fuco profitentur. Hac de re lubet aliquanto copiosius dicere, præsertim cum illos iudices habeam, qui non modo sententia sua, sed exemplo etiam, quæ dixero, confirmabunt.

proprio de semi-
nariis suis usque
proprio alvivo-

SILVA.

EXercitatio hæc non admodum ab ea differt, quæ vobis superioribus diebus proposita est; sed illud etiam curare debetis ad dicendi copiam comparandam, ut aliquando rem eandem stilo varietis.

In vigilantia præcipue versandum vobis erit, quæ quantum ad studia conferat, Cleantis lucerna tantopere celebrata satis declarat.

Adolefcentem porro desidii somnique plenum velle irridet Persius Sat. 3. quam videbitis.

Nullum est ingenium hominis tantum, quod efficere aliquid possit, nisi viridem ætatem assiduis vigiliis exercuerit. Quis enim magis ad eloquentiam factus, quam Demosthenes; quis magis, quam Aristoteles ad philosophiam? Ille tamen, ut scribit Cicero Tusc. 4. c. 19. dolere se agebat, si quando opificum antelucana victus esset industria; hic vero ita, teste Laetio, cubare solebat, ut machina ad id comparata citissime excitatus, naturam ipsam superaret, studiumque repeteret.

Ajunt Auroram amicam esse Musarum: nempe ut significant, quæ pars dici ad studia opportunissima sit. &c.

A D G R Æ C A M

I N T E R P R E T A T I O N E M :

Fabellæ.

HOdie mane adolescentem conveni juris studiosum, & quidem pro ætate strenuum, sed somno & culcitæ ut qui maxime deditum. In lectulo de more jacebat; vixque impetrare potui, ut sub ipsum prandium zothecam aperiret; nosque salutantes admitteret. Reprehensionem paraveram, cum ille me ex vultu ipso intelligens, noli, inquit, subirasce, quasi vero otiosus decumbam. O vitam jurisconsultorum infelicem! Litem adhuc audiavi magno labore animi, necdum video, quomodo satis commodè dirimere possim. Ego vero, quid hoc, inquam, litis est adeo gravis, ut ne dormienti quidem parcat? Tum ille: nihil potes cogitare gravius. Adsunt mihi quotidie bene mane feminæ duæ acerbissime litigantes: feminam dixi, satis intelligis rixosum animal & implacabile. Altera Pigritia dicitur, altera Diligentia: hæc me somno excitat, jubetque ante lucem surgere; illa adversariam arcet, graviterque increpat; & quamdiu inter se digladiantur de somni vitiis ac virtutibus, de lecti commodis & in-

inconmodis, ego inter utramque iudex animi pendeo, nec alterutram condemnare audeo. Prandium interim advenit; Amplius pronuncio. Vide igitur quantæ me curæ vel eo tempore conficiant, cum tibi cessare videor. Ad hæc primum risi, deinde vero indignatus, non modo verbis, sed etiam verberibus, cum se defendere non posset, desidiâ tam ingeniosam castigavi.

GRATIARUM ACTIO.

GRatia conatur si vobis æqua referre, Nempe supra vires est operosa suas.

EXERCITATIO XIV.

Tardus adolescens nullus
homo est.

PROOEMIUM.



LAm multas identidem personas hoc loco sumimus, ut mirum sit, adolescentis ingenium ætate ipsa tenue atque exile tantæ varietati sufficere. Modo nos matutinæ scholæ de rebus subtilissimis disputare jubent, modo ad exotericas exercitationes vocant pomeridianæ;
nunc

nunc Græca urgent, nunc Latina; interdum stantes, interdum sedentes dicimus; alias interrogamus, alias respondemus; nemo denique nostrum unus homo est, sed veluti Proteus Virgilianus, *omnia transformat: se se in miracula rerum*. Ecce nos hodie Rhetoras, qui hesterni die partim Theologi, partim Philosophi videbamus. Satin' salvæ, Quinctiliane? Nosti discipulos olim tuos, unde toties *surgebat lutea bilis*? Nimium placuisti tute tibi, cum vappas hujusmodi exclusisses. Adsumus in veteri ludæ. Verum sic habe; nos tamquam tempestate delatos huic scopulo adhæsisse, quem nec libenter tenemus, nec certe tenebimus diu. Tu vero, Naso, curæ quondam nostræ, cui partes hodie secundas tribuimus, quo animo in scenam redis? Age porro Getas cogita: nihil tibi a nobis, ut spero, continget calamitosius. Tua quidem carmina interpretari pro dignitate non possumus, at certe non deformabimus. Quid vero si ne tua quidem dicere potes, quæ publici juris esse voluisti? Misereor prolis quondam tuæ; sed jam a te ipso emancipata per omnes puerorum scholas dudum oberrat, & vapulat. Atqui ego Manibus loquor neque curantibus talia, neque scientibus; perinde quasi ab iis, qui audiunt & iudices sedent, nihil omnino timendum sit. Equidem video, quam multa verba fieri oporteat, si omnem ingeniorum nostrorum infirmitatem aperire de more velimus, causasque

fasque illas singillatim recensere, quibus ab hac luce deterrebamur: sed nunc ita se res habet, ut cum verecundiæ fines transgressi, negotium tam grave susceperimus, jam audere naviter, totumque perficere debeamus. Ac ne initio quidem forrasse peccavimus; neque omnino verecundia dicenda est, quæ adolescentes a pulvere arceat. Tarditas & ignavia hoc nomine regitur, cum qua nos perpetuum bellum suscepimus, in quam sæpe ex hoc loco declamavimus, quam hac ipsa exercitatione conficere dicendo statuimus. Si quando labes hæc teterrima (quod in primis Superi avertant) nos quoque inficiet, animadvertite jure vestro; in ceteris rebus ætatis hujus nostræ, atque imbecillitatis rationem habete.

S I L V A.

Describite exordii loco præclaram indolem ejus adolescentis, qui expertus & ad omnia promptus est. Ex quo sequitur, quàm misera sit ejus conditio, qui in ætate suapte ingenio tam fervida vietus est ac frigidus. Alteram hanc partem explicate oratorie, & ostendite, hunc nullum hominem tota vita futurum.

I. Quia in hac prima ætate prodit se natura, & significat, cujus ingenii sit, quantum possit, quid valeat; quæ si sopita est, quando, aut quomodo excitabitur? Quod
osten-

ostendi potest a simili ; nam fere ex auro-
ra primoque diluculo totius diei ratio &
natura dignoscitur.

II. Quia cum in adolescentia spiritus ce-
lerrime agantur , is aut paucos , aut he-
betes spiritus habet , qui tarde movetur.

III. Quia hæc ætas nulla re alia com-
mendatur , quam vivido naturæ impetu ,
qui est ingenii index , unde omen in reli-
quas ætates capere solemus.

IV. Quia qui friget in adolescentia , de-
ficientibus ætatis flexu spiritibus , reliquum
est , ut stipes in senectute fiat.

V. Denique quia tarditas in aliis ætati-
bus excusari potest *specie virtutis & umbra* :
nam gravitas & prudentia videri potest .
In adolescente nullam habet excusationem.
&c.

A D G R Æ C A M

INTERPRETATIONEM.

Pro tarditate .

DUm vitas tarditatis notam , vide ne
fubeas levitatis. Proverbium est apud
Varronem , Romanos sedendo vincere ; in-
de ortum opinor , quod Fabius Max. Han-
nibalis vires juveniliter exultantis , & pu-
gnandi locum impatientissime quærentis ,
cunctando fregerit. Nullum quadrupes est
huma-

humano generi utilius quam bos, nullum item tardius. Qui nimium properat, serius absolvit. Itaque citius equi caudam depilat, qui singulos pilos digitis excerptos paullatim evellit, quam qui omnes simul, utraque manu comprehensos, uno impetu conatur educere. Ajunt canem festinantem cæcos parere catulos: quod quemadmodum se habeat, videant naturæ exploratores. Quid igitur agendum? In omni vitæ ratione difficile est terminos illos invenire, quos *ultra citraque nequit consistere relictum*. Cura ne nimium juvenis, neque nimium senex videaris, & quod Græci dicunt, *Festina lente*.

GRATIARUM ACTIO.

Gratia, quid cessas vetulæ male mobilis instar?

Et tamen æterno flore puella viges.

Gratia non grata est, quæ dat sua munera tarde:

Unum si dederis, da cito, bina dabis.



E X E R C I T A T I O X V .

Multa multis condonare oportet,

P R O O E M I U M .



Æpe mecum ipse cogitavi, quo tandem fato loci hujus exercitationes regerentur, in quibus nihil umquam auditur, nisi jurgia & accusationes, perinde quasi quidquid huc affertur, ipsa soli lue statim corrumpatur, nullamque sui partem retineat, quæ possit jure laudari. Ubi quis in hunc pulverem descendit, ubi se sistit, illico turba omnis in illum; alii solœcismum obijciunt, alii rerum ordinem castigant, alii sensa non probant; quosdam vocula offendit, nonnullos etiam litterula; huic dictio non bene sonat; ille nervos desiderat; denique modo turmatim, modo singuli miserum adolescentem aggrediuntur, verberant, conficiunt. Si legis, non recte pronuncias; si recitas, male canis; si taces, es ignavus; si dicis, nimis audax; omnia demum ad reprehensionem referuntur. Equidem non diffiteor, multa præsertim a pueris in re literaria peccari, quod nisi esset, magistris non indigerent: at nimis acerbe judicat, qui nihil putat ab illis promi, nisi errores. *Objicio, reprehendo, errasti,*

ſi, faciendum erat, hæ ſunt perpetuæ harum exercitationum formulæ. Eſt ne verſiculus, quem ferre poſſis? agedum lauda, ſi diis placet, mihiſque animos adde. Laſpus alicubi videor non tam ignavia, quam infirmitate? ne me ſtatim jugules; remitte aliquid proficere volenti. Ita videlicet in omni humana vita fieri ſolet; in qua niſi veniæ daretur locus, nulla homini cum homine poſſet eſſe ſocietas & conjunctio. Ex quo enim primi parentis labe rerum natura vitiata eſt, ſiquis perfectum aliquid ſuiſque numeris abſolutum ex omni parte requirit, is mihi ne compos quidem videtur animi. Sed hoc ipſum latius explicabo, ut cum vobis perſuaſum erit in univerſum, multa multis condonari oportere, nihilo plus a me poſtuletis, quam ab ingenio infirmiſſimo debeat.

S I L V A.

Dicetis, nihil eſſe in hac rerum univerſitate ex omni parte perfectum, ſed ea bona appellari, quæ minus mala ſunt.

Quod igitur uſuvenit in rebus ceteris, idem de homine dicendum: *Vitiis nemo* Hor. l. 1. ſec. 1. *ſine naſcitur; optimus ille eſt, qui minimis urgetur.* Ergo qui humanæ vitæ ſocietate fruitur, condonare multa debet.

Quia qui nihil condonare vult, nullos amicos habet: ſtare autem ſine amicitiiſ humana vita non poteſt.

Z 2

Quia

Quia qui est difficilis, nihilque in aliis ferre potest, infinitam sibi invidiam constat; cumque ipse vitiis non careat, vitam moreque suos multorum inimicorum judicio subicit.

Quia neque magistratus summo jure agunt, sed ex æquitate multa remittunt.

Quia Deus, cujus summa est auctoritas, & infinita potentia, tamen erga homines mitissimus est. Cur non homines erga homines ipsos? &c.

A D G R Æ C A M I N T E R P R E T A T I O N E M.

Pro Severitate.

Tanta est aliquorum in peccando temeritas & pervicacia, ut vel a mitissimis pœnas extorqueat. Nam clementia quoque ipsa suos terminos habere debet, ut virtutis nomen & rationem tueatur. Neminem puto ex omni antiquitatis memoria ad parcendum fuisse prouidius, quam Alexandrum Romanorum Imperatorem: quem unum iccirco ex omnibus nomino, quod non fatuitate aut inertia, sed ratione & consilio talis fuerit: siquidem suapte natura ad severitatem ferebatur, unde illi *Severo* nomen. Cum cognovisset, Camillum quemdam Senatorem res novas moliri, ut tyrannidem occuparet, pri-

primum quidem ad se vocato gratias egit, quod reipublicæ curam sponte susceperet; deinde in Senatu imperii partem appellavit; tum ne quid joco facere videretur, in ædes Palatinas recepit, imperiali veste ornavit, & mensæ adhibuit: donec ipse in expeditionem profectus renuentem sequi, & imperium abdicantem ad rustica otia dimisit. Hunc tamen ipsum longo post tempore Imperatoris iussu occisum historici narrant. Quid rursus peccaverit, non constat; sed certe Alexandri patientiam fatigavit. Quod cum reputo, sic statuendum existimo, quemadmodum in corporibus, ita etiam in animis morbos esse quosdam, qui sine ferro atque igni curari nequeant.

GRATIARUM ACTIO.

Multa igitur multis debent peccata remitti:

Lex pulchra est, nobis non tamen æqua satis.

Omnia, si pueris jubeat peccata remitti,

Quæ nobis placeat, non erit ulla magis.

P R O O E M I A

E T

GRATIARUM ACTIONES

ad graviorum Disciplinarum disputa-
tiones, cum publicas tum
privatas, quæ

IN SEMINARIO PATAVINO

haberi solent.



DISPUTATIO I.

Ad quamlibet Disciplinam.

PROOEMIUM.



Umquam sane intelligere potui,
quemadmodum fiat, ut cum
veterani milites quotidie ho-
stem aciemque cupiant, gre-
garii vero insolentia rerum ex-
animati ad quemlibet armorum strepitum
de fuga cogitent; in nostra tamen hac
umbratili militia tirones plus animo va-
leant, quam qui viribus usuque probati
tria-

triariorum locum tenent. Ego equidem primis adulescentiæ annis in hanc areham descendere iussus, non solum nihil cunctabar; sed tamquam ad victoriam vocatus, horas ipsas impatientissime numerabam; quæ cuilibet ex more atque instituto ad se comparandum concedi solent. Nunc seu cognitione periculi seu majore famæ cura ita locum hunc reformido; ut nihil beatius putem, quam latere, aliorumque contentiones procul a sollicitudine spectare, & ex illis proficere. Quam multa tentarim, quam multa moverim, qua arte, quibus precibus usus sim, ne huc prodirem, meque aleæ tam periculosa committerem, in præsentî non vacat exponere: illud tamen tacere non debeo, me quidquid egerim, non ignavia egisse, sed formidine quadam pugnae, quæ cum ipsa per se difficilis multarum rerum apparatus, & ingenia exercitatissima postulat, tum vero mihi & valde infirmo, & parum animoso, & ex tam longa vacatione modo redeunti plane intolerabilis videbatur. Parere tamen necesse fuit; in quo deinde ne alacritas quidem defuit, ubi præsertim cogitare cæpi, cum illis rem fore, qui judicia sua ad æquitatem referre solent, omnemque hujusmodi exercitationem ex cujusque ingenio, ex loco, ex tempore, ex aliis demum, quæ adjuncta dicuntur, humani facilesque metiri.

GRATIARUM ACTIO.

PRImus ego, Charites, posco mihi munera vestra,

Queis ornem faciles in mea vota viros.
Siqua negare placet, postrema negabit
olim.

Officiosa animæ non bene prima negant.

DISPUTATIO II.

Ad Theologiam.

P R O O E M I U M.



Quidem fore non putabam, ut qui alios ridere soleo, quotiescumque de suæ disciplinæ difficultate tam multa prædicant, ipse quoque ad hunc scopulum appellere deberem, aliisque ludo esse. Videlicet id mihi proponitur ad disputandum, *utrum futurum fuerit, ut Deus humanam naturam sibi adjungeret, si Adam non peccasset*: estne, ut nobis tamquam in facili negotio blandiamur? Si in iis cognoscendis, quæ facta sunt, tantopere alii sudare se atque algere dicunt, quid reliquum est, ut ego dicam, qui in ipsa divinæ voluntatis arcana penetrare jubeor, atque adeo voluntatem ipsam quodammodo prægredi,

gredi, quidque factum fuerit, si non fecisset quod fecit, divinare? At enim illi, qui se unos Theologos putant, & locum tam gravem numero ipso defendunt, in hac se disputatione privatim ac publice frequentissime jactant. Ego vero Theologicam hanc multitudinem laceßere nolo: sed tamen multitudo est. Utinam tam bene cum litteris ageretur, ut Theologi multi esse possent. Quotidie disputant, non quidem ut veritas tamquam ex æris lapidisque conflictu expressa refulgeat, sed ut exire volens, suoque ingenio refulgere, barbararum formularum tenebris plusquam Cimmeriis obruatur. Qui in hoc sibi persuadent positam esse differendi laudem, nihil debent reformidare. Ego qui alio spectro, ad hæc tam recondita ægerrime accedo; veritus scilicet, ne per ambages ingenii mei non solum nihil promam hæc luce dignum, sed ea ipsa, quæ plana ac lucida sunt, aliqua umbra deformem. Cavete vobis diligenter, Auditores; cavete nobis: neque quidpiam abire finatis, quod temere excidisse videatur.

GRATIARUM ACTIO.

GRates, Musa, refer, dixi; tum reddidit illa:

Non est feminei Numinis istud opus.

DIS-

D I S P U T A T I O III.

Ad Theologiam.

P R O O E M I U M.



U i gravissimas controversias au-
 dire quotidie soles, N N,
 & pro tuo jure disceptare,
 miraberis fortasse, quid nos
 tanto rerum ac verborum ap-
 paratu ludicrum certamen in-
 stituamus, quo demum confecto, nihil
 victores supra victos referant; totumque
 negotium vanis gratulationibus definiatur.
 Verumtamen si reputabis, per fictas has
 pugnas eo denique perveniri, ubi tu tan-
 toperere emines, hoc est ad veras & solidas
 recte judicandas, sollicitudini huic nostræ
 non solum veniam dabis, sed auspicia quo-
 que tamquam rei gravissimæ præbebis.
 Quamquam nihil in Theologico pulvere
 leve est, ipsæque illæ exercitationes, quas
 reliquæ facultates umbra regunt, & do-
 mesticis parietibus concludunt, si a Theo-
 logis suscipiantur, ex re ipsa dignitatem
 capiunt; & magnorum virorum præsentia
 dignæ sunt. Itaque ipse me tibi potius
 excusabo, qui neque ingenio ita valeo,
 neque viribus, neque usu, ut rei non e-
 xiguæ gravitatem coram Principe sustinere pos-
 set.

possim. Video enim, quam dedecet ineptire, ubi qui præest, dignitate & sapientia conspicuus, sua quadam luce subscilia ornat, magnamque verecundiam decentibus & audientibus offundit. Sed profecto si tum denique appellare te debeo, cum paria tibi eniti poterō, tardius id æquo, aut numquam fiet. Interim quæ possunt a me proficisci, qualiacumque sint, humaniter excipe: nam ita quidem fiet, ut ad majora confirmatus ætatem audendo prægrediar; eaque tibi offeram, quæ tuo nomine & patrocínio quadantenus digna, his vero longe meliora judicentur.

GRATIARUM ACTIO.

Audisti facilis; virtus hæc Principe digna,
Muneribus nullis allicienda venit,



DISPUTATIO IV.

Ad Historiam Ecclesiasticam.

P R O O E M I U M.



Ondum satis molestia illa deposita, quam ex Theologica exercitatione cepistis, N N, ecce vos iterum Ecclesiastica historia in hanc arenam adducit, de se suisque alumnis iudicatu-
 rum. Nempe plurimum sibi scholæ nostræ de vestra sapientia & humanitate pollicentur, quæ se vobis singulæ publice commendant, nullaque tantorum calorum ratione habita, aures vestras obrundunt. Ea quidem est studiorum nostrorum ratio, ut his diebus absoluta, aliquam sibi quærant ex publica luce commendationem: nisi tamen cum primum patientiæ vestræ periculum fecimus, tam nobiscum benevole egissetis, nemo profecto nostrum ausus esset rursus descendere, vestrumque animum, renovato certamine, perterritare. Tamen si nova hæc exercitationis species, insolitus rerum historicarum apparatus, minime usitata de antiquissimis temporibus quæstiones nonnullam habere videntur jucunditatem, quam illæ fortasse non habent egregiæ quidem ac divinæ, sed tamen valde

de protritæ Thomistarum & Scotistarum disputationes. Verumtamen de re ipsa utcumque sit, de me quidem certe nihil polliceri possum, nisi tenue atque exiguum; tum quod nemo est, qui in tanto difficillimarum rerum discrimine aude-
re debeat; tum quod ego minime omnium ad audendum factus, non modo solem ac pulverem, sed etiam umbram timere soleo. Quid igitur? Scilicet tantum mihi esse in te præsidium intelligo, Princeps Eminentissime, ut præsentia tua confirmatus animos sumam, magnoque me
sive ardore, sive impetu in certamen con-
jiciam. Tu nobis si faveas, nihil est aliud, quod laboremus; nec vero favere non potes, ubi tuos videas in magno periculo positos ope indigere.

GRATIARUM ACTIO.

Munera non possunt æqua tibi lance
rependi:
Munera non debent lance minore dari.



DIS-

DISPUTATIO V.

Ad S. Biblia Polyglotta.

PROOEMIUM.



Uo primum tempore ad hæc facrarum litterarum studia vocatus sum, fortunam incusare cœpi, quæ me in altum repente compulisset, ubi magnam vitæ partem modico fructu jactarer, nihilque mihi perdiu appareret, nisi *pontus & æther*. Exiguus quidem codex ad discendum offerebatur; at eum ajebant multis abditisque linguis descriptum esse, quas simul omnes, terribili nescio quo nomine *Polyglotta* vocabant, æternisque voluminibus exaratas ostendebant. His addebant & Biblia magna, & Criticos Sacros, & Cornelium a Lapide, & Tostatum, & Ugonem, & Sylveiram, & Lorinum, & alia multa Scriptorum nomina, qui non libros, sed bibliothecas ad nostras animulas fatigandas ediderunt. Dii boni, quæ tum me cepit desperatio! Parul gravate quidem, ut sit, sed tamen parui, quoniam ita necesse erat. Quid tum postea? Cum paulo longius processissem, facile cognovi, omnia initio ad fallendum composita fuisse; nihilque studiis nostris planius esse, si recte insti-

instituantur . Linguæ multæ sunt , sed valde sibi similes : interpretes prope infiniti , sed eadem fere recoquentes : volumina immensa , sed succus mediocris , & ex uno in aliud minima varietate decurrens : uno verbo , si methodus non desit , omnia in medio posita & expedita . Neque verò hæc dico , quod putem posse me in hac exercitatione facili negotio præstare : jam enim fateor ante tubas , non esse mihi propositum , ut contentionibus emineam , a quibus me & voluntas , & exilitas laterum , & verecundia quædam pæne rustica cogit esse alienum . Sed hæc ipsa , ut spero , imbecillitatis pudorisque confessio ab ea me culpa liberabit , qua se multi plus nimio sibi fidentes hoc in loco contaminant .

GRATIARUM ACTIO.

MUnera non refero : nimirum senore
 nullo
 Ille&i nobis munera vestra datis .



DIS.

D I S P U T A T I O VI.

Ad S. Scripturam Vulgatam.

P R O O E M I U M.



Ecce nos Vulgatæ Scripturæ Interpretes, ut nobis quidem videmur, satis industrii, ut aliis nescio quibus, desides & ignavi. Sunt enim quidam nimis obsoletarum linguarum admiratores, qui nullam diligentiam probant in sacris litteris adhibitam, nisi Græcos & Hebraicos codices complectatur: quorum opinio si quidquam habere momenti debet, videtis quodnam iudicium non dicam de Scholasticis scriptoribus, sed de ipsis Sanctis Patribus ferendum sit; qui omnes, præter Hieronymum, Hebraicis litteris caruerunt, multi vero etiam Græcis. Equidem non intelligo, qui fieri potuerit, ut Deus Optimus Maximus in medio Latio religionis sedem constitueret, nec tamen velleret ad ejus mysteria explicanda Latinas litteras esse satis. Latinus igitur erit supremus religionis Antistes atque Interpres, Latinæ ejus constitutiones, Latinæ sacrificiorum formulæ, Latinæ preces; liber vero ille, unde hæc omnia fluxerunt, per quem maxime constant, ad quem unum tamquam
ad

ad lapidem Lydium exigenda sunt, intelligi ex toto non poterit, nisi ad Græcos & Hebræos confugerimus? Siqui tantum ingenii habent atque otii, ut multarum linguarum cognitionem comparare possint, afferant per me licet ad Vulgatæ Scripturæ studium non Græca solum & Hebraica, sed etiam Arabica & Ægyptia; sed a nobis tamen nihilo plus requirant, quam quantum potest Latinus homo ad sacrorum Bibliorum interpretationem divina providentia vocatus. Nam quod de fontibus ajunt, inde puriores latices fluere, quam ex rivis, id a D. Hieronymo petiturum est, cujus ætate minus aliquanto depravati erant Hebraici Græcique codices, Latinus vero nullus designari poterat in magna Interpretum varietate, qui pro certo haberetur. Nunc universæ Ecclesiæ decreto quidquid erat in antiquis illis fontibus auctoritatis, in Vulgatam interpretationem derivatum est; ut jam nec pervicacibus Hebræis, nec levibus Græcis ad nostram institutionem indigeamus. Hæc habui, quæ hodiernæ exercitationi breviter præfarer, ut a veteri accusatione me meosque aliquando liberarem: quod superest, in judicio vestro conquiescimus, cui sane tantum tribuimus, ut, si jubeatis, a proposito susceptoque consilio statim discedere parati simus.

GRATIARUM ACTIO.

UTor jure meo, dum carmina bina re-
pendo:
Hoc alias pretio munera vestra tuli.

DISPUTATIO VII.

Ad Dialecticam

P R O O E M I U M.



Ix egressi Rhetorico ludo, nec-
dum satis, quid sit syllogismus
& Enthymema tenentes, in
hanc arenam prodire jubemur,
& Dialectici personam sustine-
re. Scimus totum hoc discrimen valde leve
videri illis, qui crassiore Minerva rerum
nomina capientes, Dialecticos parum abesse
a Grammaticis putant; quod utrique de
verbo ac nomine, eorumque recta inter se
conjunctione plurimum disputent. Neque
vero nos tam abiectos homines Gramma-
ticos judicamus, ut eorum societatem re-
formidemus; præsertim si illi ad nos ac-
cedant, quemadmodum Scioppius fecit,
cum suam illam Grammaticam Philosophi-
cam scripsit. Ne illud quidem inficiabi-
mur, utramque hanc facultatem in re le-

vi occupari, modo ipsi nobis ostendant, leve aliquid esse, animi sensa recte formare & efferre. Sed bona illorum venia dicam; siqui sunt, qui ita sentiant, vereor ne ingenium habeant ad Logicen non satis idoneum: nam vel minus apte cogitant, vel sua cogitata infeliciter exprimunt. Nos ex quo cœpimus hoc in pulvere exerceri, tantum videmus, ut nunc demum homines nos esse cognoscamus, ratione & iudicio præditos, ad cogitandum natos, & ad ea, quæ cogitamus, mutuis sermonibus inter nos conferenda. Quam misera est eorum conditio, qui nondum eo pervenerunt, ut disciplinæ hujus tam divinæ usum & utilitatem intelligant! *Ille se* (inquit Fabius libro Instit. 10. c. 1.) *profecisse sciat, cui Cicero valde placebit.* Quod ille in arte dicendi valere putabat, ego ad nostram hanc cogitandi artem exigua mutatione transferre soleo, ratus hunc esse primum adolescentis progressum ad philosophica contendentis, si Dialecticos libenter audiat. Neque enim diffiteor, ab Oratoris & Poeticis studiis ad hæc nostra venientibus omnia videri strigosa, exsucca, frigida, molestiarum plenissima. Itaque qui porro pergit, & perspicit intra corticem, ille nimirum Philosophus est, vel Philosopho proximus: qui nihilo plus capit, quam Grammaticus, vocemque omnem, cujuscumque sit scholæ, aut magistri, ex sono & strepitu judicat, is redeat ad Priscianum. Sed de aliis nimis multa: ad me

ipsum venio , de quo in primis hodiernæ exercitatione iudicium ferri debet . Equidem nihil habeo , quod pollicear , ne illam quidem , quam omnes ceteroquin hoc in loco jactare solent , voluntatem & industriam . Ipse enim mihi vehementer diffido ; & quamvis intendam vires omnes , attamen cum reputo , quam longe absum ab eo fastigio , in quo laus philosophandi sita est , non solum nihil in præsentia audeo , sed vix animum majoris ætatis expectatione sustento . Si ullo umquam tempore fiet , ut aliquid possim , hujus certe diei recordabor , quo die mearum virium periculum facere incipio , & ex vestra erga nos benevolentia omen capio .

GRATIARUM ACTIO.

Sæpe fatigantem repulit me Gratia :
 numquid
 Non satis est , inquit , munera velle
 dare ?



DI-

DISPUTATIO VIII.

Ad Metaphysicam

P R O O E M I U M.

NAm ibi fumus, ubi mures ferarum rodunt; cumque superioribus diebus videretur nobis præter modum difficile privati ludi labores sustinere ob eas rerum ambages, in quas more atque ordine hic annus incurrit, nunc in publicum discrimen vocamur, de eo responsuri, quod nondum satis, si libere omnia fateri licet, intelligimus. Videte igitur, Auditores, quantum nobis de vestra bonitate polliceamur; quæ certe nisi tanta esset, non nos solum ab hac luce abstineremus, sed illi etiam, qui modestiam hanc nostram contemnere solent, suæque ingenia Musis opponere. Grave enim est loci hujus judicium, tum natura sua, quia publica judicia omnia periculi plena sunt; tum vel maxime, quod æmulatione regitur, iique de nobis in præsens judicant, de quibus nos postmodum judicabimus. Quod tametsi non cadit in omnes, satis tamen multos complectitur; estque ejusmodi, ut infinitam cogitationem accedentibus injiciat, metuque sollicitos faciat. Verum hæc in uni-

versum , At mihi præsertim multa timenda sunt , qui si me cum ceteris conferam , vix hiscere audeam , nedum in eodem stare ordine , eadem subire certamina , & provocantibus ex æquo respondere . Attamen sua voluntati quoque debet esse laus ; quæ quidem in nobis quanta sit , vel ex eo cognosci potest , quod in hanc dimicationem venio , a qua me ceteroquin ingenii viriumque infirmitas valde deterret .

GRATIARUM ACTIO.

Nill est , cur Vobis obtrudat Gratia munus ,
 Quæ conata aliàs , non dedit æqua factis .

DISPUTATIO IX.

Ad Catechismum

P R O O E M I U M .



Adsumus homines in hujus spem Ecclesiæ crescentes , ut aliqua de Sacramentis disputemus , vestroque judicio longe gravissimo subjiciamus . Quid nobis statim , Aristotelis alumni , molesti estis ? Quid negotium exhibetis , quod res materia

teria conflatas præter fidem & modum extollamus, & ad animos purgandos per miracula nimium nobis familiaria perducamus? Comprimite vocem stultitiæ indicem: vos profanum vulgus extra sacrum estis; satis curarum habetis, si tandem aliquando statuere possitis, utrum culices ex putri, an ex ovo nascantur. Sua se quique provincia, suis finibus contineat; & quoniam nos pro nostra æquitate nihil a vobis de vestris papilionibus quærimus, vos quoque nobis hanc veniam concedite, nisi fallimur, admodum debitam, ut divina oracula sine invidia proferre possimus. Quod si minus acuto ingenio præditi videmur, non ideo tamen contemnendi sumus, tamquam ad cælestes inflatus minus idonei; quippe satis constat, supera mysteria fere semper simplicibus & ineruditis patefieri; ne scilicet humanum ingenium nimio plus sibi tribuat, & cum Diis ipsis Gigantum more pugnare velit. Accipite igitur, Auditores humanissimi, quæ nobis de Sacramentis dici posse videntur, & facite pro vestra auctoritate, ut multi nobis scholæ hujus fortunam invident.

GRATIARUM ACTIO.

GRatum carmen erit, siquod nunc Gratia pangat:
Gratius at vobis, si fileatur, erit.

DISPUTATIO X.

Ad Mathematicam

P R O O E M I U M.

Ivinandi ars a Chaldæis , a Græcis , ab Etruscis , a Romanis ipsis magnopere culta , & inter religiones habita , jam ad Circulatores in forum abiit , nec nisi fatuæ plebeculæ credulitate sustinetur . Ut autem locum illum miserum , quoquo modo potest , tueatur , maximam sui partem abdicare coacta est , auspicia , ostenta , oracula , somnia ; & in paucarum rerum maximeque fidem observatione industriam suam continere . Hinc magnum sibi nomen adscivit Astrologiæ ; quo quidem non tam seipsam nobilitavit , quam nobis Mathematicis , qui astrorum scientiam , omnemque rationem , qua oriuntur & occidunt , studio completimur , injuriam intulit . Nimirum in eo se putant commune aliquid habere scholæ nostræ ridiculi Agyræ , quod nos quoque imbres , ventos , tempestatesque prædicimus ex vario stellarum motu , præsertim vero ex Solis Lunæque accessu ac recessu : sed nos quidem necessarias cæli conversiones commutationesque considerantes ,

rantes , certa ratione ducimur , ut quædam fieri oportere dicamus , quæ nisi fiant , naturalis rerum cognatio dissolvatur necesse sit . At quid habent fidera cum thesauri inventione conjunctum , cum amicitiiis , cum civili , aut bellica gloria , quæ tibi credulo viro cerdones isti pollicentur ? Non sum nescius , prædictiones quoque nostras a quibusdam rejici , atque adeo studium omne rerum cælestium condemnari : etenim ajunt , quæ supra nos , nihil ad nos . Verum hoc nihil est aliud , quam mala malis curare . Ingenia hominum suapte natura divina , & altissimis rebus contemplandis idonea , quo nequeunt corporei sensus pertingere , non sunt ita opprimenda , ut vel ipsos infra oculos , quibus cælum spectare concessum est , deprimantur . Sibi ipsi injurius est , qui de parte sui præstantissima tam humiliter cogitat . Nos hac in re quid sentiamus , & quatenus , paucis habere ; vos pro vestra sapientia totam hanc dissertationem temperate .

GRATIARUM ACTIO.

GRatia , præterito faciebas disticha cursu,
Ut solita meritis munera lege dares.
Nunc duplica generosa modos , tetrasticha
pange ;

Ipsa etenim novitas muneris instar erit .

DIS-

DISPUTATIO XI.

Ad Moralia

P R O O E M I U M.



Uti hunc exercitationum ordinem instituerunt, numquam profecto Moralem disciplinam cum Theologica conjunxissent, si reputassent, in hæc demum tempora incidendum, quibus nihil esset utrique commune. Nam in illa quidem ingenium vel exiguum loco ipso nobilitatum satis elucet; in hac promptissimi quoque homines jacere coguntur, & tamquam in abditum detrusi delitescere. Neque enim rerum judicia ex rebus ipsis hac tempestate fieri solent; sed ex præjudicatis quibusdam opinionibus, ex fama, ex rumusculis, ex eorum denique malitia, qui se callide venditare, populumque ducere noverunt. Titi^{us} moralia tractat: ergo bonus vir, nescit litteras. Quid si ingenio magno sit? quid si Canonicos ac Theologicos libros quotidie volvat? quid si gravia quæque studia Moralibus adjungat? Moralia tractat, satis est ut despiciatur. Equidem, Auditores, cum hæc aliquando cogitarem, quovis mihi potius, quam in hanc scholam eundum putabam; ubi si vel maxime labo-

laborarem, nullus tamen perpetuo viderer. Verum cum vos audissem, vestramque hanc rerum distributionem diligenter animadvertissem, aliam vobis inesse mentem cognovi, quam quæ temere circumfertur; meque ad eam facultatem libentissime contuli, quam vos infra unam Theologiam collocandam judicatis. Utinam vero quod de nostra facultate dico, de ingeniis quoque dicere possem; tantumque nos intelligentia valeremus, quantum Moralis scientia dignitate valet. Sed & modestia quadam jubemur de nobis pauca polliceri, & revera infirmissimi sumus. Nihil est opus multis, siquidem & a prima pueritia unusquisque nostrum ex hoc loco suarum virium specimen dedit, & patientiam vestram suis nugis sæpissime exercuit. Id unum tibi dicemus, Præses Illustrissime, nos, etsi mira proferamus, nullo modo posse molestissimi temporis tædia levare: verumtamen ea cogitatio levabit, quæ tibi in mentem revocet, cujus nomen ac personam hoc loco sustineas.

GRATIARUM ACTIO.

NOs quoque bis gemino solvemus carmine grates,

Moralis Pindo non bene nota cohors.

Quid vos conatum, Vates, ridetis inanem?

Nempe pares vobis nos facit officium.

DIS.

DISPUTATIO XII.

Ad Justiniani Institutiones

P R O O E M I U M.

SI rei cujusque facilitas allicere in primis juventutem solet ad eam summo studio amplectendam, nullum est artium, aut disciplinarum genus, quod plures sui studiosos habere debeat, quam Juris Institutiones. Ita enim illæ immortali viro Jacobo Cujacio planæ & expeditæ visæ sunt, ut omnem eorum operam ac laborem valde contemserit, qui se ad eas illustrandas contulerunt. Et vero quid potest esse facilius, quam ea pertractare, quæ quotidiana consuetudine usuveniunt, quæ in dictis factisque totius vitæ versantur, de quorum singulis suæ certæque leges editæ sunt? Quod cum reputo, valde miror, quid tandem Arnaldo Vinnio in mentem venerit nodum in scirpo quærere, hoc est difficultates in re facillima comminisci. Sed hinc profecto intelligere licet, quam varia sit ingeniorum ratio, quamque diversa diversi sentiant. Equidem non diffiteor, me quoque identidem hærerere, commentaria consulere, magistri opem implorare: sed nimis ætatis infirmitate fit, ut nos ne planissima

nissima quidem via inoffenso pede ambulamus. Itaque rogo vos atque obtestor, ut quidquid in præsentî certamine peccatum fuerit, nobis tribuatis, rem vero ipsam, de qua certamus, ab omni invidiæ suspitione liberetis.

GRATIARUM ACTIO.

Quattuor usquevenit reddi nunc carmina vobis;

Sed numeri ratio non satis apta venit.
Nam si tres tantum Charitas fecere Poetæ,

Jam sine postremum Numine carmen erit.

DISPUTATIO XIII.

Ad Justiniani Institutiones

PROOEMIUM.

Non ignoro esse multos, qui valde mirentur, ecquid nobis rebus sacris ac religioni addictis, de Jure Civili disputare conveniat.

Hos ego primum moneo, ne de alienis negotiis tantopere laborent; deinde respondeo, non nos Jus Flavianum, aut Ælianum tractare, non notis ac formulis

mulis actionum impallefcere , unde nullus
 nifi litium propagandarum ufus ; fed æqui
 & iniqui discrimina quærere , easque le-
 ges explicare , quibus omnia iuftitiæ ac
 virtutis officia continentur . Numquid ira
 videmur ab instituta ratione vitæ difcede-
 re ? At etiam de mancipiis , quæ nulla
 hoc tempore funt ; de patria potestate ,
 quæ jam exolevit ; de parietibus , de lu-
 minibus , de ftillicidiis , quæ vix infimi
 fubfellii rabulæ curant , diutinas contro-
 verfias excitamus , arguimus , refpondemus .
 Si nihil habent gravius quod objiciant ,
 falva res eft . Hæc fcilicet percurrimus ,
 non tractamus ; nec vero percurreremus ,
 nifi rebus gravioribus conjuncta effent ,
 vetuftaque & exquisita eruditione redun-
 darent . Sed nimis multa dicenda effent ,
 fi omnibus fatisfacere oporteret . Nunc id
 videndum , quomodo hæc , quæcumque funt ,
 pro munere ſcholæ noſtræ didicerimus :
 in quo magis vereor , Auditores , ne nos
 potius noſtramque induſtriam , quam quæ
 profitemur , condemnetis .

GRATIARUM ACTIO.

Verba ligata modis veſtro pro mune-
 re reddit

Gratia , quæ morum temperat officia .
 Ut Vates perhibent , cæleſtia carmina
 ſi funt ,

Gratia nil melius , quod dare poſſit , habet .
 DIS.

DISPUTATIO XIV.

Ad Catechismum

PROOEMIUM.



Uⁱ cælibatus commoda non recte
 perpendit, magnum quiddam &
 beatitati simile conjugium putat.
 Hominis enim natura ita compa-
 rata est, seu potius ita vitiata, ut præsen-
 tem explere cupiditatem velit, nihil præ-
 terea sollicita de rebus ceteris. Itaque,
 non secus atque effrenes viribus & ætate
 equi, adolescentum plerique ad uxores ad-
 volant, onusque pœnitendum temere su-
 scipiunt. Inde impensæ majores, inde gra-
 vissima censui puerorum cohors, inde jurg-
 gia, inde divortia, inde infinita prope
 mala, quibus leges remedia parare cona-
 tæ sunt, sed pararunt omnino numquam.
 Illud inter cetera cautum est, ut matri-
 monia recte fierent; nam malum princi-
 pium similes fere exitus consequuntur.
 Hinc illa explosa, quæ clandestina vocan-
 tur, quibus faciles plerumque puellæ olim
 deceptæ jura legesque frustra appellabant.
 Aut igitur uxore abstinendum est, aut i-
 ta quærenda uxor, ut sine fraude doloque
 fiat. Id dum ostendo, favete humaniter,
 Auditores, non quod ego humanitatem ve-
 stram

fram ullo modo mereri possim, sed quod omnibus paratam esse pro vestra facilitate velitis.

GRATIARUM ACTIO.

Olim conatus Grates deducere Pindo,
 Numine non fausto disticha multa dedi.
 Postea tentavi, numquid tetrasticha possent;
 Sed numeros sprexit Gratia trina meos.
 Carmina jam crescant: poterunt hexasticha
 forsan
 Frangere majori ferrea corda sono.

DISPUTATIO XV.

Ad Moralia

P R O O E M I U M.



SI quis rerumstrarum ignarus
 tantum hunc apparatus aspice-
 ret; ingentia volumina, publi-
 mem exedram, exactores rigi-
 dos, magnam ornatamque are-
 nam, frequentiam, silentium, expectatio-
 nem, & quod caput est, judicem Eminen-
 tissimum, is certe gravem sibi animo cer-
 taminis spociem objiceret, agique de Mu-
 sarum aris ac focis existimaret. Ubi vero
 nos in medium vocatos audiret nescio quid
 nugarum blaterare, putaret se tamquam
 in

in Oceani littore Caligulæ mimum spectare, cum parata expeditione, machinis ballistisque dispositis, indicta denique pugna, adversus conchas exercitum duxit, in easque unas tantarum irarum immerentes impetum fecit. Ita fit, Auditores, ut nos infirmitate nostra gravissimæ exercitationis dignitatem minuamus; magnamque vel ex eo commoveamus invidiam, quod non infra scholas ceteras detrusi, tum demum prodeamus (quandoquidem prodire juvat) cum alii omnino desierint. Ac de nobis quidem, nostraque gloria, quæ revera nulla est, non admodum laboramus: verumtamen Moralem disciplinam, quam nos, quales demum cumque simus, in hanc lucem asserimus, quis pati possit tam acerbe accipi, & velut inter ipsas litterarum quisquillas amandari? Siccine morum ac vivendi magistra turpiter jacebit, aut etiam iis locum cedit disputationibus, quæ inani cogitatione verbisque futilibus circumscribuntur? Quid ita est de genere hominum male merita, ut cultores quærere precario debeat, neminemque unum inveniatur, cujus ingenio & auctoritate sustentetur? Tibi se hodierna luce commendat, Princeps Eminentissime, cujus tanti interest Moralia studia in Episcopali ditioe florere, ut ipsa ditio sine illis nulla futura sit. Interim vero habe, quid nos possimus: ac si nihil aliud, hoc tamen proba, quod iter optimum ingressi sumus.

GRATIARUM ACTIO.

SOcrates, ut scribit Plato, in disputationibus ita versari solebat, ut cuperet inferior potius, quam superior discedere; quod ratione victus, falsis opinionibus, si quas animo comprehendisset, liberaretur. Tanto hoc proposito exemplo, nihil me hercule doleo, quod me toties in hoc certamine ad absurda declinantem sapientia vestra revocaveritis; nec turpe existimo ab iis vinci, qui pro eorum commodis pugnant, qui vincuntur. Et me igitur victum a vobis fateor, & ob id ipsum ingenti beneficio obstrictum: quæ simplex atque ingenua debitionis confessio non solum ad referendam gratiam, sed etiam ad incundam aliquo modo valere debet. Nisi forte ii vobis grati videntur, qui confecta demum pugna, Musas excitant, quæ sibi epinicia canant, & abeuntes tamquam ad coronam comitentur. Nos si quas agere aut habere grates possumus, primum agimus & habemus, quod non infra dignitatem vestram putaveritis nobiscum manus conferere; deinde quod victos profligatosque in fidem tutelamque vestram acceperitis, seu potius dudum acceptos retinueritis.

DISPUTATIO XVI.

Ad S. Scripturam

PROOEMIUM.



Publicæ disputationes ad veritatem detegendam primum inventæ, nescio qua Dialecticæ artis depravatione superioribus annis degenerarunt, & a rerum dignitate ad verborum pugnas & contentiones adductæ sunt. Cum enim olim, qui tamquam studiorum exactores advocabantur, plures subinde difficultates proponebant, nullaque verecundia impedirentur, quin una soluta, ad aliam transirent, gravissimum fiebat ingeniorum experimentum; totique coronæ, absoluto certamine, apparebat, non quanta subtilitate ac volubilitate verborum esset, qui responderet, sed quanta ejus scientiæ intelligentia, de qua sibi respondendum proposuisset. Verum posteritatis ambitione factum est, ut non videatur ex dignitate ejus qui interrogat, a prima difficultate discedere; & inanibus verbis ac sophismatis rem ducere præstet, quam alio confugere, & novo argumento adversarium tentare. Sed concedamus hoc illis in Dialecticis, in quibus nihil fere nisi acuminis gloriola

quæritur: dominantur ibi monstra illa per-
terrefaciendis adolescentibus inventa, *Ba-
valipto, Fapesmo, Frisefomorum*: esto in eo
campo victor ac triumphator, qui quod
semel proposuit, ad finem usque velitan-
do sustinuit; & multiplici verborum con-
formatione idem dicere sexagies potuit.
Aliud quiddam nobis in S. Scripturæ stu-
dio institutum est; totaque hujusmodi e-
xercitatio in eo consistit, ut ejus sen-
sa quam optime & quam planissime expli-
centur, multisque similibus allatis confir-
mentur. Ceterum nihil laboramus, utrum
argumenta dialectico artificio contorta sint;
utrum loco uno nostra cum sententia con-
ciliato, alius omnino novus & a primo di-
versus asseratur; utrum difficultates diffi-
cultatibus colligatæ sint, & alteram alte-
ra tamquam filia parentem excipiat. U-
num illud fatemur deesse nobis, quod ab
ingenio proficiscitur; quod quidem si rei
propositæ responderet, nimium beati nobis
videremur, nec tot laboribus ac vigiliis
florētissimam ætatem frangeremus. Quod
si in hac virium infirmitate plus justo au-
dere videmur, reputate, non nos quidem
de nobis judicare, sed ejus parere judicio,
qui rerum nostrarum arbiter divino consi-
lio constitutus, non studia modo univer-
sa, sed singulorum contentiones pro sua
prudētia & auctoritate moderatur.

GRATIARUM ACTIO.

TRia sunt, quæ beneficium ornant & amplificanc, is qui dat, id quod datur, & is qui accipit; quæ singula magnam mihi injiciunt agendarum gratiarum difficultatem. Nam, ut ab ultimo incipiam, is ego sum, in quo nulla erat promerendi causa; id vero accepi, quo uno ad famam & exultationem nihil est majus, hoc est præstantissimorum virorum præsentiam, &, nisi me amor fallit, favorem quoque. Verumtamen qui beneficium contulere, non valde me sollicitum habent; quippe etsi plurimum mercantur, nihil tamen solent pro sua benignitate postulare. Juvât ergo a vobis beneficium accipere, Viri ornatissimi, qui præter debitionis professionem nihil insuper requiritis. Hoc vobis gloriosum est, tantoque gloriosius, quanto pauciores sunt, qui gratis hoc tempore benefaciant. De te vero tibi quid dicam, Præsul Illustrissime, cujus præsentia & judicio tantopere lætantur Musæ nostræ? Unum illud verissime dicam, quod multarum laudum instar erit, effecisse te sapientia & humanitate, ut ille ipse rebus nostris adesse videretur Princeps Eminentissimus, qui unice optari potest ac debet.

D I S P U T A T I O XVII.

Ad Philosophiam

P R O O E M I U M.

Uti de valetudine scribunt, ii fere studiorum ac litterarum oſores, nos tamquam male ſanos accuſant, quod diebus ferventiſſimis non ſolum non ceſſemus, ſed etiam operam laboremque intendamus. Videlicet non intelligunt, noſtras has exercitationes adeo nihil incommodi habere, nihilque moleſtiæ, ut & a Latinis ludi, & a Græcis *χολαι*, hoc eſt otia, ſint appellatæ. Quod enim incommodum eſſe poteſt in teſto concluſoque loco, & ad ſolem ar-cendum præclare comparato cum lectiſſimis viris ſedere, de rebus pulcherrimis conferre ſermônes, ingenioſas diſputationes audire, modo Poetæ optimi, modo Oratoris, modo Philoſophi cogitata percipere, ſine ulla denique aut certe ſine magna corporis contentione inſitum a natura diſcendi deſiderium ſuaviſſime ex-ple-re? Numquid, ni ita eſſet, tam multa ingenia, tamque præclara minimam quam-que invitationem acciperent, tanto ſilento ac favore aſſent, ne ipſum quidem interrogandi monendique officium recuſarent?

rent? Vobis enimvero injuriam faciunt, nobilissimi Auditores, qui nostrum hoc consilium damnant talibus suffragiis probatum: nisi quod qui ita loquuntur, sibi ipsis potius injurii sunt, quod ostendant, non modo se litteratos non esse, sed omnino quæ sit litterarum ratio ac natura, qui locus ac tempus, ignorare. Quamquam mihi quidem nihil aliud quærendum est, quam quid jubeat Princeps Eminentissimus, cujus auspicio studia nostra reguntur: neque enim aut ille jubere potest, nisi opportuna, aut nos incommodum reputare debemus, quod ipse nobiscum patientia tam insigni suscipiat. Illud unum hodierna exercitatione molestum fore video, quod ab hac ingenio mei infirmitate manabit: sed tamen siquam vim ac significationem habet, quod vulgo fertur, nihil ita esse in provincia philosophica monstruosum, ut omni prorsus auctore careat, videor mihi in campo tam lato posse aliquid, si minus probandum, at certe ferendum.

GRATIARUM ACTIO.

SI ego nunc vestris ornatus beneficiis gratias agere velim, hæc ipsa beneficia non satis cognoscere videar; aut mihi plus assumere, quam vel ætas, vel ingenium, vel exiguus hic dicendi usus pati possit. Silere autem me neque loci consuetudo finit, neque mehercule si fineret,

Bb 4 ipse

ipse mihi tantæ debitionis conscius quiescere possem, & sine ullâ mei in vos studii atque observantiæ significatione discedere. Ergo quam benevolentiam in ipso certamine adhibuistis, sola voluntate nisque contenti, eam nunc quoque suscipientes, fatis habete, me omnem prorsus gratiæ referendæ rationem persequi, quamvis pro mearum virium infirmitate nullam assequar. Id ego te in primis oro atque obsecro, Princeps Eminentissime, cujus beneficia cum plurimi faciam, doleo vel maxime nullam mihi esse facultatem, qua tibi voluntatem hanc meam aut privatim probare possim, aut in hac publica luce patefacere. Fruere virtute tua, quæ ipsa per se magno viro debet esse fatis: ego enim, quod unum valco, tam excellentis ornamenta animi perpetua cogitatione complectar, officio colam, prædicatione amplificabo.

DISPUTATIO XVIII.

Ad quamlibet disciplinam

PROOEMIUM.



Quando nova potuit publicæ exercitationis species in palæstram literariam afferri, nunc certe necesse est; tum quia veteres nimio vulgaræ usu, & interdum etiam dolo foedatæ pri-

tæ pristinam dignitatem aliquo modo amiserunt , tum quia tanta est eorum hominum copia , qui sui periculum in hac luce facere cupiunt , ut nisi plures uno die producantur , quotidie civitatem commovere oporteat , & a ceteris occupationibus abducere . Ergo dimicationem illam , in qua unus versari solebat , duce aliquo ejus ingenium vocemque regente , nunc tres subimus , sed partem singuli suam , lateribus plane nudis , sine Magistri præsidio , ac sine illa confidentia opis , quæ alios munire consuevit , & adversus tela omnia , undecumque mitterentur , confirmare . Neque vero tantum audemus , ut credamus posse nos viris præstantissimis cum laude resistere ; verumtamen hac ratione declarandum publice fuit , nihil minus propositum fuisse nobis , quam ut nova hac disputandi forma difficultatem & periculum defugeremus . Nunc vero quis ita in nos iniquo animo erit , ut cum videat in hac acie adolescentem nulla re nixum , nisi suo qualicumque ingenio , non faveat humaniter , modicisque contentus bona cum gratia dimittat ? Id quidem ab omnibus , sed a te in primis speramus , Princeps Eminentissime , qui ut nos viresque nostras perquam exiguas optime nosti , ita aliud nihil postulas , nisi ut satis animorum sit ad res difficillimas suscipiendas .

GRA.

GRATIARUM ACTIO.

SI, quod Aristoteles ait in secundo Rhetoricorum libro, verecundum est sapius beneficium ab eodem accipere, quanta nos obrui verecundia debemus, qui vos tam sæpe legis nostris obtundimus, & rerum minimarum iudices constituimus? Enimvero si perturbatio hæc, quam etiam virtutem nonnulli putarunt, laudabilis in juvene est, habemus abunde, de quo nobis ipsi gratulemur: sin autem ne ipsa quidem, quod ex vitio oriatur, culpa caret, videtis quo loco simus. Sed nimis hæc philosophice; valeat Aristoteles; potiusque nos officiorum magistro Ciceroni tradamus, qui animi ingenui putat, *cui multum debeas, ei plurimum velle debere*. Quo plura in nos confertis, eo plura expectamus: nimirum quod ipsi vos beneficia vestra ornare debeatis, nec aliter ornari possint, quam si novis beneficiis cumulentur. Hoc vero tu ne monendus quidem es, Princeps Eminentissime, nisi quod, ut Ovidianis versiculis utar,

Trist.
5. cl.
14.

Qui monet ut facias, quod jam facis, ille monendo

Laudat, & hortatu comprobat acta suo.

DISPUTATIO XIX.

Ad quamlibet Disciplinam

PROOEMIUM.



Mnes fere, qui in arenam descendunt, adolescentes; suarum virium periculum publice facuri, carmen illud obsoletissimum præfari solent, magno se timore percelli, nec ultro accedere, nec satis pro negotii gravitate paratos. Quæ omnia quamvis ex usu dicant, non quod ita sentiant, attamen reipsa sæpe probant, vera esse, quæ dixerint; & in magnam invidiam magistros adducunt, quod Icaris istis alas adjecerint; eosque nondum satis firme repentes volare coegerint, ut, multis impune ridentibus, deciderent. Itaque ego non diffitebor, periculum hoc quantumcumque est, quod sentio quam sit grave, hoc, inquam, periculum totum me suscepisse sponte mea, alacriter, promte, animose suscepisse: quod non credo tamen ab ullo reprehendi posse, nisi ab eo, qui putet, ætatem hanc laudis stimulo carere oportere, tamdiuque in umbra delitescere, donec annis extrusa, quemadmodum Porcio Latroni contigisse ferunt, solis novitate hallucinetur. Aio etiam, me tantum
mihi

Quin-
til. l.
10. c. 5.

mihi præcepisse temporis, quantum ad rem difficillimam comparandam satis esse duxi; nihilque omisisse diligentiae, nihil laboris, aut studii, quod publica experimenti ratio postulare videretur: quod non ita a vobis accipi debet, ut mihi egregium aliquid præstandum sit, cum de industria polliceri possim, de ingenio non possim. Fere autem contingit, ut in hujusmodi certaminibus plus multo natura valeat, quam diligentia; quia plerique non tam sæpe animadvertunt, quid dicatur, quam quo spiritu ac voce dicatur. Verum quemcumque tandem exitum habitura res sit, ea me primum cogitatione consolabor, quod mihi ipse non defuerim; deinde quod eorum me iudicio commiserim, qui res æstimare prudentissime solent. Noli, Princeps Eminentissime, tantam hanc adolescentis fiduciam condemnare: nam cum mihi potissimum ob ea, quæ dixi, necessaria est, tum omnibus nostris turpe existimo, quippiam timere, te patrono. Hac ego fretus publicum disputandi periculum subeo, non valde reputans, quibus viribus, quove ingenio, sed tantum quibus auspiciis subeam.

GRATIARUM ACTIO.

SI quam magno cœpi animo, tam etiam magno persequi cœpta potuissem, iam non ego vobis gratias agerem, sed

vos mihi potius pro vestro in bonas artes ac litteras studio aliquam gratiam habere-
tis. Non enim dubito, quin libenter au-
diatis quidquid in hac urbe vestra ad ju-
ventutis eruditionem institutum est, quo-
ties judicetis, non fucum vobis fieri, non
scruta venditari, non picas produci. At
cum in ipsa acie multo mihi majus peri-
culum fuerit, quam procul aspicienti an-
te tubas appareret, sentio me vobis in-
genti beneficio obstrictum, quod leviter
blaterantem in re gravissima æquo animo
tuleritis, nec silentium modo, sed favo-
rem quoque ore nutuque vestro præbueri-
tis. Scilicet hæc summa nostri hujus cæ-
li ac soli felicitas est, ubi homines ad
humanitatem facti, litterarias omnes ex-
ercitationes boni consulunt, nihil ab ullo
requirentes, præter conatum & volunta-
tem; ut non solum in primis subselliis,
sed etiam in secundis, ac tertiis, qui or-
do est rerum omnium, aliqui sedent.
Tibi vero, Princeps Eminentissime, si me
excusem, profecto videar imponere vo-
luisse, quasi vero non tuos noris; mini-
meque scias, quantum quisque nostrum in
iis disciplinis, ad quas tuo se iudicio con-
tulit, præstare possit.

DIS.

D I S P U T A T I O XX.

Ad quamlibet Disciplinam

P R O O E M I U M.

Iquod est ab ingenua timoris professione præsidium, id certe nobis debet esse paratum, qui hac in re omnino fingere nequimus, callidoque verborum artificio animi securitatem obtegere. Nihil de schola dico, quæ, utcumque malevoli criminentur, certe postrema non est: at nos qui sumus, bone Deus, ut cum lucem hanc aspiciamus, non valde timeamus? Putatisne fieri posse, ut tantæ infirmitatis adolescens in hoc ingenii sui iudicio cristas tollat, fidenciam ostentet, sibi blandiatur? Attamen personam hanc ipsi nobis imponunt principum scholarum procures, qui præteritis diebus ex hoc loco disputantes cum se in omnem timoris humilitatem abjecerint, aut abiectos significaverint, illud est reliquum ut nos tenuissimi homines audere incipiamus, & in locum ab illis desertum commigremus. Adsumus igitur animorum fiduciaque pleni: abeant veteres illæ querelæ de nimia gravitate loci, de rerum difficultate, de iudicum supercilio; nihil de temporis

poris angustia doleamus, nihil de virium tenuitate; nulla sit ne minima quidem timoris significatio; fileatur indecorum illud atque humile verbum. Viri sumus. Vos facite, Auditores, pro vestra humanitate, ut alii, qui deinceps accedent, exemplo nostro spiritus sumant, majorique alacritate mandata vestra capeffant.

GRATIARUM ACTIO.

Ultimus hic labor est: quin munera, Gratia, fundis?

Ut laudetur opus, si pote, claude bene. Tum Dea trina mihi: quid numina nostra fatigas?

O bone, verborum, desine, munus erit.

F I N I S.

I N D E X

Eorum , quæ hoc volumine
continentur .

A <i>D Grammaticam Oratio I.</i>	pag. 1
<i>Ad Humanitatem Oratio II.</i>	23
<i>Ad Rhetoricam Oratio III.</i>	41
<i>Ad Philosophiam Oratio IV.</i>	61
<i>Ad Theologiam Oratio V.</i>	84
<i>Ad S. Scripturam Oratio VI.</i>	104
<i>Ad Jurisprudentiam Oratio VII.</i>	125
<i>Ad Historiam Oratio VIII.</i>	145
<i>Ad Ethica Oratio IX.</i>	165
<i>Ad Mathematicam Oratio X.</i>	188
<i>In funere Georgii Card. Cornelii Episcopi Patavini Oratio XI.</i>	209
<i>Commentariolum de Lingua Latina.</i>	227
<i>Vita Philippi a Turre Episc. Adriensis.</i>	253
<i>Epistola ad C. V. Joannem Fabricium.</i>	261
<i>Epistola I. ad N *** de voce Nepos.</i>	263
<i>Epistola II. ad N *** de vocibus Artopta, Loco, & Nota.</i>	270
<i>Litteraræ Exercitationes XV. vulgo Academia.</i>	283
<i>Proœmia & Gratiarum Actiones XX. ad publicas privatasque disputationes.</i>	356









